

कलिकालसव्वणुसिरिहेमचंद्रसूरीसर-पणीअ-
तिसट्टिसलागापुरिसचरियस्स पढमपव्वस्स
रुवंतरं

सिरिउसहणाहचरियं

निम्माया
आयरियविजयकत्थूरसूरी

संपायगो
उवज्झाय चंद्रोदय विजयगणी

प्रकाशक
श्री नेमि विज्ञान कस्तूरसूरी ज्ञानमंदिर, सुरत.

: મુખ પૃષ્ઠના પરિચય :

ભગવાનૃશી ઋષભદેવ સ્વામિના તેર ભવોની
હારની ગુંથણી કરી પ્રતીકો આપી મૂક્યા છે.

મધ્યમાં સમવસરાણમાં બીરાજમાન

ભાવ જિનેશ્વર ભગવાંતને

બારે પર્ષદાને ચતુર્મુખ

દેશના આપી રહ્યા છે.

જ્યારે

શ્રી-મહાદેવી માતા ચક્રી ભરતની સાથે ગજઅંબાડીએ

બેસી પુત્ર—ઋષભદેવ જિનેશ્વરના દર્શને જતાં

એકત્વ ભાવના ભાવતાં કેવલ જ્ઞાન પામ્યાનું

ભવ્ય દૃશ્ય છે.

ભવ સ્થાન

- ૧ શ્રીધનસાર્થ વાહ
- ૨ ઉત્તર કુરુમાં—યુગલિક
- ૩ સૌધર્મ દેવલોકમાં—દેવ
- ૪ મહાવિદેહમાં—મહાબલ નરેન્દ્ર
- ૫ ઈશાન દેવલોકમાં—લલિતાંગ દેવ
- ૬ પૂર્વ મહાવિદેહમાં—વજ્રજંઘ
- ૭ ઉત્તરકુરુમાં—યુગલિક
- ૮ સૌધર્મ દેવલોકમાં—દેવ
- ૯ મહાવિદેહમાં—વૈદ્યપુત્ર—જીવાણુંદ
- ૧૦ અચ્યુત દેવલોકમાં—દેવ
- ૧૧ પૂર્વ મહાવિદેહમાં—વજ્રનાભ ચક્રવર્તી
- ૧૨ સર્વાર્થ સિદ્ધ વિમાનમાં—દેવ
- ૧૩ ભગવાન શ્રી આદિનાથ

कलिकालसंववण्णुसिरिहेमचंद्रसूरीसर-पणीअ-
तिसट्टिखल्लागापुरिसचरियस्स पदमपव्वस्स

रुवंतरं

सिरिउसहणाहचरियं

निम्माणा
भावरिद्धविषयजकरयूरसूरी

संपादकी
उपज्झाष चंद्रोदय विजयगणी

प्रकाशक
भी नेमि विज्ञान कस्तूरसूरि ज्ञानमंदिर, सुरत.

विक्रमाब्द २०२५]

प्रथमावृत्ति :
वीर सं. २४९५

[इ. सं. १९६८

પ્રાપ્તિસ્થાન :
શ્રીનેમિવિજ્ઞાન કસ્તૂરસૂરિ જ્ઞાનમંદિર,
ગોપીપુરા મેઈનરોડ,
સુરત.

પ્રાપ્તિસ્થાન :
જસવંતલાલ ગિરધરલાલ શાહ,
ટે. ૩૦૯/૪ જૈનપ્રકાશન મંદિર,
હોશીવાડાની પોલ, અહમદાબાદ.

પ્રાપ્તિસ્થાન :
શ્રી સરસ્વતી પુસ્તક મંદિર,
સાગરપોલ, દાદીજીના, અહમદાબાદ.

સર્વજ્ઞભાષીકૃતેષુ પ્રકાશકેન
રાજતમ્રવાહકાવેશાનુસારેણ ।

મુદ્રક ૫-૦

પ્રકાશક :
શ્રી નેમિવિજ્ઞાન કસ્તૂરસૂરિ જ્ઞાનમંદિર
સંઘવી શાંતિમાઈ ચીમનલાલ
ગોપીપુરા, કાચસ્ય મહોલા, સુરત.


મુદ્રક :
શ્રી. સી. શાહ,
માશા પ્રિન્ટર્સ,
મુંબઈ.

समयज्ञ-शान्तमूर्ति वात्सल्यवारिधि आचार्यदेव

दीक्षा सं. १९६२ कार्तिक वद ३ वलाद.

गणपद १९७३ चानेराव.

जन्म सं. १९४७ पाटण.



पन्थासपद सं. १९७३ चानेराव. उपाध्याय पद सं. १९८७ कार्तिक वद ३ अमदावाद.

आचार्य पद सं. १९९१ ज्येष्ठ शु. १२ महुवा.

श्रीमान् विजयविज्ञानसूरीश्वरजी महाराज

स्वर्गवास सं. २०२२ चैत्र सुद १० गुरु खंभात.

गुरूणं गुणसंभरणा

सरिमतिथयरसिरिवदमाणजिणवरवइविज्जमाण-सासणस्स पभावगाणं

तवागच्छाहिवइ - विउसवरविणमियपायपंकय - अखंडवम्ह-

तेयविराइयमुत्ति-कयंबगिरिपमुहाणेगतिथोद्वारग-

भट्टारगायरियाणं पगुरुभगवंताणं

सिरिविजयनेमिसूरीसराणं

तह य तास पट्टालंकार-समयण्णु-पसंतमुत्ति-वच्छल्लवारिहि-

सच्चरणसीलसालीणं गुरुदेवायायरिय-

सिरिविजयविन्नाणसूरिवराणं

असीममहुवगारं हिययम्मि

सविणयं सएव

संभरमाणो.

विजयकथूरसूरी

[सिरिउसहणाहचरिए]

सिद्धान्तमहोदधि प्राकृतविशारद आचार्यदेव

जन्म सं. १९५७ पौष वद १ अमदावाद. दीक्षा सं. १९७६ फागण वद ३ मेवाड.

प्रवर्तकपद सं. १९९१ फागण वद २ कंदेवगिरि



उपाध्यायपद सं. १९९७ भागसर सुद ३ सुरत.

गणिपद सं. १९९४ कार्तिक वद १० जामनगर. पन्थासपद सं. १९९४ भागसर सुद २ जामनगर.

श्रीमान् विजयकस्तूरसूरीश्वरजी महाराज

आचार्यपद सं. २००१ फागण वद ४ वुरानपुर.

પ્રકાશકીય

જૈનગ્રંથકારો પૈકી કલિકાલ સર્વજ્ઞ શ્રીહિમચંદ્રસૂરીશ્વરજી મહારાજે વિવિધ વિષયના ગ્રંથો રચ્યા છે. એમાનાં એકનું—નામ ત્રિપણિ શલાકા પુરુષ ચરિત્ર છે. આ સંસ્કૃત મહાકાવ્ય-૧૦-પર્વમાં વિભક્ત છે એના પ્રથમ પર્વમાં મુખ્યત્વે કૌશલિક-શ્રીઋષભદેવ ભગવંતનું વિસ્તૃત ચરિત્ર છે.

એનું પ્રાકૃત રૂપાન્તર પરમપૂજ્ય પ્રાકૃતવિશારદઆચાર્ય મહારાજ શ્રીવિજય કસ્તૂરસૂરીશ્વરજી મહારાજશ્રીએ કર્યું છે.

આ પુસ્તકનું પ્રકાશન કરતાં અમો અતિ આનંદ અનુભવીએ છીએ એના ખાસ કરીને બે કારણો છે. એક તો આ ઉસહનાહચરિય દ્વારા ત્રિપણિ શલાકા પુરુષચરિત્રનું પ્રથમ પર્વ ચિત્ર-કાલીન બને છે.

બીજું આજકાલ પ્રાકૃતમાં કૃતિઓ રચનારાઓની સંખ્યા અતિવિરલ છે. એટલે આ પ્રાકૃત રૂપાન્તરથી પ્રાકૃત-સાહિત્યમાં વૃદ્ધિ થાય છે.

પ્રસ્તુત ગ્રંથકાર શાસન સમ્રાટ અનેક તીર્થોદ્ધારક-આબાલ બ્રહ્મચારિ પરમકૃપાળુ આચાર્ય મહારાજ શ્રીવિજયનેમિસૂરીશ્વરજી મહારાજ સાહેબના પટ્ટધર-પરમપૂજ્ય સમયજ્ઞ શાન્તમૂર્તિ આચાર્ય મહારાજ શ્રીવિજય વિજ્ઞાનસૂરીશ્વરજી મહારાજના પટ્ટધર શિષ્ય થાય છે.

જગવિખ્યાત શાસન સમ્રાટશ્રીની તથા તેઓશ્રીના વિદ્વાન સૂરિ શિષ્ય પ્રશિષ્યોની સર્વતો-મુખી સાહિત્ય સેવા પ્રશંસાપાત્ર બની છે.

તે પૈકી આ ઉસહનાહચરિયના રચયિતા આચાર્યશ્રીજીની પણ શ્રુતોપાસના-સાહિત્યસેવા આદર પાત્ર બની છે. તેઓશ્રીરચિત-અનુવાદિત સંકલિત-સંગૃહીત તેમ-સંપાદિત-સાહિત્ય-રાશિ કેટલોક પ્રકાશિત થયો છે. જ્યારે અપ્રકાશિત-પણ બહુ સંખ્યક રહ્યો છે.

જીવનભર ગુરુકુલવાસમાં રહી અજબ ગજબના રતનત્રયીના સાધનાના વાતાવરણમાં જ્ઞાન-યોગના પરિપાકના પરિણામે તેઓશ્રીએ પોતાના શિષ્ય સમૂહને પણ તે માર્ગે દોરી શ્રુતોપા-સનાના સાધક બનાવી શાસનને સમર્પિત કર્યો છે અને કરે છે.

વાત્સલ્યવારિધિ પૂર્ણ ગુરુદેવ શ્રીમાન્ વિજયવિજ્ઞાનસૂરીશ્વરજી મહારાજ શ્રીજીની ત્રિપણિના પ્રાકૃતમાં રૂપાન્તર કરવાની પ્રેરણા પૂજ્ય વિજય કસ્તૂરસૂરિજી મહારાજને મળતાં વિ. સં. ૨૦૧૫ ના મુંબઈ પાંચધુની શ્રીનમિનાથજી ઉપાશ્રયના આતુર્માસ પ્રસંગે મંગલ પ્રારંભ થયો અને વિ. સં. ૨૦૧૬ ના શ્રીગોડીજી ઉપાશ્રયના આતુર્માસમાં પ્રથમપર્વના પ્રાકૃતરૂપાન્તરની પૂર્ણાહુતિ થઈ છે.

પૂજ્યશ્રીની મુખ્યમાં-માટુંગા-કોટ-પાયધુની શ્રીનમિનાથજી તથા શ્રીગોડીજી ઉપાશ્રયના પાંચ આતુર્માંસની સ્થિરતા દરમ્યાન અનેક વિધ થયેલ શાસનપ્રભાવનાના ચિરસ્મરણીય અનુમોદનીય થયેલ કાર્યોની પરંપરાને અદ્યાપિ આરાધક જીવો યાદ કરી અનુમોદના કરી રહ્યા છે.

માટુંગામાં થયેલ લવ્યઅંજનશલાકા પ્રતિષ્ઠા મહામહોત્સવ, પાયધુની શ્રી ગોડીજી તથા શ્રીનમિનાથજી દેરાસરે તથા કોટ, પ્રાર્થના સમાજ કુર્લા તેમ માટુંગા (સહસ્રશૃંગપાર્શ્વનાથજી જીનાલયમાં) વિગેરેમાં થયેલ અભૂતપૂર્વ જિનજિમ્મ તથા ધ્વજદંડ, શાસન અધિષ્ઠાયક દેવ દેવી-ઓના પ્રતિષ્ઠા મહોત્સવો તેમ સંખ્યાબંધ જિનેન્દ્ર લક્ષિત નિમિત્તે અઠ્ઠાઈ મહોત્સવો અષ્ટોતરીસ્નાત્રો, શાંતિસ્નાત્રો, શ્રી સિદ્ધચક્ર બહત પૂજનો વિગેરે સમ્યગ્દર્શનની સ્થિરતા દઢતા-નિર્મળતા કરનારા બન્યા હતા.

સમ્યગ્ જ્ઞાનયોગની સાધનાના આલંબનભૂત શ્રીઉપધાન તપની આરાધનાઓ, શ્રીભગવતીજીસૂત્રના વાંચન પ્રારંભ મહોત્સવો, પ્રસ્તુત ઉસહનાહચરિયનું લેખનકાર્ય તેમ પૂજ્ય આચાર્ય મહારાજ શ્રીની નિશ્રામાં થયેલ મુનિ સમુહની આગમવાચના-તેમ તે વાચનાની યોગ્યતા પ્રાપ્ત કરવા મુનિસમુહની યોગોદ્દહનની સુંદર આરાધના યાદ આવતાં આનંદ અર્પે છે.

સમ્યક્ ચારિત્ર અને તપોધર્મની સાધના એ તો પાંચવર્ષની મુખ્યની સ્થિરતામાં આરાધક જીવોના હૈયે ચિરસ્થાયી બની છે. પૂજ્ય આચાર્યદેવશ્રીના-બાલ-યુનાવ-પ્રૌઢ અને વૃદ્ધ મુનિઓની જ્ઞાનધ્યાન પૂર્વકની ઘોર તપશ્ચર્યાઓ તેમ ચારિત્રનિષ્ઠ મુનિઓના ગણિ પંન્યાસ-તથા ઉપાધ્યાય પ્રદપ્રદાન જેવા શાસનમાન્ય પદપ્રદાન મહોત્સવો થવા સાથે ૨૦ થી ૨૫-ની સંખ્યામાં બાલ-યુવાન તેમ પ્રૌઢ મુમુક્ષુ જીવોને ભાગવતી પ્રમજ્યા પ્રદાન તથા ઉપસ્થાપના આદિના ચારિત્રધર્મની પ્રભાવના કરતાં પ્રસંગો લોકહૈયે જડાઈ રહ્યા છે.

શ્રીચતુર્વિધ સંઘમાં પણ અભૂતપૂર્વ બનેલ શ્રી શંખેશ્વર પાર્શ્વનાથજી ભગવંતની વિધિ-પુસ્તકરની ૧૨૦૦-ની સંખ્યામાં આરાધકોની લવ્યતમ અકૂમતપની આરાધના તેમ શ્રી સ્થંભન પાર્શ્વનાથ, અભિગ્રહ તેમ સિદ્ધગિરિરાજ અકૂમ તથા શ્રી ગૌતમસ્વામિજીના છઠ્ઠું તપની હજારો તેમ સેંકડોની સંખ્યામાં થયેલ આરાધના આજે પણ તે સાધકો યાદ કરી રહ્યા છે.

પ્રસ્તુત ગ્રંથકારશ્રીના ગ્રંથારંભથી લઈ ગ્રંથપૂર્ણાહુતિના લગભગ આર માસના સમય દરમ્યાન સામુદાયિક એક કોડ નવકાર મહામંત્રના જપની આયંબીલના તપ કરવા પૂર્વકની સાધનાઓ ગ્રંથકાર પૂજ્યશ્રીને દ્વિગુણ ઉત્સાહિત કર્યા છે.

ચતુર્વિધ શ્રીસંઘમાં થયેલ આમ રતનત્રયીની આરાધનાની ઉજવણીરૂપ લવ્ય ઉદ્ઘાપન મહોત્સવો પણ અનુમોદનાના પાત્ર બન્યા છે.

ઉપરોક્ત પ્રવૃત્તિ સાથે સાધાર્મિક લક્ષિત અંગે વ્યક્તિગત તેમ સામુહિક પ્રેરણાના પરિણામે હજારોની રકમોનો સફળવ્યય તો અદ્યાપિ પ્રચ્છન્ન જેવો રહ્યો છે.

આવા ઉત્સાહ ભર્યા વાતાવરણમાં પૂ. પંન્યાસજી શ્રી ચંદ્રોદય વિજયજી ગણિ મહારાજ (હાલ ઉપાધ્યાયજી)ની પ્રેરણા પામી આ પ્રાકૃતરૂપાન્તરને પ્રકાશિત કરવા અનેક મહાનુભાવોએ અગાઉથી આર્થિક વ્યય કરી લાભ મેળવ્યો છે જેઓની શુભ નામાવલી યથાસ્થાને મુકવામાં આવી છે.

અંતમાં એ કે પ્રસ્તુત પુસ્તકના રચયિતા પૂજ્ય આચાર્ય મહારાજ શ્રીજીને તેમ ઉપદેશક પૂજ્ય ઉપાધ્યાયજી મ. ને પ્રકાશનમાં સહાય કરનાર મહાનુભાવો, સંશોધન સંપાદકમાં સહાયક મુનિવરો, તેમ પ્રથમ તેમ બીજીવારના મુદ્રણ પત્રો તપાસવાનું કાર્ય કરનાર પંડિત શ્રી સુબોધભાઈને તેમ છેવટના મુદ્રણપત્રો તપાસવાનું કાર્ય તો ગ્રન્થકાર પૂજ્ય આચાર્યશ્રીજીએ કોઈ સખલના રહેવા ન પામે તે લક્ષ્યપૂર્વક કરેલ હોવાથી તેઓશ્રીને તેમ મુદ્રક શ્રીધૈર્યકુમાર સી. શાહ વિગેરેને આ પ્રસંગે યાદ કરવાની અમો અમારી ફરજ સમજીએ છીએ.

શાસનદેવને એક જ પ્રાર્થના કે ઉસહનાહચરિયની જેમ પૂજ્ય આચાર્ય ભગવંતને ત્રિષ્ઠિતું સંપૂર્ણ પ્રાકૃત રૂપાન્તર કરવા સહાયભૂત થાય.

હવે પછી ઉપરોક્ત આચાર્યશ્રીએ “ચંદ્રરાજનારાસ”ના આધારે પ્રાકૃતમાં રચેલે ગ્રન્થ નામે—“ચંદ્રરાય ચરિય” પ્રકાશિત કરવાની ભાવના રાખીએ છીએ.
એજ. લી.

સં. ૨૦૨૪ ના

શ્રીનેમિ-વિજ્ઞાન-કસ્તૂરસૂરિ જ્ઞાનમંદિર

વૈશાખ સુદ ૧૦ બુધવાર

સુરતના સંચાલક

શાંતિલાલ ચીમનલાલ સંઘવી



મુખ્યમાં સિરિઉસહનાહચરિયના પ્રકાશનમાં દ્રવ્યસહાયકોની નામાવલી

૩. ૧૨૫૦ શ્રી ગોડીજી-શ્રીવિજયદેવસૂર સંઘના જ્ઞાન ખાતામાંથી.
 ૨૫૫ શ્રેષ્ઠી કેશવલાલ સોમાભાઈ.
 ૨૫૦ „ હીરાલાલ ગોપાળજી.
 ૨૫૦ „ સુમતિલાલ કેવલચંદ રાજકોટવાલા.
 ૨૫૦ શ્રી દેવકરજી મેન્સન પ્રીન્સેસ્ટ્રીટ લુહારચાલ શ્રીસંઘના જ્ઞાનખાતામાંથી.
 ૧૫૦ શ્રી ગોડીજી ઉપાશ્રય-બહેનો તરફથી.
 ૧૨૫ શ્રેષ્ઠી ખુમચંદભાઈ રતનાજી બેરાજી.
 ૧૨૫ „ શાન્તીલાલ ખેચરદાસ.
 ૧૨૫ „ ખાંવચંદભાઈ રામચંદ દ્વધવાલા.
 ૧૨૫ „ નાથાલાલ મૂલચંદભાઈ, ભારતીયેનના શ્રેયાર્થે-કેટવાળા.
 ૧૨૫ „ લાલજી દેવજી-કેશવજી વીરજી.
 ૧૦૦ „ નાગરદાસ ગોવિંદજી, રતનચંદ જેચંદવાલા.
 ૧૦૦ „ જે-એમ શેઠ. હરિભાઈ.
 ૧૦૦ „ સોભાગચંદ હેમચંદભાઈ.
 ૧૦૦ „ વાડીલાલ સાંકલચંદ.
 ૧૦૦ „ કચરાભાઈ વિક્રમસી. હ. સમરતબેન.
 ૧૦૦ „ કાંતિલાલ વરધીલાલ.
 ૧૦૦ „ અમૃતલાલ પિતાંબરદાસ.
 ૧૦૦ „ અમીચંદભાઈ-લીખીબેન.
 ૧૦૦ „ રાયચંદભાઈ લલ્લુભાઈ સંઘવી-દોઢાવાળા
 ૭૫ „ હેમચંદ અમૃતલાલ કું.
 ૫૦ „ રતિલાલ પારેખ.
 ૨૫ „ ચીમનાજી ઉમાજી.
 ૮૦ „ સદ્ગુહસ્થો તરફથી.



पथाविगं

छज्जति जस्स गंधा, अन्नानविसहरणे रयणसरिसा ।
 सिद्धनिवइमहिओ जो, कुमारवालस्स बोइगरो ॥१॥
 सव्वणुसमो इहयं, कलिकालम्मि य समणवई जाओ ।
 दंसणियसव्वगंधा, जेण विरइया जगपसिद्धा ॥२॥
 सिरिहेमचन्दसूरी, चिन्नाणविबुडविणमियपयकमलो ।
 तस्स हि सव्वभूयजसं, गायमि कत्थूरसूरी इं ॥३॥

सिरिहेमचंदसूरिणो जम्मो विक्रमस्स सैर-वेयै-भूमि-ससैंक(११४५) वरिसम्मि कत्तियसुक्क-
 पुणिमाए धंधुगानयरम्मि होत्था । तस्स पिउणो नाम 'चाच' माउए य 'पाहिणी' आसी ।
 गिहत्थावत्थाए हेमचंदस्स नाम चंगदेवुत्ति । तस्स मोढजाईए उप्पत्ती हुवीअ ।

चंदकुलायरियदेवचंदसूरी सिरिथंभत्तिथम्मि तस्स माऊए आणं धेतूणं विक्रमस्स गयण-
 सर-चंद-भूमि (११५०) वरिसम्मि माहमासस्स सुक्कचउइसोए मंदबासरे रोहिणीनक्खत्तम्मि
 सिरिपासणाहचेइयम्मि दिक्खं दाऊणं सोमचंदत्ति नाम अकरिंसु ।

तओ सोमचंदो निम्मलमइबलेण नाय-वागरण-साहित्तपमुहविज्जाओ अम्भसित्ता विसेसओ
 मइविगासनिमित्तं कम्हारदेसम्मि गंतूण सरस्सईदेवीसमाराहणमणोरहं कासी ।

तयणंतरं थंभणत्तिथ्थाओ गीयट्टुसाहूहिं सह विहारं काऊणं कमेण थंभत्तिथसमीवत्थिअ-रेवया-
 वयारत्तिथम्मि सिरिनेमिणाहचेइए तीए आराहणे सावहाणपरो होत्था । तइया पुण्णाणुभावाओ
 मज्झरत्तीए नासगठविअनेत्तस्स तस्स सोमचंदस्स पुरओ पच्चक्खीहोऊण पसण्णा सरस्सई
 वएइ-‘वच्छ ! देसंतरं मा वच्चसु, तुम्हदेच्चयविसुद्धभत्तीए तुट्ठा हं । तुम्ह इच्छिअं एत्थच्चिअ
 सिज्झिहिइ’ इइ वोत्तूणं सा अदंसणं पत्ता ।

छद्धसरस्सइपसायं तं सोमचंदं पासिऊणं गुरवो संपसमक्खं नगराहीसविहियमहूसवपुब्बयं
 विक्रमस्स रसै-उउ-सैसि-सैसैंक(११६६) वरिसम्मि अक्खयतइयाए मज्झण्हसमए सूरिमंतप-
 याणेण तं आयरियपए ठवित्था । तइया सो हेमचंदसूरी इअ नामेणं पसिद्धिं पाविओ ।

तस्स माया पाहिणी सुयसिणेहेण गुरुसगासम्मि संजमं गिण्हत्था । जणणीवच्छलो अहि-
 णवायरिओ गुरुहत्थाओ तं पवत्तणीपयम्मि ठवीअ ।

हेमचंदसूरी तओ विहरमाणो कमेण अणहिल्लपुरं समागच्छिथा । एगया सिद्धराओ भूवई गयवरारूढो रायवाडिगाए वियरंतो रायपहम्मि विवणीसंठियं हेमचंदपहुं पेक्खिऊणं तम्मुहाओ सुभासिअं सुणिउं पेरेइ, तइया सूरिणा वुत्तं—‘हे सिद्धराय ! नीसकं गयरायं चलावेसु, दिसिगया तसितु, तेहिं किं ? जओ पुढवी तुमए च्चिय उद्धरिया’ एवं ‘सुहासिअं सोच्चा पसन्नहियओ सो नरवई रायसहाए आगमणट्टं पत्थणं कासी ।

एगया सिद्धराएण मालवदेसविजएण तओ आणीओ भोयवागरणपमुहगंधमंडारो सिरिहेमचंदस्स देसिओ । सिद्धरायस्स निदेसेण हेमचंदपहुणा ‘सिद्धहेम’ त्ति अभिणवं वागरणं सुत्त-उणाइ—धाउपाढ-गणपाढ-ळिगाणुसासणनामपंचंगरूवं निम्मविअं । तस्स य अट्टज्जाया । तस्स वागरणस्स विवरणट्टाए बिहन्नासो महावुत्ती लहुवुत्ती य निम्मियाओ । विसेसओ नाममाला-सेसनाममाला-अणेगट्टनाममाला-देसियनाममाला-निधंठु-छंदोणुसासण-कंवाणुसासण-तिसट्टिसलागा-पुरिसचरिय-सत्तसंधानमहाकव्व-दुविइदुगासयकव्व पमाणमीमसा-जोगसत्थपमुहा विविहविसयगंथा विरइया य । ते य विउसगणेहिं पमाणीकया ।

पंडियपवरभागवयायरियस्स इंदजालियदेवबोहस्स दुक्खियावत्थाए तेण सूरिणा सहेज्जं कयं ।

सिद्धरायनरवई पुत्तस्साऽभावेण सिरिहेमचंदपहुणा सद्धिं तिथजत्ताए निग्गओ । पुवं सिद्धगिरिम्मि जत्तं काऊणं तिथस्स पूआइ दुवालसगामे दाऊणं रेवयायलतिथम्मि समागओ । तत्थ नियसज्जणमंतिकारियजिणुद्धारम्मि सत्तावीसलक्खसुवण्णदम्मवयं सोच्चा तं च लाहं सयं घेतूणं सो बहुयं पसंसिओ । तओ सिरिहेमचंदसूरिसहिओ सो सिद्धराओ सोमेसरपट्टणम्मि उवागओ । तत्थ महादाणाइं दाऊणं अच्चम्मयपूअं च काऊणं सो अंबिगादेवीए अहिट्टिए कोडिणारनयरम्मि अंबिगादेवीदंसणट्टं समागओ । पुत्तट्टं आराहियाए अंबिगादेवीए, सिद्धरायस्स पुत्ताभावो निदिट्ठो । तस्स य उत्तराहिगारी पेइय-भाउ-देवपसायस्स पोत्तो तिहुवणपालस्स पुत्तो कुमारवालो होहिइ त्ति देवीवयणं सोच्चा पुव्वकम्मदोसेण तम्मि वेरं बहेइ । तस्स बहाइ विविहे उवाए चित्तेइ । तं वियाणिऊण कुमारवालो वेसपरावट्टणं काऊणं अच्चंतगूढठाणे वसितं लमो ।

एगया सिरिहेमचंदेण अणहिल्लपुरनयरम्मि सिद्धरायभएण भमंतो सो रक्खिओ । पुणो वि एगया थंभत्तिथम्मि सावगदुवारेण बत्तीसलक्खदम्मे दाविऊण तस्स सहेज्जं दिणं ।

विक्कमस्स गह-नंद-रुइ (११९९) वरिसम्मि सिद्धराए परलोगं गए कुमारवालो महा-राओ जाओ । सो विवत्तिसमए सहेज्जकारगे सव्वे आहविऊण अईव सम्माणं तेसिं कासी ।

१ पहावगचरियंतगयसिरिहेमचंदचरिए एयं सुहासिअं—

कारय प्रसरं सिद्ध । हस्तिराजमशक्तितम् । अस्यन्तु दिग्गजाः किं तैर्भूस्त्वयैवोद्धृता यतः ॥६७॥

सवायलक्खदेसाहिबइ-अण्णोरायस्स अणेगसो जयम्मि निष्फळे मए तस्स जयट्ठं नियमंती बाहडो पुच्छिओ 'कहं सो जिणिज्जइ ?' । तइया मंतिबाहडवयणेण पट्टणसंथिअसिरिपासणाहचेइ-अमज्झम्मि सिरिहेमचंदपहुपइट्ठिअमहापहावजुअसिरिअजियणाहजिणीसरपडिमाराहणेण अण्णो रायस्स विजओ विहिओ ।

एगया जइणधम्मसवणे मंतिबाहडमुहाओ सिरिहेमचंदसूरिणो गुणे सोच्चा तं च आहवि-ऊणं तम्मुहाओ जिणधम्मं सुणिऊणं मंसाहारचागपमुइनियमे गिण्हिथा । तओ सो जइणसत्थाणं अज्झयणं कुणंतो कमेण महासावगो संजाओ । नियदंताणं विसोइणट्ठं बत्तीसं जिणचेइयाइं तह य नियपियरसेयनिमित्तं 'तिहुवणविहार'-चेइअं अन्नाइं च अणेगचेइयाइं करावेसी । पुवं सिरि-अजियजिणाराहणेण अण्णोरायस्स विजओ कओ आसी, तओ तस्स सुमरणनिमित्तं तारंगाय-लसिहरम्मि उच्चयमं भव्वमहापासायं कराविऊणं तम्मि इक्काहिगसयंगुलपमाणं सिरिअजियणाह-जिणपडिमं करावित्ता तर्हि पइट्ठं करावित्था ।

उदयणमंतिस्स बिइयपुत्तेण अंबडेण भरुअच्छनयरम्मि 'सउणिगाविहार' चेइअस्स उद्धारो कओ तस्स पइट्ठा वि विक्कमस्स उउचंद-आहच्च (१२१६) वरिसम्मि सिरिहेमचंदसूरिणा बिहिया ।

सिरिहेमचंदपहुणो उवएसेण कुमारवालो नरिंदो समणोवासगस्स दुवालसवयाइं गिण्हिथा । ताहे सो नियसव्वदेसेसुं जीववहं तह य जूअपमुइसत्तवसणाइं निवारित्था ।

सिरिहेमचंदसूरिस्स वयणेण कुमारवालो सिंधुसोवीरदेसरायधानीवीअभयपट्टणस्स भूमि-खणणेण निग्गयाओ पुव्वकालियजिणपडिमाओ इह पट्टणम्मि आणाविऊणं जिणचेइएसु पइट्ठाविआओ ।

एवं आयरियसिरिहेमचंदसूरी कुमारवालमहारायं पडिबोहिऊण तह य सव्वंगीअगंधरयणेण गुज्जरदेसस्स सिरिजिणसासणस्स य अणुवमं पहावणं काऊणं विक्कमस्स नंद-नयण-भुय-ससंक- (१२२९) वरिसम्मि चउरासीइवरिसाउसो सगं समागओ । एवं महापुरिसाणं गुणगाणं कम्मक्खयाय होइ । तहेव इह उसहचरियविरयणे सिरिहेमचंदसूरिविरइयतिसट्ठिसलागामहापु-रिसचरियस्स पढमपव्वस्स उवओगो मए विहिओ । तेण एएसिं महापुरिसाणं गुणगाणं मज्झवि कम्मक्खयट्ठं हवेउ ।

एवं सिरिहेमचंदपहुणो संखेवओ पहावगचरियस्स समत्तीकाऊणं अहुणा तिसट्ठिसलागा पुरिसचरियाइमपव्वस्स रूवरेहा मए आलिहिज्जइ—

अणाइनिहणम्मि एयम्मि जगम्मि पउरपुण्णोदण सुलद्धमणुअभवा संस्साईया पाणिणो अज्झपुन्नइयं पाविआ । एएसि पुरिसुत्तमाणं सम्भूयकित्तणाइं जिणागमेसुं अणेगठाणेसुं विहियाइं । तेसि च निदेसो सत्थेसुं महापुरिस-सलागापुरिसाभिहाणेण निंदसिज्जइ ।

इह भरहखेत्तम्मि पत्तेयं ओसप्पिणीए तह उस्सप्पिणीए तिसट्ठी तिसट्ठी सलागापुरिसाणं गणणा किज्जइ, इमीए वट्टमाणकालहुंडावसप्पिणीए चउव्वीसं तिथयरा, दुवालस चक्कवट्ठिणो, नव वासुदेवा, नव बउदेवा, नव पडिवासुदेवा इअ तिसट्ठी सलागापुरिसा संजाया । सिरिसीलंकायरिए नव-पडिवासुदेवाणं निदेसं अकिच्चा महापुरिसाणं चउप्पणं गणणा साहिया अत्थि । तहिं च जीवाणं संस्सा सट्ठी अत्थि, जओ सोलसइम-सत्तरसइम-अट्ठारसइमतिथयरा एयम्मि भवम्मि च्चिय तिथयरा चक्कवट्ठिणो वि संजाया, भिण्णभिण्णभवाविक्षाए जो चिय तिवुट्ठवासुदेवो सच्चिय कालंतरम्मि सिरिमहावीरसामी नामेणं चउव्वीसइमो तिथयरो जाओ, तेण तयविक्षाए एगूण-सट्ठी सलागापुरिसा गणिज्जंति ।

एएसि सलागापुरिसाणं गुणाणं उक्कित्तणं पुव्वकालम्मि पुव्वानुयोगम्मि आसी । अज्ज-यणसमए सो न लहिज्जइ । अहुणा उ सलागापुरिसवण्णविसया गंथा इमे संति । १ चउ-प्पणमहापुरिसचरियं, २ कहावली सिरिभदेसरसूरिविरइया, ३ हेमतिसट्ठी, ४ उवज्जायमेहविज-यगणिविरइया लहुतिसट्ठी ।

अन्नं च दिगंबरीयमयम्मि महापुरिसवण्णविसया कहई गंथा संति, जे इमे—

१ सिरिजिणसेणायरिएण आइपुराणदुवारेण महापुरिसचरियं पारद्धं, तस्स य सीसेण गुण भेदेण उत्तरपुराणरूवेण संपुण्णं विहियं । २ पुप्फदंतविहियं तिसट्ठिमहापुरिसालंकारु किं वा महापुराणं ।

कलिकालसव्वणुसिरिहेमचंदपहुणा सक्कयभासाए तिसट्ठिसलागापुरिसचरियं छत्तीससहस्स-सिलोगसंस्तपमाणं विरइयं अत्थि । तं च दससु पव्वेसु विभइयं तहिं च पढमपव्वम्मि छ सग्गा संति ।

एवं इहयं पि पत्थुयचरियं पढमपव्वस्स पाइयभासाए रूवंतरं अत्थि । इहावि पव्वस्स ठाणम्मि वग्गो तह य सग्गस्स ठाणम्मि उदेसो एरिसं नामं ठवियं ।

अहिगारा—

देवाहिदेव-पढमसिरिसहणाहस्स तेरस भवा संति । तत्थ पढमोदेसम्मि दुवालस भवा । तह बीय-उदेसाओ चरिम-छट्ठुदेसं जाव तेरसमो अंतिमभवो वण्णिओ अत्थि ।


१ उवज्जायसुत्ते—पडिवासुदेवस्य निदेसो न विहिओ, तेण तत्थ चउप्पणं (५४) संस्सा कहिया ।

विसेसओ-बीयउदेसम्मि सत्तकुलगराणं वुत्तंतो, तहय भरहचक्कवट्टिस्स उप्पत्ती निदिट्ठा । तइयम्मि भरहरायस्स चक्करयणलाहो, मरुदेवाए मोक्खगमणं । चउत्थम्मि भरहरायस्स छक्खं-डसाहणा । पंचमम्मि भरहस्स बाहुबलिणा सद्धिं जुद्धं । छट्ठम्मि भरहनरवह्णो पुत्तस्स मरीइणो वेसपरिवट्ठणं । सिरिउसहणाहस्स भरहचक्कवट्टिणो य अट्ठावयगिरिम्मि निव्वाणपयसंपत्ती ।

अवरं च एयस्स गंधरयणाए सिरित्तागच्छाहिवह-सासणपहावग-आबालबंभयारि-सूरीसर-सेह्राऽऽयरियविजयनेमिसूरीस-पट्टालंकार- समयणू-वच्छल्लवारिहि-गुरुदेवसिरि-आयरियविजयवि-ण्णाणसूरीसरं सुमरणपहम्मि समाणेमि । तास अणुवमकिवादिट्ठीए सुहासिसाए य पेरीओ हं गंधसमत्तीकरणे पक्कलो संजाओ । तस्स य निदेसेण मुदणालए मुदणट्ठं एसो गंधो समप्पिओ । किंतु संपुण्णमुदणकज्जाओ पुव्वं तस्स गुरुदेवस्स सिरिधंभत्तिथे ओसबालुवस्स-यम्मि विक्कमस्स नेत्त-भुय-गयण-कर(२०२२) वरिसम्मि महुमासस्स सुक्कदसमीवासरे आराहणपुव्वगं देहविलयाओ सरणविरहिओ हं संजाओ, तेण गुरुदेवविरहबाहा मे चित्तं अज्ज वि जाव अईव दूमेइ ।

पज्जंते इमस्स गंधस्स मुदणपत्ताणं संसोहणकम्मम्मि मईयपरिवारगय-उवज्जायचंदुदय-विजयगणि-मुणिअसोगचंदविजय-मुणिजयचंदविजयपमुहेहि जेहिं सहेज्जं दिण्णं ते वि धण्णवायारिहा ।

इअ वेय-नयण-नायण कर(२०२४) वरिसम्मि सुरियपुरम्मि विजयकधूरसूरी निवेपइ ।



पदमवग्गो

विसयाणुकमिणिगा

सिरिउसहणाहचरिए, पहाणविसयाण संगहो जो उ
सो एत्थ मए वुत्तो, साहुगणाण सइ सुमरहं ॥२॥

पदमवग्गो पदमो उदेसो—

पदमो धणसत्थवाहभवो—तत्थ धणस्स वसंतपुरनयरगमणे वियारो, धम्मघोसायरियस्स समागमो, धणेण सह धम्मघोसायरियस्स नयरओ निग्गमणं, गिम्ह-वासा-उडवण्णणं, अडवीए वासो, सत्थजणदुहेण धणस्स चिता, सूरिणो य समीवग्गि समागमणं, सूरिधणसत्थवाहाणं संलावो, धणस्स घयदाणेण बोहिबीयसंपत्ती धम्मवएसो, धणस्स वसंतपुरनयरे आगमणं ।
पदमो भवो समत्तो । ३-९

धणस्स जुगलियनरत्तणेण समुप्पत्ती, उत्तरकुराए कप्पतरवो सोहम्मकप्पे उप्पाओ ।
बीओ जुगलियभवो तइओ य सुरभवो समत्तो । ९-१०

चउत्थो महाबलभवो—

सयबलस्स वेरगं, सयबलस्स दिक्खा, महाबलो य राया जाओ, सयंबुद्धमंतिचित्तणं, महाबलस्स अगगओ उवएसदाणं, संभिन्नमइणो चव्वागमयदंसणं सयंबुद्धकयजीवसिद्धी, सयंबुद्धकहिओ नरिंदस्स पियामह-अइबलवुत्तंतो दंडगनरिंदवुत्तंतो य, सयंबुद्धस्स असमए उवएस-
दाणस्स कारणं, महाबलनरिंदस्स दिक्खा अणसणं च । चउत्थो महाबलभवो समत्तो । १०-१९

पंचमो ललियंगदेवभवो—

ललियंगदेवो तस्स य समिद्धी, ललियंगदेवस्स जिणपडिमा-दाढापूअणं, तस्स सयंपहा महादेवी, सयंबुद्धो ईसाणकप्पे दढधम्मो देवो जाओ, निन्नामिगा, जुगंधरमुणित्थ केवल-
नाणं, तस्स य उवएसो, निन्नामिगाए सम्मईसणलाहो, अणसणं च काऊणं सा ललियं-
गदेवस्स सयंपहा देवी जाया, ललियंगदेवस्स चवणचिन्हाइं, तओ चविऊण ललियंगो वज्जजंधो सयंपहा य सिरिमई जाया । पंचमो भवो समत्तो । १९-२५

छट्ठो वज्जजंधभवो—

सिरिमईए वज्जजंधेण सह परिणयणं, वज्जजंधो सिरिमई य मच्चुं पाविता उत्तरकुरूसुं तओ अ सोहम्मदेवलोगे समुप्पण्णा । छट्ठो वज्जजंधभवो समत्तो । सत्तमो जुगलियभवो अट्ठमो य देवभवो समत्तो । २५-२९ ।

नवमो जीवाणंदभवो—

जीवाणंदाइमित्तलक्ककयमुणिचिइच्छा, जीवाणंदाइमित्ताणं संजमग्गहणं अच्चुयकप्पे य समुप्पत्ती । नवमो जीवाणंदभवो दसमो य देवभवो समत्तो । २९-३२ ॥

इक्कारसमो वज्जणाभक्कवट्ठिभवो —

देवलोगाओ चविऊण जीवाणंदाइणो छ वज्जणाहप्पमुहा जाया-वज्जसेणो तित्थयो
वज्जणाहो अ चक्कवट्ठी जाओ, वज्जणाहाईणं पव्वज्जा, वज्जणाहस्स वीसठाणगेहिं तित्थय-
रनामकम्मनिकायणं, वज्जणाहाईणं सब्बट्टसिद्धविमाणम्मि समुप्पाओ ।

इक्कारसमो वज्जणाहक्कवट्ठिभवो दुवालसमो य देवभवो समत्तो । ३२-३७ ।

वीयउद्देशो-

कुलगराणं उप्पत्ती-सेट्ठिचंदणदासस्स पुत्तो सागरचंदो, सागरचंदस्स उज्जाणे
गमणं भयाओ च पियदंसणाए रक्खणं, चंदणदासस्स पुत्तस्स पुरओ उवएसो, सागर-
चंदस्स पियदंसणाए सह विवाहो, असोगदत्तस्स एगंते पियदंसणाए मिळणं, सागरचंदेण
सह असोगदत्तस्स संवाओ, सागरचंदाइणो मरणं पाविऊणं जुगलियत्तणे समुप्पण्णा । ३७-४२ ।

कालचक्कसरूवं, विमलवाहणाइणो सत्त कुलगरा, सत्तमो कुलगरो नाभी मरुदेवा य
भज्जा, मरुदेवाए चउदससुमिणदंसणं, मरुदेवाए पुरओ नाहिकुलगरस्स इंदाणं च सुमिण-
फलकहणं, गव्वभप्पहावो उसहजम्मो य । ४३-४८ ।

दिसिकुमारीकयजिणजम्ममहसवो । ४८-५० ।

सोहम्महाविइणो जिणजम्मणघराओ जिणं घेतूणं मेरुम्मि गमणं, ईसाणकप्पाइंदाणं
मेरुसिहरे समागमणं, अच्चुयकप्पाइ-इंदकयाभिसेगमहसवो, सोहम्मकप्पिंदकयाभिसेगमहसवो,
सक्ककयजिणिंदथुई । ५१-५८ ।

नंदीसरदीवे इंदाइकय-अट्टाहियामहसवो, इंदकयमहसवो समत्तो । ५९-६० ।

‘उसह’ त्ति नामकरणं वंसठवणं च, जिणजोव्वणकाळे देहसोहा देहलक्खणाई च
। ६०-६३ ।

पहुणो देवकयसंगीयपेक्खणं, सक्ककयविवाहपत्थावो, आभियोगियदेवकयमंडववण्णणं अच्छ-
राहिं सुमंगलासुणंदाणं पउणीकरणं, सामिणो विवाहमंडवे आगमणं, देवीहिं कयविवाहउ-
वयारो, पहुणो विवाहमहसवो । ६३-६९ ।

भरहाइपुत्ताणं उप्पत्ती, सुरवइकयजिणरज्जाभिसेगो, विणीयानयरीनिम्माणं, जिणस्स रज्जं-
गसंगहो, अगिणो उप्पत्ती, जगवइणो सिप्पकलाइपयंसणं, रज्जाववत्था य । ६९-७३ ।

उसहप्पहुणो वसंतूसवनिरिक्खणं, उसहप्पहुणो वेरगं । बीओ उद्देशो समत्तो । ७३-७६

तइओ उद्देशो—

उसहपहुणो भरहस्स रज्जदाणं, संवच्छरियदाणं, दिक्खामहसवो, कच्छ-महाकच्छ-
पमुहाणं दिक्खा, उसहपहुणो अण्णमुणीणं च आहारस्स असंपत्ती, कच्छमहाकच्छाईणं आहा-

रचिता, नमिविणमीणं आगमणं, पट्टपासम्मि नमि-विणमीणं रज्जमगमणं, धरणिदागमणं च, नागराणं नमि-विणमीणं विज्जाहरेस्सरियदाणं, वेयड्डगिरिवण्णणं । ७७-८५ ।

विज्जाहराणं मज्जाया, उसहपहुणो पढमा भिक्खा, सिज्जसकुमारस्स पढमं दाणं, उस-हपहुणो बहलीदेसे गमणं, बाहुबलिणो य वंदणट्ठं आगमणं, सामिणो अदंसणे बाहुबलिणो पच्छायावो, उसहसामिणो केवलणाणुप्पत्ती । ८६-९५ ।

समोसरणं, इंदकयउसहजिणथुई, मरुदेवाए विलावो, भरहनरिंदस्स पुरओ सामिणाणुप्प-त्तीए चक्करयणुप्पत्तीए य जुगवं निवेअणं, मरुदेवाए सह भरहस्स सामिवंदणट्ठं आगमणं, मरुदेवीए मोक्खो, भरहनरिंदकयजिणथुई, उसहजिणस्स देसणा-संसारसरूवं, सम्मदंसणलाहो, सम्मदंसणलक्खणाई, उसहसेणाईणं दिक्खा, चउव्विहसंधस्स गणहराणं च ठवणा, पहुणो अक्ख-अक्खिणीओ, विहारो, अइसया य । तइयो उद्देसो समत्तो । ९५-११० ।

चउत्थो उद्देसो —

चक्कपूअणं, भरहस्स दिसिजयाय पयाणं, चक्कीणं रयणाई, दिसिजत्ताए मागह-वर दामत्तिथाहिगारो कयमालदेवाहिगारो य, सिधुनईए परतडत्थिअमिलिच्छाणं विजओ, तमिस्सा-गुहाए दुवारुग्घाडणं, मणिरयणकागिणीरयणाणं वण्णणं, उम्भग-निमग्गनईओ, गुहाओ बाहिरं निग्गमणं, उत्तरभरहम्मि चिलायाणं विजओ, हिमवंतगिरिकुमारदेवविजओ, उसहकूडम्मि नाम-लिहणं, नमि-विणमिविज्जाहराणं विजओ, इत्थीरयणं, गंगादेवी-नट्टमालदेवविजओ, नवनिहिणो ।

१११-१३६ ।

अउज्झानयरीए पवेसमहूसवो, भरहस्स महारज्जाभिसेओ, चक्कवट्ठिस्स सामिद्धीओ, सुंदरिं ददट्ठणं भरहस्स चिता सुन्दरीए य दिक्खा, भरहेसरकया धम्मचक्कवट्ठिणो थुई ।

१३६-१४६ ।

भरहस्स अट्ठाणउइभाऊणं पहुणो उवएसो, एत्थ इंगालगारस्स दिट्ठंतो तेसिं च दिक्खा । चउत्थो उद्देसो समत्तो । । १४६-१४७ ।

पंचमो उद्देसो —

भरहस्स बाहुबलिणो अगओ दूअपेसणं, तक्खसिलापुरीए पवेसो, बाहुबलिणा सह संभा-सणं, सुवेगदूअस्स सहाए निग्गमणं, विणीआनयरीए आगमणं, भरहनरिंदस्स मंतीहिं सद्धि विया-रणा, भरहनरिंदस्स संगामकरणट्ठं पयाणं बाहुबलिणो वि पयाणं, भरहबाहुबलीणं सइण्णववत्था, उभण्हं सेण्णाणं संगामट्ठं सज्जीभवणं, संगामपारंभे जिण्णिदपूअणं । १४८-१६८ ।

जुद्धनिवारणाय देवाणं आगमणं, भरहस्स नियसेण्णाणं पुरओ बलपयंसणं, भरह-बाहु-बलीणं दिट्ठिपमुहजुद्धं, भरहस्स चक्कमोयणं, बाहुबलिस्स दिक्खा, ज्ञाणमग्गया केवलनाणं च । पंचमो उद्देसो समत्तो । १६८-१८४ ।

छट्टो उदेसो—

मरीइणो वेसपरिवट्टणं, मरीइसररि पीडा, तहिं च रायपुत्तस्स कविलस्स आगमणं दिक्खा
य, उसहसामिणो अट्टावयगिरिम्मि समागमणं, अट्टावयगिरिवण्णणं, समवसरणं च । वासव-
विहिय—सिरिउसहजिणधुई, धम्मदेसणा, पंचविह—अवग्गहसरूवं, भरहेण सावगाणं भोयणदाणं ।

१८५-१९७ ।

सिरिउसहजिणीसरदेवकहियभावि—तिथ्यर—चक्कवट्टि—वासुदेव—बलदेव—पडिवासुदेवाणं सरूवं ।

१९७-२०३ ।

भरहेण पुट्ठेण भगवथा मरीइणो भाविसरूवकहणं, कुलमयकरणाओ मरीइणा नीबगो-
त्तकम्मुवज्जणं, उसहपहुणो सत्तुंजयतिकथम्मि आगमणं, केवलणाणल्लहं दंसिऊण पुंडरीग-
गणहरं तत्थ ठविकुणं भगवओ अन्नहिं विहारो, दव्वभावसंलेहणासरूवं, पुंडरीगगणहराईणं
तत्थ निव्वाणं । २०३-२०६ ।

भरहेण सत्तुंजयगिरिम्मि पुंडरीगपडिमासहिय-उसहजिणीसरचेइयनिम्मवणं, उसहजिणी-
सरस्स समणाइपरिवारसंखा । २०६-२०७ ।

भगवओ अट्टावयगिरिम्मि आगमणं अणसणं च, पहुस्स अणसणं सोच्चा भरहस्स खेओ,
तत्थ य आगमणं । आसणकंपाओ तहिं आगयाणं विसन्नहिययाणं इंदाणं अवत्थाणं । २०७-२०८ ।

तइयारगस्स एगूणणउइपक्खेसुं अवसिट्ठेसुं समाणेसुं माहमासस्स क्किण्हतेरसीए—सिरि-
उसहपहुणो निव्वाणं, अण्णेसिं पि दससहस्ससमणाणं भगवथा सद्धिं परमपयासायणं, जिण-
वरस्स इंदाइकयनिव्वाणगमणमहूसवो । २०८-२१२ ।

अट्टावयगिरिम्मि भरहकारियसिंहनिसज्जापासाओ, नवणउइभाऊणं च थूवनिम्मवणं,
भरहेण छोहनिम्मिय-जंतमइयाऽऽरक्खगपुरिसेहिं चेइयरक्खाविहाणं, जिणपडिमाणं वित्थरेण
अच्चणाइविहाणं । २१२-२१५ ।

सोग-भत्तिभरिय-भरहनरिदविहियचउव्वीसजिणवराणं धुई, विणीयानयरीए आगमणं, भरहस्स
भोगा । २१५-२२० ।

भरहनरिदस्स आयंसगेहम्मि केवलणाणुप्पत्ती, देवेहिं तरस्स मुणिवेससम्पणं, दससहस्स-
नरवईणं पव्वज्जागहणं । २२०-२२१ ।

आइच्चजसस्स रज्जाभिसेगो, देसणाए भव्वजीवे पडिबोइमाणस्स भरहस्स पुव्वलक्खव-
रिस्स जाव विहारो, अट्टावयगिरिम्मि य निव्वाणं, सव्वाउसपमाणं । २२२-२२३ ।

छट्टो उद्देसो समत्तो । सिरिउसहसामिज्जिणवइ-भरहचक्कवट्टिपडिबद्धो
पदमो वग्गो समत्तो ॥

शुद्धिपत्रकम् ।

सोद्धिपत्रकं

पुढे	पंतीप	असुद्धं	सुद्धं	पुढे	पंतीप	असुद्धं	सुद्धं
४	२	नियनिमित्तं	नियनिमित्तं	॥	२१	चिह्नच्छा	चिह्नच्छा
४	१२	जहाणुकुलं	जहाणुकुलं	३३	१९	धम्ममि	धम्ममि
॥	१५	धम्मघोषा०	धम्मघोषा०	३४	९	अई	अई
५	४	वारिधरो	वारिधरो	३६	१२	ठाणगं गु	ठाणगं ३ ।
६	८	आगममिष	आगममिष	॥	२९	उद् भास०	उद्भास०
॥	१७	वत्थ०	वत्थ०	३७	११	सवट्ट०	सवट्ट०
९	१९	गिण्हंओ	गिण्हंतो	३७	१२	छ कि	छ वि
॥	२७	०मिलासिणा	०मिलासिणो	३८	२४	हा सागर०	इव सागर०
१०	२	पत्तरवो	कपत्तरवो	३९	२४	जाइ	जाई
११	३	विज्जुलया०	विज्जुलया०	४०	७	०विवाहेण	०विवाहेण
॥	४	संझा०	संझा०	४२	१	सत्थं	सत्थं
॥	७	ताविज्जइ	ताविज्जइ	॥	१०	काल धम्मं	कालधम्मं
१३	२२	सयंमुद्धि०	सयंमुद्धि०	४३	२	जोइसिमायअ०	जोइसिया य अ०
१६	२७	सुयः	सुयः	४६	५	०मिसिच्चभाणी	०मिसिच्चभाणी
१९	४	वारियर०	वारिधर०	॥	१०	अणेगाणभओ	अणेगाणभओ
॥	१८	विणीओ	विणीओ	५१	६	विण्ण	विण्ण-
२०	३	SSयंसंतालि०	SSयंसंतालि०	५१	२२	मरुदवाए	मरुदवाए
॥	१७	ओव्वण०	ओव्वण०	५२	१५	अट्टण्हं	अट्टण्हं
२१	८	लद्धा	लद्धा	५३	१९	निहंमणिकदि०	निहंमणिकदि०
॥	१५	आयंति	आयंति	॥	२१	०महिममूखं	०महिममूखं
२२	१७	समुत्त०	समुत्त०	५५	१६	भाम	भीम-
२२	१८	संपत्तो	संपत्तो	५५	२५	उवागच्छंति	उवागच्छेइ
२३	३	असिपत्त०	असिपत्त०	५६	३	सुवणरूप०	सुवणरूप०
॥	९	भक्खिज्जंति	भक्खिज्जंति	॥	३	आट्ठोत्त.	अट्ठोत्त०
॥	२०	जलजंतूण०	जलजंतूण०	॥	६	०देवाते	देवा ते
२४	१	उत्तरं	उत्तरं	॥	११	०वणेसुय	वणेसु य
॥	२१	आइ	आइ	५७	२	०रसु०	०रसु०
२५	७	समुप्पन्नो	समुप्पन्नो	५७	४	०हाउजयं	०हाउजयं
२७	१९	आइस्सरवंता	आइस्सरवंतो	॥	८	०गज्जिये	०गज्जिये
२८	२२	जुद्धण	जुद्धण	६२	१	पण्हा	पण्ही
३०	१३	०हिट्ठिओ	०हिट्ठिओ	६३	२०	०सराराइ	०सरीराइ
॥	१६	छट्ठतवस्स	छट्ठतवस्स	६७	४	०SSणाय०	०SSणीय०

पुढे	पंतीप	असुद्धं	सुद्धं	पुढे	पंतीप	असुद्धं	सुद्धं
६९	२०	०बल उवेओ	०बल-उवेओ	„	२१	रमम०	रयण०
७२	१३	अहुणा	अहुणा	१११	१२	अइ	अह
७२	२६	पक्खिबिळण,	पक्खिबिळण	„	१५	तमिब	*तमिब
७३	३	अणंतरदिण्णक०	अणंतर दिण्णक०	„	२२	अब्भं०	*अब्भं०
७३	२२	वसंत०	वसंत०	११२	१	उव्वट्टंति	उव्वट्टंति
„	२३	०रोहाओउ०	०रोहाओ उ०	११२	१८	बिसाल०	विसाल०
७४	८	संपेक्केण	संपक्केण	„	२८	पुरोधारत्तम	पुरोधोरत्तम
„	१४	नियाइआ	नियोइया	११३	१४	भरहन्नि	भरहन्निदो
„	२६	कामणीए	कामिणीए	११६	१९	णो	*णो
७५	१३	धि दी	धिदी	११८	१५	पबोहिओ !	पबोहिओ ?
७६	२२	पट्टवरे	पट्टवर-	„	२८	उद्वन्तभू०	उद्वन्तभू०
७७	२	०पहुणा	पहुणो	११९	४	तंवाणं	तं वाणं
७८	१०	०हत्थेहिं	हत्थेहिं	„	७	वरदामवइ	वरदामवइ
„	१०	संम	समं	„	२८	बाणमात्रात्	बाणमात्रात्
८२	१६	तुम्हे	तुम्हे	१२३	१६	०पक्ख रो	०पक्खररो
„	१९	मिज्जं	मिज्जं	१२७	२३	वट्टं	वट्टं
८४	१०	विमोत्तण	विमोत्तण	१३०	६	विपसीए	विवसीए
८६	४	च स्संति	चइस्संति	१३१	८	उसहकुळम्मि	उसहकुळम्मि
„	२०	कया त	कया ते	१३३	१३	हरणो	रणो
८८	२५	परिचइता	परिचइता	„	१८	ठाणेसुंसां	ठाणेसुं सां
८९	१८	भगवत्तस्स	भगवत्तस्स	१३४	७	विज्जा०	विज्जा०
९२	६	०ज्जणा	ज्जणा	१३६	९	विइम०	विइम०
„	१८	०णिज्ज सरीरठ	०णिज्जसरीर०	१३९	७	अंगगंभि	अंगगंभि
९८	२६	कण्णमायर०	कण्णामयर०	„	९	पिक्खंतिप-	पिक्खंतिप-
„	३०	०दुःवाय०	०दुःवाप०	१४१	१५	नक्खिणि	नक्खिणि
१००	१	सइ	सइ	„	२८	वाक्खत्ति	वाक्खत्ति-
१०२	२१	भक्खरं	भक्खरं	१४२	२६	ओक्कान्ता	ओक्कान्ता
१०३	३	०माणस्सं	माणस्सं	१४८	१	०सेणावइ	सेणावइ
१०४	२२	उवसमस्सं	उवसमस्सं	१५०	२६	विवि	विव
१०५	११	मिच्छत्त	मिच्छत्त	१५१	१	इव	इव
१०६	२६	प्राणापह्णं	प्राणापह्णं	१५३	८	अयाइ	अयाइ
१०८	५	जलहराव्व	जलहराव्व	१५५	१३	सुद्धं	सुद्धं
„	२३	गण	गण-	„	२१	पक्खिज्जमाण	पक्खिज्जमाण-
„	२४	*चउ०	*चउ०	१५६	१७	इच्छतो	इच्छतो
१०९	१३	*सस्साणं	*सस्साणं	१५७	४	सज्जीवति	सज्जीवति

पुढे	पंतीप	असुखं	सुखं	पुढे	पंतीप	असुखं	सुखं
१५८	२१	वधिं	वधिं	१५८	१७	तम्हे	तम्हे
१६३	९	जलहर	जलहर	१६६	९	पबट्टेसि	पबट्टेसि
१६५	१८	वीरपट्ट	वीरपट्ट	१६९	९	उत्तरंगिठ०	उत्तरंगिठ०
१६५	२	बिम्बा	बिम्बा	१९०	७	हिट्टमि	हिट्टमि
१६६	७	मिदेइ	मिदेइ	१९९	५	र सज्जा०	भरज्जा०
१६७	१७	सिरि०	सिरि०	२०२	२१	वरिस स०	वरिसस०
१६७	२५	गच्छंतेहि-	गच्छंतेहि	२०५	१४	पुंडरीअं	पुंडरीअं
१६९	२९	परस्परं	परस्परं	२०६	५	रागहासे०	रागहासे०
१६९	२५	रयण	रयणं	२०८	४	पल्लंका०	पल्लंका०
१७०	१	अण्ण	अण्ण-	२०९	२४	जाणाविउ	जाणाविउं
१७१	२९	अगुहणात्	अगुहणात्	२११	१	मणूसाणं	मणूसाणं
१७४	६	ए	एवं	२१२	७	० गिण्हेसि !	गिण्हेसि !
१७६	१७	सली	सली-	२१४	१०	रम्माइ	रम्माइ
१७७	९	हिट्टिमि	हिट्टिमि	२१४	७	० भिगारगा	भिगारगा
१८०	१६	रवि-	रवि-	२१४	२५	गिरि पिव	गिरि पिव
१८१	४	चकं	चकं	२१७	१२	मग	मगं
१८१	९	मुहेमि	मुहेमि	२१९	३०	हिययम्मिप०	हिययम्मि प०
१८२	१३	सागिणी	सागिणी-	२२३	५	बएइ	बएइ
१८२	८	पावो	पावो	२२३	९	बाहड्डं	बाहड्डं
१८३	६	तस्सुं पाए	तस्स पाएसुं	२२३	२१	नह	नह

॥ ॐ नमो अरिहंताणं ॥

॥ नमोत्तु णं समणस्स भगवओ महावीरवद्धमाणसामिस्स ॥

॥ नमो परमगुरुवरायरियसिरिविजयनेमिस्सुरीसरसिरिविजयविन्नाणस्सरिवराणं ॥

आयरियविजयकत्थुरस्सरिविरइयं

॥ सिरिमहापुरिसचरियं ॥

(सिरिउसहनाहचरियं)

तत्थंतग्गयसिरिउसहजिणीसर-भरहचक्कवट्टिचरियपडिबद्धपढमवग्गम्मि

पढमो उद्देशो

मंगलाचरणं—

जयउ स उसहजिणिंदो, भवभयभीयाण भवसत्ताणं ।

हरइ भयं जो निच्छं, किच्चा वरधम्मसत्ताणं ॥ १ ॥

सिरिसंती जिणणाहो, सुर-असुरनियरसुगीयगुणगाहो ।

सइ पसमरसनिमग्गो देउ ममं संतिपरमपयं ॥ २ ॥

वसुदेवतणयगव्वय-जलनिहि-महण-सुरसेल-सारिच्छो ।

राईमइ-मणसाथर-हरिणंको जयउ जेमिजिणो ॥ ३ ॥

भवतावतवियसत्ते, छाहिं काउं व सगफणच्छत्तो ।

विग्घहरनामंतो, पासजिणिंदो सिवं दिज्जा ॥ ४ ॥

वंदे वीरं वीरं, जलहिजलगहीरममरगिरिधीरं ।

कम्मरयहरसमीरं, भवदवदहण-पसमण-णीरं ॥ ५ ॥

सेसा वि जयंतु जिणा, भवियजणमणनयणप्पसण्णगरा ।
 जेवि नमिरहिययपउम-सहस्सकिरणा सिवं पसा ॥ ६ ॥
 जिणवरवयणुब्भूआ, सब्भूअपयत्थकत्थणे निउणा ।
 अत्थसमत्तसरूवा, सरस्सई देउ बोहं मे ॥ ७ ॥
 इक्कारसवि गणहरे, गोयमपमुहे गुणगणसंजुत्ते ।
 वंदामि ते वि पुज्जे, जाण पसाया सुयं होइ ॥ ८ ॥
 अण्णे वि य गुणगरूआ, चउदस-दसपुब्बिणोऽत्थ आयरिया ।
 मज्झ सह पसीएज्जा, अमोहवयणा जुगप्पवरा ॥ ९ ॥
 वीरजिणीसरसासण-पहावगा सुयपहावसंपुण्णा ।
 जे अण्णे आयरिया, ते मे नाणप्पया होतु ॥ १० ॥
 सिरिहेमबंदसूरी, सव्वण्णुसमो जयम्मि जो जाओ ।
 जास तिसट्ठि-चरियं, जए पसिद्धं विराएइ ॥ ११ ॥
 तग्गयभावे गिणिहअ, पाइअभासानिबद्धमेयं हि ।
 ओज्झाय-मेरु-पंडिय — जसभट्ठाणं मए हेउं ॥ १२ ॥
 जयउ सिरिनेमिसूरी, उद्धारगरो कयंबतित्थस्स ।
 तवगच्छभूसणं मे, पहावगो सासणे पगुरु ॥ १३ ॥
 वच्छल्लवारिही मे, विण्णाणगुरु जएउ सूरिवरो ।
 जास सुहादिदीए, मन्दो वि समत्थओ जाओ ॥ १४ ॥
 कत्थूरायरिएणं, विरहयमेयं महापुरिसचरियं ।
 जाव चरमजिणतित्थं, ताव जयउ भवियबोहगरं ॥ १५ ॥

महापुरिसचरियस्स उवक्कमो-

अह एयाए ओसप्पिणीइ, उसहाइ-वीरपज्जंता ।
 तित्थयरा चउवीसं, बारह भरहाइणो वक्की ॥ १६ ॥
 पडिविण्हणो य नव नव, बलदेवा केसवा य नरवसहा ।
 जाया उत्तमपुरिसा, तिसट्ठि-संखाइ सुपसिद्धा ॥ १७ ॥
 तेसिं पढमं वुच्छं, जिणवर-उसहस्स तेरहभवे य ।
 स म्म इंसण ला हा सिवपयसंपत्तिपज्जंतं ॥ १८ ॥

उसहचरिए पढमो धणसत्थवाहभवो—

अत्थि वलयागारसंथिअ—असंखदीवसमुदेहिं परिवेढिओ लक्खजोयणपमाणा-
यामवित्थरो किंचिदहिगतिलक्खपरिहिसंजुओ जंबूदीवो नाम दीवो । गंगासिन्धुप्पमुह-
महानईहिं भरहाइसत्तखेत्तेहिं हिमवंताइ—छवरिसधरेहिं च समलंकियस्स तस्स मज्झमि-
नाभिव्व लक्खजोयणपमाणुच्चो मेहलत्तयविहसिओ चत्तालीसजोयणुच्चचूलो जिणचेइ-
अमंडिओ सुवण्णरयणमइओ मेरु वट्ठइ । तस्स पच्छिमविदेहेसु खिडपइदिअं नाम महीमहि-
लामंडणं महापुरं आसि । तत्थ महइदीहिं रायमाणो देविंदतुल्लो धम्मकम्मेसु सह साव-
हाणो पसण्णचंददाहिहाणो महाराया होत्था । तम्मिच्चिय नयरंमि धणणामो सत्थवाहो,
सो सरियाणं सागरुव्व संपयाणं ठाणं चिय तस्स लच्छी वि मयंकस्स पदेव
अणण्णसाहारणा परुवयारिक्कफला, सो उरालया—गहीरिम—धीरिमाइ—गुणवरिओ सच्चाण
वि सेवणिज्जो आसी ।

धणस्स वसंतपुरनयरगमणे विचारो—

सो एगया गहियमहाभंडुवारणो वसंतपुरनयरं गंतुं विचारित्था । तओ
सो धणो सयले पुरे डिंडिमं तालिऊणं नयरवासिलोमे इअ उग्योसित्था । ‘इमो
धणसत्थवाहो वसंतपुरनयरं गच्छिस्सइ, जेसिं जणाणं तत्थ गंतुं इच्छा सिया, ते
सव्वे अमुणा सह चलंतु । सो य भंडरहियस्स भंडं, अवाहणस्स वाहणं, असहेज्जस्स
सहेज्जं, संबलरहियस्स संबलं दाहिइ । मग्गे वि चोर—सावयाइकूरपाणिगणेहिंतो
सहगामिवंधवे इव हुब्बले मंदे य सव्वे पालिस्सइ’ । तओ स सुइमुहुत्ते सधव—ललणा-
कयमंगलो रहे उवविसिऊण पट्टणाओ बाहिरं पट्टाणं कासी । तया पत्थाणमेरीस-
इसवणेण वसंतपुरनयरगामिणो सव्वे जणा तत्थ सभागया ।

धम्मघोसायरियस्स समागमो—

पत्थंतरंमि आयरिअणुणगणसमलंकिओ धम्मघोसो नाम सूरिपुंगवो साहुचरियाए विहरंतो
धम्मवएसदाणेण महि पावयंतो सत्थवाहसमीवमुवागओ । धणसत्थवाहो वि तवतेयसा
सहस्सकिरणमिव दिप्पंतं तं आयरिअवरं पासिऊण ससंभमं उट्ठाय कयंजली तस्स
पायसरोयं वंदिऊण समागमणकारणं पुट्टं, सूरिवरेण उच्चं—‘अम्हे तुम्हेहिं समं वसंतपुरनयरं
समागच्छिस्सामो’ सि । तं सोच्चा सत्थवाहो आह—हे भयवं ! धणो अहं जओ अहिगंतूणं
वंदणारिहा तुम्हे अओ अवस्सं मम सत्थेण सह समागच्छिस्सह एवं कहिऊण

निअग्रअगारे कहेइ-एएसिं आयरिअवरियाणं कए असण-पाणाइयं तुम्हेहिं सइ कायव्वं, एवं सोऊण आयरिआ कहिति-‘अम्हाणं मुणीणं नियनिमत्तं कयं कारियं अणुमोइअं च अन्नाइं न कप्पइ, किं च हे सत्थवाह ! सिरिजिणंदसासणे वावी-कूव-तडाग-सरियाइगयं / असत्थोवर्णं जलंपि वारियं, महुगरविचीए आहारगवेसिणो अम्हे, तेण अणेण अलं ।

महुगारसमा बुद्धा, जे भवंति अणिस्सिआ ।

नाणापिंडरया दंता, तेण वुच्चंति साहुणो ॥ १ ॥

एत्थंतरंमि केण वि जणेण सत्थवाहस्स पुरओ पक्कअंवफलभरभरियं एगं थालगं ठविअं । तओ पमोअपुलइअमणो सत्थवाहो मुणिंदं कहेइ-हे भयवं ! अमूइं फलाइं गिण्हह, मं च अणुगिणिहत्था । स्ररी कहेइ-असत्थोवहयं एरिसफलाइयं अम्हाणं फासिउं पि न कप्पइ किं पुणो खाइउं ? । समणायासवणगुणरंजिओ धणो कहेइ-अहो ! दुक्करं समणत्तणपालणं, अम्हारिसेहिं पमायगत्येहिं एगदिवसंपि पालिउं असक्कमेव । तओ सिरिमंताणं जं कप्पणिज्जं तं दाहिस्सं, मइ पसीएह, जहाणुकुलं मए सद्धिं आगच्छिज्जाह एवं वोत्तूण नमिऊण मुणिंदे गमणाय अणुजाणित्था । तओ सत्थवाहो चंचलेहि तुरंगेहिं उट्टेहिं वसहेहिं विविहवाहणेहिं च तुंगेहिं तरंगेहिं सागरुव्व निग्गओ । धणेण सह घम्मघोसायरिअस्स नगराओ निग्गमणं—

अह सामण्णमूलगुणुत्तरगुणगण-समण्णिअ-समणवरेहिं सह आयरिअपुंगवा वि तेण सह चलिआ । सत्थरक्खणत्थं सो धणो सया अग्गओ तस्स य मित्तो माणिभदो पिढ्ढओ चलेइ, उभयपासाओ विविहसत्थधराऽऽसारोहवरसुहदेहिं रक्खिज्जमाणो सत्थपाणीहिं च आरक्खगणेहिं सव्वओ समंतओ परिवेदिओ वइरपंजरमज्झठिओ इव स सत्थो पइमि निग्गच्छित्था । एवं धणो निद्धण-सिरिमंताणं समभावेण जोमं खेमं च कुणंतो सव्वे सह निविग्गेण नेसी । एवं सव्वलोएहिं पसंसिज्जमाणो सो धणो दिणे दिणे रक्खि पयाणं कासी । कईसु पयाणेसु कएसु पहियजणाणं भयंकारो भीसणो अच्चु-हामो सरोवराणं सरियाणं च पयाइं तणूकुणंतो गिम्हउऊ संजाओ ।

गिम्ह-वासा-उउवण्णणं—

तंवणोवि बन्धिच्छदुवमं आतवं वितेणेइ । अच्चंतदूसहो पवणो वाइ । तिच्चातवपीलिआ सत्थपहिआ मग्गे पइतरं उवविसंता पइपवं पवेसं कुणंतो पयं पिच्चा पिच्चा भूमीए पलोद्धिसु । दिणयरस्स तत्तलोहसरिसपयंडकिरणेहिं मयणपिंडुव्व सरीराणि वि विलीणाणि ।

पदमो धणसत्थवाहभवो ॥

एयारिसिगिम्हयाले सत्थजणा पलास-ताल-हिंताल-नलिणी-कयलीदलेहिं तालअं-
टीकएहिं चम्मयं सैमं छिदिंसु । तओ गिम्हयालस्स ठिइच्छेयं, पवासीणं च
गइविच्छेयं कुणंतो मेहच्छाइओ वासायालो संपत्तो ।

खणंतरंमि वारिधरो वि धारा-सराऽऽसारं कुणंतो रक्खसो विव उत्तासं जणिंतो
सत्थपहिंएहिं दिट्ठो । सो जलहरो अलायमिव विज्जुं मुहुं मुहुं भमाडंतो, बालगे इव
पहिंए उत्तासिंतो मुसलप्पमाणजलधाराहिं वासिउं पउत्तो । जलप्पवाहेहिं पुढवीए
सत्त्वं नीयं उच्चं च समीकयं । मग्गो वि पंकवहुलेहिं दुग्गमो संजाओ । कोसो वि
जोयणाणं सयं विअ जाओ । पहिअजणो आज्ञाणुसंलग्ननवकदमो सणिअं सणिअं
चलिउं लग्गो । सयडा वि पंकवियडे खुत्ता, करहा वि खलियपाया पए पए
पडिआ, तथा धणसत्थवाहो मग्गाणं दुग्गमत्तणं पासित्ता तीए महाडवीमज्झंमि
आवासं काऊण संठिओ ।

अडवीए वासो—

ससमणा छरिवरा वि माणिभदेण दंसिए जंतुरहियभूमियले उडय-उवस्सए
वासं अकरिंसु । तत्थ सत्थलोगाणं बहुत्तणओ पाउसकालस्स य दिग्घत्तणओ सव्वेसि
पौहेयं जैवसाइं च खुट्ठिअं । तओ ते सत्थजणा तावसा इव कुवेला छुहावाहिया य कंदमू-
लाइं खाइउं पउत्ता । सत्थवासिजणाणं सत्त्वं नच्चा माणिभदेण सायंकालंमि धणसत्थवाहस्स
पुरओ विन्नत्तं ।

सत्थजणदुहेण धणस्स चिंता सूरिणो य समीवम्मि समागमणं—

सत्थलोगदुक्खसवणचिंताउरस्स सत्थवाहस्स रत्तीए निदावि न समागया ।
रत्तीए चरमे जामेमि निम्मलासओ आससालापाहरिओ एवं वडत्था—

पत्तजसो णु सत्त्वत्थ, गओ वि विसमं दसं ।

सामी अम्हाण पालेज्ज, पडिबणमहो ! इमो ॥ २ ॥

एयं औयणिऊण 'मईए सत्थे अच्चंतदुहिओ को वि इह अत्थि ? जेणाहं
उवालंमिओम्हि अणेण' ति तेणं वियारिअं, हा !! णायं, अकय-अकारिय-अणणु-
मय-पासुअ-भिक्षापेत्तुवजीविणो धम्मघोसायरिअवरिआ मए सह समागया संति ।
जे उ कंदमूलफलाईणि कयावि न फरिसंति, अहुणा दुहिए सत्थे ते संति । तेसिं

१ तालवृन्तीकृतैः । २ धम्म । ३ पाथेयम् । ४ यवसादि-वृणादि । ५ आकर्ष्यं ।

पहंमि जं पओयणं सिया तं अंगीकाऊण मग्गे सह आणीआ । अज्जच्चिअ ते सेइ—
 पहंमि समागया, जडेण मए किं कयं ? वायामेत्तेण वि अज्ज जाव उइअं न कयं,
 अज्ज अहं ताणं सूरिपुंगवाणं नियमुहं कहं दंसिस्सं ? तहवि अज्जावि तेसिं वयण-
 कमलं पासिऊण नियावराहे पक्खालिस्सं, सव्वत्थ वि निरीहविचीणं तेसिं तु किं
 मए कायव्वं ? एवं चिंतमाणस्स मुणिदंसणे ऊसुगचित्तस्स सरोदओ संजाओ । सुइ-
 वत्थविहूसिओ पहाणजणसहिओ धणो सूरिणमुवस्सए समागओ । अब्भंतरे पविसंतो
 सो पावसमुहस्स मंथणदंडमिव, निव्वुर्इए पहमिव, धम्मस्स अत्थाणमिव, कल्लाणसं-
 पयाए हारमिव, सिक्खंस्सीणं कप्पदुममिव, संघस्स अलंकारमिव, मुत्तिमंतं आगममिव,
 तित्थयरमिव धम्मघोसमुणिदं पासित्था । तत्थ के वि साहवो ज्ञाणाहीणअप्पाणो, के वि
 मैउणवइणो, के वि काउस्सग्गे संठिआ, के वि आगमपढणतल्लिज्जा, के वि वायणा-
 दाणतप्परा, के वि गुरुवंदणसीला, के वि धम्मकहं कुणंता, के वि सुअनाणस्स उदेसगा,
 के वि सुअस्स अणुणादाइणो, के वि तत्ताइं वयंता दिहा । सो धणो आयरिअपायपंकयं
 पणमित्ता जहक्कमं साहुणो वि वंदेइ । मुणिदो वि तस्स पावपणासणं धम्मलाई देइ ।

सूरिधणास्तथवाहाणं संलाबो—

तओ आयरिअपायकमले रायहंसो इव उवविसित्ता वोत्तुं, पारंभेइ—‘भयवं ! तया
 सहागमणामंतणं कुणंतेण मए निष्फलं चिअ संभमो दंसिओ, जओ ताओ दिणाओ
 आरब्भ अज्ज जाव न दिट्ठा न य वंदिआ, न य कयावि अण्ण—पाणीअ—वत्थपमु-
 हेहिं सक्कारिआ, मए भूदेण किं कयं ? जं पूयणिज्जा वि एवं अवमणिआ ।
 मम इमं पमायायरणं भयवंता ! तुम्हे सहिज्जाह, महापुरिसा पुढिविक्ख सव्वंसहा
 चिय’ । सूरिणो वि आहु—‘अम्हाणं मग्गंमि दुट्ठ—सावय—चोर पमुहेहिंतो रक्खंतेण
 तुमए किं न कयं ?, अन्नं च तव एव सत्थजणा पासुअं कप्पणिज्जं उइअं असण-
 पाणाइं दिति, तम्हा अम्हाणं सव्वं सिज्झइ, ऊणया कावि न । तओ हे सुद्धासय !
 मा विसायं कुणंसु’ । सत्थवाहो वोल्लेइ—उत्तमा गुणे च्चिय पासंति, तेण
 तुम्हेहिं एवं वुच्चइ । अओ नियपमाण लज्जिओमिह, किंव मयोवरिं किच्चा साहु
 अज्ज मज्झ नेहे पेसह, जहेच्छं आहारं देमि । सूरि आह—‘वट्ठमाणेण जोगेण’ जारिसा
 भिक्खा मुणीणं कप्पइ तं तु तुमं जाणेसि । धणो ‘जं चिय उवयरिस्सइ तमेव दाहं’
 ति वोत्तुणं नमिऊण निआवासे गओ । इमस्स अणुपयमेव साहु—संघाडओ धणावासे
 गओ, तया तस्स अगारे दइव्वजोगओ किमवि कप्पणिज्जं न सिया, तत्तो इओ तओ

गवेसमाणो सुदुनियहिययमिब घयं पासित्था, 'तुम्हाणं एयं कप्पेज्जा' इअ कहिऊण 'कप्पिज्ज'ति वयंतस्स साहुस्स पत्तम्मि सव्वं घयं दिण्णं।

धणस्स घयदाणेण बोहिबीयसंपत्ती—

धण्णो हं कयपुण्णो अहं ति चिंतितो मुणीणं पाए पणमेइ। मुणिणो वि सव्वकल्ला-
णसिद्धीए सिद्धमंतसमं धम्मलाहं दाऊण तओ निग्गया। एवं धणसत्थवाहेण तया
घयदाणपहावेण निम्मलयरभाविसुद्धीए सिवतरुवीयसमं सुदुल्लहं बोहिबीअं पत्तं।

— धम्मवएसो—

रयणीए मुणीण उवस्सए गंतूण मुणिंदं पणमिन्ता पुरओ उवविट्ठो। तया
धम्मघोसत्तिरिंदो मेहशुणिणा देसणं देइ—

धम्मो संगलमुविकट्ठं, धम्मो सग्गाववग्गओ।

धम्मो संसारकंतारुल्लघणे मग्गदेसओ ॥ ३ ॥

धम्माओ भूवो होज्जा एवं धम्माओ वासुदेवो बलदेवो चक्रवट्ठी देवो इंदो अ हवइ,
धम्माहि गेवेज्जय-अणुत्तरेसु अहमिंदत्तणं पावेइ, एत्तो किं किं न सिज्झइ ? जओ
उत्तं—

सग्गो ताण धरंगणे सहयरा, सव्वा सुहा संपया।

सोहग्गाइगुणावली विरयए, सव्वंगमालिंगणं ॥

संसारो न दुरुत्तरो सिवसुहं, पत्तं करंभोरुहे।

जे सम्मं जिणधम्मकम्मकरणे, वट्ठंति उद्धारया ॥ ४ ॥

सो धम्मो दाण-सील-तव-भाव-भेयाओ चउच्चिहो होइ। तत्थ नाणदाण-
अभयदाण-धम्मवग्गहदाणओ दाणधम्मो तिविहो वुत्तो, भव्वजीवाणं धम्मवएसेण नाण-
साहणदाणेण य नाणदाणं कहियं। नाणेण जीवो हियाहियं जीवाजीवाइ-नवतत्ताइं जाणेइ,
विरइं च पावेइ, तओ निम्मलं केवलनाणं लहिऊणं निहिललोमेसु अणुगिण्हित्ता परमपयं च
पावेइ। अभयदाणं तु मणवायाकाएहिं करणकारण-अणुमोयणेहिं पि जीवाणं वहवज्जणाओ
होइ। अभयदाणेण जणो जम्मंतरेसु कंतो दीहाउसो आरुग्गवंतो सुरूवो लायण्णवंतो
दिदसत्तिमंतो य होइ, तओ परलोमे सुहं इच्छंतेण जीवेसु जीवदया कायव्वा। जओ उत्तं—

इक्कस्स कए निअजीविअस्स, बहुआओ जीवकोडीओ।

दुक्खे ठवंति जे केह, ताण किं सासयं जीअं ? ॥ ५ ॥

जं आरुगमुदग्गमप्पडिहयं, आणेसरत्तं फुडं ।

रुवं अप्पडिरुवमुज्जलतरा, कित्ती धणं जुव्वणं ॥

दीहं आउ अवंचणो परिअणो, पुत्ता सुपुण्णासया ।

तं सव्वं सचराचरंमि वि जए, नूणं दयाए फलं ॥ ६ ॥

धम्मवग्गाहदाणं तु दायग-गाहग-देय-काल-भावविमुद्धीए होइ । तत्थ दायग-मुद्धं, नाय-उवज्जिअ-दव्वो नाणवंतो आसंसा-रहिओ अणुतावरहिओ दायगो भवुदहि-तरणत्थं जं देइ तं ।

इमं चित्तं इमं वित्तं, इमं पत्तं निरंतरं ।

संजायं जस्स मे सो हं, कयत्थो म्हि त्ति दायगो ॥ ७ ॥

गाहगमुद्धो-सावज्ज जोगविरओ गारवचयरहिओ तिगुत्तो पंचसमिइजुत्तो रागदोसव-ज्जिओ निम्ममो अट्टारससहस्ससीलंगधारी नाणदंसणचारित्तधरो समकंचणलेट्ठुओ सुहज्जाणट्ठिओ जिइंदियो नाणाविहतवचरणसीलो सतरहविदंसंजमधरो अट्टार-सविहवंभवेरधारगो एरिसो गाहगो मुद्धिमंतो जाणियव्वो । देयमुद्धं तु बाया-लीसदोसरहिअं असण-पाण-खाइम-साइम-वत्थ-सेज्जा-संधाराइअं भवेज्जा । कालमुद्धं-जं किं चि वि काले संजआणं साहूणं दिज्जइ तं णेयं । फलासंसारहिणण सद्धाए अ जं अप्पिज्जइ तं भावमुद्धं जाणिअव्वं । देहेण विणा न धम्मो, आहाराइं विणा न देहो तम्हा धम्मवग्गाहदाणं निरंतरं कायव्वं । सीलं सावज्जजोगविरइ-रुवं, तं दुविहं देसविरइ-सव्वविरइ-भेअओ । तत्थ देसविरइ तिगुणव्वय-चउसिक्खा-वय-थूलअहिंसाइ-पंचाणुव्वयसरुवदुवालसविहा जाणियव्वो । इयं च देसविरइ जइ-धम्माणुरयाणं सुस्ससाइगुणवंताणं सम-संवैग-निव्वेअ-अणुकंपा-अत्थिक्कलक्खणरुवसम्म-दंसणं पडिवन्नाणं मिच्छत्तरहियाणं साणुबंधकोहुदयवज्जिआणं चरित्तमोहणिज्ज-खओ-वसमेण अगारीणं संजायइ । सव्वओ हिंसाइवज्जणेण सव्वविरइ होइ । सा उ सहावओ मंदकसायाणं संसारसोक्खविरयाणं विणयाइगुणसंजुआणं महापुरिसाणं साहूणं भवेइ । जं तु किलिट्ठकम्मकट्ठाणि देहेइ तं तवं बाहिरअभंतरभेअभिन्नं दुवालसविहं जाणेज्जा, दंसणनाणचरित्तधरेसु अणिच्चला भत्ती, तेसिं कउजकरणं, मुद्धिक्किता, संसारदुगुंछा सा भावणा होज्जा ।

चउद्धा कहिओ धम्मो, नीसीमफलदायगो ।

कायव्वो भवभीरुहिं, भव्वेहिं सो सुभावओ ॥ ८ ॥

तओ धम्मवुवएसं सोच्चा धणसत्थवाहो कहेइ—हे भयवं ! अज्ज जाव मज्झ दिणाइं निष्फलाइं गयाइं, अज्ज मे सहलो दिवहो संजाओ, जेण कयावि अपत्तो जिणदेसिओ धम्मो अज्ज मए संपत्तो इअ कट्ठिऊण अप्पाणं पुण्णवंतं मन्नमाणो निआवासे गओ, परमाणंदनिम्ममो सुअधम्मवुवएसविआरणाए रत्तिं नेसी । पच्चूसकाले मंगलपादमो सुत्तुट्ठिअस्स तस्स पुरओ संखगहीरमहुरसदेण पदेइ—‘ववसायहरा पाउसव्व रयणी गया, तेयाभिमुहो भाणु संजाओ, सरयकालो इव नराणं ववसायवयंसो पभायकालो वियं भेइ, दिणयरकिरणेहिं सुवकपंका मग्गा सुगमणा जाया । एयंमि कालंमि ववसायसालिणो सत्थजणा देसंतराई गंतुं तुवरिति’, इअ तस्स वयणं सोच्चा, ‘अणेण पयाणसमओ जाणाविओ’ ति धणसत्थवाहो नच्चा पयाणभेरिं वाएइ । तओ पयाणद्वकासदसवणेण सत्थजणा निअनिअवाहणेहिं चलिउं लग्गा । धम्मघोसमुणिवई वि मुणिवुंदपरिवरिओ विहरिउं पउत्तो । धणसत्थवाहो वि सव्वओ समंता सत्थधरारक्खगपुरिसेहिं रक्खिज्जमाणो निग्गओ । कमेण महाभयाणगाडविं अविग्गेण समुत्तिणे समाणे मुणिंदा वि सत्थवई अणुजाणावित्ता अन्नओ विहरिउं लग्गा । जओ—

समणाणं सउणाणं, भमरकुलाणं च गोकुलाणं च ।

अनिआओ वसईओ, सारइयाणं च मेहाणं ॥ ९ ॥

धणस्स वसंतपुरनयरे आगमणं—

सत्थवाहो वि निरुवदवेण गच्छंतो कमेण वसंतपुरनयरं संपत्तो । तत्थ निय-कयाणगाइं विक्किणंतो पडिकयाणगाणि अ गिण्हंओ भूरिसमिद्धिमंतो संजाओ । तओ धणो गामाणुगामं वियरंतो निअभंडाणि विक्किणंतो नवाइं च गिण्हंतो कमेण निय-नयरंमि समागओ । रण्णा वि बहं मण्णिओ सो धणसत्थवाहो नयरसेट्ठिपयं संपत्तो लोगाणं च विसमकज्जेसु पुच्छणिज्जो वीसासारिहो अ जाओ । सो धणसत्थवाहो कमेण पुण्णाउसो—

धणस्स जुगलिघनरत्तजेण समुप्पत्ती— (पदमो भवो समत्तो ॥ १ ॥)

मुणिदाणपहावेण एयंमि जंबूदीवंमि सीयामहानईए उत्तरतडंमि उत्तरकुरु-नामखित्तंमि जुगलधम्मणेण समुप्पण्णो । तत्थ ठिआ जणा अट्ठमतवपज्जंते आहारा-मिलासिणा जुगलरूवा कोसतिगुच्चा तिपल्लुवमाउसा पज्जंतसमयपसवा मंदकसाया ममत्तरहिआ एगूणपन्नासं दिणाइं अवच्चजुगलं पालित्ता पज्जंते मरणं लहिता सुरेसुं ते उववज्जिरे । उत्तरकुराए भूमीओ सहावओ रमणिज्जाओ संति, मज्जंगपमुइ-

इसविहकपतखणो जुगलमणूसाणं सइ वंछिआइं अट्ठाइं दिंति । जओ उत्तं—

उत्तरकुराए प्यतरवो—

मज्जंगकप्पमुहा तत्थ, दसहा कप्पपायवा ।

मणुआणमजसेण, सइ अप्पिंति वंछिअं ॥ १० ॥

तत्थ मज्जंगकप्परुक्खा सोहणं साउतरं मज्जं १, भिगतरवो भायणं २, तुरि-
अंगा विविहलयजुत्ताइं वज्जाइं समप्पिंति ३ । दीवसिहा जोइसिआ य अत्त्वब्भुअं
उज्जोअं कुणंति ४-५ । चित्तंगा पुप्फाइं मल्लाइं च ६ । चित्तरसा भोज्जं ७, मणि-
अंगा भूसणाइं ८, गेहागारा घराइं ९, अंगगिणकप्पतरुणो दिव्वाइं वत्थाइं दिंति १० ॥
अण्णे वि कप्पतरवो तत्थ मणवंछिअदायगा संति । सो धणजीवो कप्पतरू
संपन्नसयलभोगो देवो इव पंचिदियविसयमुहाइं भुजंतो सुहेण कालं विणेसी । तओ
सो धणजीवो निअं जुगलधम्माउसं पालित्ता पुव्वजम्मदिण्णसुपत्तदाणाणुभावओ
सोहम्मकप्पे सुरो होत्था ।

सोहम्मकप्पे उप्पाओ—

बीओ जुगलिअभवो तइओ अ सुरभवो समतो ॥ २-३ ॥

अउत्थो महाबलभवो—

अह सो धणजीवो सोहम्मकप्पाओ चविऊण यच्छिमविदेहेसुं गंधिलावईए विजए वेअ-
इहपव्वए गंधारनामजगवए गंवसमिद्धपुरे विजजाहरपइणो सयबलस्स रण्णो चंदरुंतमज्जाए
पुत्तत्तणेण समुप्पन्नो । सयबलस्स रण्णो पुत्तो महाबलो जाओ, बलेण नामेण य सो महाबलो
संजाओ । रक्खगपुरिसेहिं रक्खिउजमाणो मायपियरेहिं च लालिउजमाणो कमेण सो बुद्धिं
पत्तो । कलानिहिव्व सणियं सणियं समग्गकलासंपुण्णो जणाणं नयणाणंदयरो महाभागो
होत्था । स समयाइण्णु समए मायपिऊणं आएसाओ मुत्तं विणयसिरिमिअ विणय-
वई कन्नं परिणेंसु । अह सो कामिणीजणकम्मणं रइलीलावणं जोव्वणं पत्तो । एगया
सयबलो विजजाहरवई निम्मलबुद्धी महासत्तिमंतो तत्तजाणगो इमं चित्तित्था—

उत्तमा अप्पचिंता सा, कामचिंता उ मज्झिमा ।

अहमा अत्थचिंता सा, परचिंता उहमाहमा ॥ ११ ॥

सयबलस्स वेरग्गं

हुवालसदारेहिं मलसाविणी काया निम्मलाहार-वत्थाहूसेणेहिं वारंवारं सकारिआ
वि खलुव्वं विविकअं पावेइ न कं पि गुणमावहेइ । सरीराओ बाहिरनिग्गय-मल-मुत्त-

सिलिम्हेहि दुगंछणा जइ जायइ तथा देहंतगाएहि तेहि किं न ? एयंमि देहे
अच्छंतबीहणगकारिणो 'अयंढे सप्पा इव रोगा समुव्वर्धन्ति ।

स्वमसासयमेवं, बिज्जुल्लयाच्चंचलं च जए जीअं ।

संझाणुरागसरिसं, खणरमणिज्जं च तारुणं ॥ १२ ॥

जीअं जलबिंदुसमं, संपत्तीओ तरंगलोलाओ ।

सुमिणयसमं च पिम्मं, जं जाणसु तं करिज्जासु ॥ १३ ॥

सरीरंतट्टिओ वि अप्पा सव्वया कामकोहाइतावेहि ताविज्जइ, परिणाम-
कडुफलदायगविसएसु सुहं मन्नमाणो असुइमज्झट्टिअकीडगुव्व मणयंप्पि अहो !! न
विरज्जइ, कामभोगाऽऽसत्तमणो अंधो कूवमिव पायगाओ ठिअं मच्चुं न पासइ, विस-
संनिह-विसएसु गिद्धो अप्पा अप्पणो हिआय न पयट्टेइ धम्माइचज्जसु, अणाइकाल-
ऽब्भासाओ पावसरूवअत्थकामेसु पयट्टेज्जा, न पुणो धम्ममोक्खेसुं । अपारे भवजल-
हिमि महारयणमिव पाणिगणाणं अईव दुल्लहं मणुअत्तणं, तंमि लद्धे वि पुण्णजोगओ
जिणीसरो देवो, सुसाइवो गुरवो, जिणंदपणीओ अ धम्मो पाविज्जंति, तओ एएसु
पत्तेसु पमाओ न कायव्वो । जओ उत्तं—

पाविअ दुल्लहलंभं, बिज्जुल्लयाच्चंचलं च मणुअत्तं ।

धम्मंमि जो विसीयइ, सो काउरिसो न सप्पुरिसो ॥ १४ ॥

तम्हा एयंमि महाबलकुमारंमि रज्जभारं समारोवित्ता अप्पणो समीहियं कुणेमो
एवं विआरित्ता रज्जगहणहेयवे विणयसंपण्णं महाबलकुमारं बोद्धाविज्जण रज्ज-
दाणाय बोहित्था, सो अणिच्छंतो पिउआणाए रज्जभारं घेत्तुं अणुमणित्था ।

महाबलो राया जाओ सयबलस्स य दिक्खा—

तओ सो सयबलनरिंदो सीहासणम्मि महाबलं उवविसावित्ता निअहत्थेण तिलगमंगलं
काही । तेण सो कुंदसोयरकंतिणा चंदणतिलणं इंदुणा उदयगिरिव्व सोहीअ । तस्स अभि-
सेयसमए चंदुदए समुद्धो इव मंगल्लदुंदुही सव्वदिसाओ गज्जाविंती वाइत्था । सव्वओ
मंतिसामंतपमुहवरपुरिसेहिं समागतूण बीओ सयबलनरिंदुव्व सो महाबलनरवई सविणयं
पणमिओ । एवं सयबलमहीवई रज्जम्मि पुत्तं निवेसित्ता तओ दीणाणाहार्षणं दाणं
दाऊण नरवईकयमहसवपुव्वयं जुगप्पहाणगुणगणधारगाइरिआणं संनिगासे निव्वंत्तो ।

सो रायरिसी केरिसो जाओ ?—

मिउमहवसंपन्ने, गम्भीरो सुसमाहिओ ।

विहरइ महिं महप्पा, सीलभूएण अप्पणा ॥ १५ ॥

एवं सो मुणिवरो गहणासेवणसिक्खाए गुरुवराण पासंमि रयणत्तयं अब्भसंतो सच्चत्थ समचित्तं भावितो, जिइंदिओ कोहाइअरिणं जिणंतो, 'अज्झप्पविसोहि-
जुत्तो सत्थपारगो समिइगुत्तिजुत्तो दूसहपरीसहे अहिसहंतो मेत्ती—पमोय—कारुणा—मज्झत्थ
भावणादिण्णचित्तो परमपए इव अमंदाणंदरससागरनिमगो संजमाराहणसीलो संजाओ,
एवं कमेण रायरिसी महप्पा ज्ञाणेण तवसा य निम्मलचारितं आराहिऊण अंते
अणसणेण निआउं सम्मं अइवाहिता सग्गसंपयं संपत्तो ।

अह सो महाबलनरिंदो सबलाणेगखेअरुवुंदेहिं परिवरिओ इंदो इव अखंडसासणो
पुढविं पसासेइ । स रमणिज्जरमणीपरिअरिओ पसणचित्तो रम्मारासणेसीसु कमलिणी-
वणखंडेसु रायहंसो इव कया कीलेइ, अग्गओ पासओ पच्छा नारीगणपरिवेढिओ
सो सक्खं मुत्तिमंतो सिंगाररसो इव कया दीसइ, एवं केवलं विसयकीलासत्तचित्तस्स
तस्स धम्मविपुहस्स निष्फलाइं दिणाइं जंति । एगया सो महाराओ अवरमणि-
मययंभसरिसागेगामच्च—सामन्तपुहविसिट्ठजणविराइअसहाए उवविट्ठो होत्था ।
तया रण्णो पहाणमन्तिवरा सयंबुद्धो संभिन्नमई सयमई महामई अ नरिंदं पणमिता
जोगिणो इव महीवइदिण्णेगचित्ता सहामज्जे नियनियासणम्मि उवविट्ठा संति । तत्थ
सम्मदिट्ठो सयंबुद्धो जो निअसामिभत्तिवच्छलो कल्लाणमित्तो बुद्धिरयणरोहणायलुव्व
आसी । जओ—

जोएइ य जो धम्मे, जीव विविहेण केणइ नएण ।

संसार-चौरगगयं, सो नणु कल्लाणमित्तो त्ति ॥ १६ ॥

सयंबुद्धिमंतिचित्तणं, महाबलं च पइ उवएसो—

सो केवलकामभोगासत्तं नरवइं दट्ठूण विचितेइ—अम्हाणं सामी दुहंतइदिएहिं
विसयासत्तो पासमाणेसु अम्हेसु हरिज्जइ, तओ तं उविकखमाणानं अम्हाणं धिद्धी ?? ।
विसयाणंदमग्गचित्ताणं धम्मकम्मविहीणानं अम्हाणं सामीणं निरत्थयं जम्मं गच्छइ त्ति
ये मणो तम्मेइ । जइ अम्हेहि एसो धम्मसम्पुहो न करिज्जइ तथा अम्हाणं नैम्म-

मंतीणं च किं अंतरं होज्जा ? । तओ कहं पि अम्हेहिं नरिंदो हिअपहंमि नेयव्वो,
कया वि सामिवसणजीविणो एए दुट्ठमंतिणो मं निदिस्सइ अणेण किं मम ? एवं
विआरित्ता सव्वमंतिपहाणयमो सो सयंबुद्धो मंती रइयंजलो रायाणं विण्णवेइ-हे महाराय !
ससारंमि समुद्धो नदीजलेहिं, वडवाणलो समुद्धजलेहिं, जमो जंतूहिं, अग्गी ईध-
णेहिं न 'तिप्पइ, तहा जीवो वि पंचिदियविसयसुहेहिं कया वि किं तित्ति पावेइ ? ।

अधिराण चंचलाण य, खणमित्तसुहंकराण पावाणं ।
दुग्गइनिबंधणाणं, विरमसु एआण भोगाणं ॥ १७ ॥
सत्तलं कामा विसं कामा, कामा आसीवीसोवमा ।
कामे पत्थेअमाणा, अकामा जंति दुग्गइ ॥ १८ ॥
तिलमित्तं विसयसुहं, दुहं च गिरिरायसिगतुंगयरं ।
भवकोडीहिं न निट्ठइ, जं जाणसु तं करिज्जासु ॥ १९ ॥
मयणेण मएणेव, जणो परवसीकओ ।
सयायारपहंभट्ठो, पंडए च्च भवावडे ॥ २० ॥

विसयवल्लीओ इव इत्थीओ दंसणेण फासणेण उवभोगेण य अच्चवंतं वामोहाय
- च्चिअ जायन्ते । अणं च एए नैम्मसुहिआ खाण-पाणिक्कदिणवित्ता सामिणो
परलोगहियं न चित्तिरे, अहो ! दुज्जणा नियत्थसाहणपरा, कुलीणाणं दुज्जणसंसग्गाओ
अव्वुद्धओ कुओ होज्जा ? , जओ बोरीतरुसंनिहिंमि कयली कयावि किं नंदइ ? ।
तओ हे सामि ! पसीअसु, सयं विउसो असि, विमूढो मा भवाहि, वसणासत्ति परि-
चइत्ता धम्ममि मणं ठविज्जाहि । जओ उत्तं—

नरनरवहदेवाणं, जं सोक्खं सव्वुत्तमं लोए ।
तं धम्मेण विट्ठप्पइ, तम्हा धम्मं सया कुणसु ॥ २१ ॥
जाणइ जणो मरिज्जइ, पेच्छइ लोओ मरंतयं अन्नं ।
न य कोइ जए अमरो, कह तह वि अणायरो धम्मे ॥ २२ ॥
धम्मो बंधू सुमित्तो य, धम्मो य परमो गुरु ।
सुक्खमग्गपयट्ठाणं, धम्मो परमसंदणो ॥ २३ ॥

जहा देवहीणं चेइअं, चंदरहिआ रयणी, अवारित्तेण जई, नयणहीणं मुहमिव
निद्धम्मो नरो न सोहइ । अहियं किं बुच्चइ ? , धम्मेणेव नरा सग्गे दिविंदाइसुहं

माणुसमवे अ चकवटित्तणं विज्जाद्वरत्तं च नरिंदत्तणं च लद्धूणं लोयग्गपयं पावेइरे ।
अओ हे नरवर ! उक्किट्ठपयलाहाय धम्मं चिय सरणं गच्छाहि । एवं सयंबुद्धमंतिस्स
वयणं सोच्चा अच्चंतमिच्छत्तदोसकलुसिओ इलाहलोवममई संभिन्नमई आह—
संभिण्णमइणो चच्चागमयदंसणं—

सयंबुद्ध ! सुट्ठ सुट्ठ महारायस्स हिअचित्तगो तुमं असि, उगारेहि आहारो
इव गिराए भावो नज्जइ । सरलस्स सयापसण्णमणस्स नियसामिणो हियट्ठं तारिसा
चिअ कुलामच्चा वयंति न अगरे, निसग्गकट्ठिणओ तुज्झ को उवज्झाओ अज्झावगो होत्था,
जओ पहुणो पुरओ अयंडासणिपायसरिसं जं एवं वयासी । भोगट्ठीहिं पुरिसेहिं
इह नरिंदो सेविज्जइ, तेहिं 'तुमं कामभोगां मा भुंजसु' एवं कं वुच्चइ ।

जो धुवाइं परिचिच्चा, अधुवं परिसेवए ।

धुवाइं तस्स नस्संति, अधुवं नहमेव य ॥२४॥

एयं हि हत्थगयचक्खणिज्जं हिच्चा कुप्पराळेहणसरिसं चिअ ।

परलोगफलओ धम्मो जं कहिज्जइ तं तु अजुत्तमेव, जीवस्साऽभावेण परलोगो
नत्थि च्चिअ । पुढवी-आउ-तेउ-वाऊहिंतो चेयणा गुंल-लोट्ठुदगाईसुं मयसत्तीइव समु-
ब्भवइ, सरीराओ भिण्णो को वि सरीरो न विज्जइ, जो सरीरं चिच्चा परलोगं गमिस्सइ ।
अओ नीलंकेण पंचिंदियविसयसोक्खं भोत्तव्वं, अयं निओ अण्णा भोगाओ न बंचणीओ,
ससविसाणुव सुहेसु अंतरायकारिणो 'धम्मो अयं, अहम्मो अयं' ति न संकणिज्जा,
धम्म-अधम्मा न संति च्चिअ । अण्णं च—

उव्वज्जंति विवज्जंति, कम्मणा जइ जंतवो ।

उव्वज्जंति विवज्जंति, बुव्वुआ केण कम्मणा ॥ २५ ॥

सव्वहा जीवाणं अभावाओ 'जो एव जीवो मरइ सच्चिअ पुणो उव्वज्जेइ'
एयं तु वायामेत्तमेव । ताओ हे महाराय ! सिरिसकुसुमतुल्लसेज्जाए रुवलायण-
जुत्ताहिं सुंदरीहिं समं सेच्छाए रमसु, अमयसरिसासणाई साउरूवाइं पिज्जाइं जहासई
भुंजसु, कप्पूरागरुक्तथूरीचंदणचच्चिअदेहो 'एगसोरब्भनिप्पण्णो इव अहोनिंसं
चिट्ठाहि, उज्जाण-जाण-चित्तसालाइ-विविहसोहं पेच्छिज्जसु, वेलु-वंस-वीणा-मिअंस-

तुरिआइ-निणाएहिं अहोरत्तं तुमं विलसिज्जाहि, एवं जावज्जीवं पंचेदियकामभोगो-
बभोगेहिं सुहं जीवेज्ज, अलाहि धम्मकज्जेहिं, जयंमि धम्माधम्मफलं न सिआ ॥

सयंबुद्धमंनिकयजीवसिद्धी -

तओ संभिणमइणो वयणं सोच्चा सयंबुद्धो वएइ, हे संभिन्नमइ ! एवं वयंतेहिं
स-परमत्तूहिं नत्थिअजणेहिं अंधेहिं अंधा विव दुग्गईसुं पाडिज्जंति, थिरत्थु ताणं ।
अयं जीवो सुहदुहजाणगो स-संवेयण-वेयणिज्जो अत्थि । बाहाभावाओ, न हि केणइ
निसेहिउं सकिज्जइ । जीवं विणा कया वि सुहिओ हं दुक्खिओ हं ति पच्चओ कस्स
वि न जायए । एवं निआणुभावाओ निअसरीरे जीवे साहिए परसरीरे वि जीवो
अणुभाणप्पमाणाओ सिज्जइ जहा परसरीरे वि जीवो अत्थि, सच्चत्थ बुद्धिपुच्चाए किरि-
आए उलंभाओ, जो एव जंन् मरइ स एव पुणो उव्वज्जइ, एवं जीवस्स परलोगो
वि असंसयं अत्थि, एगं चिअ चेयणं बालत्तणाओ जोव्वणं इव, जोव्वणाओ अ
बुद्धत्तणं इव जम्माओ अन्नहिं जम्ममंमि जायइ । पुव्वचेयणस्स अणुवत्तणं विणा
कहं असिक्खिअबालो थणंमि मुहं अप्पेइ ? अण्णं च अचेयणभूएहितो चेयणो कहं
जायइ । जयम्मि कारणस्स अणुरूपं हि कज्जं दीसइ, देह-जीवाणं कयावि अभि-
णत्तणं न कहणिज्जं, मरणावस्थाए कलेवरंमि जीवो न उवलब्भइ । तओ देहाओ
भिण्णो परलोग-गमिरो अयं जीवो अत्थि, धम्माधम्मनिबंधणं परलोगो वि विज्जइ ।
अओ महाराय ! दुग्गइदाइणो सग्गइविरोहिणो पंचेदियविसए दूरओ मुंचसु, एगो
राया होइ एगो रंको एवं सिरिमंत-दलिदाणं धीमंत-जडाणं सुख-कुख्खाणं सबल-
दुब्बलाणं निरोग-रोगपीलिआणं सुहग-दुहगाणं च तुल्ले वि मणुअत्तणे जं अंतरं तं
धम्माधम्मनिबंधणं नायव्वं, 'एगं बाहणं होइ अन्नो तं आरोहइ, एक्को अभयं
सग्गइ वीओ अभयं देइ' एयं धम्माधम्मफलं णाऊण हे सामि ! दुज्जणवयणमिव
अहम्मो चयणिज्जो, वीयरागवयणमिव सिवसम्मिककारणं धम्मो धेत्तव्वो होइ ।
एवं सयंबुद्धो खणभंगुराइणो सयमइणो खणिअवायं, 'मायामयं च जगं' ति बाइणो
महामइस्स मायात्रायं च विविहजुत्तिपुरस्सरं निराकरित्ता नरिंदं कहेइ-रायवर !
कामभोगासत्तेहिं विवायकुसलेहिं पुणोदयविमुहेहिं एवहिं तुमं पयारिज्जसि, तओ
त्रिवेगं आलंबित्ता कामभोगे दूरओ चइज्जासु, इह परत्थ य कल्लाणाय धम्मं चिय सेवि
ज्जाहि । अह धम्मियवयणसवणपसण्णवयणो राया वएइ-निम्मलबुद्धि ! सयंबुद्ध ! तुमए
अईव सोहणं वुत्तं, अवस्सं धम्मो कायव्वो, न अम्हे धम्मविरोहिणो किंतु समए एव

धम्मो आयरणिज्जो 'बालत्तणे विज्जाए अब्भासो कायव्वो, जोव्वणे य विषयभोगा भोत्तव्वा, बुद्धत्तणम्मि अ मुणित्तणं कायव्वं' ति कामभोगजोगाजुव्वत्तणं लद्धूणं को तस्स उइअं उवेक्खेज्जा, तुमए अवसरं विणा धम्मवएसो कओ, 'वीणाए वाइज्जमाणीए वेय-उग्गालो किं विरायइ?' धम्मस्स फलं सगाइआइ तं संदिद्धं चिअ, तओ इहभविग-विसय सुहाऽऽसायरसं असमए किं निसेहसि ? ।

सयंबुद्धमंतिकहिओ नरिंदस्स पियामहअइवल्लवुत्तंतो—

अह सयंबुद्धो कयंजली विण्णवेइ-आवस्सयकरणिज्जधम्मफलंमि अण्णाहा न संकित्था, एगया नरवर ! बालत्तणे अम्हे नंदणवणम्मि गया, तया तत्थ अचवंतसुंदररूवधरं एगं सुरवरं पासित्था किवासीलो सो देवो तया एवमाह-हे निव ! तव अहं अइवल्लो नाम पियामहो अम्हि, संसारभयविरत्तमणो तिणमिव रज्जसिरिं चइत्ता पवज्जमुवागओ, निम्मलयरचारित्ताराहणेण अंते अणसणं गहिउण लंतगदेवल्लोगे तस्स अहिसो अहं जाओ 'तुमए वि धम्मकज्जंमि पमाओ न कायव्वो' इअ वोत्तूण पयासिआगासो विज्जुव्व सो तिरोहिओ आसि । तओ पचक्खे वि पमाणंतरकप्पणाए किं ?, अओ महाराय ! पियामहस्स वयणं सुमरंतो 'परलोगो अत्थि' इअ मण्णसु । नरिंदोवि बोलेइ-मंतिवर ! जं तुमए पियामहस्स वयणं सारिओ तं सोहणं कयं, अहुणा हं धम्माधम्मनिबंधणं परलोगं मण्णेम्मि । अह अण्णाणतमतइविणासणभक्खंरसमो सो मंतिवरो समयं लद्धूणं साणंदं बोत्तुं पारंभेइ—

हे नरीसर ! पुरा तुम्ह वंसम्मि कुरुचंदो नाम नरिंदो होत्था, तस्स भज्जा कुरुमई, हरिचन्दो नाम पुत्तो । स निवई सुगयभत्तो महारंभमहापरिगहेसु सया रओ, जो कयंतुव्व सव्वया पाणिहिंसाइ-निंदणिज्जाऽणज्जकज्जेसु निइओ होसी । पंचेदियविसयसुहाइ एगंतं भुंजंतस्स धम्मविमुहस्स तस्स अंतिमस-मए आसण्णनरगदुक्खवैणिगामेत्तसंनिहो सत्तधाउप्पकोवो संजाओ, जेण तस्स सुउमा-लतूलसेज्जा कंटगसेज्जा इव दुहदाइणी जाया, साउसुरसअसणाइंपि लिंवरसुव्व विर-साणि अ जायाइ, चंदणागरुकूपूरकत्थूरीपमुहसुगंधपयत्थाइंपि दुग्गंधसरिसाइ होहीअ, भज्जापुत्तमिताइ-परिवारजणा य सत्तुव्व चक्खूणं उव्वेगजणगा होत्था, अहवा पुण्णक्खए सव्वं विवरीयत्तणं जायइ । तया कुरुमई हरिचंदो अ तं नरिंदं पच्छण्णं

आणंददायगसुहेयविसयउचयारेहिं पडिजागरित्था । कास-सास-सूलजराइवाहिवाहिओ पच्चंगं इंगालेहिं चुंविज्जमाणो इव दाहविग्गलो रुद्वज्जाणपरो स भूवई मरणं पत्तो । तओ तस्स पुत्तो हरिचंदो तस्स उद्धदेहियं किच्चा सयायारपहासत्तो नायपुरस्सरं रज्जं पालेउं लग्गो । सो राया एत्थ वि पावफलं निअपिउणो अच्चंतदुक्खनिबंधणं मरणं ददूणं गहेमुं सूरमिव पुरिसद्वेमुं धम्मं विअ पसंसित्था । अण्णया सो निअवा-लमित्तं सावगं सुबुद्धिमंतिवरं कहित्था, 'तुमए पइदिणं धम्मसत्थविउसेहिंतो धम्मं सोच्चा मम सो कहिअव्वो' एयं सुणिऊण सुबुद्धी मंती निच्चं निअपण्णाऽणुसारेण रण्णो पुरओ जिणिदयणीअयम्मं कहिउं तपर्रो जाओ, 'जओ अणुकूलपवत्तणं सज्ज-णाणं ऊसाहकारणं होज्जा' एवं सुबुद्धिकहिअं धम्मं सुणमाणो रोगभीओ ओसहमिव पावभीओ तं सइहीअ । अण्णया नयराओ बाहिरं उज्जाणमज्झम्मि सीलंधरमुणिस्स उप्पण्णे केवलनाणे तस्स महूसवं काउं देवा समागया । सुबुद्धिणा एयंमि वुत्तंते कहिए सद्धातरंगिअमाणसो आसारूढो सो राया तं मुणिंदं उवागओ, तं पणमित्ता उवविट्ठे नरिंदे स केवलनाणी महामुणी अन्नान्तमहरणिं धम्मदेसणं अकासी । देसणंतो स भूवई कयंजली तं मुणिंदं पुच्छित्था-हे भयवं ! मम पिआ मरिऊण कं गइं पत्तो ? । अह सो केवलिवरो वयासी-महाराय ! तव पिआ तिव्वपावुदएण अंतो बहुदुक्खं अणुभविऊण सत्तमिं नरगावणिं गओ । तारिसाणं महाघोरकम्माणं न अन्नं ठाणं सिआ । तं सोच्चा संजायसंवेगो स महीवई मुणिंदं पणमिऊण उट्ठाय नयरम्मि समागओ । पुत्तस्स रज्जं दाऊणं सुबुद्धिं मंतिं आह-हे मंतिवर ! इं पव्वज्जं गिणिहस्सं । तुमं मम इव मज्झ पुत्ते वि जिणिदधम्मं सइ उवदिसाहि । सो वि आह-हे नरिंद ! अहंपि तुमए सह पव्वइस्सं, मम पुत्तो तुम्हाणं पुत्तस्स अगओ धम्मं कहिस्सइ । तओ ते राय-मंतिणो कम्मगिरिभेयणकुलिपसरिसं महव्वयं गिणिहत्था, निम्मलयरविसुद्धीए उगगतवसा किलि-ट्टकम्माइं खवित्ता केवलनाणं लद्धूणं सिवं पत्ता ।

दंडगनरिंदवुत्तंतो-

अवरं च तुम्हाणं वंसे पुरा पयंडसासणो दंडगो नाम पत्थिवो अहेसि । तस्स पुत्तो मणिमाली नाम जयम्मि विक्खाओ संजाओ । सो नरिंदो पुत्तमित्तकलत्तेमुं सुवण्ण-मणि-रयण-रययधनेमुं च अच्चंतमुच्छावंतो अभू । कालकमेण अट्टज्जाणपरो सो निवो मच्चुं पाविअ नियमंडागारे अयगरत्तणेण समुववन्नो । तत्थ ठिओ दारुणसरूढो सव्व-भक्खिहुआसण इव उदित्तो जो जो मंडागारं पवेसइ, तं तं गसेइ । एगया मंडागारं

पविसंतो निअपुत्तो मणिमाली पुव्वजम्मजाइसरणाओ अयं मे पुत्तत्ति उवलक्खिओ,
 पसंतागिइं दंसितो सो अयगरो ससिणेहो मुत्तिमंतो पुव्वजम्मनिअवंधू इव को वि
 एसो त्ति मणिमालिणा जाणिओ । तओ मणिमालिनरिंदो कासइ ओहिनाणसंपन्न-
 महाग्घुणिवरस्स समीवाओ तं नियं पियरं नच्चा, तस्स पुरओ उवविसित्ताणं जिणिंदभा-
 सिअं धम्मं कहित्था । तओ सो अयगरो अरिहंतधम्मं पावित्ता अणसणं च अंगि-
 किच्च सुहज्झाणपरो मरिऊण देवलोगं गओ । पुत्तनेहेण सम्माओ आगंतूण स देवो
 दिव्वमुत्ताहलमंडिअं हारं अप्पित्था, सो हारो अज्जावि तुज्झ हियए अत्थि । हरिचं-
 दनरिंदवंसम्मि तुमं सुबुद्धिमंतस्सि य वंसम्मि अहं जाओ, तओ कमागयनेहभावो
 धम्मे तुमं पवट्ठिज्जसि । जं तु अयंडे विण्णत्तो किज्जए तत्थ कारणं सुणिज्जउ ।
 सयंबुद्धस्स असमए उवएसस्स कारणं--

जं अज्ज नंदणवणम्मि जगभावपयासगे महामोहतमच्छेदगे एगतथ मिलिए निसागर-
 दिवागरे इव दुवे चारणसमणग्घुणिणो पासित्था । नाणातिसयसोहिल्ला भव्वजीवाणं
 देसणं कुणंता ते दुग्घिण मुणिवरा समए तुम्हकेराउसयमाणं मए पुट्ठा । तेहिं तुम्हाणं
 मासमेत्तं आउं निवेइअं, एएण कारणेण धम्माय अज्ज महाराय ! तुवरेमि । महा-
 बलनरिंदो अप्पं नियाउसं सोच्चा वएइ--सयंबुद्ध ! बुद्धिनिहाणं ! तुमं चिय मम एगो
 वंधू असि, जं तु मम कज्जट्ठं एवं तम्मेसि । विसयपसत्तं मोहनिदाए निदालुं मं
 सासेहि, किं आराहेमि ? । मए अप्पम्मि आउसम्मि अहुणा कियंतो धम्मो साह-
 णिज्जो, 'केरिसं कूवखणणं सज्जो लग्गे पलीवणे' । सयंबुद्धो एवं कहेइ--मा विसीअसु,
 धीरिमं धरेसु, परलोगिक्कमित्तं जइधम्मं अंगीकुणसु ।

एगदिवसं पि जीवो, पव्वज्जमुवागओ अणण्णमणो ।

जइवि न पावइ मोक्खं, अवस्सं वेमाणिओ होइ ॥२६॥

महाबलनरिंदस्स दिक्खा अणसणं च--

'आमं'ति वोत्तूणं नियरज्जे नियपुत्तं ठविऊण महाबलनरिंदो दीणाणाहज्जाणं
 तारिसं दाणं दासी, जहा न को वि धणरहिओ आसी । अवरो इंदो इव स सव्व-
 चेइएसु विचित्तवत्थ--माणिककुसुमेहि पूअं अट्ठाहिआमहसवपुव्वं अकासी, तओ
 सयणं परिवारं च खमिऊण आयरिअपायकमले मुक्खसिरिसहिं पव्वज्जं गिण्हेइ,
 विसुद्धोए पवट्ठमाणमणो सो सव्वसावज्जजोगविरईए समं चिय चउव्विहाहारं पच्च-

क्खाणं समायरेइ । तओ निरंतरं समाहिपेऊसदहमग्गो भोज्जाइं भुंजन्तो इव पेज्जाइं पिवंतो इव स अक्खीणदेहतेओ मद्दासत्तसिरोमणी मणयं पि गिलाणं न पत्तो, एवं सुस-
माहिओ पंचपरमिट्ठिनमुक्कारं सुमरंतो वावीसदिणाइं अणसणं काऊणं ईसाणदेवलोगे सिरि-
प्पहविमाणे सयणिज्जसंपुडम्मि वारिघरगम्भे विज्जुपुंजो इव समुप्पन्नो ।

चउत्थो महाबलभवो समत्तो ।



पंचमो ललियंगदेवभवो—

ललियंगदेवो तस्स य समिद्धी—

दिक्खागिई सुसंठाणो, सत्तधाउज्झिअंगओ ।

सिरीससुउमालंगो, कंतिकंतदिगंतरो ॥२७॥

वज्जकाओ महोसाहो, पुण्णलक्खगलक्खिओ ।

कामरुवो ओहिनाणी, सच्चवित्ताणपारगो ॥२८॥

अणिमाइसुणोवेओ निदोसो अर्चितणिज्जवेभवो सो ललियंगुत्ति जहट्टनामेण
पसिद्धो जाओ, जेण पाएसु रयणकडगा, कडोतडम्मि कडिसुत्तं, हत्थेसु कंकणजुगलं,
सुएसुं अगयजुम्पं, वच्छम्मि हारलट्ठी, कंठे मेवेज्जयं, मुद्धानंमि माला किरिडो अ इच्चा-
इभूसणवुंदं दिक्खाइं च वसणाइं तस्स सव्वंगभूसणं जोव्वणेण सह जायइ । मंगलपाट्ठगा
'जय जय जगदाणेदो' ति पढिउं लग्गा । अह सो सुत्त-उट्ठिओ इव सव्वओ
पासंतो चित्तेइ—'किं इंदयालं ? किं सिविणो ? किं माया ? किमिव एरिसं ? किं एयं
गीयनिच्चाइं मं उद्विडिऊण पयइइ, अयं लोगो विणीओ सम नाहाय किं चिइइ ? इमं
सिरिमंतं रम्मं कल्लाणसयणं केण कम्मेण अहं पावित्था' इअ विचारंतं तं सुक्कोमलाइ
गिराए कयंजली पडिहारो विण्णवेइ—हे नाह ! अम्हे अज्ज धण्णा कयपुण्णा य, जेण तुमए
सामिणा सणाहा जाया, पेऊससरिसदिट्ठीए विणमिरेसु अम्हासु पसायं कुणाहि, हे सामि !
ईसाणकप्पो एसो जहासंकप्पिअ-पयायगो अणप्प-अक्खीण-सिरिओ सया सुहनिहाणं
सिआ, एयंमि देवलोगे तुमए पउरपुण्णेण उवज्जिअं सिरिप्पहं इमं विमाणं साहुं
अहुणा अउंहुणेसि । अमी तुम्हाणं सहामंडणं सामाणिआ सुरा, एए तायत्तीसगा देवा
गुरुपयठाणभूआ, एए अमरा पारिसज्जा लीलाविलासगोहीसुं विणोअदाइणो, एए देवा
संवम्मिआ विविहसत्थधारिणो सामिरक्खामहादक्खा अपपरक्खजा, अमी लोग-
पाला पुररक्खाहिकारिणो, एए सेणावइणो अणीगधुरंधरा, इमे पइण्णगसुरा
पउरजाणपयसरिसा, सव्वे एए सुरा मत्थयम्मि तुव आणं धरिस्संति, एए
मणप्पसायजगगा रयणनिम्मिआ पासाया, एआओ सोवण्णकमलागराओ रयण-

मईओ वावीओ, इमे कीलणगगिरिणो रयणकंचणसिहरा, सच्छजलाओ एआओ कीलान-
ईओ, इमाणि कीलोज्जागाणि निअपुक्कफलाणि, एयं सहावरं सुवण्णमाणिकनिम्मिअं,
एयाई सव्वाई तव वित्ताई हरिस्संति । एआओ चामराऽऽयंसंतालिअंटइत्थाओ वार
जुवईओ तुमं सइ सेविस्संति । अयं गंधव्वग्गो चउव्विहाऽऽउज्जवायणचउरो तव पुरओ
संगीयद्वं सज्जो संविद्वइ । तओ सो ओहिनाणेण पुव्वं जम्मं सुमरेइ-सयंबुद्धेण
मंतिणा धम्ममित्तेण जिणिंअधम्मं विवोहिओ सो हं विज्जाहरपई, तया पव्वज्जं पडि-
वण्णो तयच्चिअ अणसणं कासी, तओ संजमाराहणकलं मए इमं पत्तं । अओ धम्मस्स
वइभवं' ति सुमरिऊण सयणिज्जाओ उट्ठाय सिंघासणं अलंकरेइ ॥

ललियंगदेवस्स जिणपडिमा-दाढापूअणं--

तओ देवेहिं रज्जाभिसेएण अहिसित्तो चामरेहिं च वीइओ गंधव्वेहिं अहिगीओ
सो समुत्थाय भत्तिपुण्णमाणसो सासयजिणचेइए गंनूण जिणपडिमाओ समच्चेइ, देवेहिं
गीयमंगले किज्जमाणे विविहथोत्तेहिं जिणाहीसं थुणेइ, तओ नाणदीवगाई पोत्थयाई
वाएइ, तओ माणवथंभट्ठिआओ जिणीसराणं दाढाओ पूएइ ।

तस्स सयंपहा महादेवी--

अह पुण्णेदुसरिसदिव्वाऽऽयवत्तेण रेहिरो स लीलावरं गओ, तत्थ सहस्ससो अच्छ-
रागणेहिं परिओ परिवरिअं सयंपहं नाम देविं पासेइ । नेहाइसयजुत्ताए कयव्वुट्ठाणाए
तीए सह जोव्वणवयउइअविविहविसयमोगे भुंजंतो निरन्तरनेहो बहुकालं गपेइ ।
आउस्स कम्मस्स खगभंगुरत्तणेण सा सयंपहादेवी तरुत्तो दलमिव सग्गाओ चुआ । तओ
कुल्लिसेण ताडिओ इव स ललियंगदेवो पियाचवणदुक्खेण मुच्छं गओ । पुणो लद-
चेयणो पडिसदेहिं सिरिपहविमाणं विलावंतो वारंवारं विलविउं लग्गो, उव्वणे
वावीए कीलासेले नन्दणवणे अ कत्थ वि पीई न पावेइ, हा पिए ! हा पिए !
कत्थ तुमं असि, कत्थ तुमं असि, एवं विलवंतो एसो जगं सयंपहामइअं पासंतो
सव्वओ भमिउं लग्गो ।

सयंबुद्धो ईसाणकप्पे ददधम्मो देवो जाओ--

इओ अ सो सयंबुद्धो मंती सामिमरणुप्पणवेरग्गमावणो सिरिसिद्धा-
यरिअसमीवम्मि गहिअदिव्खो सुदीहकालं संजमं पालित्ताणं ईसाणकप्पे दिदधम्मो नाम

इंदसामणिओ सुरो होत्था । सो य पुव्वभवसंबंधाओ नेहवंधुरो बंधू इव तं ललियंगं आसासित्तं इमं वयणं बवेइ-भो महासत्तसालि ! महिलामेत्तनिमित्तं किं मुञ्चसि ?, 'धीरा पाणंते वि एरिसि अवत्थं न हि पाविरे' । ललियंगो वि आह-बंधु ! किं बुच्चइ-जेण सुदूसहो उ पिआविरहो, पाणंते सुसहो भवे, संसारम्मि सारंगलोयणा एण चिवअ णणु सारं, जं विणा ण्णं एरिसीओ वि सव्वसंपयाओ असारो गणिज्जंति । एयस्स वयणं सोच्चा तस्स दुक्खेण दुहिओ सो वि इंदसामाणिअसुरो दिहधम्मो ओहिना-णेण उवओगं दाऊण इमीए सखं नच्चा बवेइ-महाभाग ! मा विसीआहि, अहुणा सत्थो भवसु, मग्गमाणेग मए तुव पाणपिआ लद्धा अत्थि, सुगमु ।

निन्नामिगा—

महीयले धायइखंडस्स पुव्वविदेहे नंदिगामे नागिलो नाम दरिदो गिहवई अत्थि । नि-विडपावोदयाओ उयरपूरणाय नयरे पेओ इव सया भमंतो किंपि अलंतो खुहिओ तिसिओ अ सयइ, तारिसो अ उद्देइ, दालिदस्स बुहुक्खा इव तस्स भज्जा दुब्भगासिरो-मणी नागसिरी नाम अत्थि, ताणं उवरिमुवरिं छ कण्णाओ जायाओ, ताओ पय-ईए बहुभक्खणसीलाओ कुरूवाओ सव्वनिंदणिज्जाओ हविंसु, कमेण पुणो वि अस्स पत्ती गव्वभरा जाया, 'पाएण हि दलिद्वाणं इत्थीओ बहुसो गव्विणीओ जायंन्ति' तथा सो वित्तेइ-कस्स कम्मस्स इमं फलं?, जं अहं मणूसलोगे वि नरगणीलं पावेमि, अणेण जम्मसिद्धेण अविइच्छणीएण भूरिणा दालिददु-क्खेण उवहुओ अम्हि, इओ सक्खं दलिदमुत्तीहिं इव पुव्वजम्मवेरिणीहिं इव कन्न-गाहिं बहुसो अदिओ, जइ अहुणा मे भज्जा पुणा वि पुत्तिगं पसविस्सइ तथा एयं कुहुंवगं उज्झित्ता विएसं गच्छिस्सं, एवं चिंतापवण्णस्स तस्स मेहिणी कण्णसई-पवेससरिसं पुत्तिजम्मं पसवेइ, तेण य तं मुअं । अह सो नागिलो उद्दमुहो अहम-बलिवदो भारमिव कुहुंव उज्झिता विएसं निग्गओ । तथा तीए पसवजणिअदुक्खे पइप्प-वसणवीडा वणम्मि खारखेवो इव तक्कालं जाया । तओ नागसिरी तीए पुत्तीए नामं पि न अकासी, तत्तो लोमेहिं तीए नामं 'इमा निन्नामिंय' ति उदीरिअं । सा नागसिरी सम्मं तं न पाळेइ, तह वि सा निन्नामिगा बहिदुअं लम्मा, 'जओ वज्जाहयस्स वि अवस्सीणाउसस्स मच्चू न सिआ' । माऊए वि उव्वेगविधाइणी अच्चंतदुब्भगा सा अन्नपरम्मि दुक्कम्मं कुणंती कालं गमेइ । एगया कम्मि मेह-पसंगे धणइद-बालाग-हत्थेसुं मोयगे पेक्खिऊणं

सा वि नियमावरं मग्गेइ । दंतेहिं दंते घंसंती माया बवेइ — जुत्तं, मोयगे मग्गेसि, तुज्ज पिया वि मोयगमक्खमो चेव, जइ लइहुए भक्खिउं इच्छसि, तथा पुत्ति ! रज्जुं गहिऊण कट्टभाराऽऽणयणत्थं अंबरतिला-पव्वयं गच्छ । सा निन्नामिगा मुम्मुरसमाणाए माऊए गिराए उज्जमाणा रुयंती दवरियं वेत्तूण गिरिं पइ गया ।

जुगंधरमुणिस्स केवलनाणं तस्स य उवएसो—

तथा तत्थ पव्वयसिहरम्मि एगरविअ-पडिमाधरस्स जुगंधरमहापुणिणो केवलनाणं समुप्पणं आसि । अइ सण्णिहिअदेवया तस्स मुणिंदस्स केवलनाणमइसवं आरंभिंघु । पव्वयाऽऽसण्णनयस्वासिणो जणा अहमहमिगा-पुव्वयं तत्थ तं महापुणिं वंदिउं निग्गाआ । नागावत्थाऽऽहसणभूसिअं मुणिवरवंदणाय गच्छंतं जगं दददूणं अइविमहएण सा निन्नामिगा खणं चित्तलिहियव्व संठिआ, तओ सा परंपराए लोमाऽऽगमणकारणं णच्चा दुक्खभारमिव कट्टभारं चत्ता जणेहिं सह चलंती निन्नामिगा तं गिरिं आरोहित्था ' जं तित्थाइं सव्वसाहरणाइं हुंति ' । सा महामुणिंदस्स पाए कप्पतरुव्व मण्णमाणा साणंदं वंदेइ ' मई हि गईए अनुसारिणी सिआ ' ।

अइ जगजंतुहियावद्दो सो मुणिवरो लोणं मेहो इव अत्तायंतो गहीराए झुणीए धम्मदेपणं कुणेइ-आममुत्तनिवद्वपलिअंकाऽहिरोहण-सरिसविसयसेवणं भवभूमीए निवडणाय सिआ, सव्वपाणीणं पुत्त-मित-कउत्ताइ-परिवारजोगो एगगामसहाऽऽवा-समुत्तपडिअजगुवमो, चुललीलक्खजोणिगहणभीसणसंसारे भमंताणं जीवाणं अणंतक्खुत्तो सरुम्मपरिणामजणिओ दुहसंभारो संपन्नो, लोमे वालग्गकोडिमित्तं पि तं किंपि ठाणं नत्थि, जत्थ जीवा बहुसो दुस्खपरंपरं न पत्ता । एयं सोच्चा निन्नामिगा अंजलिं काऊण भयवंतं कइइ-तुम्हे राय-रंकेसुं सुदगदुहगेसुं च सिरिमंतनिद्वणेसु य तुल्लो सिआ तेण विण्णविज्जइ — भगवंतेहिं एसो संसारो दुक्खाणं खाणी कहिओ, ता ममाओ अहियतमो इह को वि दुहिओ किं अत्थि ? । केवली आइ — दुहिअमाणिणि ! भदे ! निरय-तिरिअगइयजीवाणं पुरओ तुज्ज केरिसं दुक्खं, अण्णेसि जीवाणं दुक्खं-सुणाहि — पाणिणो नियक्कम्मपरिणामेण निरयभूमीए उववज्जिरे, तत्थ जीवा छेयण-भेयणाइवेयणं सहिरे, परमाहम्मिएहिं असुरेहिं के वि जंतेहिं तिलपीसणमिव निपीडि-ज्जंति, कट्टं च करवत्तेहिं केवि दारिज्जंति, के वि सुलसेज्जासुं साइज्जंति, के वि सिलायलंमि वत्थमिव अण्णालिज्जंति, के वि लोहपत्ताइं पिय मोअरेहिं कुट्टिज्जंति, के वि

खंडसो खंडिजंति, एवं ते नरगजीवा करुणसरं अकंदंता भुज्जो मिलियंगा तदेव भुज्जो भुज्जो
तं चिअ दुहं अणुभाविज्जन्ति, पुणो पिवासिया ते तत्तत्तरसं पाइजंति, छायास्थिणो अ
असिपत्तरुस्स तलम्मि उवविसाविज्जन्ति, एवं नरगम्मि नेरइआ पुराकयकम्मं सारिज्ज-
माणा मुहुत्तमेत्तं पि वियणं विणा ठाउं न लहंते, वच्छे ! नरगगयाणं पाणीणं जं
दुक्खं तं सुणाविज्जमाणं पि अवरेसिं दुहाय जायए । तिरियगईसु वि जलयर-थल-
यर-खयरजीवा सकम्मजणिअदुक्खं अणुभवमाणा पक्खक्खं पेक्खिज्जन्ति । तत्थ जलयरा
परुप्परं तिमिगिलणाएण खायंता मच्छबंधेहि परिगिण्हिज्जन्ति बगाईहि च गिलिज्जन्ति,
एवं केवि उक्कीलिज्जन्ति, केवि भज्जिज्जन्ति, कियंता भोत्तुकामेहि विपच्चिज्जन्ति अ ।
एवं थलयरा मिगाइपाणिणो मंसाहारि-सिंघवग्गप्पमुहकूरसत्तेहि भकिखज्जन्ति, मिगाया-
सत्तेहि मंसत्थीहि वागुरिएहि अणवराहिणो ते हणिज्जन्ति, खुहा-पिवासा-सीउण्हाइभा
रारोवणाइणा कसं-ऽकुसतोत्तंमेहि च एए अइव वेयणं सहंते ।

तिचिरसुगपारेवयवंडयाइखेअरां सेणसिंचाणगिद्वप्पमुहेहि मंसलुद्धेहि गिण्हिज्जन्ति,
मंसलुद्धसंउणिएहि नाजोवायपवंचणेण नाणारुवविडंबणेहि पइहम्मिज्जन्ति, एवं
तिरिआणं जलाइसत्थाइजणियमयं सव्वओ निअनिअकम्मबंधनिबंधणं सिआ । माणुस्सए
वि संपत्ते के वि मणुसा जम्मओ अंधा बहिरा पंगुणो कुट्ठिणो अ जायंते,
चोरिअपरदार-वह-बंध-पसत्ता केवि माणवा नारगा इव नवनवनिग्गहेहि निगिण्हिज्जन्ति,
के वि मणुआ निरंतरं विविहवाहीहि बाहिज्जमाणा परमुहं पेक्खमाणा पुत्तेहि पि उवि-
क्खिज्जन्ति, मुल्लकिणिआ के वि अस्सयरा इव तालिज्जन्ति, अन्ने अ अइभारेण वाहिज्जन्ति
पिवासाइयं च अणुभाविज्जन्ति । अमराणंपि परुप्परपराभवकिलिट्ठाणं सामिसेवगभाववद्धाणं
निरंतरं दुक्खमेव । सहावओ अइदारुणे असारे संसारसमुदे जलजंतूणमिव दुक्खाणं न
अवही, भूअपेआइसंकुले ठाणे मंतक्खरं इव दुक्खनिलयसंसारे जिणिंददंसिओ धम्मो
एव भवविणासणे उवाओ । 'जीवहिंसा कया वि न कायव्वा' । -पाणिणो हिंसाइ अइ-
भारेण नावा इव नरए मज्जन्ति । 'असच्चं सव्वहा चयणीअं' जं असच्चवयणेण पाणि-
गणो चिरं संसारे भमेइ । 'अदिण्णं न मे'ज्जं'-जओ अदिण्णाऽऽदाणाओ कैक्किच्छु-
फलफरिसाओ इव कया वि सुहं न लहेज्जा । 'मेहुणं सव्वहा परिहरियव्वं'-अवंभसे-
वणेण हि गलम्मि गहिक्रुग रंको इव जगो निरयम्मि पक्खिज्जइ । 'परिग्गहो न
धरियव्वो'-परिग्गहवसेण जं लोगो अइभारेण बलीवदो इव दुक्खपंकम्मि निमज्जइ ।

१ उत्कीलयन्ते-कीलकेन नियन्त्रयन्ते । २ भुज्जयन्ते-पच्यन्ते । ३ अनपराधिनः । ४ तोवकैः-परोषो इति
भाषायाम् । ५ चट्कादिः । ६ इयेन० पक्षिविशेषः । ७ शाकुनिकैः । ८ प्रतिहन्यन्ते । ९ त्यजनीयम् ।

१० गालम् । ११ कपिकच्छु-कौवच ।

जो इमाई पंचावि हिंसाईणि देसओ वोसिरेज्ज सो वि उत्तरुत्तरकल्लाण संपयं पावेइ ।
निन्नामिगाए सम्मइंसणत्ताहो, अणसणं च काऊणं सा ललियंगदेवस्स
सयंपहा देवी जाया—

अह सा संसारभयतसिया पत्तमुद्रसंवेगा रागदोसकम्मगंथिं भिदिऊण महा
मुणिस्स पुरओ सम्मइंसणं पावेइ, भावओ अ जिणिंददेसिअं गिहिधम्मं अंगीकरेइ,
परलोममग्गपत्थेयणभूआई च पंचाणुव्वयाई पडिवज्जित्ता मुणिणाहं पणमिऊण दारुभारं
च वेतूण कयकिच्चवेव मुअमागसा नियवरमि गच्छेइ । तओ आरब्भ सा जुगंधर-
महामुणिस्स य देसणं नियनामं इव अविस्सरंती दुब्भग्गकम्मखवणत्थं नाणाविहं दुक्करं
तवं तवंती कमेण जोव्वणं पत्ता, तह वि दुब्भगं तं न कोवि परिणेइ, तओ विसिहय-
संवेगा तत्थ गिरिवरे पुणो सभागयस्स जुगंधरमुणिवरस्स अग्गओ अहुणा गहियाण-
सगा सा अरिय । तओ तत्थ गच्छउ, इमोए निअं रूवं दंसेहि, जइ तुमए सा
रागिगी सिआ, तो तुज्ज पत्ती होज्जा 'जओ अंतकाळे जारिसी मई, गई किल
तारिसी भवे' एवं मित्तवयणं सोच्चा सो तहेव अकासी । सा निन्नामिगा ललि-
यंगदेवस्मि रागिगी समाणा भरिऊण पुव्वमिव सयंपहा नाम तस्स पिआ जाया ।
सो वि ललियंगदेवो पणयकोवाओ पणट्ठं इव तं पाविता तीए समं अहिययरे काम-
भोगे विलसिउं लग्गो ।

ललियंगदेवस्स चवणचिण्हाइ, तओ चविऊण ललियंगो चज्जजंघो, सयंपहा य
सिरिमई जाया

एवं तीए सद्धिं रममाणो कियंतम्मि काले गए सो ललियंगदेवो
निअचवणचिण्हाइं पेक्खित्था तथा तस्स रयणाहसणाइं तेअरहियाइं जायाइं,
पुण्फमालाओ मिलाणं पत्ताओ, अंगं वत्थाइं च मलिणिआई, 'जओ आसण्णे वसणे लच्छीए
लच्छीनाहो वि मुंचिज्जइ' कामभोगेमुं च तिब्वासत्ती तस्स जायइ, तस्स परिवारो
वि सव्वो सोमविरसं जंपेइ, 'जंपिराणं हि भाविकज्जाणुसारेण वाया निग्गच्छइ,'
आकालपडिवणपिआहिं सइ च्चिअ कयावराहो इव सिरि-हिरीहिं परिमुच्चइ, मच्चु-
काले पक्खेहिं कीडिआ इव सो अदीणो वि हि दीणयाए, विणिदो वि हि निद्दाए
अ अंस्सिओ, तस्स तणुसंधिवंधणा हियण सद्धिं विसिलेसित्था, महावलेहि पि
अरूपणिज्जा कणपत्तरो कंपिउं लग्गा, रोगरहियस्स तस्स भाविडुगाइगमणुत्थ-वेयणा
संकाए इव सव्वंग उंगसंधीओ भंजित्था, तस्स दिट्ठी वि मईला जाया, तक्खणे
अंगाणि वि गब्भावासनिवासुत्थ-दुहाऽऽगमभयाओ इव अच्चंतकंपणसोलाइं जायाइं,

स रम्मेसु वि कीलागिरि-सरोवर-वावी-उववणेसु वि कथं वि रइं न पावित्था,
 तओ पियं नेहरहिअं पासित्ता सा सयंपहादेवी वणइ-हे पिय ! मए किं अवरद्धं ?
 जं एवं सुण्णचित्तो दीसइ । ललियंगो बोल्लेइ-हे पिय ! तुमए न अवरद्धं किंतु
 मए चिअ, जओ पुव्वमवे तवो अप्पो कओ, धम्महीणो अ केवलं कामभोगेसुं चेव
 पसत्तो, पुव्वजम्ममि अहं विज्जाहरनरिंदो हुवीअ, तथा सेसंमि आउसंमि पुण्णो-
 दयपेरिणणं व्व सयंबुद्धेण मंतिणा पडिबोहिओ अहं जिणिंदधम्मं पावित्था । तेण
 अंतिमकाले आराहिअधम्मपहावेण एयंमि स्तिरिप्पहविमाणे सामित्तणेण समुत्थन्नो,
 अहुणा तं पुण्णं खीणं तेण इओ अहं चइस्सामि एयं भासमाणस्स तस्स पुरओ
 देविंदेण आदिट्ठो दिट्ठधम्मो नाम देवो उवेच्च तं एवं वणइ । “अज्ज ईसाणिंदो नंदी-
 सराइदीवेसुं जिणिंदपडिमच्चणमहसवं काउं गच्छिइइ, ता तुमं पि तस्साऽऽणाए
 आगच्छसु”, एवं सोच्चा अहो ! पुण्णुदयाओ मम कालोइअं सामिसासणं ति पमुइअमणो
 पियाए सहिओ चलीअ । नंदीसरम्मि गच्चा बीसरिआसण्णचवणो सो परमहरिसेण
 सासयपडिमाओ अच्चेइ, तओ सुहभावणावासिअमणो अन्नेसुं तित्थेसुं गच्छंतो
 विचाले खीणाउसो सो चविओ ।

पंचमो भवो समत्तो,

अहं छटो वज्रजंघभवो—

तओ चविज्ज जंबूदीवे पुव्वविदेहे उवसागरं सीयाए महानईए उत्तरतडम्मि पुक्ख-
 लावईए विजए लोहगालमहापुरंमि सुवण्णजंघस्स रण्णो लच्छीनामाए भज्जाए
 पुत्तत्तणेण समुत्थन्नो, पुत्तजम्ममि संपत्ताऽऽणंदा मायपियरा पुत्तस्स वज्रजंघो ति
 नामं करेइरे ।

तिरिमईए वुत्तंतो

अहं सा सयंपहा देवी पिअवियोगे दुहट्ठा धम्मकज्जंमि संलीणा कियंतेण
 कालेण ललियंगो इव सग्गाओ चविज्ज इहेव विजए पुंडरिणिणीए नयरीए वज्ज-
 सेणचक्कवट्ठिस्स गुणवईए भज्जाए पुत्तत्तणेण समुत्थन्ना, मायपिअरेहिं सब्बलोगा-
 इसाणीए सिरीए संजुत्तणेण तिरिमइ ति नामं ठविअं । सा कमेणं पंचधावीहिं
 लालिज्जमाणा सुउमाळंगा विलसंतपाणिपल्लवा वइदमाणी निद्धाए कंतीए नहयलं
 पयासंती जोव्वणमणुपत्ता । एगया सा सब्बओभइं नामं पासायं कीडाए आरो-
 हंती पासायतलोवरिं गया, तत्थ नयरसोइं पासंती सा मणोरमुज्जाणे सुत्थिअमहा-

मुणिणो उप्पण्णे केवलनाणे तस्स महसवं काउं आगच्छंते देवे पासइ, पासिऊण
 'पुव्वं मए एरिसं कथं दिट्ठं' ति विचारंती ऊहापोहं च कुणंती निसासुमिणमिव
 पुव्वाइं जम्मंतराइं सुमरेइ, हियए पुव्वभवनाणभारं वहिउं असमत्था इव तक्खणंमि
 मुच्छिआ भूमियलंमि निवडिया, सहीहिं कएण चंदणाइउवयारेण लद्धवेयणा समुट्ठिआ
 समाणा चित्तंमि य एवं चित्तेइ-मम पुव्वभवपई ललियंगो सो सग्गाओ चविओ
 संपइ कथं ओइण्णो अत्थि ति अन्नाणं मं पीलेइ, हिययसंकंते एयम्मि, न अओ
 मम पाणणाहो, जओ कप्पूरपत्ते को नाम लवणं पक्खिवेज्ज । सो अ
 पाणप्पिओ मम वयणगोअरो न सिआ, तो अण्णेण सह आलवेण अलं ति विआरित्ता
 मउणं चेव अकासी । तया तस्स सहीवग्गो भूअप्पेआइदोससंकाए मंतंतताइ-उवयारं
 काउं लग्गो । सा उवयारसएहिं पि भूगत्तणं न भुंवेइ । अहं कंमि पओयणे वि
 निअं परिवारं अक्खराइं लिहिऊण 'भूमया-इत्थाइसन्नाए वा निओएइ, अन्नया सा
 सिरिमई कीलोउजाणे कीलणत्थं गया, तत्थ एगंते समयं लद्धणं पंडियाए नाम
 धाईए पुच्छिआ-हे पुत्ति ! तुमं मज्झ पाणा इव पिआ असि, तुज्झ वि अहं माई
 इव, तेण अम्हाणं अण्णमण्णं अवीसासकारणं न, तओ जेण हेउणा मोणं आलंबसे
 तं मज्झ कहसु, मम तुज्झ दुक्खसंविभागं दाऊण अप्पाणं अप्पदुक्खं कुणाहि, तव
 दुक्खं अहं णाऊण तस्स पईगारत्थं जइस्सं, जओ हि अण्णायरोगस्स कयाइ चिइच्छा
 न जुज्जइ, माऊए इव तीए वयणं सोच्चा सा वि पुव्वजम्मसंभवनिअवुत्तंतं तीए
 अग्गओ बवेइ । सा य पंडिआ उवायकुसला सिरिमईए तं वुत्तंतं पडम्मि आलिहिऊण
 नयरंमि दंसिउं सिग्गं गया । तया वज्जसेणचक्कवट्ठिस्स जम्मदिवसो हुवीअ, एयम्मि
 समए तत्थ बहवो भूवइणो आगया । अहं सा पंडिआ तं सुंदरं चित्तपडं चेतूणं
 रायमग्गम्मि वित्थारिऊण ठिआ । तत्थ सत्थकुसला के जणा तं पडं पासित्ता
 सग्ग-नंदीसराइअं ठाणं आगमत्थाऽविरोहेण परिशुणिरे, अवरे उ महासावगा मत्थयं
 धुवमाणा पत्तेगं सिरिअरिहंताणं पडिमाओ वण्णिंति, के वि कलाकोसलसालिणो अभिक्खणं
 कुंणिअनेत्तेहिं पइक्खणं पडं पेक्खमाणा चित्तेहासुद्धिं पसंसंति । एत्थंतरम्मि य दुइंतो
 इअ जहत्थनापो दुइंसणमहीवइणो पुत्तो तत्थ समागओ, सो तं चित्तपडं खणं
 पेक्खऊण धीमंतो अलीगाए मुच्छाए भूमीए पडिओ, लद्धसन्नो इव उट्ठिओ सो
 जणेण मुच्छाए कारणं पुट्ठो कवडनाडयं काऊण वुत्तंतं कहेइ-मम पुव्वभवचरिअं
 केणावि एत्थ लिहिअं अत्थि, एयस्स चित्तपडस्स दंसणाओ मम जाईसरणं समुप्पण्णं,

अहं ललियंगो अम्हि, इमा सयंपहा मम देवी इच्चाइं जं एत्थ पडम्मि लिहियं तं संवपइ च्चिअ । अह य पंडिआ तं पुच्छेइ—जइ एवं भइ ! तया कहेहि ‘पडंमि को इमो संनिवेसो, तं तुमं सयं अंगुलीए दंसेसु’ । सो वएइ—एसो मेरुपव्वओ, एसा नयरी पुंडरिगिणी । तीए पुणो वि पुट्ठो—इमो मुणीसरो को ? । सो वएइ—इमस्स नामं मए विस्सरिअं । भुज्जो वि सा पुच्छेइ—मंतीहिं परिवरिओ अयं नरिंदो को नाम ? एसा य तवंसिणी का ? । सो बोलेइ—अहं न जाणामि । तीए नार्यं—इमो को वि मायावी अत्थि ?, तओ सा उवहासपुव्वयं वएइ—‘हे पुत्त ! तुम्ह पुव्वभवचरियं संवपइ एव, तुमं ललियंगो देवो असि, तुम्ह पत्ती उ सयंपहा नंदिग्गामे कम्मदोसाओ संपइ पंगूभूआ उप्पन्नास्मि, संजायजार्इसरणाओ निअं चरियं पडम्मि आलिहिउण तीए एसो पडो धायइखंडगयाए मम अप्पिओ, तीए पंगूए करुणाए तुं मए गवेसिओ असि, तओ आगच्छाहि तीए समीवंमि तुमं नएमि, दीणा सा तुम्ह विओगम्मि पुत्त ? कट्ठेण जीवइ, तओ पुव्वजम्मप्पियं अज्ज समासासेहि’ एवं वोत्तूणं तुण्हिआए पंडियाए स मांइओ नियमित्तेहिं चेव उवहासपुव्वयं भासिओ—मित्त ! कलत्तरयणाभिगमाओ तुम्ह महंतो पुण्णुदओ, तओ तत्थ गच्छसु, सा पंगू पिआ तुम्ह संव्वहा पोसणिउजा एव । तओ विलक्ख—दीणाणणो स दुइंतो कुमारो कत्थ वि गओ ।

अह लोहग्गलपुराओ सो वज्जजंघो वि तया तत्थ समुवागओ, तं चित्तपडलिहिअनिअचरियं पासिउण मुच्छिओ ताळयंटेहिं ‘बीइओ जलेहिं च सिंचिओ, अह सो उट्ठिओ समाणो सज्जो सग्गाओ आगओ इव जाइस्सरवंता होत्था । तया तीए पंडिआए ‘कुमार ! इमं चित्तपडं पेक्खित्ता तुमं किं मुच्छिओ असि ?’ इअ पुट्ठो वज्जजंघो आह—हे भदे ! इह सप्पियस्स मम पुव्वभवसंभवचरियं इमं लिहिअं, तं दट्ठूणं अहं मुच्छिओ, चित्तपडम्मि इमो ईसाणकण्णो, इमं सिरिप्पहं विमाणं, एसो हं ललियंगो नामेणं देवो, इमा मज्झ सयंपहा नाम पिआ अत्थि, इओ अ धायइसंडे नंदिग्गामे महादलिहस्स घरम्मि निन्नामिगा पुत्ती इमा, इह सा अंबरतिलगपव्वयमारूढा जुगंधरमहामुणिस्स पुरओ गहिआणसणा ठिआ अत्थि, एत्थ अहं ईमीए निअरूढंसणत्थं आगओ, । मइ रत्ता मरिउण एसा णूणं सयंपहा जाया, इह नंदीसरदीवे जिणपडिमापूअणपरो अहं अम्हि, इओ अन्नतित्थेसु गच्छमाणो मग्गम्मि चयमाणो अहं अम्हि, इह य एगागिणी मज्झ विओगे दीणाणणा इमा सयंपहा, इह य चय-

माणा इमा सा एव मज्झ पिआ अत्थि । अहं मण्णेमि—तीए जाइस्सरणेण इह नियचरियं लिहियं, 'न हि अन्नो अण्णाणुभूअं कयाइ जाणाइ' । पंडिआवि आमं ति वोत्तूण सिरिमईए समीवे गंतूण हिययविसल्लीकरणोसहसमं तं सव्वं कहेइ ।

सिरिमईए वज्जजंघेण सह परिणयणं —

सिरिमई पिअ-वुत्तंतगिराए रोमंचिआ जाया । तं च वुत्तंतं पंडिआमुद्देण सिरिमई पिउणो जाणावित्था, जओ इत्थी सार्यत्तंतं न अरिहेइ । तीए गिराए पमुइओ वज्ज-सेणनरिंदो वज्जजंघकुमारं वाहरित्ता तं आह—हे कुमार ! अम्हाणं एसा सिरिमई पुत्ती पुव्वजम्भु व्व तुम्हं एहिं पि पिआ होउ, तेण कुमारेण तदत्ति पडिवण्णे पसण्णो भूवई सिरिमईं कण्णं समहसवं कुमारेण सह परिणावेइ । तओ जोण्हामयंका इव संजुत्ता ते सियवसणधरा रण्णाणुणाया लोहगलपुरं गच्छिस्सु ।

- (अह सुवण्णजंघो नरिंदो वज्जजंघं जोमं नच्चा तं रज्जम्मि ठव्जिऊण पव्वज्जं गिण्हित्था । वज्जसेणचक्कवट्ठी वि पुक्खलपालस्स पुत्तस्स रज्जसिरिं दाऊणं पव्वइओ, सो य तित्थयरो जाओ । वज्जजंघो वि सिरिमईए पियाए सह विविहकामभोगां भुंजमाणो नायमग्गेण रज्जं पसासेइ । गंगासागराणमिव विओमं अपत्ताणं भोगे भुंज-माणानं ताणं पुत्तो समुप्पणो । अह पुक्खलपालस्स सीमाए सामंतनरिंदा तेण सह विरोहं काउं पउत्ता, एयस्स आणं अवमण्णेइरे, तओ वुज्जजाणं व तेसिं साहणत्थं वज्जजंघनरिंदं वाहरेइ । अह पबलसेणासहिओ बलवंतो सो वज्जजंघो नयराओ निग्गच्छेइ, तथा पियविरहाऽसहा सिरिमई वि नरिंदेण सह निग्गया, अह सो नरिंदो मग्गम्मि गच्छंतो अदपहम्मि अमावासारयणीए वि जोण्हाममदायगं महासरवणं पासेइ । तत्थ पहिगेहिं सो विण्णत्तो—हे राय ! इहं दिट्ठिविससण्णो अत्थि त्ति वयणं सोच्चा सो अन्नेण पहेण निग्गओ, कमेण सो पुंडरीगिणीनयरीए समागओ । तेयंसिणो अस्स महारायस्स पहावाओ सव्वे सामंतनरिंदा जुद्धेण विणा आहीणा जाया । राया पुक्खलपालोवि वज्जजंघनरिंदस्स विविहप्पयारेण सागयं कासी । समए सो वज्जजंघो पुक्खलवालनरिंदस्स अणुणं भेतूण सिरिमईए सहिओ नयरीए निग्गओ । अह सो कमेण महासरवणं संपत्तो, तथा पहिएहिं सो वुत्तो—हे महाराय ! संपइ अस्स वणमज्झेण गच्छाहि, जओ अहुणा एत्थ वणम्मि दुण्हं अणगाराणं केवलनाणं समुप्पणं

अत्थि, तर्हि सुराऽऽगमणोज्जोआओ सो दिट्ठिविससण्णो विसरहिओ जाओ । नामेण सागरसेणो मुणिसेणो अ ते मुणिणो सर-मयंका इव राय ! एत्थ विजंति, सहोयरे ते मुणी णाऊण विसेसेण सहारिसो नरिंदो तत्थच्चिअ वणे निवासं करेइ, तओ सभज्जो भत्तिभर-नमिरो सो सुरासुरसेविण देसणं कुणंते दुण्णि मुणिवरे बंदेइ, देसणासवणाणं तरं वत्थ-अन्नपाणोवगारणेहि ताणं पडिलाहित्था, तओ सो चित्तेइ-सामणसहोयरभावे विअहो ! एए निकसाया समत्तरहिआ परिग्गहविरया धण्णा चिअ, एरिसो अहं न म्हि, गहियवयस्स पिउणो सप्पहेण अणुसारिणो एए च्चिअ सहोयरा, अहं तुं 'किणिओ इव पुत्तो म्हि, एवं ठिए वि जइ पव्वएमि ता किंचि न अजुत्तं, 'गहियमेत्ता वि पव्वज्जा दीविगा इव तमविणासाय होज्जा' तम्हा एहि नयरिं गंतूण पुत्तस्स रज्जं दाऊण हंसो हंसस्स गइमिव पिउस्स गइं पाविस्सामि । सिरिमईए वि सह वयग्गहेण अणुमोइओ सो तीए सह तओ निग्गच्छिऊण कमेण लोहग्गलपुरं पत्तो ।

वज्जजंघो सिरिमई अ मच्चुं पाविस्सा उत्तरकुरुसुं तओ अ सोहम्मदेवलोगे समुप्पण्णा —

तया उ अस्स रज्जलुद्धो पुत्तो धणदाणेण पहाणमंडलं नियाहीणं अकासी । सिरिमईए सहिओ नरिंदो पच्चूहे अप्पणो वयग्गहणं पुत्तस्स य रज्जदाणं चित्तमाणो निसाए सुविओ, सुहेण सुत्तेसु तेसु पुत्तो ताणं गिहब्भंतरे विसधूवं करित्था, 'घराओ हि उट्ठिअं अग्निं पिव तं निरोहिउं को समत्थो सिआ ?' नासिगापविट्ठेहि विसमइअधूवधूमेहि ते सज्जो मच्चुं पाविउण उत्तरकुरुसुं जुगलधम्मेण समुववण्णा, 'जओ एगचित्ताविवण्णाणं गई एगा हि जायइ,' तर्हि पि ते खेत्ताणुरुवसुहं अणुभवित्ता मरणं पाविता सोहम्मदेवलोगंमि सुरा जाया ।

लुट्ठो वज्जजंघभवो, सत्तमो य जुगलियभवो, अट्ठमो य देवभवो समत्तो ।

अह नवमो जीवाणंदभवो —

अह वज्जजंघजीवो देवलोगम्मि दिव्वाइं भोगाइं निरंतरं भोत्तूणं आउक्खएण चविऊण जंबूदीवे विदेहेसु खिइपइट्ठिअनयरंमि सुविहिवेज्जस्स पुत्तो नामेण जीवाणंदो जाओ, तया तम्मि नयरंमि अन्ने वि चउरो पुत्ता समुववण्णा, तत्थ एगो ईसाणचंदनरिंदस्स कणगवईए भज्जाए नामेण महीधरो, अन्नो सुणासीरनामस्स मंतिणो लच्छीए भज्जाए सुबुद्धी नाम नंदणो, अवरो सत्थवाहवइणो सागरदत्तस्स पियाए अभयमईए

पुण्णमदो नाम, चउत्थो धणसेट्ठिणो सीलमईए पत्तीए सीलपुंजो इव नामेणं गुणायरो
त्ति । एए सव्वे बालधारेहि राईदिअं जत्तेण रक्खिज्जमाणा वड्ढिउं पउत्ता, सहपंसुकील-
णपरा ते समंविअ सयलकलाकलावं गिण्हेइरे ।

अह सिरिमईए जीवो वि देवलोगाओ चवित्ता तत्थच्चिअ नयरम्मि ईसरदत्तस्स
सेट्ठिणो केसवो नाम तणओ संजाओ । जीवाणंदप्पमुहा ते छ च्चिअ परुप्परं सव्वया
अविउत्ता मित्तत्तणं पत्ता । जीवाणंदो वि पिउसंतिअं 'अट्ठंग-आउविज्जं रसवीरिअविवागओ
अ सव्वाओ ओसहीओ सम्मं वेइत्था, गएसु एरावणो इव, गहेसु आइच्चो इव, सो वेज्जेसुं
निरैवज्ज-विज्जो विउसपहाणो होत्था । ते सव्वे सोअरा इव सएव रमंता कयार्इ
कासईअण्णमण्णस्स घरंमि अण्णमण्णमणुरत्ता सह चिट्ठिति । एगया वेज्जपुत्त-
जीवाणंदस्स मंदिरे चिट्ठमाणेसु तेसुं एगो साहू भिक्खागहणठं आगओ । सो य पुहवी-
पालनरिंदस्स पुत्तो नामेण गुणागरो मलमिव रज्जं चइत्ता पव्वज्जं गिण्हित्था, गिम्हा-
यवेण जलोहो इव उग्गतवसा किसीभूअदेहो सो अकाल-अपत्थभोयणाओ किमिकुट्ठाहि-
भूओ आसी, सो मुणिवरो सव्वंगीण-किमि-कुट्ठाहिट्ठिओ वि कत्थ ओसहं न मग्गित्था
'जओ मुमुक्खवो साहवो कायनिरिक्खिआ हुंति' ।

जीवाणंदाइमित्तउक्ककयमुणिचिइच्छा —

एगया छट्ठ तवस्स पारणे गोअरचरिआए गेहाओ गेहं परिभमंतो तेहिं नियगिहंग-
णसंपत्तो सो मुणी दिट्ठो । तया नरिंदपुत्तमहीधरेण किंचि परिहासेण जीवाणंदो भिसयवरो
वुत्तो-जीवाणंद ! तुम्ह वाहिणो परिनाणं ओसदस्स य नाणं, चिइच्छाए य कउसलं अत्थि,
केवलं किया नत्थि, सव्वया तुम्हे वेसा इव दव्वं विणा 'संधुअं पि दुहपीलिअं पि
पत्थणापरं पि जणं नयणेणावि न पासेह, तह वि विवेगवंतेहिं एगंतओ अत्थलुदेहिं
न होयव्वं, धम्मं पि अंगीकाऊण कत्थ वि चिइच्छा कया ?, चिइच्छाए वाहिनियाणे
च तुम्ह सव्वं परिस्समं धिद्धी, गिहंगणे आगयं एरिसं सरोगं पत्तं जं एवं उविक्खसे ।
चिइच्छाविण्णाणरयणरयणागरो जीवाणंदो वि आह-महाभाग ! साहुं साहुं तुमए अहं विम्हा-
विओ म्हि । जओ-बंभणो मच्छररहिओ, अवंचगो वणिओ, ईसारहिओ पिओ, देही निरा-
मओ, विउसो धणी, गव्वविरहिओ गुणी, इत्थी अचवला, रायपुत्तो सयायाररओ अ जयम्मि

पाएण नहि दीसइ । अहो ! मए अयं महापुणी चिइच्छणिज्जो चिअ, किंतु ओसहाणं अभावो अंतरायत्तणं उवेइ, तत्थ वि मम पासम्मि एणं लक्खपाणं तेल्लं अत्थि, न उ गोसीस-चंदणं रयणकंबलो य सिआ, तं तुम्हे आणेज्जाइ । एयस्स वयणं सोच्चा 'अम्हे ताई आणेसामो' त्ति कहिऊण पंच वि ते वयंसा वणिअहट्ठम्मि गया । सो वि मुणिंदो निअ-ट्ठाणं गओ । जोग्गमुल्लं घेतूणं अम्हाणं गोसीसचंदणं-रयणकंबलाई देसु त्ति वुत्तो बुद्धव-णिओ ताई दिंतो इमं ववेइ-एआणं एकिकस्स मुल्लं दीणाराणं लक्खमेगं सिया, जइ इच्छा सिया तया गिण्हेह, अवरं च कहेह एएहिं तुम्हाणं किं पओयणं अत्थि ? ते वि कहिति मुल्लं गिण्हेह गोसीसकंबलाई च देह, एएहिं अम्हे महापुणिस्स चिइच्छं करिस्सामु त्ति अम्हाणं पओयणं । तेसिं वयणं सोच्चा विम्हयविप्फारिअलोयणो रोमंच-सइआऽऽणंदो सो मणसा एवं चित्तेइ-एएसिं जोव्वणं उम्माय-पमाय-मयणोम्मत्तं कत्थं ?, विवेगाऽऽ-वासा य बुद्धत्तणोइआ मई कत्थं ?, जराजज्जरिअदेहाणं अम्हारिसाणं उइअं जं, तं अहो ! एए कुणंति इअ चित्तिऊण सो कहेइ-गोसीस-कंबलाई तुम्हे गिण्हेह, तुम्हाणं भदा ! भदं अत्थु, तुम्हाणं दव्वेणं अलाहि, इमेसिं वत्थूणं मुल्लं अक्खयं धम्मं अहं गिण्हिस्सं, तुम्हेहिं बंधूहिं इव सोहणं अहं धम्मभागीकओ एवं वोत्तूणं सो वणिअवरो गोसीसकंबलाई अप्पिऊण अह सो भाविअप्पा पव्वइओ परमपयं च पत्तो । महापु-रिसाणं उत्तमा ते जीवाणंदेण सहिआ ओसहसामग्गि गिण्हित्ता जत्थ सो मुणिवरो तत्थ ते गच्छित्था, नग्गोहपायवस्स हिट्ठमि काउस्सग्गेण चिट्ठमाणं ज्ञाणसमाहिजुत्तं ज्ञाणेगलीणं तं मुणिवरं पणमिऊणं वयंति—हे भयवं ! अज्ज भयवंताणं चिइच्छाक-म्मेण धम्मविग्गं करिस्सामु, तं अणुजाणाहि अम्हासुं च पुण्णेण अणुगिण्हसु, एवं मुणिवरस्स अणुणं घेतूण अह ते नवं गोमडयं आणेसु, मुणिस्स पच्चंगं तेण तेल्लेण अब्भंगं काही, अच्चुण्हवीरिएण तेण तेल्लेण मुणी सण्णारहिओ संजाओ, 'उग्गवाहिणो हि पसमणे अच्चुगं ओसठं उइअं', तेण तेल्लेण वाउला किमओ सरी-राओ बाहिरं निग्गया । तओ जीवाणंदो रयणकंबलेण समंतओ मुणिं अच्छाईअ । अह ते किमिणो रयणकंबलस्स सीयत्तणओ तत्थच्चिअ विलीणा । जीवाणंदवेज्जो कंबलं मंदं अंदोलंतो गोकुलेवरम्मि किमिणो पाडित्था, तओ जीवाणंदो अमयरसेहिं इअ जंतुजीवाउगोसीसचंदणरसेहिं तं मुणिं आसासित्था । पुव्वं तु जे किमिणो निग्गया ते तैयागय त्ति चित्तिऊण भुज्जो मुणिणो तेल्लुअंगं काही, तेण अब्भंगेण भुज्जो वि बहुणो मंसगया वि किमओ निग्गया । तहेव पुणो अच्छायणे कए रयणकंबलम्मि ते निलीणा जाया । तंमि गोमडए ते किमिणो भुज्जो तहेव पाडित्था, वेज्जस्स अहो !

बुद्धिकोसलं । पुणा वि जीवाणंदो गोसीसचंदणरसेण सुणिं आसासीअ । भुज्जो तेल्लभं-
गेण अत्थिमज्झगया वि किमी निग्गच्छीअ, पुणो वि अच्छायणप्पयारेण रयणकंबलविलग्गे
किमिणो गोकडेवरम्मि खिवित्था । तओ पुणो वि सो भिसयवरो परमाए भत्तीए
गोसीसचंदणरसेहिं तं सुणिवरं विलिपित्था, संरोहणोसहेहिं संजायनवेत्तओ दित्तिमंतो
सो सुणी विमुद्धकंचणपडिमा इव विराइत्था । भत्तिभरनिग्गरेहिं तेहिं खमिओ सो खमा-
समणो तओ अण्णहिं विहरितुं निग्गओ । तओ बुद्धिमता ते अवसिद्धगोसीसचंदणं रयणकंबलं
च विक्केऊण सुवणं गिण्हित्ति, तेण सुवण्णेण अप्पकेरसुवण्णेण य मेरुसिंगमिव उत्तुंगं
जिणचेइअं करावित्ति । तओ ते महासया निच्चं जिणपडिमं पूयंता 'गुरुवासणा-
तल्लिच्छा कं पि कालं' वइक्कमिति ।

जीवाणंदाहमित्ताणं संजमग्गहणं अच्चुयकप्पे य समुप्पत्ती —

एगया ते विमुद्धपरिणामा वयंसा जायसंवेगा साहुसगासम्मि मणूसजम्मतरुणो
फलं पव्वज्जं गिण्हित्ति । ते चउत्थल्लह-अद्धम-दसम-हुवालसाइतवेहिं संजमं निम्म-
लयरं पालित्ता, दायारं अपीलत्ता, पारणम्मि महुगरवितीए देहमेत्तनिव्वहणत्थं भिक्खं
गिण्हत्ता, अवलम्बिअयीरिमा ते सुहापिवासा-सीउण्हाइपरीसहे सुहडा पहारे इव सहारे,
मोहनरिंदस्स सेणाए अंगाणि इव चउरो कसाए खंति-मदव-अज्जवाडलोहसत्थेहिं
जिण्हित्ति, एवं अज्झत्थविमुद्धीए संजमं आराहंता पज्जंते ते दव्वओ भावओ अ संले-
हणं काऊणं कम्मगिरिनिण्णासणे असणिसमं अणसणं अकरिंसु, पंचनमुक्कारमहामंतं सुम-
रंता सुसमाहिजुत्ता देहं चइऊण एए छ वि वयंसा हुवालसमअच्चुअकप्पम्मि इंदसामाणि-
गदेवत्तणेण समुप्पण्णा । तत्थ वि बावीसं सागरोवमे जाव दिव्वाइं सुहाइं अणुभवित्ता
तओ चवित्था 'जओ मोक्खं विणा कत्थ वि अचवणं नत्थि' ।

नवमो जीवाणंदभवो, दसमो य देवभवो समत्तो ।

अह इकारसमो वज्जणाभक्कवट्ठिभवो—

देवलोगाओ चविऊण ते वज्जणाहप्पसुहा जाया —

अह जंबूदीवे दीवे पुव्वविदेहे पुक्खलवईए विजए पुंडरिगिणीनयरीए वज्जसे-
णनरिंदस्स धारिणीए महिसीए तेसु पंच कप्पेण तणया समुववण्णा, तत्थ वेज्जस्स जीवो
नामेण वज्जणाओ चउदसमहासुविणसइओ पढमो पुत्तो होत्था, रायपुत्तस्स जीवो उ
वाहू नाम बीओ, मंतिपुत्तस्स जीवोऽवि नामओ सुबाहु त्ति तइओ, सेट्ठि-सत्थवाहपु-

त्ताणं जीवा नामेण पीढो महापीढो य चउत्थो पंचमो य संजाया । तह य केसवस्स जीवो सुजसो रायपुत्तो जाओ, तस्स य बालत्तणाओ आरब्भ वज्जणाभस्स उवरिं अईव नेहो अत्थि, 'जओ हि पुव्वभवसंबंधनेहो भवंतरे वि बंधुत्तणं उवेइ', कमेण ते रायत-
णया सो य सुजसो वड्हिंसु, कलागहणे वि तेसिं कलायरिओ निमित्तमेत्तो होत्था, 'जओ महापुरिसाणं सयं चिय गुणा पाउब्भवंति' ।

वज्जसेणो तित्थयरौ जाओ वज्जणाहो अ चक्कवट्ठी जाओ-

अह वज्जसेणनरिंदो लोगंतिअदेवेहिं समागतूणं विण्णविओ--'हे भयवं ! तित्थं पवत्तेहि' । तओ वज्जसेणो सक्कसमपरक्कमं वज्जणाभं रज्जम्मि निवेसिऊण वरवरि-
यापुव्वं च संवच्छरिअदानेण सव्वलोमे पीणिऊण देवासुरनरवईहिं च कयनिकखमणम-
हूसवो उज्जाणं गंतूणं सयंबुद्धो स भयवं दिक्खं मिण्हेइ, तथा मणपज्जवनानं तस्स समुप्पन्नं, सो भयवंतो विविहाभिग्गहधारगो अप्परओ 'समयाधणो निम्ममो निप्प-
रिग्गहो गामाणुगामं विहरिउं पउत्तो । वज्जणाभो वि पत्तेगं नियभाऊणं विसए दासी,
तेहिं बंधूहिं लोगपालेहिं इंदो इव स विराएइ, सुजसो य तस्स सारही संजाओ ।

अह वज्जसेणतित्थयरस्स घाइकम्ममलक्खयाओ उज्जलं केवलनानं समुववन्नं,
तया य वज्जणाहस्स महीवइणो 'अहरीकयभक्खरं आउहसालाए चक्करयणं पविसित्था,
अण्णाइंपि तेरह रयणाइं सेवापरा य नवा वि निहिणो तस्स अभविंसु । सो सव्वं
पुक्खलावई विजयं साहित्था, तओ समगनरिंदेहिं अस्स चक्कवट्ठित्तणाऽहिसेगमहूसवो
कओ । चक्कवट्ठित्तणस्स कामभोगाइं भुजंतस्स वि अस्स वयवद्धणेण
सह धम्ममि बुद्धीवि अहिगाहिगं वड्हित्था । एगया वज्जसेण-
जिणीसरौ जयजंतुपरमाणंदजणगो सक्खं भोक्खो इव विहरंतो तत्थ समागओ,
देवनिम्मियसमोसरणे चेइअतरुणो हिट्ठम्मि सीहासणम्मि उवविसिऊण धम्मदेसणं
कुणेइ । तथा जिणीसराऽऽगमणसमायारं सोच्चा संबंधवो वज्जणाहो वि जगवंधुणो
जिणीसरस्स पायपंकयं उवागओ, सो जिणिंदं ति-पयाहिणं किच्चा पणमित्ता य
सक्कस्स अणुबंधू इव विट्ठओ उवविसित्था । सो भव्वजणमणमुत्तीसुं बोहिमुत्ता-
जणणिं साइनक्खत्तवुट्ठिसण्णिहं देसणं सुणेइ । भगवओ गिरं सुणमाणो हरिसाऽइ-
रेगाओ स सद्धालू नरिंदो एवं विचित्तेइ-'अयं असारो संसारो समुद्धो इव दुत्तरो,
तस्स वि तारगो तिलोगणाहो पबलपुण्णुदएण पावियव्वो, जो भयवं जणाण

अन्नाणतमोहरणे आइच्चो इव, अणाइकालुप्पन्नाऽचिइच्छणीयकम्मवाहिसंहरणे मे ताओ अपुव्वो चिइच्छगो, अहना सव्वदुक्खाणं विणासगो, अतुल्लाणुवममुहाणं जणगो करुणाऽमयसागरो मज्झ पिआ अत्थि, एवंविहे भयवंते पत्ते वि मोहपमत्तेहिं अम्हेहिं अप्पणा चिय अप्पा वंचिओ एसो', तओ सो चकवट्टी तं धम्मचकवट्टिं जिणिंदं नमिरो भत्तिभरगगरगिराए विण्णवेइ—'हे नाह ! अज्ज जाव मए कामभोग-पहाणेहिं अत्थसाहणपरेहिं नीइसत्थेहिं मई कयत्थिया, विसयलोलेण नेवत्थकम्मेहिं नडेण इव चिरं मए अयं अप्पा विणट्टिओ, मम इमं हि विउलरज्जं अत्थकाम-निबंधणं एत्थ जो धम्मो चित्तिज्जमाणो सो पावाणुबंधगो चिअ, तओ तायस्स पुत्तो भविऊण जई भवसमुदम्मि भमामि तया अन्नसाहारणस्स मज्झ को पुरिसगारो सिया । जहा तुम्हेहिं दिण्णं इमं रज्जं पालेमि, तह संजम-महारज्जं दिण्णं पि पालिस्सं, मज्झ तं देसु' ।

वज्जणाहार्इणं पव्वज्जा—

अह सो चकवट्टी भवविरत्तमणो पुत्तस्स रज्जं दाऊणं भगवओ पासे महव्वयं पडिवण्णो । तया बाहुप्पमुहा सोअरिआ वि जेट्ठेण भाउणा सह वयं गिणिंसु, जओ पिउणा जेट्ठेण य जं अंगीकयं तं चिय तेसिं कमागयं सिया । सो वि सुजसो सारही निअसामिधम्मसारहिणो पायपउमंते पव्वइओ, जओ सेवणा सामि-पयाणुसारिणो च्चिअ हुंति । सो वज्जणाहो रायरिसी कमेण सुयसागरस्स पारीणो दुवालसंगविज संजाओ । बाहुप्पमुहा साहवोऽवि ते एगारसंगीए पारं पत्ता । तित्थयरपायसेवाए दुक्करतवाराहणाए य संतोसधणा वि ते सइ असंतोसिआ हविंसु । निच्चं ते जिणीसर-वाणी-पीऊस-रस-पाणरया अवि मासखवणाइ-तवसा न किलम्मिंति । कमेण भयवं वज्जसेणो वि तित्थयरो सुकज्जाण-तइअ-चउत्थपायं ज्ञायंतो गिन्वाणवि-णिम्मिअमहूसवं निव्वाणं पावित्था । वज्जणाहो वि बाहुप्पमुहमुणिवरेहिं सहिओ भव्व-जीवे बोहिंतो वसुहं विहरित्था । तेसिं मुणीणं तवसंजमजोगप्पहावेण चंदकिरणेण पव्वएसुं ओसहीओ इव खेलोसहिपमुहलदीओ पाउम्भवित्था ।

*लदीणं वणणं—

ताणं 'खेललवेणापि कुट्टिणो देहं कोडी-वेहरसेण तंबं इव सुवण्णं संपज्जइ, कण-नेत्ताइसमुप्पण्णो अंगभवो य कत्थूरिगापरिमलो मलो सव्वरोगीणं रोगहरो होइ, ताणं देह-फरिसमेत्तेण अमएण व्व सरोगा देहिणो रोगरहिया हुंति । ताण अंगपुट्टं मेह-नई-पमुहजलं पि सव्वरोगे हणेइ, ताणमंगपुट्टपव्वणो वि विसप्पमुह-दोसे हरेइ, तेसिं पत्ते मुहे

*लदीणं सक्कं विसेसेण कुमारवालपडिबोहम्मि तईअपरथावाओ दंसणीयं । १ *लेप्पलवेनापि ।

वा संपविट्ठं विसमीसिअं अण्णं विसरहियत्तणमुवेइ । ताण वयणसवणाओ मंतक्खरेहिं विसमिव महाविसवाहिवाहियस्स बाहा अवसरेइ, तास नहा केसा दंता अण्णं पि सरीर-समुप्पन्नं सव्वं ओसहतणं पावेइ । तह एएसिं महप्पाणं अट्ठमहासिद्धीओ वि संजायाओ, जेण ताणं अणिमसत्ती तहा होत्था जहा छइरंधे वि तंतुव्व संचलिउं अलं । तेसिं महिमसत्ती सा हुवीअ, जीए मेरुगिरी वि जाणुपमाणो किज्जइ, एआणं लहिमसत्तीए तहा सामत्थं संजायं, जेण अणिलस्सावि लाघवं लंवेइरे । देहस्स गरिमसत्ती वइराओ वि अइसाइणी तहा होत्था, जीए सकाइहिं पि जा न सहिज्जइ । ताणं 'पावणसत्ती तहा होसी, जीए तरुपत्तमिव ते अंगुलीए मेरुसिहरं गहाइणो य छिविरे' । पाक्कम्मगुणेण तह सत्ती आविब्भुया, जह भूमीए इव जले, जले इव भूमीए ते चरिउं खमा । एस्सरिय-सत्ती तहा संभूया, जेण ते चक्कवट्ठि-सुराहीस-रिद्धिवित्थरं विहेउं 'पहुप्पंति । वसित्त-गुणेणं तह सत्ती जाया जेण कूरावि जंतुणो ताणं पसमं जंति । अण्णाओ वि अणेगाओ रिद्धीओ ताणं संजायाओ । जहा-अपडिघायत्तगुणेण सेल्लमज्जे वि रंधमिव गच्छंति, अंतद्वाणगुणेण ते साहवो पवणो व्व सव्वओ अदिस्सयं 'पाउणंति, कामरुवित्तण-गुणेणं ते नियनाणारूवेहिं लोमं पुरेइरे, ताणं जा बीयबुद्धिरिद्धी सा एगत्थवी-आओ अणेगत्थवीयाणं परोहिणी, कुट्टबुद्धी ताणं तह संजाया, जीए कोट्टपक्खित्तध-णमिव अत्थाणं समरणं विणा सुत्तं अक्खयं सिया, आइ-मज्झ-अंतगय-एगपयस-वणेणावि सव्वंगंथाऽवबोहाओ ते पयाणुसारिणो, एगं वत्थुं उद्धरिउणं अंतमुहुत्तेण सुय-समुदावगाहणसत्तीए ते मणोबलिणो, अंतोमुहुत्तेण 'माउयक्खरमेत्तलीलाए सव्वं सुयं गुणमाणा ते वायाबलिणो, दीहकालं पडिमं पवज्जमाणा परिस्सम-गिलाण-रहिया ते कायबलिणो, भायणत्थियकयन्नस्सवि 'सुहाइरसभावपरिणामाओ ते अमय-खीर-महु-धयाऽऽसविणो, दुक्खपीलिएसु तेसिं वयणं अमयाइ-परिणामं जायइ । तेसिं पत्त-पडियमणं 'थेवं पि बहुयदाणेवि जाव सयं न जिमंति ताव न झिज्जए तओ ते अक्खीण-महाणसरिद्धिणो, तित्थयरपरिसाए इव अप्पदेसे वि निराबाहं असंखिज्जपाणीणं ठिईए ते अक्खीणमहालया, सेसेंदियविसयस्स एगेणवि इंदिएण उवलंभाओ ते संभिण्णसोय-लद्धिमंता, तेसिं च जंघाचारणलद्धी सा होत्था जीए एगेणं 'उप्पाएणं रुयगदीवं गच्छंति, रुयगदीवाओ वलंता ते एगेण उप्पाएण नंदीसरदीवे आगच्छंति, बीएणं सदृठाणं आग-च्छंति, उद्धगईए गच्छंता ते एगेण उप्पाएण मेरु-सिहरसंठियं पंडगुज्जाणं, बलिआ

१ प्राणशक्तिः प्राप्तिशक्तिः । २ स्पृशन्ति । ३ प्रभवन्ति । ४ प्राप्नुवन्ति । ५ अकारादिषट्चत्वारिंशन्मातृ-काक्षरं । ६ सुधादि० अमृतादि० । ७ घृतास्त्रविणः । ८ स्तोकमपि । ९ उत्पातेन ।

संता एगेण उप्पाएण नंदणवणं, बीएण उप्पायभूमिं आगच्छंति । ते विज्जाचारणलद्धीए एगेण उप्पाएण माणुसुत्तरपञ्चयं, बीएण य नंदीसरदीवं गच्छंति, तओ वलमाणा एगेण उप्पाएण सट्ठाणं आगच्छंति, एवं तिरिअगमणमिव उड्ढं पि दोहिं उप्पाएहिं जंति, एगेण पुणो आगच्छंति । ते आसीविसइड्ढीए निग्गहाणुग्गहक्खमा हुंति, । अन्नाओ वि ताणं बहुलद्धीओ पाउब्भुया, तहवि ते समणा अप्पकज्जंमि निराकंखा ताओ लद्धीओ न पउंजंति ।

वज्जनाहस्स वीसठाणगेहिं तित्थयरनामकम्मनिकायणं—

इओ य वज्जनाहमुणिंदेण वीसइथाणगेहिं तित्थयरनामगोत्तकम्मं निकाइअं निवद्धं । जहा-तत्थ पढमं पयं जिणिंदाणं जिणपडिमाणं च पूआए अवण्णवायनिसेहेण सब्भूयत्थथुईए य आराहेइ^१ । बीयं सिद्धिस्थाणेसु सिद्धाणं पडिजागरणमहसवेहिं जहावदिठयसिद्धत्तगुणकित्तणाओ य^२ । बाल-गिलाण-^३सेहाइजईण जो अणुग्गहो तं पवयणस्स वच्छल्लसरूवं तइअं ठाणगं^४ गुरूणं आहारो-सहि-वत्थ-पाणगाइदाणाओ अंजलि-योजनाओ य अईव वच्छल्लकरणं तं चउत्थं ठाणगं^५ । वीसवरिसवयपरियायाणं छट्ठिठवरिसाउसाणं चउत्थ-समवायंगधराणं थविराणं च भत्तीए पंचमं ५ । अत्थाविकखाए अप्पाणाओ बहुसुयधराणं सइ अण्ण-वत्थाइदाणेण वच्छल्लकरणं छट्ठं ६ । उक्किटतवंकम्मनिरयाणं तवंसीणं भत्ति-विस्सामणा-दाणेहिं वच्छल्लं तु सत्तमं ७ । दुवालसंगसुयम्मि निच्चं वायणापमुहेहिं सुत्तउत्थ-तदुभयगओ जो नाणोवओगो तं अट्ठमं ८ । संकादिदोसरहियं थिरयाइगुण-भूसिअं^६ समाइ-लवखणं सम्मत्तदंसणं पुणो नवमं ९ । नाण-दंसण-चारित्तोवयारेहिं कम्माणं^७ विणयणाओ विणओ पुणो दसमं १० । इच्छा-मिच्छाकाराइआवस्सयजो-गेसु जत्तेण अइयारपरिहारो उ एकारसं ११ । अहिंसाइ-समिइप्पमुहमूलोत्तरगुणेशु जा निरइयारा पउत्ती उ बारसमं १२ । पमायपरिहारेण खणे खणे लवे लवे सुहज्झाणस्स करणं एयं तेरसमं १३ । मणसो देहस्स य बाहारहिण जहासत्ति निरंतरं तवकरणं एयं चउइसमं १४ । मण-वय-कायसुद्धीए तवंसीसु जहसत्ति अण्णार्इणं जो संविभागो तं पण्णरसं १५ । आयरियप्पमुहदसणं भत्त-पाणाऽऽहाराऽऽसणार्इहिं वेयावच्चस्स करणं तं सोलसमं १६ । समणाइचउव्विहसंघस्स सब्वाऽवायनिवारणाओ मणसमाहिअणणं तं सत्थरसं १७ । अभिणवसुत्तउत्थ तदुभयस्स सब्बया जत्तेण जं गहणं तं अट्ठारसट्ठाणगं १८ । सट्ठाए^८ उब्भासणेण अवण्णवायनिसेहेण य सुयनाणस्स भत्ती तं एगूणवीसइमं ठाणगं १९ ।

१ शैक्षादि०-अभिनवदीक्षितादि । २ अर्थापेक्षया आत्मनः सकाशात् । ३ शमादि० । ४ विनयात् अपनयनात् । ५ उद्भासनेन-प्रकाशनेन ।

विज्जा-निमित्त-कच्च-वाय-धम्मकहाहिं जं जिणसासणस्स पभावणाकरणं तं वीसइमं
ठाणगं २०। एएसु ठाणगेसु एगमवि ठाणगं तित्थयरनामकम्मस्स बंधकारणं । एसो
भयवं सव्वेहिं ठाणगेहिं पि तित्थयरनामकम्मं बंधित्था । बाहुमुणिणा साहूणं वेयावच्चं
कुणंतेण चक्कवट्ठि-भोगफलदायगं कम्मं उवज्जिअं । सुबाहुसाहुणा तवंसीणं महरिसीणं
विस्सामणं कुणंतेण लोमुत्तरं बाहुवलं समुवज्जिअं । तथा वज्जणाभो मुणिंदो 'अहो !
इमे साहुवेयावच्चविस्सामपरा धण्णा' इअ बाहु-सुबाहुमुणिणो पसंसित्था । ताणं
पसंसं सोच्चा ते उ पीढ-महापीढ मुणिणो परिचित्तिसु- 'जो हि उवगारयरो सच्चिअ
इह पसंसिज्जइ, आगमऽज्जयणपढण-ज्जाणरए अणुवकारिणो अम्हे को पसंसेज्जा ?
अहवा कज्जकरो जणो चिअ गिउज्जइ' एवं ईसानिवद्धदुक्कयकम्मं अणालोयंतेहिं माया-
मिच्छत्तजुतेहिं तेहिं इत्थित्तणनिबंधणं कम्मं उवज्जिअं ।

वज्जणाहार्हणं सवट्ठसिद्धविमाणे समुप्पाओ—

एवं वज्जणाभपमुहा छ कि मुणिवरा चउइस-पुव्वलक्खे जाव असिधारासहोयरं
निरइयारं पव्वज्जं पाल्लिसु । पज्जंते दुविहसंलेहणापुव्वयं पायवोवगमणाऽणसणं पडिब-
ज्जित्ताणं समाहिणा कालं काऊण सवट्ठसिद्धविमाणे तिच्चीससागरोवमाउसा सुरवरा
समुप्पण्णा ।

इकारसमो वज्जणाहचक्कवट्ठि भवो, दुवालसमो देवभवो य समत्तो ।

एवं उसहदेवस्स, दुवालस भवा इमे ।

वुत्ता पढमवग्गस्स, पढमोदेसगे इह ॥

इअ सिरित्तामच्छाहिवइ-सिरिकयंबप्पमुहाणेगतिथोद्वारग-सासणप्पहावग-आबालंबभयारि-
सूरीससेहर-आयरिअविजयनेमिसूरीसर-पट्टालंकार समयणु-संतमुत्ति-वच्छल्ल-
वारिहि-आयरिअविजयविण्णाणसूरीसर-पट्टधर-सिद्धंतमहोदहि पाइअभासा-
विसारयायरिअ-विजयकत्थूरसूरिविरइए महापुरिसचरिए पढमवग्गम्मि
उसहजिणीसरस्स धणाइदुवालसभवसरूवो पढमोउदेसो

समत्तो ॥

उद्देसो बीओ

कुलगराणं उप्पत्ती

इह जंबूदीवस्स पच्छिमविदेहे अरीहिं अवराइआ नामेण वि अवराइआ पुरी
अत्थि । तीए नयरीए सिरीए ईसाणिंदो इव ईसाणचंदो नाम राया होत्था ।

सेट्ठिचंदणदासस्स पुत्तो सागरचन्दो—

तत्थ सिरिए सोहिल्लो धम्मअजणाणं पहाणो नयरीजणप्पिओ नामेण चंदणदासो सेट्ठिवरो आसि । तस्स य जगनयणाऽऽणंदनियाणं सागरस्स चंदो इव सागरचंदो नाम नंदणो होसी, सो य उज्जुसीलो विवेगवंतो सयच्चिअ धम्मकम्मसीलो सयलनयरजणस्सावि मुहमंडणं हवित्था । एगया सो ईसाणचंदस्स रण्णो दंसणत्थं सेवा-समागयाणेगसामंत-वररायविराइअं रायसहं उवागओ । तथा ईसाणचंदनरिंदेण सो आसणतंबूलदाणाइपडिवत्तीए महानेहेण पिउणा इव दंसिओ । एत्थंतरम्मि को वि मंगलपाढगो सहाए अब्भंतरे समागतूण अहरीकयसंखड्डणिगिराए भणित्था, अज्ज हे भूवइ ? भवओ उज्जाणे सज्जीकया-णेगपुप्फा उज्जय-उज्जाणपालीव वसंतसिरी वियंभेइ, तओ ईदो नंदणवणं इव 'विअसिर-कुसुमामोयसुरहीकयदिसाऽऽणणं एयं उज्जाणं संभावसु । राया वि दुवारपालं आह- 'पच्चूसे अहिलनयर-लोमेहि उज्जाणंमि समागतव्वं' ति नगरे उग्घोसेसु, तुमए वि उज्जाणे एयव्वं ति नरिंदो सागरचंदं आदिसित्था । तओ रण्णा विसज्जिओ सो 'स-घरं समागओ संतो निअभिचास्स असोगदत्तस्स तं निवस्स आणं कहित्था ।

सागरचंदस्स उज्जाणे गमणं भयाओ य पियदंसणारक्खणं—

वीयदिवसे सपरिवारो भूवई उज्जाणंमि गच्छित्था, पउरंजणा वि तत्थ गच्छिंसु, सो सेट्ठितणओ वि असोगदत्तेण सह गओ । तत्थ उज्जाणे लोगो पुप्फाबचएहिं गीय-निच्चाइकम्मेहिं च कीलिउं पउत्तो, ठाणे ठाणे विविहकीलापरा उवविट्ठा पउरंजणा 'आवासि-अपुप्फसर-नरिंद-खंधावार-धुरं भरिंसु । पए पए संपवुत्त-गीय-वाइअ-महासदे अब्भहिए समुट्ठिए समाणे अयंढे एगाओ तरुगहणाओ रक्खेह 'रक्खेह' ति भयतसियाए कीए वि इत्थीए करुणसदो उट्ठिओ । तइयां सोचपविदठाए तीए गिराए समाकड्ठिओ इव 'किं एयं' ति संभंतो सागरदत्तो तत्थ धाविओ । सो तत्थ सेट्ठिणो पुण्णभइस्स पियदंसणा-कण्णं 'विगेहिं हरिणिं इव दुदठेहिं गहियं पेक्खित्था । अह सो एगस्स इत्थं आमोडिऊण छुरिगं गिण्हित्था । ते दुदठपुरिसा तस्स तारिसं परक्कमं पासिऊण जलंतजलणदंसणाओ वग्घा इव पलाइंसु । हा सागरचंदेण दुदठपुरिसेहिंतो विमोइआ पियदंसणा 'परुवयार-वसणो पुरिसुत्तमो मम पुण्णोदएण समाकड्ठिओ इह को एस समागओ ?, पज्जुणरुवधरो एसो च्चिअ मज्झ पिओ भावि' ति चिंतंती नियगिहं गच्छित्था । असोगदत्तसहिओ सागरचंदो हियए 'अणुस्रयं इव पियदंसणं वढंतो घरं गओ । अह चंदणदाससेट्ठिणा जण-

१ विक्रसत् । २ तं भावय-प्रसन्नो भूत्वा प्रेक्षस्व । ३ स्वयंहम् । ४ आवासितपुण्यशरनरेन्द्र-

स्कन्धावारधुराम् । ५ श्रोत्रप्रविष्टया । ६ इकैः-परुवडे । ७ अनुस्यूतमिव-परोपायेक्षती ॥ ४५

परंपराए पुत्तस्स समग्गो वुत्तंतो विण्णाओ, जओ उक्किटं सुहकम्मं न ढक्किज्जइ ।
सो चित्तित्था-पियदंसणाए उवरिं रागो अस्स उइओ, रायहंसो कमलिणिं विणा ण
अण्णत्थ रज्जइ, जं अणेण पुत्तेण तया इमं 'उब्भट्ठत्तणं पर्यसिअं तं न जुत्तं, सपोरिसे-
णावि वणिण्णं न हि 'पोरिसं कायव्वं, किं च सरलस्स मज्झ तणयस्स मायाविणा
असोगदत्तेण सह संगो कयलीतरुणो बोरीरुक्खेण इव ण सोहणो त्ति चित्तिज्जण
स सेट्ठी सागरचंदं बोद्धाविज्जण सामेण उवाएण सासितं आह—

चंदणदासस्स पुत्तं पइ उवएसो—

वच्छ ! सव्वसत्थाणुसारेण ववहारेण सयं 'अहिण्णु असि, तह वि मए किंचि
जाणाविज्जए, पुत्त ! अम्हे हि वणिआ, तओ कलाकौसलजीविणो अशुब्भट्ठायार-
वेसा समाणा जह न 'गरिहिज्जामो तहा होयव्वं, जोव्वणे वि गूढविक्रमेहिं भवि-
यव्वं, इत्थीणं सरीरमिव अम्हाणं संपयाओ कामभोगा दाणं च गुत्तं चिय सोहाए
अलं होइ, निअजाईए अणणुरुव्वं किज्जमाणं कज्जं न सोहए, जह—'चरणे 'करहस्सेव
वद्धं कणयनेउरं' । सहावओ वंकचित्ताणं दुज्जणाणं संसग्गो न हियावहो, अयं च
असोगदत्तो कुट्टरोगो देहमिव तुमं समए दूसिस्सइ, अस्स मायाविणो 'वारजुवईए
इव मणंसि अण्णं वयणे अण्णं किरियाए वि अण्णं, तओ वीसासो तुमए न कायव्वो ।
सागरचंदो वि पिउणो उवएसं सुणित्ता मणम्मि चित्तित्था, एयाओ उवदेसाओ
पिउणा दुट्ठजणाओ कण्णामोअणवुत्तंतो सयलो सो विण्णाओ त्ति अहं मण्णेमि, पिउ-
स्स असोगदत्तस्स संगो सोहणो न विभाइ, तहावि एवं होउ त्ति खणं मणंसि विमं-
सित्ता सागरचंदो वि सविणयं पियरं कहित्था—ताओ जं आदिसइ 'अहं तुम्ह पुत्तो म्हि'
तओ तं कायव्वमेव, जत्थ गुरुणो आणा लंघिज्जइ तेण कज्जेण अलं, किंतु हे पियर !
अकम्हा तारिसं कज्जं उवचिट्ठए जत्थ मणयं पि वियार—कालपइक्खणं न सहेइ,
वियारं कुणंतस्स कासइ कज्जस्स कालो अइगच्छेइ, एरिसे आगए काले पाणसंसए य
पत्ते वि तं चिअ काहं, जं तुम्हाणं लज्जाकरं न सिआ । जं मज्झ असोगदत्तेण सह
मित्तया तत्थ सहावासो सहपंसुक्कीलणं भुज्जो भुज्जो दंसणं च त्ति कारणं, समा जाइ समा
विज्जा समं सीलं 'समं वयं परोक्खे वि उवकारित्तणं सुहदुहसमभागिया य मित्तत्तणं
पयाइ । 'एयम्मि मणयं पि दुग्गुणं न पासेमि, भवओ मुसा को वि 'अक्खासि, अत्थु
वा तारिसो मायावी, एसो मम किं करिस्सइ ? एतत्थ विणिविसिए वि 'कच्चं कच्चं एव

१ उद्भट्टवम् । २ पौहवम् । ३ अभिज्ञः । ४ गह्वरामहे । ५ उच्छ्रित्येव । ६ वारयुवत्याः—वेदयायाः

७ समं वयः । ८ आख्यत्—अकथयत् । ९ काचम् ।

मणी मणिच्चिय' एवं पुत्तेण वुत्तो सेट्ठी तं आह—तुमं बुद्धिमंतो सि, तहवि सवत्थ साव-
हाणेण होयव्वं, जओ परचित्ताइं दुल्लक्खाइं हुंति । अह पुत्तस्स भाववियाणमो सेट्ठी
पुत्तइं सीलाइगुणविहूसिअं पियदंसणं कण्णं पुण्णभइसेट्ठिस्स समीवे मग्गित्था । पुराऽवि
तुम्ह तणएण मम सुआ उवगारकिणिअत्ति वयंतो सेट्ठी पुण्णभदो तस्स वयणं अणुमग्गित्था ।

सागरचंदस्स पियदंसणाए सह विवाहो—

तओ पसत्थतिहिवार-नक्खत्ते सुहलग्गे अ दुण्हं पियरेहिं सागरचंदस्स पियदंसणाए
सह विवाहो कारिओ । अहिलसिअविवाहेण ते बह्वरा अईव पमोईंसु । समाणमाणस-
त्तणेण अभिण्णभावपत्ताणं ताणं परुप्परं नेहभावो वदित्था । ताणं सीलवत्ताणं रुववत्ताणं
अज्जवसालीणं च विहिवसाओ अणुरुवो संजोगो होत्था ।

असोगदत्तस्स एगंतं पियदंसणाए मिलणं—

अह एगया सागरचंदो कज्जनिमित्तं बाहिरं निग्गओ तथा असोगदत्तो तस्स
घरम्मि आगंतूण पियदंसणं कहेइ तव पिओ सागरचंदो धणदत्तसेट्ठिणो बहूए सह एगंतं
जं मंतणं कुणेइ, तत्थ तस्स किं कारणं होज्जा ? । तथा सा सहावसरला वएइ—तव मित्तो
एयं जाणेइ, अहवा तस्स सव्वया बीयं हिययं असि, तेण तुमं जाणेसि । ववसाय-
पराणं महत्ताणं एगंतमंतिअकज्जाणि को जाणेज्जा ?, अह जाणेइ स घरम्मि कहं
कहेज्जा ? । असोगदत्तो वि कहेइ—तुम्ह पियस्स तीए सह जं पयोयणं, तं अहं जानामि
किन्तु कहं कहिज्जइ ? । पियदंसणाए 'किं तं' ति पुट्ठो ? सो ववेइ—तुमए सह मम जं
पयोयणं अत्थि, तीए सह तस्स वि तं सिया । तस्स भावं अविद्याणंतीए सरलभावाए
पियदंसणाए पुणो वि पुट्ठं मए सह तव किं पयोयणं ? । सो वयासी—सुलोयणे !
एगं तुमं पियं विणा भिण्ण—भिण्णरसविउसस्स सचेयणस्स पुरिसस्स कस्स तुमए सह
पयोयणं न सिया । कण्णसुइसरिसं दुट्ठभावसूयगं तस्स वयणं सोच्चा सा अहोसुही-
होऊण सकोवा साहिकवेवं कहेइ—रे निम्मज्जाय ! पुरिसाहम ! तुमए एयं कहं
चित्तिअं ? अहवा चित्तअं समाणं कहं तु वुत्तं ?, अहमयमस्स तुमं धिरत्थु, किंच मह-
प्पाणं मम पइं अप्पसरिसं चेव 'रे ! संभावेसि, मित्तमिसाओ सत्तसरूवं तुमं धिरत्थु ।
रे पाव ! इओ गच्छ, मा चिट्ठसु, तुव दंसणाओ वि पावं सिय त्ति तीए अक्कोसिओ
स 'येणो इव सिग्धं निग्गओ । स गोहच्चागारो इव मलिणाणणो विसण्णमणो समा-
गच्छंतो मग्गे सागरचंदेण विलोगिओ ।

सागरचन्देण सह असोगदत्तस्स संवाओ—

हे मित्त ! केण हेउणा उच्चिग्गो इव लक्खिज्जसि ? इअ सुद्धहियएण सागर-
चंदेण पुच्छिअं । तओ सो मायाकुडगिरी दीहं नीसासं उव्वमंतो संकोइआऽहरो
दुद्धो कट्ठेण इव बवेइ—‘हे भायर ! संसारसागरे वसंताणं उव्वेगकारणं किं पुच्छसि !,
जं गुञ्जथाणे वणमिव न ढक्किउं नाऽवि पयासिउं सक्किज्जइ, तं किंपि इह उव-
ट्ठिअं’ ति वोत्तूण मायादंसिअ-अंसुविलोयणे असोगदत्ते ठिए समाणे सो मायारहिओ
इअ चित्तिउं पउत्तो—अहो ! असारो संसारो, जत्थ एरिसाणमवि पुरिसाणं अयंढे
एरिसं संदेहपयं उवजायए, अस्स धीरिमाए अवयंतस्स वि उच्चएण अब्भंतस्सुव्वेगो
धूमेण वन्ही इव बलाओ ‘बाहेहिं नज्जइ त्ति चित्तिऊण सज्जो मित्तदुक्खेण दुहिओ
सागरचंदो भुज्जो सगगारं तं कहेइ—हे मित्त ! जइ अप्पयासणीअं न सिआ तया
तं उव्वेगकारणं मज्झ संसेहि, दुक्खविभागं च मम दाऊणं अहुणा थोक्कदुहो
भवाहि । असोगदत्तो वि आह-मम पाणसमे तुमम्मि अण्णं अप्पयासणिज्जं किंपि न,
विसेसेण अयं वुत्तंतो । हे वयंस ! तुमं जाणासि, जं अंगणाओ इह अणत्थाणं खाणी ।
सागरचंदो वि बएइ—एवं चिअ, किं नाम संपइ सप्पिणीए इव कीए वि
इत्थीए विसमसंकडे निवडिओ असि ? । असोगदत्तो वि कारिमं वीडयं कुणंतो
कहेइ—तव पिआ पियदंसणा मं पइ चिरं जाव असमंजसं भासेइ, मए ‘सयंचिअ लज्जिऊण
कया वि एसा चिट्ठिस्सइ’ त्ति चित्तिऊण अज्ज जाव उव्विक्खिआ परं दिणे दिणे
असइत्तणोइअवयणेहिं मं वयंती अहो ! एसा न विरमेइ । हे बंधु ! अज्ज उ तुम्ह
गवेसणत्थं तव घरम्मि गओ, तया छलणपराए तीए रक्खसीए इव निरुद्धो अम्मिह,
कहंचि तीए बंधणाओ अप्पाणं मोइऊण अहं इह सिग्घं समागओ । तओ मए चित्तिअं
इमा जीवंतं मं न मुंचिस्सइ, अओ अज्ज अप्पाणं किं वावाएमि ? अहवा मरिउं न
उइअं, जं इमा मम मित्तस्स एरिसं अण्णहा कहिस्सइ तं तह मम परोक्खे वि, तओ
मरणेण अलं, अहवा सयं चिअ एयं सव्वं मम मित्तस्स पुरओ कहेमि, जहा इमीए
कयवीसासो एसो अणत्थं न पोवेइ, एयंपि न जुत्तं, जं इमीए मणोरहो मए न
पूरिओ । अह तीए दुसीलयाकहणेण खयम्मि खारं किं खिवेमि ? एवं चित्तमाणो अहं
एत्थ तुमए संपइ दिट्ठो म्हि, हे बंधव ! मज्झ इमं उव्वेगकारणं जाणेहि । एयं
‘आयणिऊण पिविअविसो इव खणं सागरचन्दो निच्चलो संजाओ । सागरचन्दो

१. बाणैः । २. स्तोकदुःखः । ३. कृत्रिमं व्रीडकम्—कृत्रिमां लज्जाम् । ४. आकर्ण्य—श्रुत्वा ।

कहेइ—‘इत्थीणं इमं जुज्जइ, विसायं मा कुणसु, सत्थं अवलंविज्जण सुहे ववसाए ठाय्व्वं, न सुमरणीअं तीए वयणं, जारिसी तारिसी वा सा अत्थु, किं तीए, केवलं अम्हाणं भाउणं ’मणमइलिआ मा होउ, एवं उज्जुणा तेण अणुणीओ सो अहमो असो-गदत्तो पमुइअचित्तो जाओ, ’माइणो अवराहं किच्चा वि अप्पाणं सम्माणित्ति’ ।

तओ पभिइं नेहरहिओ सागरचन्दो उव्वेगसहिअं पियदंसणं रोगगसिअं अंगु-लिमिव धारेइ, किंतु पुव्वमिव तं नीरागेण वट्ठावेइ, ‘सयं हि पालिआ जा लया निप्फला वि नेव उम्मूलिज्जइ’ । पियदंसणा ‘एयाणं मम कओ भेओ मा होउ’ ति विचारित्ता असोगदत्तस्स तं वुत्तंतं पियस्स न निवेइत्था । अह सागरचन्दो निव्वेएण संसारं कारागारसमं मण्णमाणो दीणाऽणाहदुक्खिअजणेसु नियरिद्धिं सहलं करित्था । कालकमेण सागरचन्दो पियदंसणा असोगदत्तो अ निआउं पूरिऊण तिणिण वि एए काल धम्मं उवागया ।

सागरचन्दाइणो मरणं लद्धं जुगलियत्तणे समुप्पण्णा—

इह जंबूदीवे भरहखेत्तस्स दाहिणइदभरहम्मि गंगासिंधूण अंतरे मज्झभागे इमोए ओसप्पिणीए तइयारगे बहुगए पल्लवमस्स य अट्टमभागे अवसिट्ठे समाणे जुगलधम्मणे सागरचन्द—पियदंसणा समुववण्णा ।

कालचक्रकसरूवं

पंचसु भरहेसु पंचसु य एरवएसु खेत्तेसु कालववत्थाए हेऊ दुवाळसाऽरं कालचक्रं सिआ । ओसप्पिणी—उस्सप्पिणीभेयाओ कालो दुविहो अत्थि, ओसप्पिणीए सुसमसुसमाइणो छ अरा संति, तत्थ पढमो सुसमसुसमारो चउसागरोवम कोडाकोडिपमाणो, बीओ सुसमारो तिसागरोवमकोडाकोडिपमाणो, तइओ सुसमदसमारो दुसागरोवमकोडाकोडिपमाणो चउत्थो दुस्समसुसमारो दुचत्तालीसवाससहस्सोणो एगसागरोवमकोडाकोडिपमाणो, पंचमो दुस्समारो एगवीस सहस्सवरिसपमाणो, छट्ठो दुस्समदसमारो वि तावंतवरिसपमाणो । जहा ओसप्पिणीए छ अरा उदीरिआ, तह ते च्चिअ पडिलोमकमेण उस्सप्पिणीए वि जाणियव्वा, एवं ओसप्पिणीए उस्सप्पि-णीए य संमिलिआ सागरोवमाणं वीसं कोडाकोडीओ हुंति । तत्थ पढमारंमि मणुस्सा तिपल्लवमजीविणो तिकोसुच्चा चउत्थदिणभोइणो भवन्ति, ते माणवा चउरंससंठाणा वइरिसिहनारायसंधयणा सब्बलक्खणलक्खिआ सयासुहा भंदकोह—माण—माया—लोहा सब्बया सहावओ अहम्मपरिहारिणो संति । ताणं मज्जंगपसुहा दसविहा कप्पतरुणो अहोनिंसं

अहिलसिआइं दिंति । तत्थ मज्जंगतरवो मज्जाइं, भिंगा य भायणाइं तुरियंगा विविह-
तुरियाइं, दीवसिहा जोइसिआयअसरिसं उज्जोयं, चित्तंगा विविहाइं पुप्फाइं मल्लाइं च,
चित्तरसा विविहभोयणजायं, मणिअंगा अणेगविहभूसणाइं, मेहागारा सुघराइं, 'अणगिणा
दिब्बाइं वसणाइं पयच्छंति । तथा तत्थ भूमीओ सकरा इव साउमईओ, सरियाईसु जलाइं
पि सया अच्चन्तमहुराइं । एवं पढमारे तत्थ आउसंघयणाइयं अइकमेइ, तओ कप्पदुमपहावा
सणियं ऊणं ऊणं जायंते । बीयम्मि अरए माणवा दुपल्लोवमजीविणो कोसदुगुच्चा
तइअदिणभोइणो हुंति, तत्थ कप्पमहीरुहा किंचिऊणपहावा, 'उअगाइं भूमिसकरा
वि महुरत्तणेण पुव्वओ किंचि हीणा जायन्ते, एयम्मि अरए कालक्केण पुव्वाऽरगो विव
हीणहीणयरं अन्नं पि सव्वं जायइ । तइए अरगे नरा एगपल्लाउसा एगकोसुस्सया
बीअदिणभोइणो, एयंमि अरंमि पुव्वमिव देहं आउं भूमिमहुरया कप्पदुमपहावो वि य
हीणं जायइ । पुव्वपपहावरहिए चउत्थे अरगे माणवा कोडिपुव्वाउसा पंचसयधणुहुस्सया
हुंति । पंचमारे वरिससयाउसा सत्तहत्थुच्चदेहा, छट्ठे अरे पुणो सोलसवासाउसा एगहत्थु-
स्सया मणुआ हवंति । उस्सप्पिणीए वि पच्छाणुपुव्वीए दुस्सम-दुस्समपमुहा छ अरा
एरिसा जाणियव्वा ।

विमलवाहणाइणो सत्तकुलगरा—

तइआरंतजायत्तणेण ते सागरचन्द-पियदंसणा नवधणुसय-उच्चा पल्लदसमभागा-
उसा वइररिसहनारायसंघयणा समचउरंससंठाणा जुगलधम्मिणो संजाया । तत्थ साग
रचन्दो जच्चसुवण्णजुई तस्स भज्जा पियंगुवण्णसरिसा होत्था । सो असोगदत्तो
पुव्वजम्मकयमायाइ तत्थ च्चिअ सुक्कवण्णाऽऽहो चउदंतो गयराओ संजाओ । एगया
इओ तओ भमंतेण तेण गएण पुव्वजम्ममित्तो स जुगलनरो पेक्खिओ, पुव्वभवब्भा-
सवसओ तस्स तम्मि नेहो पाउब्भुओ, । तेण हत्थिणा नियकरेण तं वेत्तूण जहासुहं आलिं-
गित्ता अणिच्छंतो स नियखंधपएसे समारोविओ । अन्ननुन्दंसगब्भासाओ ताणं दुण्हं
पि पुव्वजम्मस्स सुमरणं संजायं । अण्णे जुगलधम्मिणो चउदंतगयखंधसमारूढं तं
इंदं इव पेक्खिंस्सु । 'संख-कुंद-इंदुविमलं गयं आरूढो' तओ मिहुणगनरेहिं 'इमो
विमलवाहणो'ति नामेण वुत्तो । स विमलवाहणो जाईसरणाओ नीइजाणगो पयईए
भइओ खूववंतो य इइ सव्वजणेहिंतो अब्भहिओ संजाओ । कियंते काले गए कप्प-
तरूणं पहावो संजमभट्ठाणं जईणमिव मंदीभूओ । तहा तारिसकालाणुभावेण मिहुणगनराणं

कप्पतरुसुं ममरां संजायं, अण्णेण अंगीकरं कप्पतरं जया अण्णो गिण्हेज्जा,
 तया पुव्वजुगलियनरस्स महंतो पराभवो होत्था । ते तहा परिभवं परुप्परं
 असहमाणा अप्पणो अहिगणुणवंतं विमलवाहणं सामित्तणेण अंगीकुणित्था । स
 थविरो विमलवाहणो जाइस्सरणनाणेण नीइजाणणो जुगलिनगराणं कप्पपायवे
 विभइऊण देइ । तत्थ जो जो परकप्पतरुगहणेण मज्जायं अइक्कमेइ स
 तस्स सिक्खणत्थं हक्कारनीइं ठवित्था । 'तुमए हा ! दुक्कडं' ति एरिसदंढेण
 वारिहिवेलाजलाणि इव मज्जायं ते मिहुणगनरा न अइक्कमिसु । तेण हक्कारदंढेण ते
 जुगलिआ दंडाईहिं घाओ वरं, न उ हक्कारतिरक्कारो त्ति मण्णिंसु । तस्स विमलवा-
 हणस्स छम्मासपमिए आउसस्स अवसेसे समाणे चंदजसा भज्जा एमं मिहुणं पस-
 वित्था । ते इत्थीपुरिसा असंखेज्जवरिसाउसा पढमसंघयणा पढमसंठाणा सामवण्णा
 अट्ठधणुसउस्सया मायापियरेहिं 'चक्खुमंतो चंदकंता य' ति दिण्णनामा वड्ढिउं
 पयत्ता । छम्मासे जाव तं पुत्तजुगलं पालित्ताणं जरारोगरहिआ मच्चुं लद्धूण विमल-
 वाहणो सुवण्णकुमारेसु चंदजसा य नागकुमारेसु समुववण्णा । सो करिवरो वि
 निआउं पालिउआणं तत्थिच्चिअ नागकुमारे उप्पण्णो । पढमकुलगरो समत्तो १ ।

अह चक्खुमंतो वि विमलवाहणो इव हक्कारनीइं जुगलियनराणं मज्जायं वट्ठावित्था ।
 पत्ते चरमकाले चक्खुमंत-चंदकंताणं जसंसी अ सुरूवा य जुगलरूविणो पुत्ता समुव-
 वण्णा । ते वि पुव्वमिव संघयण-संठाण-वण्णसरिसा पुव्वओ मणयं ऊणाउसा कमेणं
 बुद्धिं पत्ता । सया सहयरा दित्तिमंता सत्तधणुसय-उस्सया ते मिहुणगनराणं मज्जे
 तोरणथंभविलासं लहिंसु, अह ते वि कालकमेण कालधम्मं उवागंतूण चक्खुमंतो सुवण्ण-
 कुमारेसु चंदकंता य नागेसु उप्पण्णा । बीओ कुलगरोत्ति २ । तओ जसंसी पिउणो
 इव सन्नाइं मिहुणगाइं गोवालो गावीओ इव सलीलं पालित्था । अह मिहुणगनरा
 कमेण हक्कारं नीइं उल्लंघिउं पउत्ता, ताइं सासिउं जसंसी कुलगरो मक्कारनीइं
 अकासि, 'एगोसहाउसज्जे रोगे हि ओसहंतरं दायव्वं चिअ' । स महामई अप्पे अव-
 राहे पढमं नीइं, मज्झमे बीयं, महंते अवराहे दुण्णि वि नीइंओ जुंजित्था । पज्जंते
 जसंसिणो सुरूवाए य मणयं नूणाउसा जुगलरूवा इत्थीपुरिसा सह संजाया । तेहिं
 चंदुव्व उज्जलत्तणेण पुत्तस्स अभिचंदो त्ति पुत्तीए पियंगुसमाणवण्णत्तणेण पडिख्व त्ति
 नाम कयं । पिउत्तो अप्पाउसा सइदछधणुसउच्चा कमेण ते बुद्धिं उवित्था ।

परिपुण्णाउसो जसंसी उदहिकुमारेसु सुरूवा य नागकुमारेसु उप्पण्णा । तइओ कुलगरुत्ति ३ । अभिचंदो वि पिउणो इव सव्वे जुगलियनरे तीए मज्जायाए हक्कार-
मक्कारनीईहिं सासित्था । अंतकाले पडिरूवा वि मिहुणगं पसवित्था । मायपियरेहिं
पुत्तस्स अभिक्खा पसेणई पुत्तीए य चक्खुकंतं त्ति ठविआ । ते वि मायापिअरेहितो
नूणाउसा तमालसामलप्पहा छधणुसय-उस्सेहं धरंता कमेण वड्हित्था ।
अभिचंदो वि पज्जंते मरणं लद्धूणं उदहिकुमारेसु, पडिरूवा पुणो नागकुमारेसु समु-
ववण्णा । चउत्थो कुलगरुत्ति ४ । पसेणई मिहुणगनराणं तहेव नाहो होत्था, 'महापुरि-
साणं हि पुत्ता पाएणं महापुरिसा चेव जायंते' । जह कामपीलिआ नरा हिरि-मज्जा-
याओ अइक्कमेइरे, तह तया जुगलियनरा हक्कारनीइं मक्कारनीइं च वइक्कमिन्ति ।
तओ पसेणई अगायार-महाभूअ-उत्तास-अमंतअखरोवमं धिक्कारनीइं अण्णं करित्था ।
स नीइक्कुसलो ताहिं तीहिं नीईहिं सयलमिहुणगलोगं पसासित्था । तओ पच्छिमकाले
चक्खुकंता वि किंचि नूणाउसं पण्णासाऽहिगपंचधणुसय-उसयं मिहुणगं पसवीअ, तं वि
सह च्चिअ वुड्हित्तं पयत्तं । पुत्तो मरुदेवो नाम नंदणा य सिरिकंता नामेण ते दुण्णि
लोयम्मि पसिद्धिं पत्ता । पियंगुवण्णपैत्तीए सुक्खणप्पहो मरुदेवो नंदणवणतरुसेणीए
कणयायलो इव सोहित्था । ते वि पज्जंते मरणं पाविउण पसेणई दीवकुमारेसु चक्खुकंता
पुणो नागकुमारेसु उववज्जिअ । पंचमो कुलगरोत्ति ५ । मरुदेवो वि तेण च्चिअ नीइक्कमेण सव्वे
जुगलिए नरे पसासित्था । पज्जंते सिरिकंता नामेण नाभिं मरुदेवं च जुगलगं पस-
वित्था, ते पणवीसाऽहिग-पंचधणुसउस्सया सह च्चिअ वुड्हित्तं पाविअ । पियंगुसंनिहा
मरुदेवा जंबूणयवणसरिसो य नाही मायपियरगुणेहिं ताण पडिबिबभूया इव सोहित्था ।
सिरिकंतामरुदेवेहितो ताणं आउसं मणयं नूणं संखिज्जपुव्वपमाणं होत्था । अह
मरुदेवो कालधम्मं उवागच्छिअ दीवकुमारेसु, सिरिकंता वि तक्कालं चिअ नागकुमारेसुं
गच्छित्था । छट्ठो कुलगरो समत्तो ६ । मिहुणगनराणं सत्तमो कुलगरो नाभी संजाओ ।
सो वि पुव्वमिव जुगलियनरे तीहिं नीईहिं पसासित्तं पउत्तो ।

तया तइआरगसेसे संखाए चउरासीइपुव्वसयसहस्सेसु सनवासीइपक्खेसु समा-
णेसु इह आसाढमासस्स किण्ह चउत्थीए उत्तरासाढानक्खत्ते चंदे उवागए सिरिवज्ज-
णाहस्स जीवो तित्तीससागरोवमरमाणं आउं परिपालिउण सवट्ठसिद्धिमाणाओ
चविउआण सिरिनाभिकुलगरस्स भज्जाए मरुदेवीए उयरंमि ओइण्णो । तस्साऽव-
यारम्मि लोगत्तए वि पाणीणं दुक्खच्छेआओ खणं सोक्खं उज्जोओ य महंतो

संज्ञाओ । तत्थ अवयाररयणीए वासभवणे सुहसुत्ताए मरुदेवीए चउइस महासुमिणा दिद्वा । तत्थ पढेमे सियो पीणक्खंधो दिग्घसरलपुच्छो सुवण्णखिखिणीमालाविराडओ वसहो १, चउदंतो सेयवण्णो केमुण्णओ झरंतमयरेहिरो गयवरो २, पीअनयणो दिग्घरसणो लोलेकेसरो सीहो ३, पउमइहकमलवासिणी पुण्णचंदविलोयणा दिसिगइ-दोरुयीवरकराभिसिचमाणी सिरिदेवी ४, नाणाविहाऽमरतरुपुष्पपरिगुंफिअं दामं ५, नियाऽऽण्णपडिच्छंदमिव आणंदजणगं पहापूरुज्जोइअ-दिसामंडलं चंदमंडलं ६, तमपडलविद्धंसगो निसाए वि वासर-भमकारगो रस्सिसहस्ससोहिरो स्रो ७, खिखिणीजालसोहिरीए पयलंतीए पडागाए रायमाणो महाधओ ८, जच्चकंचणु-ज्जलंतरुवो समुद-महगुग्गच्छंत-सुहाकुंभ-सहोयरो पुण्णकुंभो ९, भंमरनिणार्हि पउमेहिं पढमत्तिथयरं धुणिउं अणेगाण्णभओ इव महंतो पउमसरो १०, भूमीए वित्थरिअसरय-मेहमालासोहाचोरेहिं वीइनियरेहिं मणाभिरामो खीरसागरो ११, देवत्तणे जत्थ भयवं उंसिओ होत्था, तं इहावि पुव्वनेहेण आगयं पिच अमिअपहाविराडं विमाणवरं १२, महियलपइट्ठिओ उइठं गगणमंडलंतं पभासयंतो तारगाणं गणो कओ वि एगत्थमिलिओ इव पुंजीभूआऽमलजुई महंतो रयणपुजो १३, तिलोमीमज्झट्ठिआणं तेयंसीणं पयत्थाणं संपिडिओ तेओ इव धूमरहिओ सिही १४ । एवं एए चउइस महासुमिणा सरय-ससिवयणाए मरुदेवीए सुहपंकए कमेण पविसिंसु । निसाविरामसमए सामिणी मरुदेवी वि सुमिणंते विम्वइआणणा विबोदित्था । तओ सा मरुदेवी हियए अमायंतं हरिसं उग्गीरंती इव कोमलक्खरेहिं तहेव ते सुमिणे नाभिकुलगरस्स कहित्था ।

मरुदेवं पइ नाहिकुलगरस्स इंदाणं च सुमिण-कलकहणं—

हे देवि ! तुम्ह उत्तमो कुलगरो पुत्तो होहिइ ति कहिऊण नाभिकुलगरो अप्पकेरसरलयाणुसारेण सुविणाणं अत्थं वियारिउं पयत्तो । तया इंदाणं आसणाई धिराई पि तया कंपियाई, 'अकम्हा अम्हाणं आसणाणं पकंपणं किं !' ति इंदा ओहिनाणेण उवओणं दाऊण तं वियारिंसु । तंमि समए भयवओ माउस्स सुविणाणं अत्थं आसंसिउं कयसंकेआ वयंसा इव सिग्गं तत्थ आगच्छिंसु । तओ विणएण कयंजलिणो ते सुमिणाणं अत्थं फुडं अकहिंसु—हे सामिणि ! सुमिणे वसहदंसणाओ तव पुत्तो मोहपंकमग्ग-धम्मरहुद्धरणसमत्थो होही १ । गयवरदंसणाओ तव तणओ गुरुराणं पि गुरुरो महावीरिइक्कधामं २ । सीहदंसणाओ धीरो सव्वत्थ भयरहिओ स्रो

अक्खलियविक्रमो पुरिससीहो होहिइ ३ । सिरिदेवीदंसणेण ते पुत्तो 'लोगत्तइस्सरिय-
सिरिनाहो ४ । सुमिणे दामदंसणाओ सव्वलोगस्स पुप्फमाला इव सिरसा उव्वहणिज्ज-
सासणो होही ५ । पुण्णरयणीयरदंसणाओ जगनयणाऽऽणंदगरो कंतो तुम्ह नंदणो भवि-
स्सइ ६ । रविदंसणेण मोहंधयारविदंसणो जगभावुज्जोयकारणो य ७ । महाधय-
दंसणाओ महावंसपइहिओ धम्मधओ होहिइ ८ । पुण्णकुंभदंसणे सयलाऽऽसयपुण्ण-
भायणं ९ । पउमसरोवरेण संसारकंतरपडियाणं जंतूणं तावं हरिस्सइ १० । स्वीर-
सागरदंसणेण अपरिभवणीओ आयरणिज्जो होही ११ । चिमाणदरिसणेण तव अंगओ
तिभुवणपई वेमाणियसुरेहिं पि सेविहिइ १२ । फुरंतकंतिरयणपुंजदरिसणेण तव
अंगओ सव्वगुणरयणागरो सिया १३ । निद्धमूवन्दिदंसणेण तव सुओ अन्नतेयसीणं
तेयं दूरं काहिइ १४ । हे सामिणि ? एएहिं चउइसेहिं सुमिणेहिं तुम्ह अंगओ चउइस-
रज्जुपमाणलोगस्स अग्गभागे ठाहिइ त्ति समुइयफलं, इअ सुमिणाण अत्थं कहिऊण
मरुदेविं च सामिणिं पणमित्ता सुरेसरा नियनियठाणमुवागया । इंदेहिं सुविणत्थ-
कहणाऽमएण सिंचिया सा वारिधरेहिं वसुहा इव 'समूससिआ जाया ।

गवभप्पहावो उसहैजिणजम्मो अ—

तेण गवभेण सा मरुदेवा सूरेण मेहमाला इव, मुत्ताहलेण सुत्ती इव, सीहेण गिरिकंदरा इव
सोहित्था । निसग्गओ पियंगुसामवण्णा वि सा सरएण मेहमाला इव पंडुरत्तणं पत्ता, ।
तेल्लविककमहासारं गवभं सा धारयंती वि खेयं न पत्ता, 'गवभवासीणं अरिहंताण
एसो हि अणुवमो पहावो चिय' । मरुदेवाए उयरंमि सणियं सणियं गवभो निगूढं
वडिढत्था । भगवओ पहावाओ सामिणी विसेसाओ वीसवच्छला जाया । नाभिकुलगरो
वि सव्वेसिं जुगलियनराणं पिउत्तो वि अहियं माणणीओ संजाओ, कप्पतरुणो वि
सामिणो पहावाओ विसिट्ठाणुभावा अभविंसु, 'जओ हि सरयकालाणुभावाओ चंद-
किरणा अहिगसिरिणो जायंते' । जह पाउसागमे सव्वओ हि संतावा उवसमंति, तह
भगवओ पहावओ भूमी वि उवसंत-तिरिय-मणूसवइरा जायइ । तओ सा मरुदेवा नवसुं
मासेसुं अद्धदमदिणेसु य गएसु 'महुमासस्स बहुलद्वमीदिणे मज्झरत्तीए गहेसु उच्च-
ट्ठाणट्ठिएसु उत्तरासाढाए चंदे उवागए जुगलियं पुत्तं पसवित्था । तया दिसाओ
हरिसेण इव पसणं पत्ताओ, लोगो कीलापरो जाओ । उववायसेज्जाजायदेवो इव
जराउ—सोणिअप्पमुहकलंकपरिवज्जिओ सयणिज्जे सो विराइत्था । तया कय—

जगनयणचमकारो अंधयारविणासगो बिज्जुपयासो इव उज्जोओ लोगत्तए संजाओ ।
मेहगहीरझुणी दुंदुही गयणे सयं चिअ बाइउं पयत्ता । तथा तिरिय-त्तर-देवाणं तह
य पुव्वं अपत्तसोक्खाणं नेरइयाणं पि खणं सुहं जायए । भूमीए मंदं मंदं पसप्पंतेहिं
समीरणेहिं किंकरेहिं इव मेइणीए रयं अवहरिअं । मेहा चेलुक्खेवं गंधं बुं च वरिसिरे,
मेइणी य ऊसामं समाससेइ ।

दिसिकुमारीकयजम्ममहूसवो —

अह अहोलोगवासिणीओ पयलियासणाओ अह दिसिकुमारीओ सज्जो सुइवरंमि
समागया ।

ताओ इमाओ—

भोगंकरा भोगवई, सुभोगा भोगमालिणी ।

तोयधारा विचित्ता य, पुष्पमाला अणिंदिया ॥१॥

तत्थ पढमं तित्थयरं तित्थयरमायरं च पयाहिणतिगं काऊण वंदिऊण य एवं
वयंति—‘तुभं नमो जगमायरे ? जगनाणदीवदाइमे !, अम्हे अह अहोलोगवासिणीओ
दिसाकुमारीओ ओहिनाणेण तित्थयरस्स पवित्तं जम्मं नाऊण जिण-जम्ममहूसव-
करणत्थं इहागया, तम्हा तुम्हेहिं न भेयव्वं’ ति वोत्तूणं पुव्वुत्तरदिसाए संठिआ
थंभसहस्सजुअं पुव्वसुहं सुइगावरं कुणंति । पुणो ताओ सुइगावरं परिओ जोयणभूमि-
पज्जंतं सकरा—कंटगाइअं संवट्टयाएण अवहरिंति, संवट्टयायं च संहरिऊण भगवंतं
च पणमिअ तयासण्णनिसण्णाओ भगवओ गुणे गायंतीओ अवचिट्ठंति । तहेव उइड-
लोगवासिणीओ वि अह मेरुगिरिसंठिअ-दिसिकुमारीओ आसणकंणेण जिणजम्मणं
णाऊण तत्थ आगयाओ, ता इमाओ—

मेहंकरा मेहवई, सुमेहा मेहमालिणी ।

सुवच्छा वच्छमित्ता य, वारिसेणा बलाहगा ॥२॥

ताओ जिणं जिणजण्णि नच्चा थुणिता य गयणे मेहपडलं सिग्घं विउव्वित्ति,
विउव्विऊण ताओ सुगंधिवरतोएण जोजणं जाव सुइवरस्स संमंतओ रय-
समूहं पसमेइरे, तओ वसुंधराए पंचवण्णपुप्फेहिं जाणुपमाणं बुद्धिं पकुव्वंति, तहेव

तित्थयरस्स निम्मलयरे गुणे गायंतीओ हरिस-पगरिस-सालिणीओ जहोइअट्ठाणे चिट्ठंति । पुव्वरुयगपव्वयाओ अट्ठ दिसाकुमारीओ वि विमाणेहिं सह तत्थ आगया । ताओ इमाओ—

नंदा य उत्तराणंदा, आणंदा नंदिवट्ठणा ।

विजया वेजयंती अ, जयंती चापराइआ ॥३॥

एआओ पट्ठं मरुदेवं च नमिऊण पुव्वं व कहिऊण दप्पणहत्थाओ मंगलाइं गायंतीओ पुव्वदिसाए चिट्ठंति । दाहिणरुयगगिरिसंठिआ अट्ठ दिसाकुमारीओ हरिसेण तत्थ समागयाओ, ता इमाओ—

समाहारा सुपयत्ता, सुप्पवुद्धा जसोहरा ।

लच्छीवई सेसवई, चित्तगुत्ता वसुंधरा ॥४॥

ताओ जिणिंदं जिणजण्णिं च पणमित्ता पुव्वमिव निवेइऊण भिंगारपाणीओ जिणगुणे गायंतीओ दाहिणदिसाए अवचिट्ठंति । पच्छिमरुयगगिरिवासिणीओ वि अट्ठ दिसाकुमारीओ भत्तीए परुप्परं फट्ठं कुणंतीओ आगया, ता इमाउ—

इलादेवी सुरादेवी, पुढवी पउमावई ।

एगनासा नवमिगा, भद्दा सीयत्ति नामओ ॥५॥

इमा जिणवरं जिणवरस्स मायरं च पणमित्ता पुव्वं व विण्णविऊण विज्जण-हत्थाओ जिणिंदगुणे गायंतीओ पच्छिमदिसाए चिट्ठंति ।

उत्तररुयगगिरित्तो अट्ठ दिसाकुमारीओ वि सिग्घं आभिओगियदेवविउव्विय-विमाणेहिं सह तत्थागया, ता इमा—

अलंबुत्ता मिस्सकेसी, पुंडरीगा य वारुणी ।

हासा सव्वप्पहा चैव, सिरी हिरि त्ति नामओ ॥६॥

इमाओ जिणिंदं जिणिंदस्स अंबं च नमिऊण पुव्वमिव कहिऊण गायंतीओ चामरहत्था उत्तरदिसाए चिट्ठंति । रुयगगिरिणो विदिसाहिंतो चउरो दिसाकुमारीओ समायाया, ता इमा—

१ पट्ठणा य—सुपा० । २ भोगवई—सुपा० । ३ स्पद्धांम् । ४ ऽनवमिगा भद्दाऽसोगा य अट्ठमा—सुपा० ।
५ वारुणी पुंडरीगा य, मिस्सकेसी अलंबुत्ता—सुपा० ।

चित्ता चित्तकणगा 'सएरा सोत्तामणी तहा ।

ताओ जिणं जिणमायरं च पणमिउआण तहेव विण्णविअ दीवहत्था जिणगुण-
गायंतीओ ईसाणाइविदिसासु चिट्ठंति । पुणो चउरो दिसाकुमारिगाओ रुयगदीवाओ
समागया, ताओ—

'रुवा रुवासिगा यावि, सुरुवा रुवगावई ॥७॥

इमाओ चउरंगुलं वज्जिऊण जिणवरस्स नाहिनालं छेत्तुणं खाओयरे खिवंति,
तं विवरं रयणेहिं पूरिऊण तस्स उवरिं दुरुवाए पीढिगावंधं कुणेइरे, पुणो ताओ
जिणवरजम्मणघराओ पुव्व-दाहिण-उत्तरदिसासु तिणिण सिरिगेहाणीव केलीघराइं
विउव्विरे, पत्तेगं ताण मज्झंमि सीहासणविहूसिअं विसालं चउस्सालं विउव्वंति ।
तओ ताओ जिणं करंजलीए ठविऊण मायरं च दासीओ इव दिण्णवाहूओ दाहिण-
चउस्सालंमि निति । जिणं जिणमायरं च सीहासणंमि निवेसिऊण ताओ सुगंधिणा
लक्खपागतेरलेणं अब्भंगणं कुणेइरे, तओ अमंदाऽऽमोयपमोइआ ताओ दिव्वेण उव्वदु-
णेण दुणिण उव्वइंति, तओ पुव्वचउस्सालंमि नेऊण सीहासणंमि य ते दुणिण निवेसिऊण
निम्मलेहिं सुगंधेहिं जलेहिं ण्हावेइरे । अह गंधकसायवत्थेहिं ताणं अंगाइं पमज्जंति,
तओ गोसीसचंदणरसेहिं चच्चेइरे, देवदूसवसणाइं विज्जुप्पणाससरिसाइं विचिंताऽऽह-
रणाइं च ते दुणिण पहिराविति । अह उत्तरचउस्सालंमि नेऊण सिंवासणोवरिं भयवंतं भग-
वंतमायरं च निसीआविति, तओ खुल्लहिमवंतगिरिणो गोसीसचंदणकट्ठाइं आभियोगिय-
देवेहिं आणविति । तओ अरणिकट्ठेहिं अग्गिं उप्पाइत्ता गोसीसचंदणेहिं होमं काऊण तेण
'वन्दिभप्पेण रक्खपाोट्टलिगं ताणं बंधति, 'पव्वयाउसो भवाहि' ति वोत्तूण ताओ
पहुणो कण्णपासंमि दोणिण पाहाणगोलगे परुणपरं अप्फालिति । तओ पहुं मरुदेवं च
सुइगाभवणंमि सयणिज्जे ठविऊण मंगलाइं गायंतीओ ताओ चिट्ठंति । एयाओ
दिसिकुमारीओ चउसहस्ससामाणिअदेवेहिं चऊहिं च महत्तरादेवीहिं, सोलससहस्संग-
रक्खगेहिं, सत्तहिं सेण्णेहिं, सत्तहिं सेणाहिवईहिं, अण्णेहिं महीइिदहिं देवेहिं, आभियो-
गियदेवविउव्वियजोयणयमाणविमाणेहिं सह जिणजम्मणभवणे समागच्छंति ।

इअ दिसिकुमारिगाकयजम्ममहूसवो ।

१ सतेरा सौत्तामणी । शतेरा वसुधामिनी-कप्प० । सुतेर-सोयामणी नामा-सुपा० । २ रुवा रुयंसा
सुरुवा रुयगावई नामा-सुपा० । ३ आनाययन्ति । ४ वह्निभस्मना ।

सोहम्माहिवइणो जिणजम्मणघराओ जिणं घेत्तूणं मेरुम्मि गमणं—

अह तथा सासयघंटाणं रणरणारवो सग्गविमाणेसुं संभूओ । तेण सेलमूलाणीव
अयलाणि अवि आसणाइं कंषिआई, संभमाओ हिययाइं च । तओ सोहम्माहिवई
कोवाडोवारुणनेत्तो 'ण्डालपट्टघडियभिउडीवियडाणणो अहरं पैप्फोरंतो, एगेण
अंधिणा आसणं थिरं काउं इव ऊससंतो 'अज्ज कयंतेण कस्स पत्तं उक्खित्तं' ति
बुवंतो वज्जं गिण्हेइ । तथा कुद्धकेसरिसरिसं सक्कं पेक्खित्ता सेणाहिवईतं नच्चा विण्ण
वेइ—हे सामि ! मइ सेवगे समाणे किं एरिसो आवेसो ?, समादिससु तव कं सत्तुं
इणेमि ? । तओ विबुहाहिवो ओहिणाणेण पढमजिणवइणो जम्मे जाणिऊण विगलिय-
कोहो खणेण पसणमणो 'मए अणुइअं चित्तिं, मम धिरत्थु, मिच्छा मे दुक्कडं' ति
वयंतो वासवो सीहासणं चएइ, चइत्ता तित्थयराभिमुहे सत्त अट्ट पयाइं गंतूणं, मत्थए
अंजलिं काउणं, वामं जाणुं भूमीए अलगं ठवेइ दाहिणं च जाणुं धरणियलंसि निवे-
सित्ता, तिक्खुत्तो मत्थयं धरणियले निवेसिऊण अरिहंतं नच्चा रोमंघियदेहो थुइं कुणेइ
— 'हे तित्थनाह ! तिओगनाह ! किवारससागर ! सिरिनाभिनंदण ! हे भयवं तुम्हं
नमो, जम्मओ आभिणिबोहियाइनाणत्तएण तुमं सोहसे, हे देव ! इमं भारह-
वासं तेलुक्कमउल्लिरयणेण तुमए अलंकरिज्जइ, तेण अज्ज सग्गाओ वि अइरिच्चइ ।
हे जगनाह ! तुम्ह जम्मकल्लाणमहसवपवित्तिओ वासरो वि तुममिव आसंसारं वदं-
णिज्जो, हे पहु ! तुम्ह जम्मकम्मुणा नेरइयाणं पि सुइं जायइ, 'अरिहताणं हि
उदयो केसिं संतावहारगो न सिया ? ।' हे विहु ! तुम्हाणं चरणसरोयं पाविऊण
अहुणा के भवोदहिं न तरिस्संति ? । रणंमि कप्पतरु इव मरुभूमीए नइप्पवाहो
इव हे भयवं ! लोगाणं पुण्णेण भारहवासे तुमं ओइण्णो असि' ति भयवंतं थुणि-
ऊण सोहम्माहिवई हरिणेगमेसि पाइत्ताणीयाहिवई एवं वयासी—जंबूदीवे दाहिणइडभ-
रए मज्झखंडे मज्झभूमिभागे नाभिकुलगरस्स पत्तीए मरुदवाए नंदणो पढमतित्थयरो
संजाओ, तेण तस्स जम्मणमहसवहेयवे सव्वे सुरा आहविज्जंतु । तओ सो सेणा-
हिवई जोयणपरिमंडलपसाणं अच्चब्भुयसरं सुघोसाभिव्खयंतं तिक्खुत्तो उल्लालितो
वाएइ, तओ तीसे घणघोसपडिरववसेणं सोहम्मदेवलोगस्स अन्नाण वि घंटाणं एगू-
णाइं वत्तीसं सयसहस्साइं रणरणारवं काउं पारद्धाइं, तप्पडिरवो वि समगं समुच्छ-
लिओ । तथा पंचविहविसयपसत्ता देवा तेण सदेण 'किं एयं' ति संभंता सावहा-
णयं पाविआ । सावहाणेसु देवेषु अह सो सेणाहिवई मेहनिग्घोसगहीरेण वएण
सुररायसासणं कहेइ—भो भो देवा ! देवीपमुहपरिवारजुयाणं तुम्हाणं सव्वेसिं अलं-
घणिज्जसासणो सोहम्मदेवलोगाहिवई सक्को इअ आदिसइ—'जंबूदीवस्स दाहिण-

इदमरहे मज्झखंडे नाभिकुलगरस्स मेहे पढमतिथयरो संजाओ, तत्थ तस्स पहुणो जम्मकल्लणमहुसवविहाणिच्छाए गंतुं अम्हाणं इव तुम्हे तुवरेह—‘अओ परं अण्णं अहिगं किच्चं न’ इअ हरिणेगमेसिवयणाओ पहुणो जम्ममहं नाऊण केवि अरि-
 इंतं पइ भत्तिभावओ, केवि इंदस्स आणाए, केवि दारेहिं उल्लासिआ, केवि मिताणुवत्तणाओ देवा नियनियविमाणवरेहिं सकसंनिहिंमि समागच्छंति । तओ सको वि पालां नाम आभियोगियं देवं ‘अणुवमं विमाणं करिज्जउ’ त्ति आदिसइ, पालगदेवो सामिनिदेसपरिपालगो तंमि समए लक्खजोयणवित्थारं पंचसयजो-
 यणुच्चं इच्छाणुमाणगमणं पालकं नाम विमाणं विउव्वेइ, तस्स विमाणस्स तिण्णि सोवाणपंतीओ संति, ताणं पुरओ विविहवण्णरयणमयाइं तिण्णि तोर-
 णाईं, तस्स विमाणस्स अब्भंतरा भूमी समेवित्ता राएइ । एयस्स मज्झभागे रयण-
 निम्मिओ पेक्खामंडवो अत्थि । मंडवस्स अब्भंतरम्मि चारुमाणिकनिम्मिया अट्टजोयण-
 विखंक्काऽऽयामा पिण्डो य चउजोयणा पंकयस्स कण्णिगा विव पीडिया अत्थि, तीए
 ‘उवरिं असेसतेयसारपुंजनिम्मियं पिय एगं रयणसीहासणं अत्थि, तस्स सीहासणस्स वायव्व-उत्तर—उत्तरपुरच्छिम दिसासुं चउरासीइसहस्ससामाणियदेवाणं तावं-
 ताईं भदासणाईं, पुव्वदिसाए अट्ठहं अगमहिंसीणं अट्ठ, दाहिणपुव्वदिसाए अब्भं-
 तरपारिसज्जदेवाणं दुवालसभदासणसहस्साईं, दाहिणदिसाए मज्झपारिसज्ज-
 देवाणं चउदससहस्साणि, दाहिणपच्छिमदिसाए बाहिरपारिसज्जदेवाणं सोलस
 भदासणसहस्साईं, पच्छिमदिसाए सत्तण्हं अणिआहिवईणं सत्त भदासणाईं सति, तस्स
 सकस्स सव्वासु दिसासु समंतओ चउण्हं चउरासीईणं आयरक्खदेवसहस्साणं तावंताईं
 भदासणाईं संति, एवं परिपुण्णं विमाणं विरइऊण आभियोगियदेवा देविंदस्स विण्णविति ।
 पुरंदरो वि तंमि समए अरुवब्भुयं रुवं विउव्वेइ, विउव्वित्ता अट्ठहिं महिसीहिं सह वासवो
 पुव्वसोवाणमग्गेण पयाहिणं कुणंतो विमाणं आरोहेइ, माणिकभित्तिसंकतमुत्ती सहस्संगो इव
 ‘सहस्सक्खो नियभदासणे पुव्वमुहो उवविसेइ, तह सकसामाणियदेवा उत्तरसोवाणेहिं
 विमाणमज्झे पविसित्ता नियनियभदासणे उवविसंति । एवं अण्णे वि देवा पच्छिमाइ
 सोवाणपंतीए पविसिऊण नियनियासणेसु उवविसंति । सिंघासणनिसण्णस्स सकस्स पुरओ
 दप्पणप्पमुहाइं अट्ठ मंगलाइं विरायंति, उवरिं सेयच्छत्तं, उवसत्पता इंसाविव ‘धुव्वंता
 दोणि चामरा सोहेइरे, तह विमाणस्स अग्गओ विविहपडागाहिं सोहमाणो सहस्सजोयणु-
 च्चो महिंदज्जओ सोहइ । तओ कोडिसंखेहिं सामाणिआइदेवेहिं परिवरिओ सको

१ समवृत्ता । २ अष्टयोजनविष्कभायामा । ३ पिण्डतः=वाहल्यतः । ४ उपरि ५ । सहस्राक्षः=इन्द्रः ।

पवाहेहि सागरो इव राएइ । तं च महाविमाणं अन्नसुराणं विमाणेहि परिवेदियं समाणं
मूलवेइअं परिहिचेइएहिं इव उरुचएण विरायइ । तओ मागहाणं जयजयसहेहिं दुंदुहि-
निस्सणेहिं च गंधव्वाऽणीग-नट्टाऽणीगवाइयरवेहिं देवाणं च कोलाहलेण य सहमइयं
विमाणं इन्दइच्छाए सोहम्मदेवलोगस्स उत्तरओ तिरियमग्गेण उत्तरंतं जंबूदीवस्स इक्क-
णाय भायणमिव लक्खिज्जइ । तथा सीहवाहणो इत्थिवाहणं कहेइ-इओ दूरं गच्छाहि, अण्णह
मम सीहो न सहिस्सइ, एवं महिसवाहणो आसवाहणं, वग्गवाहणो भिगवाहणं, गरुडवाहणो
सप्पवाहणं वएइ । देवाणं कोडाकोडीहिं अन्नदेवविमाणेहिं बहुविहअण्णवाहणेहिं च वित्थि-
ण्णो वि नहमग्गो तथा अइसंकीण्णो संजाओ । तं विमाणं गयणतलाओ उत्तरंतं समुदे महाअय-
पडं जाणपत्तमिव राएइ, एवं असंखिज्जदीवसमुदे कमेणं उलंघित्ताणं नंदीसरदीवे समाग-
च्छेइ, तत्थ इंदो दाहिणपुव्वदिताए गंतूण रइगरपव्वए तं विमाणं संखिविऊण तओ
वि दीवसागरे उल्लंघंतो कमेण तं विमाणं संखिवंतो जेणेव जंबूदीवस्स दाहिणद्धभारइं
खित्तं, जेणेव मज्झखंडं, जेणेव पढमतित्थयरस्स जम्मभवणं तेणेव समागच्छेइ, दिव्ववर-
विमाणेण जिणजम्मणभुवणस्स तिक्खुत्तो आयाहिणपयाहिणं काऊणं तओ विमाणाओ
उत्तरिऊणं पसण्णमाणसो सक्को अट्टहिं अग्गमहिंसीहिं चुलसीसहस्ससामाणियदेवेहिं
संजुत्तो जत्थ तित्थयरो जिणजणणी य तत्थेव आगच्छइ, दिट्ठिविसए पडुं पणमेइ । तओ
समायरं मयवंतं तिपयाहिणपुव्वयं पुणो वि नमंसेइ, नमंसित्ता मुद्धम्मि निवडंजली भत्तिमंतो
सक्को मरुदेवासामिणिं संथुणेइ-हे देवि ! रयणकुक्खिधरे ! जगदीवपदाइगे ! तुम्हं नमोत्थु,
जगमायर ! तुमं धण्णा ! पुण्णवई असि, तुमं चिय सहलजम्मा असि, तुममेव उत्तमलक्खणा,
पुत्तवईसु तुमं चेव भुवणत्तए पवित्ता सि, जीए अब्भंतर-तम-पसर-निरुंभणिकवदिणनाहं
पढमजिणिंदं वरपुत्तरयणं जणिऊण संपयं पुव्वा जणणी खज्जोयपसविणी इव कया ।
हे देवि ! अहं सोहम्मदेविंदो तुम्ह पुत्तरयग्गस्स अरिहंतस्स जम्मगमहिमहसवं काउं
इह आगओ अम्हि, 'भवन्तीए नेव भेयव्वं' ति कहिऊण इंदो जिणजणणीए 'अवसोवणी
निदं दलिऊण जणणिपासे वेउव्वियजिणपडिरूवं ठविऊणं सयमेव इंदो पंच सरीरे
विउव्विऊण एगेण रूवेणं पिट्ठग्गो जिणस्स मत्थए छत्तं धरेइ, दोहिं च उभयपासेसु
सेयवरचामरे ढालए, एक्केण पुरो सारयरविमंडलं च दिसावलयं उज्जोयंतं वज्जं धरेइ,
पुणो एगेण रूवेणं हरिसवसुल्लसियरोमंचो सक्को सुरहिगोसीसचंदणचच्चियकर-
कमळे जिणवरं धरेइ, इअ पंचहिं रूवेहिं सव्वं पि नियक्कायव्वं काउं भत्तिभरकलिओ
बहुदेवदेवीकोडीहिं परिवुडो अण्णाणं पुण्णमंतं मण्णंतो आखंडलो मन्दरसेलाभिमुहं चलेइ,
तथा उक्कंठियदेवाग दिट्ठीओ जिणिंददेहे निवडियाओ, केइ अग्गमामिणो देवा पिट्ठगे

देवे, पिठुगा य देवा पुरओ गच्छंते देवे पसंसेईरे, अग्गेयणा केइ अमरा पढुणो अच्चब्भु-
यरूवं ददंठुं पिठुवटीणि नेत्ताइं इच्छंति । पक्खगामिणो केइ अमरा पढुं ददंठुं अतित्ता समाणा
धंभियाइं इव नयणाइं अन्नओ नेउं न पोरिंति, एवं पढुमुहदंसणुंसुगदेवदेवीगणपरिव-
रिओ परमेणं पमोएणं दिव्वगईए गयणमग्गेण गच्छंतो देविंदो कमेण मेरुमहीधरं संपत्तो ।
तत्थ पंडगवणम्मि चूलिगाए दाहिणदिसाए नीहारहारधवलाए अइपंडुवत्तसिलाए मणि-
रणकिरणजलक्खालियत्तवणीयमइय-सिहासणम्मि उच्छंमठवियजिणणाहो हरिसवस-
वियसियनयणजुगो पुब्बामिमुहो सक्को उवविसइ ।

ईसाणकप्पाइइंदाणं मेरुसिहरे समागमणं—

एत्थंतरम्मि महायोसाधंढानायपडिबोहियअट्ठावीसविमाणलक्खवासिदेवेहिं परि-
वरिओ सुल्लधरो वसहाहणो पुप्फगनामामियोगियदेवकयपुप्फगविमाणेण ईसाण-
कप्पाहिर्वईइंदो ईसाणकप्पस्स दाहिणओ तिरियमग्गेण निगंतूण नंदीसरदीवे उत्तरपुरत्थि-
मिल्ले रइकरपव्वए आगंतूण सोहम्मिंदो इव विमाणं पडिसंहरित्ता सुमेरुसिहरम्मि सिग्घं
जिणीसरपासम्मि उवागच्छेइ । एवं दुवालसविमाणलक्खवासिसुरगणसंजुओ
सणकुमारदेविंदो सुमणोविमाणेण, अट्ठलक्खविमाणत्थिअदेवेहिं परिवरिओ महिंदो
सिरिवच्छविमाणेण, चउलक्खविमाणवासिअमरेहिं परिवुडो चम्मिहंदो नंदावत्त-
विमाणेण, पण्णाससहस्सविमाणवासिदेवेहिं जुओ लंतगं देविंदो कामगवविमाणेण,
चत्तालोससहस्साणं विमाणानं अमरगणेहिं परिवरिओ सुकिंदो पीइगमविमाणेण, छ-
सहस्सविमाणवासिदेवेहिं सह सहस्सारिंदो मणोरमविमाणेण, चउसयविमाणट्ठिअ-
सुरगणेहिं संजुतो आणय-पाणयवासवो विमलेण विमाणेण, तिसयविमाणाहिर्वई
“आरण-अच्चुयदेवराओ य सव्वओभइविमाणेण मेरुगिरिवरम्मि जिणयायपासंमि
उवागया । तथा रयणपहापुठवीए अब्भंतरनिवासिभवण-वंतरदेविंदाणमवि तहेव
आसणाइं पि कपिंसु, तत्थ असुरिंदस्स चमरचंचारायधाणीए सुहम्माए सहाए चमरा-
भिहसीहासणंमि निसण्णो असुरेसो “चमरिंदो वि ओहिणाणेण जिणजम्मं नच्चा
देवाणं जाणणत्थं दुमेण अणीयाहिर्वइणा ओहसरं घंटं वायावेइ, एमो विचउसट्ठिसहस्स-
सामाणियदेवेहिं तेत्तीस-तायत्तीसग-देवेहिं पंचहिं अगमहिंसीहिं तीहिं परिसाहिं सत्तहिं
अणीएहिं सत्तहिं अणीयाहिर्वईहिं, पइदिसं अप्परक्खगाणं चउसट्ठिसहरसेहिं परमरिद्धि-
मंतैहिं देवेहिं अवरेहिं असुरकुमारेहिं च परिवरिओ पण्णाससहस्सजोयणवित्थंडं पंचजोय-
णसयउच्चं महज्झयविहूसियं आभियोगियदेवविउव्वियं विमाणं समारोहिऊण जिण-

जम्ममहूसवसमायरणत्थं सको इव नंदीसरदीवम्मि विमाणं संहरिऊण चमरिंदो मेससि-
हरं समागओ । एवं बलिचंवानयरीए ^{११}बलिंदो असुरेसरो महादुमेण सेणावङ्गा महो-
हसरं घंट वाएइ, सो वि सट्टिसहस्ससामाणियदेवेहिं, चउग्गुणेहिं च आयरक्खगदेवेहिं
तायत्तिसगाइदेवगणेहिं च परियरिओ चमरो विव मंदरायलमागओ । एवं ^{१२}धरणना-
गिंदो पत्तिसेणावङ्गा भइसेणेण मेहसराघंटावायणेण पडिबोहिएहिं छसहस्स
सामाणियदेवेहिं चउग्गुणेहिं आयरक्खगदेवेहिं छहिं महिसीहिं अन्नेहिं पि नागकुमार-
देवेहिं परिवुडो पणवीसजोयणसहस्सवित्थरं सद्धदुजोयणसयतुंगं इंदज्झयविराइयं
विमाणरयणमारोहिता भयवंतदंसणुसुगो खणेण मंदरायलसिहरमागओ । ^{१३}भूयाणंदो
वि नागिंदो पायत्ताणियवइदक्खेण मेहसराघंटाए पताडणेण पबोहिएहिं सामाणियदेव-
बुंदेहिं परिवुडो आभियोगियदेवविउन्वियविमाणवरमारोहिउआण जगत्तयनाहपवि-
त्तियं सुरगिरिंदं समागओ । एवं विज्जुकुमाराणं ^{१४}हरी ^{१५}हरिसहो दोण्णि इंदा, सुवण्ण-
कुमाराणं ^{१६}वेणुदेरो ^{१७}वेणुदारी, अग्गिकुमाराणं ^{१८}अग्गिसिहअग्गिमाणवा, वाउकुमाराणं
^{१९}बेलंब-^{२०}पैभेजणा, थणियकुमाराणं ^{२१}सुघोस-^{२२}मैहायोसा, उदहिकुमाराणं ^{२३}जलकंत-
^{२४}जलप्पहा, दीवकुमाराणं ^{२५}पुण्ण-^{२६}विसिद्धा, दिसिकुमाराणं ^{२७}अमिय^{२८}अमियवाहणा
दोण्णि पुरंदरा । एवं वंतरेसु पिसायवासवा ^{२९}काल-^{३०}महाकाला, भूयपुरंदरा ^{३१}सुख-
^{३२}पडिरूवा, जक्खरायइंदा ^{३३}पुण्णभइ^{३४}माणिभइ, रक्खसाणं इंदा ^{३५}भाम^{३६}महाभीमा,
किंनराण महोसरा^{३७}किंनर^{३८}किंपुरिसा, किंपुरिसिंदा^{३९}सप्पुरिसा^{४०}महापुरिसा, महो-
रगपुरंदरा ^{४१}अइकाय^{४२}महाकाया, गंधव्वाणं इंदा ^{४३}गीयरइ^{४४}गीयजसा, एए सोलस
वंतरिंदा । तह अणपन्नियपणपन्नियाइवाणवंतरअट्टनिकायाणं पि सोलस इंदा उवागया ।
ते य इमे-अणपन्नियाणं ^{४५}सन्नहिंय^{४६}समाणगा दोण्णि इंदा, पणपन्नियाण महो-
सरा ^{४७}धाया^{४८}विधाया य, इसिवाइयाणं ^{४९}इसि-^{५०}इसिपालगा, भूयवाइयाणं ^{५१}ईसरो
^{५२}महेसरो य, कंदियाणं वासवा ^{५३}सुवच्छो ^{५४}विसालगो य, महाकंदियाणं इंदा ^{५५}हास-
^{५६}हासरइणो, कोहंडाण^{५७}-सेय^{५८}महासेयपुदरंरा, पावगाणं वासवा ^{५९}पवगो ^{६०}पवगपई अ ।
जोइसियाणं असंखेज्जा ^{६१}चंद^{६२}आइच्चा इंदा मेरुसिहरे पढमजिणस्स पुरओ समागया,
इअ मंदरगिरिवरमुद्धम्मि जिणजम्मणमहूसवकरणं इंदाणं चउसट्ठी उवागच्छंति ।

अच्चुयकप्पाइंदकयाभिसेगमहूसवो-

अह अच्चुयवासवो आभियोगियदेवे जिणजम्मणाभिसेगोवगरणाई आणेअह त्ति
आदिसेइ । पहिद्वित्ता ते देवा उत्तरपुरच्छिमदिसाए किंचि अवकम्मिऊण खणेण वेउ-

१५ हरिकान्तो हरिस्सहः बृहत्सं । १७ वेणुदाली । १९ अग्निशिखः । २३ घोष इति बृहत्सं ।
२७ । पूर्णविशिष्टौ, पुण्य-वशिष्टौ-बृहत्सं । २९ अमित० अमितगति-बृहत्सं । १ अणपर्णिकानाम् अप्रज्ञप्तीनाम् ।
२ पणपर्णिकानाम्-पञ्चप्रज्ञप्तीनाम् ।

वियसमुग्धाएणं उत्तमयोगलाइं अकडिऊण अटोत्तरसहस्सं सुवण्णकलसाणं, अटोत्तर-
सहस्सं रूपकलसाणं, अटोत्तरसहस्सं रयणकलसाणं, एवं सुवण्णरूपकलसाणं सुवण्ण-
रयणकलसाणं रूपरयणकलसाणं सुवण्णरूपरयणकलसाणं भोमेयगाणं कलसाणं आटोत्त-
रसहस्सं विउव्विंति । तह य भिगार-दप्पण-रयणकरंडग-^१सुपइट्ठग-थालग-^२पत्तिगा-पुप्फचंगे-
रियाइ-पूओवगरणाइं कलसाणमिव सुवण्णाइमयाइं पत्तेगं अट्टुत्तरसहस्सं विउव्विरे । ते अभि-
योगियदेवाते कलसे वेत्तूणं खीसरमुद्दे गच्छंति, तस्स जलं पुंडरीग-उप्पल-कोकणयाइं च
पोम्मविसेसाइं, पुक्खरसमुद्दे उदगं पुक्खराइं च, भरहेरवयाइं मागहाइतित्थेसु जलं मड्डियं
च, गंगासिंधुपमुहवरनईणं सलिलाइं, खुड्डगहिमवंतपव्वयस्स सिद्धैत्थ-पुप्फ-वरगंघे सव्वो-
सहीओ य पउमदहस्स जलं विमलाइं च सुगंधाइं पंकयाइं गिण्हेइरे, एवं सव्ववासहर-
वेयइह-वक्खार-पव्वएसु देव-उत्तरकुरुमु अंतरनईसु भइसाल-नंदण-सोमणस-
पंडगवणेसुय जलाइं पंकयाइं गोसीस-चंदण-कुसुमो-सहि-फलाइं च गिण्हंति, तओ
ते गंधगारा इव एगत्थ गंधदव्वं जलाइं च मेलिऊण सिग्वं मंदरायलसिहरम्मि
समागच्छंति । ते विणयपणया ताइं गंधदव्वाइं खीरोयाइसलिलपडिपुण्णपुण्ण-
कलसे य अच्चुय-सुरादिवइणो समर्पिंति । अह सो अच्चुयदेविंदो अभिसेयसव्व-
सामग्नि ददहूण जायहरिसो आसणाओ उट्ठिता दसहिं सामाणियसहस्सेहिं, चत्तालीसाए
आयरक्खदेवसहस्सेहिं, तेत्तीसाए तायत्तीसेहिं, तीहिं परिसाहिं, चउहिं लोगपालेहिं,
सत्तहिं महाणीएहिं, सत्तहिं अणियवईहिं सव्वओ संपरिवुडो तेहिं विमलतित्थुप्पण-
खीर-नीरपरिपुण्णेहिं विमलकमलपिहाणेहिं गोसीसचंदणपमुहपट्ठाणवत्थुजुत्तेहिं सव्वोस-
हिरससहिंएहिं बहुसहस्ससंखेहिं महप्पमाणेहिं विउव्विंएहिं साभाविंएहिं च कलसेहिं
परमेण पमोएण भगवओ भुवणिककबंधवस्स पढमतित्थयरस्स जम्माभिसेगमहूसवं काउं
समुवट्ठिओ ।

तत्तो असीमभत्तिभरो कय उत्तरासंगो अच्चुयदेविंदो विकसियपारिजायाइपुप्फंजलिं
गिण्हेइ, गिण्हिऊण सुगंधिणा बहुलधूवधूमेण तं कुसुमंजलिं वासिऊण तिलोहनाहस्स
पुरओ मोपइ । अह अच्चुयदेविंदो सामाणियदेवेहिं सह अट्टुत्तरसहस्सं कलसे वेत्तूण
नियमत्थयमिव ते मणयं नमावितो तिहुवणनिकारणबंधवस्स पढमतित्थयरस्स जम्मा-
भिसेयं कुणइ, तथा समकालं सयलकलसेहिंतो सारयससिमऊहजालं पिव गयणसुरस-
रियाजलपडलं व तुसारहारधवलं खीरोयहिजलं जिणोवरि निवडियं, एवं च पवइमाणे
जिणाभिसेए सुरेहिं चउव्विइआउज्जाइं ताडिज्जंति । जहा सिरिमहावीरचरिए--

हुंदुही-पडह-भंभा-हुडुकाउलं, वेणु-बीणारबुडिमस्सहयमहलं ।
 झल्लरी-केरड-कंसाल-रव-बंधुरं, घोरगंभीरमेरीनिनायुद्धरं ॥१॥
 काहलारवसंबद्धखरमुहिसरं, पूरियाऽसंख-संखुत्थरवनिम्भरं ।
 पलयकालेव गज्जंतघणवंदयं, ताडियं सुरेहिं चाउच्चिहाउजयं ॥२॥

केवि सुरा चउच्चिहाइं आउज्जाइं वायंति, केवि देवा गंधवसमिलियं^१भसलोह-
 सुमणोहर-मंदार-पुप्फाइं मुंचंति, केवि मल्ला इव^२कमदहरं सज्जंति, अवरे सुहकंठ-
 रक्सुंदरं गायंति, केवि उतालतालाउलं रासयं कुणंति, एवं केवि देवा हरिसपगरिसवसेणं
 करनच्चियं, केवि मयविहलं गयगज्जियं, केवि सुइबंधुरं हयहेसियं, केवि गलदहरं कुणंति,
 अन्ने सुट्ठीहिं धरणीयलं पहरंति, केवि^३कंठीरवनायं कुच्चंति, केवि तक्खणेण तियसा
 इंदस्स अतियं कलसे उवणिति । इअ निहणियविग्घेण सुरवइसंघेण सच्चायरेण भवभ-
 यभंजणे पढमजिणवरमज्जणे किज्जमाणे मारिसेण मंदबुद्धिणा किं वणिज्जइ ।

जिणाभिसेगे य वट्टमाणे परमहरिसभरपुलइयसरीरा सव्वेवि सुरिंदा धूवकड-
 च्छय-सेयचामर-विसालच्छत्त-सुहपुप्फ-वरगंधहत्था पुरओ चिट्ठंति । अच्चुयसुरेसरे
 जिणं ण्हविऊण विरए^४ पाणयपमुहा बासट्ठी वि देविंदा नियनियपरिवारपरियरिया महावि-
 भूइए सोहम्माहिबइं मोत्तूणं कमेण पढमजिणं अभिसिंचंति, अंगरागं अच्चणं च कुणंति ।
 तयणंतरं च ईसाणदेविंदो सोहम्मपुरंदरुव्व नियरुव्वं पंचहा विउच्चित्ता एगेण रुवेण
 भयवंतं उच्छंगे धरंतो सिंहासणे निसीयइ, बीएण सेयच्छत्तं धरेइ, दोहिं च उभयपासेसुं
 वरचामरेहिं जिणीसरं वीएइ, एकेण य पुरओ हत्थम्मि खलं उल्लालितो पुरओ चिट्ठइ ।

सोहम्मकर्प्पिदकयाभिसेगमहूसवो—

अह सोहम्माहिबइं वि तित्थयरस्स चउडिसिं चत्तारि धवलवसहे संखदलुज्जले रमणिज्ज-
 सरीरे विउव्वइ, तेसिं च अट्ठसिगग्गेहितो अट्ठ खीरोयसलिलधाराओ उड्ढं गयणंगण-
 गामिणीओ पुणो अहोनिवडणेण एगीभूयाओ काऊण जिणुत्तमंगे खिवेइ, अन्नेहिं च
 बहुएहिं खीरोयकलससहस्सेहिं अभिसिंचइ, एवं कमेण निव्वत्तिए मज्जणमहूसवे परम-
 पमोयभरपुलइयंगो सोहम्मसुरनाहो सुकुमालगंधकासाइए जिणदेहं लूहिऊण गोसीसचं-
 दणुम्मीस-घुंसिणेणं अंगं आलिपइ, सियसुरहिकुसुमेहिं पूयावित्थरं विरएइ । अह सक्को

१ कट्टः—वायविशेषः । २ भ्रमरौघः । ३ कमददरम्—पादप्रहारम् । ४ सिंहानाम् । ५ गन्धका-
 पायिकया—सुगंधिकापायिरंगना वस्त्रवडे । ६ वृत्तणेन—केशर ।

रणमयपट्टमि सारयससिकरधवलेहिं अखंडेहिं रूपतंडुलेहिं दण्ण-भदासण-वद्धमाण-कलस-
मच्छ-सिरिवच्छ-सत्थिय-नंदावत्त-लक्खणाई अट्टमंगलाई आलिहेइ । तओ सो सच्चालंकार-
विभूसियं करेइ-तिलोगवइणो मुद्धमि वइरमाणिकमउडं ठवेइ, कण्णेसु सुवण्णकुंडलाई,
कंठकंदले दिव्वमुत्तालयं, बाहूसु अंगए, मणिबंधेसुं मोत्तियमणिकंकणाई, कडिदेसम्मि
सुवण्णकडिसुत्तं, पाएसु माणिकपायकडगे संठवेइ, एवं जगगुरूणो अंगाई सव्वदेहालं-
कारेहिं विभूसेइ । तओ इंदो भत्तिवासिय-मणो वियसिय-पारिजायाइमालाहि परमेसरं
पूएइ । बहुविहकुसुमनियरं च आज्ञाणुमेत्तं मुयइ । नाणाविहमणि-भत्ति-विचित्त-दंडेणं
वइरामयकडुल्लुणं पवरगंधाभिरामं धूवं उक्खिवइ, पज्जलंतदीवियाचक्खवालमणहरं
आरत्तियं तह य वरमंगलनिलयं मंगलपईवं उत्तारेइ । एवं च सव्वकायव्वे कयंमि तओ
सुरासुरेहिं सव्वायरेण पढमजिणपुरओ पणच्चियं । तओ तियसपुंगवो सद्धाल्लहिं सुरवरेहिं
सामिणो पइण्णगकुसुमपयरं उत्तरावेइ, तओ सक्को सक्कत्थवेण परमेसरं वंदिऊण
पुलइयदेहो भत्तीए थुणिउं समारंभेइ—

सक्ककयजिणिंदथुई—

नमो तुम्हं जगन्नाह !, तेलुक्कंडभोयभक्खर ।

संसारमरुकप्पहु !, बीसुद्धरणबन्धव ! ॥ १ ॥

जय भुवणत्तयवंदिय ! भक्कवमज्झनिवडंत अंतुउद्धरणसमत्थ !, जयसु परमेसर !
सरणागयदढवज्जयंजर ! वम्महकुंगकेसरि ! मोहतमपसरदिवसयर !, हे जिणिंद ! जं
तुज्झ मज्जणे एवं उवयरिया अम्हे तेण अरुवंतं अविरइपरायणं पि अप्पाणं अइपुण्ण-
वंतं मण्णेमो । हे नाह ! जत्थ तुमं जम्मं पाविओ तस्स भारहखित्तस्स भइं होउ ।
सा धरणी वि वंदणिज्जा, जा तुज्झ कमकमलं वहिहिइ । हे जिणवर ! ते मणूसा
खलु धण्णा चिय, जे तुमं अहोनिंसं पेक्खिस्संति । जहसमयं ददुणो अम्हे केरिसा ? ।

जह तुह पयसेवाए, जिणिंद ! फलमत्थि ता सया कालं ।

एवंविहपरममहं, अम्हे पेच्छंतया होमो ॥ २ ॥

नाहं वोत्तुं समत्थो म्हि, सव्वभूए वि ते गुणे ।

चरमसागरे माउं, जलाई नणु को खमो ! ॥ ३ ॥

इअ जगनाहं थुणिऊण हरिसपुण्णमाणसो सक्को पुण्वमिव पंचहारुवं विउव्वित्ता
ईसाणदेविंदस्स उस्संगाओ जिणवई चेत्तूण नियामरणेहिं परिवरिओ जिणजम्मणधरंमि

समागओ, तित्थयरपडिरुवं उवसंहरिऊण जणणीए अंतियंमि पहुं ठवेइ, तओ मरु-
देवाजणणीए तं ओसोवणिं निहं अवणेइ । पहुणो ऊसीसगमूलंमि एगं पवरं देव-
दूसजुयलं रयणकुंडलजुयलं च ठवेइ, तओ पुरंदरो विचित्तरयणहारअद्धहारजुयं सुवण्ण-
पायारनिम्मियं हेमभासुरं एगं 'सिरिदामगंडं पहुणो अवरिं दिट्ठिविणोयाय उल्लोए
मुंचेइ, जं अवलायंतो तित्थेसरो सुहेण सचक्खुविकखेवणं कुणेइ, सिरिमहावीरचरिए-
लंबंतमुत्ताहलावचूलयं 'लंबूसयं भगवओ अभिरमणनिमित्तं अवलोयंमि ओलंबेइ त्ति
कहियं । तओ सक्को वेसमणं आणवेइ-जहा भो सिग्गमेव बत्तीसं हिरण्णकोडीओ
बत्तीसं सुवण्णकोडीओ, बत्तीसं रयणकोडीओ, बत्तीसं नंदासणाइं बत्तीसं भदासणाइं
अन्नाणि य वत्थ-नेवत्थपमुहाइं महग्घाइं विसिट्ठवत्थूणि भगवओ जम्मणभवणे उव-
णमेहि । कुबेरदेवोऽपि जंभगदेवेहिं सव्वं तं सिग्गं कारवेइ । पुणरवि सक्को आभि-
योगियदेवेहिंतो सव्वत्थ एवं उग्घोसावेइ-भो भो भवणवइ-वंतर-जोइसिय-वेमाणिया
देवा देवीओ य भवंतो सुणंतु-जो किर तित्थयरस्स तित्थयरजणणीए वा असुहं
अणिट्ठं काउं चित्तिस्सइ तस्स अवस्सं अज्जग-मंजरिव्व उत्तिमंगं सत्ता तडित्ति फुट्ठिहि-
इत्ति एवं उग्घोसाविऊण तओ देविंदो पहुस्स अंगुट्ठम्मि नाणाहाररसमइयं अमयं ठवेइ ।
जओ अरिहंता थणपाणं न कुणंति, किंतु खुहोदए समाणे सयं चिय अमयरसज्जरण-
सहावं अंगुट्ठं मुहंमि पक्खिवंति । पहुणो धाइक्कमाणि सव्वाणि काउं इंदो पंच अच्छ-
रसाओ आदिसइ ।

नंदीसरदीवे इंदाइकयअट्टाहियामहूसवो -

अह य जिणमज्जणमहूसवारणंतरं सुमेरुसिहराओ बहवो सुरा नंदीसरदीवे
गच्छंति । सोहम्मिंदो वि सिरिनाभिनेदणजम्मणधराओ निग्गच्छिऊण नंदी-
सरदीवे लहुमेरुपमाणुच्चे पुव्वदिसाए संठिए नामेण देवरमणे अंजणगिरिम्मि
अवयरेइ, तत्थ अइसुंदरमणिपीडिगाचेइयतरु-महिंदज्जपविराइए चउदुवारंमि चेइए पवि-
सेइ, तत्थ रिसहपमुहाओ सासयजिणपडिमाओ अट्टाहियामहूसवपुव्वयं पूएइ, तस्स
य गिरिणो चउदिसासंठियवावीसु फलियमइयदहिमुहपव्वएसुं चऊसु वि चेइएसु सास-
यतित्थयरपडिमाणं अट्टाहियामहूसवं सक्कस्स चउरां लोगवाला कुणंति । एवं इसा-
णिंदो उत्तरदिसापडिइए रमणीए नाम अंजणपव्वए ओयरइ, तस्स य लोगपाला उत्तर-
गिरिणो वावीदहिमुहपव्वएसु ओयरिऊण अट्टदिणपज्जंतं महूसवं कुणंति । चमरिंदो
दाहिणदिसावट्टिए रयणपहाभासिए 'निच्चुज्जोयाहिकखे अंजणपव्वए ओयरइ, तस्स

य लोगपाला दाहिणंजणपव्वयस्स वावीमज्झट्टियदहिमुहपव्वएसु आगच्छंति, तह अट्ठदिणं जाव महस्सवं कुणेइरे । बल्लिंदो वि पच्छिमासासंठियस्सयंपद्दाभिहे अंजणगिरिम्मि समागंत्तूण रिसहाइसासयपडिमाणं महस्सवं कुणेइ, तस्स य लोगपाला तप्पुक्खरिणी-अब्भंतरवट्ठिदहिमुहगिरीसु सासयजिणपडिमाओ अट्ठदिणाइं जाव अच्चिंति । एवं नंदी-सरदीवंमि जिणवेइयमहस्सवं काऊण सव्वे इंदा देवा य नियं नियं ठाणं समुवग-च्छंति ।

इअ इंदकयमहस्सवो समत्तो ॥

‘उसह’ त्ति नामकरणं वंसठवणं च-

अह संपबुद्धा सामिणी मरुदेवा वि देवागमणाइराइयवुत्तंतं नाभिकुलगारस्स कहेइ । जं पट्ठुणो उरुपएसम्मि उसहलंछणं, अण्णं च माऊए सुमिणम्मि पढमो उसहो निरिक्खिओ तत्तो मायपियरा सुहम्मि दिणम्मि तस्स बालगस्स नाम महस्सवपुरस्सरं ‘उसहो’ त्ति कुणेइरे, तथा सहजायाए कण्णाए वि सुमंगल त्ति जहत्थं नाम विहियं । बाल-त्तणम्मि पट्ठु निय-अंगुट्ठम्मि सक्कसंकमियं सुहारसं जहकालं पिवइ । इन्देण आइ-ट्ठाओ पंचावि धाइसरूवाओ देवीओ परमेसरं महासुणिं समिईओ इव संरक्खन्ति । पट्ठुणो जम्माओ किंचि ऊणे संवच्छरे जाए समाणे सोहम्मिदो वंसठवणट्ठं उवागओ ‘भिच्चेण रित्तहत्थेण सामिणो दंसणं न कायव्वं’ त्ति विचारित्ता महइ इक्खुलट्ठिं पेत्तूणं नाभिकुलगरुस्संगनिसण्णस्स सामिस्स पुरओ समागओ । पट्ठु ओहिनाणाओ इन्दस्स संकप्पं नच्चा तं इक्खुलट्ठिं गहिउं करिव्व करं पसारेइ । विहुभावविण्णायगो सक्को पट्ठु सिरसा पणमित्ता तं इक्खुलट्ठिं पाहुडमिव अप्पेइ । सामिणा जं इक्खु गहिओ तओ ‘इक्खागु’ त्ति सामिणो वंसं ठविऊण सक्को सग्गं गओ । जिणस्स देहाइणो अइसया देवहिं च सह कीलणं —

जुगाइनाहस्स देहो सेआऽऽमयमलरहिओ सुगंधी तवणिज्जारविंदमिव सुंदरागारो य, मेससोणियाइं गोक्खीरधाराधवलाइं दुमंधरहियाइं, आहारनीहारविही लोयणाणं अगोयरो, वियसियकुसुयाऽऽमोयसरिसो सुरहिसासो, एए चउरो अइसया तित्थयरस्स जम्मेण सह हुंति । वइररिसहनारायं संघयणं धरितो पट्ठु भूमिपडण-भयाओ इव पाएहिं मंदं मंदं चलेइ, बालो वि गहीरमहुरञ्जणी पट्ठु भासेइ, सामिणो समवउरंसंठाणं अईव सोहइ, सरिसवया होऊण समागयसुरकुमारेहिं सह तेसिं

चित्ताणुरंजणाय उसहसामी कीलेइ । धूलीधूसरसवंगो धग्घरमालं धरंतो कीलंतो
पहू अवभंतरठियमयावत्थाकलहो इव विराएइ । सामी जं किंचि लीलाए हत्थेण
गिण्हेइ तं उदालेउं महड्ढिओ वि देवो न खमो । जो पहुणो बलं परिक्खिउं
अंगुलिं पि गिण्हेइ, सो 'सासपवणेणावि रेणुव्व दूरओ गच्छेइ । केइ सुरकुमारा
विचित्तगेदुगेहिं भूमीए लोदुमाणा गेंदुया इव पहुंच रमाविति, केइ रायसुगा होऊण
जीव जीवत्ति नंद नंदत्ति वारंवारं वयंति । केइ सुरा मोरा भविऊणं केकासइं
कुणंता सामिस्स पुरओ नच्चिरे, केइ हंसख्वधरा गंधारसइं खंता पासम्मि चरंति,
केवि कौचख्वधरा मज्झिमारावं कुणंता पुरओ रसंति, धरियकोइलख्वा केवि सुरा
पहुमणविणोदाय सामिसंनिहिम्मि पंचमसरं गायंति, केवि सुरा पहुवाहणेण अप्पाणं
पवित्तिउं इच्छंता तुरंगा हविऊण हेसारवेण धेवयद्धणिं कुणंति । केवि कलहख्वधरा
निसायसरं रसंता अहोमुहा होऊण करेण पहुस्स चरणे फरिसंति । के
वि वसहख्वधरा 'रिसमसरछज्जिरा सिंगेहिं तडीओ तालितो सामिणो नयणविणोयं
पकुव्वंति, के वि अंजणायलसंनिहा महिसीहोऊण मिहो जुज्झमाणा भत्तुस्स जुद्धकीलं
दंसेइरे । के वि पहुणो विणोयट्ठं मल्लख्वधारिणो सुरा मुहुं मुहुं भ्रए अप्फालिता मल्ल-
जुद्धभूमीसुं परुपरं बोल्लाविति, एवं देवकुमारेहिं विविहविणोयप्पारेहिं सययं
उवासिज्जमाणो ताहिं च धाडख्वधराहिं देवंगणाहिं लालिज्जमाणो विह कमेण बुद्धिं
पावेइ । अंगुट्टामयपाणावत्थाए परओ वयंमि संठिआ अवरे अरिहंता गिहवासे सिद्धं
अण्णं भुंजेइरे, भयवं नाभिनंदणो उ देवाणीअ-उत्तरकुरुखेत्तफलाइं भुंजेइ, खीरसमुद-
जलं च पिवेइ, एवं पहू बालत्तणं उलंघिऊण विभत्तावयवं बीयं जोव्वणवयं पावेइ ।

जिणज्जोव्वणकाले देहसोहा देहलक्खणाइं च—

जोव्वणवयंमि पत्ते पहुणो पाया मउआ रत्ता कमलोयरसरिसा कंपसेयरहिया
उण्हा समतला य संजाया । सामिस्स लच्छीलीलागेहाणं पायाणं तलम्मि संख-
कुंभचिण्हाइं तह पण्हीए सत्थिओ विरायंति । सामिस्स अंगुट्ठो मंसलो बट्टुलो तुंगो
भुजंगमफणुवमो 'वच्छो इव सिरिवच्छलंछिओ, पहुणो निव्वाय-निकंप-सिणिद्ध-
दीवसिहोवमाओ निरंतराओ उज्जुओ अंगूलीओ पायपउमाणं दलाइं इव सोहेइरे ।
जगगुरुणो पायंगुलितलेसुं णंदावत्ता सोहंति, जाण पडिबिंवाइं पुढवीए धम्मपइट्ठाण-
हेउत्तणं पावंति । अंगुलीणं पव्वेमुं जवा जगप्पहुणो जगलच्छीविवाहाय 'उत्ता इव

भासेइरे । पहुस्स 'पण्हा पायकमलस्स कंदा इव 'वत्तुलाऽऽयया वित्थिण्णा य, अंगुठ्ठअंगुलिफणीणं नहा फणामणिसंनिहा रायंति । सामिपायाणं दुण्णि गूढा गुप्फा हेमारविंद-मंडलकणिगागोलगसिरिं वित्थारिंति । पहुणो पाया उवरिभागम्मि कुम्भो व्व उण्णया अदिस्ससिरा निद्धच्छविणो लोमविवज्जिया संति । सामिणो सेयाओ 'जंघाओ अम्भंतरमग्ग-अत्थि-पिसियपुक्खलाओ कमवट्टुलाओ 'एणीजंघासोहाहारिणीओ । सामिस्स जाणुइं मंसपूराइं वट्टुलाइं, उरुणो य मउआ निद्धा अणुपुव्वेण पीवरा पोढ-कयली-थंभ-विग्गमा, 'मुक्खा य गूढा समट्ठिणो, पुरिसचिन्हं च जच्चतुरंगस्स इव अइगूढं । सामिणो कडी आयया मंसला थूला विसाला कठिणा, मज्झभागे य तणुत्तणेण 'कुलिसोदरसरिसो, नाभी गंभीरा सरियावत्तविलासधरा, कुच्छीओ निद्ध-मंसल-कोमल-सरल-समाओ । पहुणो वच्छत्थलं सुवण्णसिलाविसालं उण्णयं सिरिवच्छरयणपीढअंकियं सिरिलोलावेदिगासिरिं धरेइ । भगवओ खंधा दिड-पीणुण्णया वसह-कउह-सण्णिहा, कच्छाओ अप्पलोमुण्णयाओ गंधसेयमलरहियाओ, बाहाओ आजानुलंबिराओ पीणाओ हत्थफणच्छत्ताओ, जगवइणो हत्था नव-अंब-पल्लवारुणतला 'निकम्मकक्कसा सेय-च्छिदरहिया उण्हा तह य दंड-चक्क-धणुह-मच्छ-सिरिवच्छ-वइर-अंकुस-झय-कमल-चामर-छत्त-संख-कलस-समुद-मंदर-मगर-रिसह-सीह-तुरंग-रह-सत्थिय-दिसिगय-पासाय-तोरण-दीवंपमुहमुहलक्खणेहिं पाया इव सोहिरा । 'सोणपाणिजाया अंगुठ्ठो अंगुलीओ य रत्ता सरला य सोहेइरे । सामिणो अंगुठ्ठपव्वेसु जवा जस-वत्तुरंगस्स पुट्ठिविसेसहेपवो फुडं सोइंति । पहुणो अंगुलिमुट्ठेसु दाहिणावत्ता सन्धसंपत्तिसंसिणो दाहिणावत्तसंखसोइं धरंति । करकमलमूलम्मि तिण्णि रेहाओ लोगत्तयं उद्धरिउं संखालेहा इव रायंते । विहुणो कंठो वत्तुलो अणइदीहो रेहा-तयपवित्तिओ गहीरञ्जणी संखविडंबणं करेइ । पहुणो वयणं विमलं वत्तुलं कंतितरंगियं लंछणवज्जिओ अवरो चंदोव्व विरायइ । सामिस्स 'मसिणा मंसला निद्धा कवोला सहाऽऽवा-सियलच्छीसरस्सईणं सुवण्णमइया 'आयंसा इव संति, कण्णा अम्भंतरावत्तसुहगा खंधाव-लंबिणो, ओट्ठा विंवफलोवसा, बत्तीसं दंता कुंदपुप्फसरिसो, नासा कमओ वित्थिण्णा कमेणुत्तुंगवंसा य । पहुणो चिबुअं 'अहस्सदीहं मंसलं वत्तुलं मउयं, 'मंसुं च सामलं बहलं निद्धं कोमलं सिया । विहुस्स जीहा पच्चग्ग-कप्पतरु-पवालारुण-कोमला अण-इथूला दुवालसंगपवयण-अत्थ-पयंसणी । सामिणो नयणा मज्झभागे किण्ह-धवला,

१ पार्थिः-पयनी पानी । २ वत्तुलायता । ३ 'मुकुलम्-अर्धविकसितम् । ४ जङ्घे-पदपिण्डके । ५ 'हरिणी' । ६ मुक्कौ । ७ वज्रमध्यभागसदृशः । ८ निष्कर्मकर्कशौ । ९ शोणपाणिजाताः-रवतहस्तोत्पन्नाः । १० मखणौ-स्निग्धौ । ११ आदशौ-दर्पणौ । १२ अहस्वदीर्घम् । १३ इमधु ।

अन्तर्भागे रत्ना, अथो नीलमणि-फलहरयण-सोणमणि-विन्नासमइया इव ते सोहिरे, तद्
कण्ठे जाव 'विस्संता कज्जलसामपम्हा ते लोयणा वियसियतामरसे निलीणालिकुलमिव
रायंते । जगनाहस्स सामलाओ कुडिलाओ भुमयाओ दिट्ठिपुक्खरणीतीरसमुम्भिण-
लयासिरिं वहेइरे । भुवणपइणो विसालं मंसलं वत्तुलं कट्ठिणं मसिणं समं भालं अट्टमी-
मयंग-सोहं धरेइ । भुवणसामिस्स अणुकमेण समुण्णयं सिरं अहोमुहीभूयच्छत्तवरसारि-
क्खमिव । तित्थयरस्स पारमेसरत्तणसूयगमत्थए वत्तुलं उत्तुंगं उण्हीहं कलससिरिं पावेइ,
मुद्धम्मि य भसलसामा कुंचिया कोमला निद्धा केसा जैउणाए तरंगा इव रेहंते । पट्ठणो
देहम्मि तथा गोरोयणगव्वभगउरा निद्धनिम्मला सुवण्णदवविलित्ता इव विभाइ । पट्ठसरी-
रम्मि मउआइं भमरसामाईं लोमाईं मुणालतंतुव्व तणूईं छज्जिरे, एवं अणण्णाऽसाहारणवि-
विहलक्खणेहिं लक्खिओ पट्ठ रयणेहिं रयणागरुव्व कास सेवणिज्जो न होउजा ? ।

पट्ठणो देवकयसंगीयपेक्खणं—

महिं देण दिण्हत्थो जक्खेहिं उक्खित्तचामरो धरणिं देण कयदुवारपालत्तणो
वरुणेण धरियच्छतो जीव जीव ति बोद्धिरेहिं देवगणेहिं समंतओ परिवरिओ गव्वर-
हिओ जगगुरु जट्ठासुहं विहरेइ । बलिंद-ऊसंगठविअचरणो चमरिंदसंग-पलिअंक-
विन्नसिअउत्तरदेहो देवाणीयासणनिसण्णो हत्थसाडयपाणीहिं अच्छराहिं उभयपासओ
उवासिज्जमाणो आसत्तिरहिओ दिव्वं संगीयं पेक्खेइ । अण्णया बालभावाणुरुव्वकीलाए
मिहो कीलंतं किंचि वि मिहुणगं तालरुक्खस्स हिट्ठमि गयं, तथा चिय दइव्वदुज्जो-
गाओ मिहुणगस्स नरमुद्धंमि महंतं तालफलं एरंडे विज्जुदंडो इव पडेइ, कागतालीयनाएण
मुद्धंमि पहाओ सो मिहुणगदारगो पढमेण अकालमच्चुणा विवण्णो समाणो मंदकसाय-
त्तणाओ सगं गओ । पुरा हि मच्चुपत्तमिहुणगसराराइं महापक्खिणो उप्पाडिऊण सज्जो
समुद्धम्मि पक्खिवित्था, ओसप्पिणीए हि हीयमाणसहावाओ तयारिणिं तं कलेवरं तद्-
च्चिय थिअं । अह सहजाया बीआ बालिगा सहावओ मुद्धा अवसिट्ठा सा तरलियनयणा
थिआ । तीए जणममिहुणगं तं बालिगं वेत्तूण पालेइ, पुणो तीए नाम 'सुणंद'ति
विणिम्मियं । केमि कालंमि गए तीए मायपियरा वि मरिऊण सभं पाविया ।
किंकायव्वमूढा सा वि बालिगा चंचललोयणा जूहभट्टा हरिणीव एगाणिणी वणंमि
भमेइ, सा सव्वावयवमुहगा पुण्णलायण्णामयसरिया वणमज्झंमि एगाणिणी संचरंती
वणदेवीव विराएइ । एगया मिहुणगाइं तं एगाणिणिं मुद्धं दट्ठूणं किंकायव्वविमूढाइं

ताई सिरिनाभिकुलगरस्स पुरओ उवाणिति । नाभिकुलगरो एसा रिसहनाहस्स धम्म-
पत्ती होउत्ति वियारित्ता नयणकइरवकोमुई तं गिण्हेइ ।

सक्ककयविवाहपत्थावो —

एत्थंतरे इंदो ओहिनाणेण सामिणो विवाहसमयं नच्चा तत्थ समागच्छेइ, पहुस्स
पायपंकयाई पणमिऊण सेवगो इव अगओ ठाऊण सक्को कयंजली एवं विण्णवेइ—जो
अन्नाणी नाणसागरं ताहं साऽभिप्पाएण बुद्धीए य कज्जेसु पयट्ठाविउं इच्छेज्जा सो हि
उवहासपयं पावेइ, सामिणा महापसाएण सया पेकिखया ते च्चिय भिच्चा कयाइ वि किंचण
सच्छंदं पि जप्पंति, पहुस्स अभिप्पायं जाणिऊण जे वयंति ते च्चिय सेवगा कहिज्जंति ।
हे नाह ! अहं तु अभिप्पायं अगच्चा जं बवेमि, तत्थ अपसायं मा कुणसु । अहं
मण्णेमि—भयवं गम्भवासाओ पारब्भ वि वीयरागो अन्नपुरिसत्थाणं अणवेक्खाए चउ-
त्थमोक्खपुरिसत्थाय तप्परो होज्जा । तह वि हे नाह ! लोगाणं ववहारमग्गो वि
तुमए चिय मोक्खमग्गो इव सम्मं पयडाविस्सए । तम्हा लोगववहाराय तुमए विहि-
ज्जमाणं पाणिग्गहणमहूसवं इज्जमि, सामि ! पसीअसु । हे विहु ! भुवणभूसणाओ
नियाणुरुवाओ खववईओ सुमंगल-सुणंदाओ देवीओ तुं विवाहिउं अरिहेसि । सामी
वि ओहिणा पुव्वलक्खणं तेसीइं जाव निकाइयं भोगफलं नियकम्मं अम्हाणं भोत्तव्वं
अत्थि त्ति जाणेइ, इमं कम्मं अवस्सं भोत्तव्वं ति मत्थयं कंप्माणो सामी तया सायं-
तणे सरोयमिव हिट्ठमुहो चिट्ठइ । अह पुरंदरो पहुणो अभिप्पायं उवलक्खित्ता विवाह-
कम्मारंभाय सिग्घं आभियोगियदेवे सदावेइ ।

आभियोगियदेवकयमंडववण्णणं —

अह ते आभियोगियदेवा इंदस्स सासणाओ सुहम्मसहाए अणुयंपिव
मंडवं रयंति । तत्थ सुवण्ण-माणिक-रययथंभा मेरु-रोहण-वेयइह-चूलिगा इव
पयासेइरे । उज्जोयगरा सुवण्णकुंभा तत्थ चक्कवट्ठिणो कागिणीरयणमंडलाई
इव छज्जिरे, अण्णतेय-असहाओ सुवण्णवेइगाओ आइच्चपयासं परामवंतीओ
विरायंति, अब्भंतरे पविसंता मणिसिलाभित्तीसुं पडिर्विविया के के परि-
वारत्तणं न जंति ? । रयणथंभावत्थियाओ सालभंजियाओ संगीयकरणपरिसंतनत्त-
गीओ इव भासेइरे, सब्बदिसासुं कप्पक्खपल्लवेहिं कयतोरणाई कामदेवेण सज्जि-
याई धणुहाई इव सोहंते, फलिहमयदुवारसाहासु नीलमणितोरणाई सरयमेहपंतिमज्झ-

थिअमुग-सेणिसंनिहाइं भासेइरे । सो मंडवो कथइ फलिहवद्धपुढवीनिरंतरकिरणेहिं
कीलापेऊससरसीभमं, कथ वि पोम्मरागमणिकिरणनिचएहिं दिव्वकोसुंभअंसुग-
संसयं, कथइ नीलमणिरस्सिपवादेहिं वैवियमंगलियजव-अंकुरसोहं, कथइ मरगय-
मणिरस्सिंदेहिं अह-उवनीयमंगलियवंससकं जणेइ । सेय-दिव्व-अंसुग-उल्लोय-
ज्जलेण सो मंडवो गगणठियाए गंगाए समस्सिओ इव होत्था । उल्लोयंमि लंबमा-
णाओ भोत्तियमालाओ अट्ठहं दिसाणं हरिसहसियाइं विव छज्जंते । तत्थ देवीहिं
परिट्ठवियाओ अब्भंलिहग्गभागाओ चउरो रयणकलससेणीओ रईए निहाणाइं इव विरा-
यंति । कुंभावट्टंभदाइणो अहवंसा विस्साऽवट्टंभदायग-सामिवंसवुद्धिद्वयगा इव सोहंते ।
तह य विवाहोइयकम्मंमि हे रंभे ! मालाओ आरंभसु, हे उव्वसि ! दुरुच्चाओ
सज्जेसु, हे पयाइ ! वरस्स अग्गदाणहं घयदहिआइं समाहराहि, हे मंजुघोसे !
मंजुघोसेण धवलमंगलाइं गायसु, हे सुगंधे ! सुगंधीइं वत्थूइं पगुणीकुणसु, हे तिलो-
त्तमे ! दुवारदेसंमि उत्तमे सत्थिए रएसु, हे मेणे ! विवाहसमय-समागयजणे सम्मा-
णेसु, हे सुकेसि ! बह्वराणं कए केसाभरणं धरेहि, हे सहजण्णे ! जणजत्तागय-
नराणं ठाणं पयंसेहि, हे चित्तलेहे ! माइवरंमि विचित्तं चित्तं आलिहसु, हे पुण्णिणि !
पुण्णपत्ताइं पगुणीकुणसु, हे पुंडरीए ! पुंडरीएहिं पुण्णकलसे विभूसाहि, हे अंबि-
लोए ! वरमंचियं जहट्ठठाणं ठवेहि, हे हंसपाइ ! बह्वराणं पाउगे मुंचसु,
हे पुंजिगाथले ! वेइगाथलिं छगणेहिं सिग्गं लिंपसु, हे रामे ! अण्णहिं किं
रमसे ?, हे हेमे ! किं हेमं पेक्खसि ?, हे कउत्थले ! पमत्ता इव किं विसंथुला असि ?,
हे मारीइ ! किं चित्तेसि, हे सुमुहि ! किं उम्मुही होसि, हे गंधच्चि ! अगगओ
किं न चिट्ठसि ? हे दिव्वे ! मुहा किं दिवसि ? नणु लग्गवेला आसण्णा वट्ठइ,
तओ सव्वप्पणा निय-निय-करणिज्जंमि तुवरेह त्ति नामगहणपुव्वयं मुहुं मुहुं
आएसं दिंतीणं देवीणं परुप्परं संभमाओ महंतो कोलाहलो संजाओ ।

अच्छराहिं सुमंगला-सुणंदाणं पउणीकरणं—

तओ काओ अच्छराओ मंगलमज्जणनिमित्तं सुमंगलं सुणंदं च आसणंमि निसी-
आर्विति । अह सुंदरधवलमंगले गिज्जमाणे सुगंधिणा तेल्लेण ताणं सव्वंगे अब्भंमं
कुणंति । तओ उव्वट्ठणिज्जवण्णयसुहुमच्चुण्णेहिं ताणं उव्वट्ठणं कुणेइरे । ताणं पाएसुं

१ शुक्रश्रेणिं—कीरपंक्तिं । २ उत्तमज्ञल्ययव । ३ घृताचि ।—देव्यभिधानम् । ४ जन्यथात्रागतन-
राणाम्—जनैर्यामां आवेल माणसो । ५ अम्भोवे । ६ हंसपादि । ७ पादुकाः । ८ क्रतुस्थले । ९ दीव्यसि ।

जाणूसुं हत्थेसुं खंधेसुं भालंमि य नव लुहाकुंडे इव तिलगे करंति । पुण ताओ देवीओ 'तक्कु-ट्टिअ-कोसुंभ-सुत्तेहिं समचउरंससंठाणं पेक्खिउं पिब ताणं वाम-दाहिण-पासेसुं अंगं फासेइरे, सोहणगत्ताओ ताओ कण्णाओ 'वण्णगंमि ठवियाओ, तओ ताओ हरिसुम्मत्ताओ तेण चिय विहिणा 'उव्वण्णयंपि समायरंति, पुणो अण्णंमि य आसणे निवेसिऊण नियकुलदेवया इव सुवण्णकलसजलेहिं ताओ ण्हाविति । तओ गंध-कासायवत्थेण ताणं अंगं लुहंति । अमलेण य वत्थेण केसे वेढेइरे, तओ य ताओ आसणंतरम्मि ठवित्ता खोसवत्थाइं च परिहाविऊण केसेहिंतो जलं निकासित्ता इसिं 'अल्लकुंतले दिव्वधूवेण धूवेज्जा । ताणं चलणे अलत्तरसेण मंडेइरे, अंगं चारुणा अंगरागेण विलिंपन्ति । गीवाए हत्थ-अग्गभागे थणेसुं कपोलदेसेसुं च मयणस्स पसत्थीओ इव पत्तवल्लीओ लिहंति, 'णिलाडंमि चंदणेण चारुतिलां नेत्तेसुं च अंजणं कुणंति, वियसिअपुण्णमालाहिं धम्मिल्लं बंधेइरे, लंबमाणदसिगा-सेणि-रेहिराइं विवाह-जोग्गवत्थाइं पहिराविति, ताणं मत्थयोवरिं विवाहमणिभासुरे मउडे ठवेइरे, कण्णेसु मणिमयकण्णाहरणाइं निवेसेइरे, कण्णलयासुं दिव्वाइं मोत्तिअकुंडलाइं समारोविति, कंठे कंठाभूसणं, थणतडे हारं, भुयासु रयणमंडिए केऊरे हत्थमूलेसुं च मुत्तामइयकं-कणाइं पहिराविति, कडिभागंमि कणंतकिंकिणीसेणिविराइयाओ मणिमयकंचीओ ठविति, पाएसुं झणझणारावं कुणंताइं रयणनेउराइं समारोवेइरे, एवं ताओ कन्नाओ सज्जिऊण देवीगणेण उप्पाडिऊण माइघरस्स अब्भंतरम्मि नेऊण सुवण्णासणे उव्वे-साविति । इंदेण विवाहसज्जीभवणाय अइव निव्वंधा विण्णविज्जमाणो चसहलंछणो पडू 'लोगम्मि ववहारठिई दंसणिज्जा, मम य भोत्तव्वं भोग्गकम्मं अत्थि' त्ति चित्ति-ऊण इंदवयणं अणुमण्णेइ ।

सज्जियस्स सामिणो विवाहमंडवे आगमणं, देवीहिं कयचिवाह-उवयारो—

अह सकेण सामी ण्हविऊण विलिंपित्ता य जहाविहिणा भूसणाइणा भूसिओ, दुवारपालेण विव इंदेण सोहिज्जमाण-अग्ग-मग्गो, अच्छरागणेहिं उभयपासेसुं उत्ता-रिज्जमाणलवणो, इंदाणीहिं गिज्जमाणधवलमंगलो, सामाणियाइदेवीहिं 'किज्जमाणो-यारणविही, गंधव्ववुंदेहिं हरिसेण वाइज्जमाण-आउज्जो सामो दिव्वेण वाहणेण मंडवदुवारदेसंमि समागओ । अह सामी तिदसनाहेण दिण्हत्थो जाणाओ उत्तरिऊण मंडवदुवारभूमीए संठिओ । मंडवठियदेवीओ दुवारे तडतडनिकुणंत-लवणाऽनलग-

१ तर्कुस्थितं । २ पीठीचोळवानुं स्थान । ३ उद्वर्णकम्-पीठी चोळवी । ४ आर्द्रकुन्तलान्-आर्द्रकेशान् ।

५ ललाटे । ६ क्रियमाणावतारणविधिः ।

भिभं सरावसंपुडं सुयंति । कावि दुव्वाइ-मंगलियदव्वलंछियं रुपगथालं अग्गे धारेइ, कावि कोसुंभवसणा अग्घदाणदं पच्चक्खं मंगलमिव पंचसाहेण वइसाइ उक्खेवित्ता अग्गे संठिया । हे अग्घदाइणि ! अग्घोइयवराय अग्घं देसु, खणं मक्खणं उक्खेवसु, थालाओ दहिं उइदं धरेसु, । सुन्दरि ! नंदणवणाऽऽणायचंदणदवं उण्णेसु, भइसालवणपुढवीए आहरियं समट्टियं दुरुव्वं उद्धराहि, णणु मिलंतल्लोगनयणसेणीहिं जायजंगमतोरणो एसो जगत्तयउत्तमो उत्तरीअच्छाइयाऽसेसदेहो गङ्गातरंगंतरिअ-रायहंससरिसो वरो तोरणदुवारंमि उदं चिट्ठइ । पवणेण अस्स पुप्फाइं पडंति, चंदणं च सुस्सइ, तम्हा हे सुंदरि ! चिरं कुणेहि, दारंमि वरं मा धरसु मा धरसु । अह सा सुंदरी देवनारीहिं उच्चएहिं गिज्जमाणेसुं धवलमंगलेसुं तिजग-पूयणिज्जस्स वरस्स अग्घं देइ । एगा सुन्दरी कणंतल्ल-यकंकणेहिं सह मंथाणेण तिसुत्तो तिजगपणो भालं चुंवेइ ।

पहुणो विवाहमहसवो—

अह पट्ट सपाउगेण वामेण पाएण हिमखप्परलीलाए सवन्नि सरावसंपुडं दळेइ । तओ तीए अग्घदाइणीए कंठम्मि पविस्सत्तकोसुंभवत्थेण आकडिदज्जमाणो पट्ट माइहरं जाइ । तत्थ मयणफलेण उवसाहियं हत्थसुत्तं वहूवराणं हत्थेसु बंधेइ । अह मेरुसिलाए केसरी इव माउदेवीणं पुरओ उच्चए सुवण्णासणे सामी अच्छेइ । तओ देवीओ समी-आसत्थ-छल्लीओ पिसिऊण कण्णाणं हत्थेसुं हत्थालेवं कुणंति । तओ अवाउलो पट्ट सुहल्लमोदयंमि ताणं कण्णाणं हत्थालेवजुए हत्थे हत्थेहिं गिण्हेइ । तया हत्थसंपुडमज्ज-त्थहत्थालेवस्स अब्भंतरे इंदो तत्थ मुद्धियं निक्खेवेइ । तया उभयहत्थगहियाहिं ताहिं कण्णाहिं सह विहू साहादुग-लम्माहिं लयाहिं पायवो इव विराएइ । तारामेलगपव्वंमि वहूवरदिट्ठीओ सागर-सरियाणं जलाइं इव अण्णुण्णं अहिमुइं निवडंति । तयाणि च ताणं वाउरहियजलं पिव निच्चला दिट्ठी दिट्ठीए सह, मणो य मणसा सह जुंजित्था । तया अण्णोऽण्णं नयणतारासु पडिबिंबिया ते अणुरागओ हियएसुं अण्णुण्णं पविसंता इव छज्जिरे । इओ य सामाणियाइणो देवा अणुचरा भविऊण पहुणो पासेसु चिट्ठंति । उवहासकम्मंमि कुसलाओ वहूणं पासचराओ इत्थीओ कोउग-धवलमंगलाइं गाउं एवं आरंभन्ति-जरपीलिओ सागरजलं सोसिउं इव इमो अणुवरगो लइइए खाइउं केण मणसा नणु सद्धात्तू जाओ ?, कंदोइयस्स कुक्कुरो इव इमो अणुवरगो मंडगेसुं थिरदिट्ठीओ केण मणसा नणु अभिलसिओ ?, रंकवालो इव आजम्मणाऽदिट्ठपुव्वो एस अणुवरो वडगाइं खाइउं केण मणसा नणु सद्धइ ?, जलाणं बप्पीहो इव

१ पच्चशाखेन-हस्तेन, वैशाखम्-मन्थनदण्डम् । २ अर्घ्योचितवराय । ३ उन्नय-ऊर्ध्वं नय । ४ मातृगृहम् ।

५ विवाहप्रसंगे वरस्स अणुचरगा अणवर ति कहिज्जंति । ६ कान्दविकस्य । ७ चातकः ।

धणाणं जायगो इव अयं अणुवरो केण मणेण नणु पूगाणं सद्दाल्ल ? , तिणाणं
 'तण्णागो इव इमो अणुवरो तंबूलवल्लीपत्ताणं केण मणसा नणु सद्दावंतो ? , मक्खण-
 पिंडे लंपडबिडालो व्व अयं अणुवरो चुण्णंमि केण मणसा नणु सद्दाल्ल अत्थि ? , केआर-
 कदमस्स महिसो विव अयं अणुवरो विलेवणस्स सद्धं केण मणेणं नणु कुणेइ ? , निम्मल्लेसु
 उम्मत्तो इव अयं अणुवरो पुप्फमालासुं लोललोयणो केण मणसा नणु सिणिज्झइ ? ,
 कोउग-उक्कणियाऽऽणणा कोउअधवलमंगलाइं सुणमाणा देवा आलेक्खलिहिया इव
 तत्थ संजाया । तया 'लोगेसुं अयं ववहारो दंसणीओ' ति पट्ट विनाएसुं मज्झत्थो इव तं
 उव्विक्खेइ । दुण्हं नावाणं अंचले महापवहणस्स इव दुण्हं देवीणं अंचलेहिं सह पहुणो
 अंचलं इंदो बंधेइ । तओ आभियोगियदेवो इव सुराहिर्वइ पट्टं कडितडंमि समारोहिऊण
 वेइयाघरं पइ चलेइ, तया दोहिं इंदाणीहिं सिग्घं दुण्णि कण्णाओ कडितडंमि आरोहि-
 ऊण अवियोइयहत्थग्गं सामिणा सद्धिं चालिआओ । तेल्लुककसिरोरयणेहिं तेहिं
 वहुवरेहिं सह ते सव्वे पुच्चदुवारेण वेदिगागेहस्स मज्झभागंमि पविसेइरे । अहं को
 वि तायतीसगामरो पुढवी मज्झाओ उट्ठियमिव वेइकुंडे सिग्घं वन्हि पाउंकुणेइ । तत्थ
 अग्निमि समिहाकट्टनिकखेवणेण उट्ठिअधूमलेहाओ खेयरइत्थीणं कण्णावयंसत्तणं
 पावंतीओ गयणंगणे वित्थरंति । देवीहिं गिज्जमाणधवलमंगलो सामी सुमंगला-
 सुणंदाहिं सह पुण्णं अट्ठमंगलं जाव तं वन्हि समंतओ परिभमेइ । चासवो गिज्ज-
 माणेहिं आसीवयणेहिं पाणिमोक्खेण सह च्चिय ताणं अंचलमोक्खणं कारेइ ।
 इंदाणीहिं सहिओ पुरंदरो सामिलग्गमहूसवजायहरिसेण हत्थाऽभिणय-लीलाए
 नच्चेइ, तं अणुकरंता अवरे वि देवा सुइया समाणा नच्चेइरे । चारणेहिं पिव जय-
 जयाराव-करणपरेहिं केहिं देवेहिं, भरहेहिं पिव विविहनच्चकरणसीलेहिं केहिं सुरेहिं,
 गंधव्वेहिं पिव गायमाणेहिं अवरेहिं अमरेहिं, आउज्जाइं इव अच्चंतफुडं मुहाणि वायं-
 तेहिं अण्णेहिं सुरेहिं, पवंगेहिं इव संभसाओ पवमाणेहिं केहिं, विद्सगेहिं इव सव्वं
 अण्णं हासमाणेहिं अण्णेहिं, पडिहारेहिं इव अण्णं अवसारंतेहिं, अवरेहिं हरिसुम्मत्तसुरेहिं
 च दंसिज्जमाणनियमत्तिओ विहू सुमंगला-सुणंदाहिं विभूसिय-उभय-पासओ दिव्व-
 जाणमोरोहिऊण नियट्ठाणं गच्छेइ । एवं समत्तसंगीओ रंगायरिओ विव इंदो निव-
 त्तिअ-विवाहो पट्टं नमिऊण सट्ठाणं समागओ । तओ आरब्भ सामिपयंसिआ विवाह-
 विही लोगंमि पयट्ठिआ, महंताणं हि पउत्तीओ परट्ठं चिय सिया ॥

इअ देवकयविवाहमहूसवो समत्तो ॥

तओ सामी अणासत्तो वि दोहिं भज्जाहिं सह भोगाई भुंजमाणो चिरं विहरेइ ।
सायावेयणिज्जं पि हि कम्मं अशुत्तं न झिज्जइ ।

जिणस्स भरहाइपुत्ताणं उत्पत्ती—

अह विवाहाणंतरं ताहिं सह पंचिंदियविसयसुहाईं भुंजंतस्स पहुणो किंचि ऊणेषुं
छपुव्वलक्खेसु गएसु सव्वट्टसिद्धविमाणाओ बाहुजीव—पीढजीवा चविऊण सुमंगलादे-
वीए कुच्छीए जुगलत्तणेण समुवण्णा, तह य सुबाहु—महापीढजीवा सव्वट्टसिद्धाओ चवित्ता
सुणंदादेवीए कुच्छीए ओइण्णा । तया सुमंगला गव्वमपहावसंसिणो चउदस महासुमिणे
मरुदेवी इव पासेइ । अह सा सुमंगलादेवी नियसामिस्स पुरओ तं सुविणसरूवं कहेइ, पहु
वि तुम्ह चक्कवट्ठी नंदणो भविस्सइ त्ति वएइ । अह समये सुहदिवसे सुमंगला सामिणी
पुव्वदिसा आइच्च—संझाओ इव नियपहापयासियदिसासुहं भरह—बंभीरूवं अवच्चजुगलं
पसवेइ, तह सुणंदादेवी पाउसो चारिय—विज्जूओ इव सुंदरागिइजुयं बाहुबलि—सुंदरीरूवं
अवच्चजुगलं जणेइ । अह कमेण सुमंगलादेवी एगुणपण्णासं पुत्तजुगलाई पसवेइ । तओ
एए महातेयंसिणो महुसाहा विंझगिरिम्मि कलहा इव रममाणा कमेण वड्ढिठसु । उस-
हपहु समंताओ तेहिं अवच्चेहिं परिवरिओ भूरीहिं साहाहिं महारूखो इव सोदइ ।
तया हि पच्चूसकालम्मि पदीवाणं तेओ इव ओसप्पिणीदोसाओ कप्पतरूणं पहावो
झिज्जइ, तेण मिहुणगनराणं कोहाइणो कसाया सणियं पाउव्वंति । अह ते मिहुणग-
नरा इक्कार—मक्कार—धक्काररूवाओ तिण्णि दंडनीईओ अइक्कमेति, तओ ते सं-
मिलिऊण उसहनाहस्स समीवं उवागच्छिऊण तं च जायमाणं असमंजसं विणवेइरे ।
नाणत्तयविभूसिओ जाइस्सरो भयवं एवं वएइ—जे उ मज्जायं उल्लंघंते ताणं सास-
गो राया होइ, पढमं हि उच्चए आसणे उववेसावित्ता अहिसित्तो चउरंगवल उवे-
ओ अखंडियसासणो सो सिया । ते कहिति—अम्हाणं तुम्हे चिय राया होसु, न
उविवत्तसु, अम्हाणं मज्झम्मि तुम्हसरिसो अर्रो को वि न सिया । तया नाभिनेदणो
भासेइ कुलगरोत्तमं नाभिं अभिगंनूणं अम्भत्थेह, सो तुम्हाणं रायाणं दादिइ । तेहिं
मिहुणगनरेहिं नाभिकुलगरो रायाणं पत्थिओ सो ‘भवताणं उसहो राया होउ’ त्ति
ताणं कहेइ । अह ते मिहुणगा पमुइया सेमुवेइत्ता नाभिणा अम्हाणं तुमं चिय राया
अप्पिओ असि त्ति पहुं कहिति । तओ ते जुगलियनरा सामिणो अभिसेगकरणत्थं
जलाणयणाय गया ।

सुरवइकओ जिणस्स रज्जाभिसेगो—

तया सुरवइणो सिंघासणं च कंपियं, सो ओहिणाणेण पहुणो रज्जाभिसेगसमयं विण्णाय तत्थ आगच्छेइ, आगच्छिऊण कंचणमइयवेइगं निम्मविऊण तत्थ सीहासणं ठवेइ । तत्थ पहुं ठविऊण सुराणीयतित्थजलेहिं सोहम्मकप्पाहिबई पुरोहिओ व्व उसहसा-मिणो रज्जाभिसेगं विहेइ । अह वासवो निम्मलगुणेण चंदजोण्हामयाई दिव्ववत्थाई सामिणा परिहावेइ, जग-ललामस्स पहुणो अंगम्मि जहट्टाणं किरीडाइणो रयणालंकारे निवेसेइ । एयम्मि समये मिहुणगनरा वि कमलदलेहिं जलं वेत्तूणं आगया, सव्वालंकारेहिं च विभूसियं पहुं पासमाणा अग्घं दाउं इव पुरओ ते चिट्ठंति । दिव्व-नेवत्थ-वत्थाभूसालं-करियस्स पहुणो सिरंमि निक्खिविउं न जुत्तं ति वियारिऊण पाएसुं जलं निक्खिवंति ।

विणीया नयरी निम्माणं--

एए साहु विणयगुणसंपण्णा, तओ पुरंदरो पहुणो विणीयाभिकखं नयरिं निम्माउं कुबेरदेवस्स आदेसं दाऊणं देवलोगं गओ । सो कुबेरो दुवालसजोयणा-यामं नवजोयणवित्थिण्णं अउज्झत्ति अवरनामं विणीयं पुरिं रएइ । सो जक्खराओ तं निम्मविऊण अक्खयवत्थनेवत्थ-धण-धण्णेहिं पूरेइ । तहिं नयरीए भित्तिं विणा वि गयणंमि वइर-इंदनील-वेरुलिय-मणिमइयपासाय-कब्बुर-रंस्सीहिं चित्तकम्मं विर-इज्जइ । तत्थ उच्चेहिं सुवण्णमयपासाएहिं झयच्छलाओ मेरुपव्वयसिहराई अभिपत्त-दंसणलीलव्व वित्थरिज्जइ । तीए नयरीए वप्पम्मि उदित्त-माणिक-कविसीस-परंप-राओ खेयर-इत्थीणं जत्तेणं विणा आयंसत्तणं पावंति । तत्थ हट्टग-पासाएसु समु-स्सियरयणरासिणो दट्ठूणं अयं रोहिणायलो तस्स पुरओ अवयरकूडो ति तक्किज्जइ । तत्थ घरवावीओ जलकीलारयललणाणं तुट्ठियहार-मोत्तिगेहिं तंवपणीसरियासोहं वित्त-णेइरे । तत्थ सेट्ठिणो तारिसा संति, जाणं कास वि इक्कयमस्स सो वणियपुत्तो ववहरिउं समागओ किमु एसो कुबेरो ति मण्णेमि, तत्थ रत्तीए चंदकंतमणि-निम्मिय-भित्ति-पासायझरतवारीहिं सव्वओ पसंतरयाओ रत्थाओ किज्जंति । सा नयरी सुहासरिसजलेहिं वावी-कूव-सरोवरलक्खेहिं नवमुहाकुंडं नागलोगं परिभवेइ । जम्माओ पुव्वलक्खणं बीसाए गयाए तीए नयरीए पयाओ पालिउं सामो नरिंदो होत्था । मंताणं उँकारो इव निवाणं पढमो निवो सो नियं संतइमिव पयाओ पालेइ ।

सो पद्द असहसासणे साहुपालणे य कुसले मंतिणो नियाई अंगाई पिव निउंजेइ,

जिणस्स रज्जंगसंगहो—

तद्द उसहलंछणो सो चोरिक्काइरक्खणे दक्खे आरक्खणे वि इंदो लोगपाले इव विहेइ । देहस्स उत्तमंगं इव सेणाए उक्किट्टमंगमिव रज्जट्टिइहेउं हत्थिणो सो गिण्हेइ । स उसहज्झओ आइच्चतुरग-फट्ठाए इव उद्धुरकंधरे बंधुरे तुरंगे धरेइ । नाभि-नंदणो सुसिलिट्ठकट्ठघडिणं रहे भूमिस्थिआइं विमाणाइं इव निम्मवेइ । स नाभिसुण्ण निगचक्कवट्ठिभवे इव 'सुपरिक्खिअविरियाणं पाइकाणं च परिग्गहं कुणेइ, तद्द तत्थ नविअमहारज्जपासायस्स थंभे इव महाबलवंते सेणाहिवइणो ठवेइ, तद्दुवओ-गकुसलो जगवई गावी-वसह-करह-महिस-आसयर-पमुहं संगिण्हेइ । तया कप्पतरुसुं समुच्छिउण्णेसुं जणा कंदमूलफलाइं भुंजंति । तद्द य तिणव्व सयं चिय समुप्पण्णाओ सालि-गोहूम-चणग-मुग्गपमुहाओ ओसहीओ अपक्काओ खायंति । तंमि आहारे 'अजीरमाणे तेहिं जुगलियनरेहिं विण्णविओ विहू वएइ—'हत्थेहि ताओ महिउण तयं च अवणीअ अडुणाखाएह' तं च सोच्चा जगपहुणो उवएसाणुसारओ तद्दा भुंजमाणानं पि ओसहीणं कट्ठिभावाओ सो वि आहारो न जीरइ । पुणोवि तेहिं विण्णत्तो सामी कहेइ—ताओ हत्थेहिं संघंसिउण जलेहिं तिमिउण पत्तपुडंमि धरिउण खाएह । ते तद्द कुणंति, तद्दवि अजिण्णाहारवेयणा तारिसा होइ, तओ तेहिं विण्णत्तो जगणाहो एवं आदिसेइ—'पुव्वकहियविहिं किच्चा तओ ओसहीओ मुट्ठीए आयवंमि कक्खासु य खिवित्ता तद्दा सुहं भक्खेह' ।

अग्निगणो उत्पत्ती—

तत्थ वि अजिण्णाहारेण पीलिणसु जणेसु, अद्द मिहो साहाधंसणाओ तरुखंडम्मि अग्गी उट्ठिओ । तिणकट्ठाइं डहंतं तं दट्ठणं दिप्पमाणरयणभमेण ते मिहुणगनरा धावित्ता हत्थेहिं वेत्तुं पारंभेइरे । तेण अग्निगणा डज्झमाणा ते भीया समाणा पद्दं उवेच्चा 'किं पि नूयणं अच्चव्वभुयं भूयं समुप्पणं' ति निवेयंति । सामी वएइ—'निद्ध-रुक्खकालजोगेण अग्गी पयडिओ अत्थि, एयंतरुक्खकाले एयंतनिद्धकाले य अग्गी न होइ' । अस्स अग्निगणो पासंमि ठाउण पज्जंतट्ठिअ—तिणाइणो अवसारणेण तओ तं गिण्हेह, तओ पुव्वुत्तविहिणा इमाओ ओसहीओ सोहिउण जल्लणंमि पक्खिविउण, पइउण य खाएह । मुट्ठा ते तद्द कुणंति, बन्दिणा ताओ ओसहीओ दद्दाओ, पुणावि

सामिणो पासमि समागतूण कहेति—हे सामि ! 'बुहुक्खिओ एसो अम्हाणं किंचि वि न देइ उयरंभरीव एगो खित्ताओ सव्वाओ ओसहीओ भक्खेइ । तयाणिं पट्ट वि गय-खंधाधिरूढो होत्था, स तेहिं अल्लगं मट्ठियापिंडं आणावेइ । सिंधुरकुम्भथलमि मट्ठियापिंडं ठविऊण हत्थेण वित्थारित्ता भायणं निम्मवेइ । एवं सिप्पाणं पढमं कुंभगार-सिप्पं पट्टणा ताणं पयंसियं । सामी वएइ—'एवं अवराइं पि भायणाइं निम्मविऊण, अग्गिणो उवरिं ताइं विण्णसिऊण, तहिं ओसहीओ पयावेइ, तओ पच्छा खाएइ' । ते वि सामिसासणाणुसारेण तदेव कुणंति । तयाइओ कुम्भगारा पढमसिप्पिणो संजाया ।

जगवइणो सिप्पकलाइपयंसणं—

जगप्पट्ट गेहाइनिम्मवणत्थं वैडुडइ—अयगारे निम्मवेइ, महापुरिसाणं 'सिद्धीओ हि विस्सस्स सुहसंपायणट्ठं चिय सिया । लोगाणं विविहचित्तकम्मकीलाविणोयट्ठं गि-हाइचित्तकम्मकरणाय स पट्ट चित्तगरे निम्मवेइ । लोगाणं वत्थनिम्मवणट्ठं कुर्विदे कप्पेइ, तया हि सव्वकप्पदुमथाणे पट्ट चिय कप्पदुमो । लोगाणं नहाणं च बुद्धीए अच्चंतं बाहिज्जमाणे लोगे जगपिया 'ण्हाविए कप्पेइ । एवं एयाइं पंच वि सिप्पाइं पत्तेगं वीसइभेयओ मिण्णाइं सिप्पाणं सयं लोगम्मि सरियाणं पवाहा इव पसरिअं, तह य तिणहार—कट्टहार—किसि—वाणिज्जाइं पि कम्माइं लोगाणं आजीविगानिमित्तं दंसियाइं । जगववत्थानयरी—चउपह—सरिसं साम—दाण—भेय—दंडनीइचउक्कं कप्पेइ । सो पट्ट बावत्तरिकलाओ भरहं सिक्खावेइ, सोवि भरहो नियभायरे पुत्ते अन्ने य वि सम्मं 'अज्झयावेइ, सुपत्तम्मि हि दिण्णा विज्जा सयसाहा होइ । नाभिन्दणो बाहुबलिं हत्थि—तुरग—इत्थि—पुरिसाणं बहुसो भिज्जमाणाइं लक्खणाइं च विण्णवेइ, बंभीए अट्टारस लिवीओ दाहिणहत्थेण, सुंदरीए पुणो 'सव्वेण पाणिणा गणियं दंसेइ । सयलवत्थुगय—माणु—म्माण—अवमाण—पडिमाणाइं, तह य मणिपमुहाणं पोयणविहिं च पयट्टावेइ । वाइ—पइवाईणं सामिणा आइडो ववहारो राय—पहाण—कुलशुरुसक्खीहिं सह संजायइ । नागाईणं अच्चणं धणुहवेयकला निगिच्छासत्थं जुद्धकला अत्थुवायसत्थं बंध—वह—घाय—गोठ्ठीओ य तओ होत्था । तओ आरंभिऊण जणाणं इयं मे माया, अयं मम पियो भाया य, इमी मह भज्जा, इमं च मे घरं धणं ति ममया समु-प्पण्णा । विवाहपसंगे पट्टं वत्थेण पसाहियं अलंकारेहिं अलंकियं च दट्टणं लोगो वि

१ बुभुक्षितः । २ वदेक्ययस्कारान्—तक्ष—लोहकारान् ३ सृष्टयः—उत्पत्तयः । ४ नापितान् । ५ अध्यापयति ।

६ सव्वेन—वामेन ।

तओ परं अप्पाणं पसाहेइ अलंकरेइ य, तथा पहुकयं पढमं पाणिग्गहणं दट्ठणं लोगो वि अज्ज वि तह विवाहविहिं कुणेइ, 'महापुरिसेहिं पवट्ठिओ मग्गो धुवो भवइ' । पहुविवाहाओ अणंतरंदिण्ण कण्णाए परिणयणं संजायं । 'चूलो-वणयण-विज्जा-आपुच्छाओ वि तओ पवट्ठिया, एयं अप्पणो कायव्वं ति जाणमाणो सामी एयं सव्वं सावज्जं पि लोगाणुकंपाए पयट्ठावेइ । पहुणो उवएसपरंपराओ अज्जाऽवि जयम्मि सव्वं कला-इयं इमं विउसेहिं सत्थरूवेण निवट्ठं पयट्ठइ । सामिणो सिक्खाए समग्गो वि लोगो दक्खो होत्था, 'उवएसगं विणा नरा वि पमुक्ख आयरंति ।'

जगवइणो रज्ज-ववत्था—

जगट्ठिइनाडगसुत्तहारो सामी तथा उग्ग-भोग-रायण्ण-खत्तिथभेएहिं चउव्विहे जणे ठवेइ, तत्थ उग्गदंडाहिगारिणो आरक्खगपुरिसा उग्गा, इंदस्स तायत्तीसगा इव पहुस्स मंतिपमुहा भोगा, पहुणो समाणाउसा जे ते 'रायणा संजाया, अवसेसा पुरिसा खत्तिथ ति होत्था । एवं नवीणं च ववहारववत्थं निम्मवित्ता विह नवं रज्ज-सिरिं भुंजइ । वाहिचिइच्छगो वाहिजुत्तजणेषु जहा ओसदं देइ तह पहु दंडणिज्ज-लोगेभुं जहावराहं दंडं पउंजेइ, तओ दंडभीया लोगा चोरिकाइगं नहि कुणंति, जओ एगा विय दंडनीई सव्वाऽणीइसप्पवसीकरणजंगुलिमंतसरिसा सिया । सुसिक्खिओ लोगो पहुणो आणमिव कासइ खेतु-ज्जाण-गेहाईणं कोवि मज्जायं न अइक्कमेइ । जलहरो गज्जच्छलाओ जगप्पहुणो नायधम्मं थुणमाणो सस्सनिप्फत्तिकए काले वरि-सेइ । तथा सस्सखेत्तेहिं इक्खुवाडेहिं गोकुलेहिं च परिपुण्णा जणा नियरिद्धीए पहुणो महिइइदपयंसगा विरायंति । हेय-गेज्झ-विवेगनाणकुसलीकएहिं लोगेहिं पहु पाएण विदेहखेत्तसंनिहं भरइखित्तं कुणेइ । रज्जाभिसेगाओ पारंभिऊण पुढवीं पालमाणो तिसट्ठिं पुव्वलक्खाई नाभिनेदणो अइवाहेइ ।

उसहप्पहुणो वसंतूसवनिरिक्खणं —

एगया पहु मयणकयावासे वसंतमासे समागए समाणे परिवाराणुरोहाओउज्जा-णम्मि गच्छित्था । तत्थ पुप्फाहरणभूसिओ जगप्पह पुप्फवासगेहे देहधारी 'पुप्फमासो

१ चूडोपनयनं । २ राजन्याः । ३ पुष्पमासः—वसन्तकालः ।

इव उवविटो आसि । तथा वसंतउच्छी गुंजमाणेहिं फुल्लमायंद-मयरंतुम्मत्तभमरेहिं
जगवणो सागयं कुणमाणो इव राएइ । मलयाऽणिलेसगो पंचमसरभणिरकोइलेहिं
आरब्भमाणपुव्वरंगे इव लयानिच्चं दंसेइ । मिगनयणाओ कामुकाणं इव कुरुवगाऽ-
सोग-वउलाणं आसिलेस-पायघाय-मुहासवे दिति । पवलाऽऽमोय-पमोइयमहुगरो
तिलगतुरु जुवाणभालथलिमिव वणत्थलि सोहावेइ । बहुणा पीण-थणभारेण किसोय-
रिव्व लवली-लया पुप्फगुच्छभारेण नमेइ । मलयाऽणिलो दक्खो कामुगो इव मंद-
मंदं सहयारलयं मुदं बहुमिव आसिलिसेइ । जंबूग-कयंब-मायंद-चंपगा-ऽसोगलट्ठीहिं
पज्जुणो लट्ठिधरो इव पावासुए हंतुं समत्थो होइ । पच्चग्ग-पाडला-पुप्फसंपेकेण
सुरहीकओ मलयमारुओ जलमिव कस्स हरिसं न देइ । महुरसेहिं अब्भंतरसारो
महुगतुरु उवसपंतमहुगरेहिं महुपत्तमिव कलकलाउलो किज्जइ । कुसुमसरेण गोलिगा-
धणुहअब्भासं काउं कलंबकुसुमच्छलाओ गोलिगाओ सज्जियाओ इव मणेमि । वावी-
कूव-पवा पिण्ण वसंतेण भसलपहियाणं वासंतीलया मयरंदपवा इव पकप्पिया । अच्चंत-
कुसुमामोयसंपण्ण सिंदुवारेण घाणविसेण इव पावासूणं महामोहो किज्जइ । वसंतु-
ज्जाणपालेण चंपगेसु नियाइआ महुगरा आरक्खगा इव निस्संकं भमंति । जोव्वणं
इत्थि-पुरिसाणं इव वसंतो उत्तमाऽणुत्तमतरु-लयाणं सिरिं देइ । मिगनयणाओ महा-
तिहिणो वसंतस्स अयं दाउं ऊसुगा इव तत्थ उज्जाणे कुसुमाणं अवचयाय आरंभन्ति ।
कुसुमसरस्स अम्हासुं आउहभूयासुं किं अण्णेहिं आउहेहिं इअ बुद्धीए कामिणीओ कुसु-
माइं अवचिणेइरे । उच्चिणिणसुं पुप्फेसुं तव्विओग-पीला-पीलिआ वासंती मंजुगुंज-
तमहुगरेण रुवेइ इव । काई इत्थी मल्लिगं उच्चिणिऊण गच्छंती तल्लग्गवसणा 'अण्णहिं
मा गच्छाहि' ति तीए निसिज्झमाणा इव तत्थ चिट्ठइ । काई इत्थी चंपगं चिण-
माणा 'नियाऽऽसयभंणेण कोहेण इव उइडेंतेण भमरजुवगेण डसिज्जइ । कावि इत्थी
उक्खित्तवाहुलया बाहुमूलनिरिक्खणपराणं जुवगाणं मणेण सद्धिं अच्चुच्चाइं पुप्फाईं
हरेइ । नूयणपुप्फगुच्छइत्था पुप्फगाहिगाओ जंगमा वल्लीओ इव रायंति । पुप्फुच्चय
कोऊहल्लाओ रुक्खस्स पडिसाहं विलग्गाहिं इत्थीहिं 'साहिणो संजायइत्थियफला
इव सोहंति । कोवि पुरिसो सयं उच्चिणिणहिं 'मल्लिगाकोरगेहिं मुत्तादाभविडंबगं
सव्वंणिगाभरणं कामणीए कुणेइ । कोवि जुवाणो नियहत्थेण वियसियकुसुमेहिं
पियाए धम्मेल्लं पुप्फसरस्स तूणीरमिव पूरेइ । कोवि पुरिसो पंचवणकुसुमेहिं सयं

१ लासकः-वृत्त्यकारः । २ आश्लेषः । ३ मुखमदिरा । ४ वृक्षविशेषस्य लता । ५ पाटलापुष्प-
पाटलावृक्षस्य पुष्पविशेषः । ६ भ्रमरपथिकानाम् । ७ घ्राणविषेणेव । ८ प्रवासिनाम् । ९ निजाश्रयभङ्गेन-
स्वस्थानचिनाशेन । १० शाखिनः-तरवः । ११ मल्लिकाकलिकाभिः ।

विडंबिय-इंदधणुहं मालं गंठिऊण दाऊण य पियं परितोसेइ । को वि पियाए सलीलं पक्खित्तं पुप्फजेदुअं किंकरो पसायं पिव इत्थेहिं पडिच्छइ । काओ मिगलोयणाओ दोलाअंदोलणेण गमणागमणाइं कुणंतीओ सावराहे पइणो इव पाएहिं पायव-अग्गे हणेइरे । कावि दोलारूढा नवोढा पियनामं पुच्छंतीणं सहीजणाणं लज्जियाणा लयायाए सहेइ । को वि संमुहस्थिय-कायरनयणाए सद्धिं दोलारूढो तीए गाढालिंग-णिच्छाए दोलं गाढं अंदोलेइ । के वि जुवाणा उज्जाणरुक्खेसुं पडिसाहं लंबमाण-दोला-अंदोलणलीलाए पवंगा इव रेहिरे ।

उसहृत्पहुणो वेरंगं—

अह तत्थ उज्जाणे एवं खेलिज्जमाणेसुं पउरजणेसुं सामी झाएइ—अन्नहिं कत्थ वि एरिसा कीला दिट्ठा किं ? । अह सामी ओहिनाणेण सयं च भुत्तपुव्वं उत्तरुत्तरं अणुत्तरदेवलोगसुहयज्जंतं सम्मसुहं परिजाणेइ । भुज्जो वि विगलंतमोहबंधणो सामी वित्तेइ—विसयवामूढो एसो जणो अप्पणो हियं न जाणेइ, तस्स धिरत्थु । अहो ! एयंमि संसारकूवंमि जीवा कम्मेहिं अरहट्टयडीनाएणं गमणागमणकिरियं कुणंति । धि द्दी ताणं मोहंधमणाणं पाणीणं, जाणं इमं जम्मं सुत्ताणं रयणीव सव्वहा वि मुहच्चिय गच्छेइ । एए रागदोसमोहा जीवाणं उदयंतं धम्मं मूसगा पायवं व मूलाओ केत्तेति । अहो ! मूढेहिं कोहो नग्गोहरुक्खो इव वडिदज्जइ, किंतु सो 'नियवुडिदपावगं पि मूलाओ भक्खेइ । गयारूढा इत्थियगा इव माणारूढा मज्जायालंघिणो इमे माणवा किंचि वि न गणंति । कवियच्छुवीय-कोसिमिव उवतावकारिणिं मायं दुरासया इमे सरीरिणो निच्छं न चयंति । । खारोदगेण दुद्धं इव, अंजणेण सियवसणमिव एगेणं लोहेणं निम्बलो वि गुणगामो दसिज्जइ । जओ उत्तं—

रत्तिंधा य दियंधा, जायंधा माय-माण-कोवंधा ।

कामंधा लोहंधा, कमेण एए विसेसंधा ॥

भव-कारागारंमि चउरो कसाया जामिगा इव नेया । जाव पासत्थिआ ते जागरंति ताव नराणं कत्तो मोक्खो ?, भूयगहिया इव अंगणाऽऽलिंगणाउला देहिणो समंतओ झिज्जमाणं पि आउसं न जाणेइरे । ओसदेहिं सिंहारुगं पिव तेहिं तेहिं विविदेहिं आहारेहिं अप्पणा अप्पणो अणट्ठकए उम्माओ कुणिज्जइ । इमं सुगंधिं किं अग्वाएमि, इमं सुगंधिं किं अग्वाएमि ति ? सुगंधमूढो लोगो भसलो व्व भमंतो

जाउ रइं न लहइ । कीलणमेहिं बालं इव लोगो आवायरमणिज्जेहिं सुंदरीपमुहव-
त्तूहिं अप्पाणं पयारेइ । सत्थाणुचित्ताओ निदाळु इव वेणु-वीणाइ-सदेसु निरंतरं
दिण्णकण्णो नियलाहाओ भंसेइ । वाय-पित्त-सिलिम्हेहिं पिव जुगवं पवलवंतेहिं
विसएहिं देहीणं चेयणा लुंषिज्जइ, धिरत्थु ताणं, एवं असारसंसारवेरग्गचित्ता-
तंतूहिं 'निसिस्सविय-माणसो परमेसरो जाव होत्था, ताव वंभलोमंत-वासिणो सार-
स्सयपमुहा नव लोगंतियदेवा जगपहुणो पायाणं अंतिए समागच्छंति ते इमे—

लोगंतियदेवाणं धम्मतिथपवट्टणट्ठं विण्णत्ती—

सारस्सय-माइच्चा, वन्ही वरुणा य गहतोया य ।

तुसिया अव्वावाहा, मरुआ तह चेव रिद्धा य ॥

मत्थए पउम-कोससरिसेहिं निवद्धंजलीहिं अवरकयाभूसणा इव ते लोगंतिय
देवा एवं विण्णविति ।

सक्क-चूडामणिपहा-जलमग्गपयंबुय ! ।

भरहखेत्तनिण्णट्ठ-मोक्खमग्गपदीवग ! ॥१॥

लोगववत्था पढमा, जहा नाह ! पवट्टिया ।

पवत्तेसु तहा धम्म-तिथं किच्चं नियं सर ॥२॥

एवं ते लोगंतियदेवा पहुं विण्णविज्जण देवलोगम्मि नियवंभलोगट्ठाणे गया ।
पव्वज्जगहणाहिलासी सामी वि नंदणुज्जाणमज्झाओ सज्जो नियं पासायं समागओ ।

जम्म-ववहार-रज्ज-ट्टिइ-वेरग्गाइ-दंसणसरूवो ।

एवं पहुणो पुण्णो, एसो वीओ वि उद्देसो ॥

इअ सिरित्वागच्छाहिवइ—सिरिकयंबप्पमुहाणेगतिथोद्वारग-सासणप्पहावग-आबाल-

वंभयारि-सूरीससेहर-आयरिय-विजयनेमिसूरीसर-पट्टालंकार-समयण्णु-संतमुत्ति-

वच्छल्लवारिहि-आइरिअ-विजयविण्णाणसूरीसर-पट्टधरे-सिद्धंत-

महोदहि-पाइअभासाविसारय विजयकत्थूरसूरिविरइए

महापुरिसचरिए पढमवग्गे सिरिउसहपहुजम्म-

ववहार-रज्ज-ट्टिइ-वेरग्गाइसरूवो

विइओ उद्देसो समत्तो ॥

तइओ उद्देसो

उसहपहुणा भरहस्स रज्जदाणं—

अह नाभिनंदणो पहू समंतओ भरहं बाहुवलिपमुहतणए इयरे वि सामंताइणो य आहवेइ । पहू भरहं भासेइ—‘हे वच्छ ! तुं इमं रज्जं गिण्हसु, अम्हे संजमसामज्जं अहुणा गिण्हस्सामो’ एवं पहुणो वयणं सोच्चा तेण वयसा खणं हिट्टमुहो ठाऊण कयंजली भरहो नमिऊण समगगरं एवं वएइ—हे नाह ! भवंताणं पायपउमपीढ-पुरओ लोट्टंतस्स मम जहा सुहं होइ, न तहा रयणसिंहासणम्मि समासीणस्स । हे विहु ! तुम्हाणं अगओ पाएहिं धावंतस्स मम जं सुहं होजा, न तं सलीलहत्थि-खंधाधिरूढस्स । हे सामि ! तुम्ह चरणकमलच्छायानिलीणस्स जं सुहं जायइ तं सिय-च्छत्तच्छायच्छाइयदेहस्स नो मम होइ । तुमए विरहियस्स मम किं सामज्जसंप-याए ? तुम्हकेरसेवासुहखीरसमुदस्स मम रज्जसुहं हि विंदुव्व विभाइ । सामी वएइ—अम्हेहिं रज्जं उज्झियं, नरिंदाभावे पुढवीए मच्छसरिसो नाओ पयट्टेज्जा । हे वच्छ ! तओ इमं पुढविं जहजोग्गं परिपालेहि, तुं आपसकारगो असि, अम्हाणं अयं चिय आपसो अत्थि । सो भरहो पहुणो सिद्धाएसं लंघितं असमत्थो ‘आमं’ ति वोत्तूणं सामिणो आणं अंगीकुणेइ, गुरुसु य एसच्चिय विणयथिई । तओ विणयनमिरो भरहो मत्थएण पहुं पणमिता पिउणो उण्णयं वंसमिव सीहासणं अलंकरेइ । अह पहु-निदेसाओ अमच्च—सामंत—सेणावइपमुहेहिं भरहस्स अभिसेगो देवेहिं पहुणो इव कओ । तथा भरहमुद्धंमि पुणिमाचंदसरिसं छत्तं सामिणो अखंडसासणमिव सोहइ । तस्स य उभयपासंमि वीइज्जमाणा चामरा भरहइदुगाओ समागच्छिस्स-माणीणं सिरीणं आगया दोणि दूआ इव सोहंते । स वसहनंदणो वत्थेहिं मुत्तालं-कारेहिं पि अच्चंतनिम्मलनियगुणेहिं पिव छज्जेइ । महामहिमभायणं स नवो नरिंदो रायवग्गेण अप्पकल्लाणवंछाए चंदुव्व नमंसिओ । अह पहू अण्णेसिं पि य बाहुव-लिप्पमुहपुत्ताणं जहोइयं देसे विभइत्ता देइ । तओ पहू कप्पदुमो इव नराणं नियमण-पत्थणाणुरूवं संवच्छरियं दाणं देइ ।

संवच्छरिअदाणं—

‘जो जस्स अत्थी सो तं गिण्हेउ’ इच्चेवं उग्योसणं पहू चउप्पह—चच्चर—पओली-पमुहठाणेसुं करावेइ । वासवनिट्ठ-कुबेर—पेरिआ जंभगदेवा चिरभट्टाई नट्टाई पहीण-

सामिगाईं अइपणट्टसेऊईं गिरिकुंजगयाईं मसाणट्टागगूढाईं घरंतरंमि य गुत्ताईं रयय-
सुवण्ण-रयणाइधणाईं सव्वओ समाहरिऊण दितस्स भत्तो मेहो जलाईं इव पूरिति ।
नाभिनंदणो दिणे दिणे आइच्चोदयाओ भोयणखणं जाव सुवण्णस्स अट्टलवखसहियं
एगकोडिं देइ, संवच्छरेण उ हिरण्णस्स अट्टासीइकोडिजुयं कोडिसयतिगं असीइलक्खं
च दाणं अप्पेइ । जओ उत्तं—

तिन्नेव य कोडिसया, अट्टासीईं य हुंति कोडीओ ।
असिईं च सयसहस्सं, एयं संवच्छरे दिन्नं ॥

सामिस्स पक्कज्जागहणसवणेण जायसंसारवेरग्गा जणा सेसामेत्तं गिण्हेइरे,
इच्छादाणे वि न अहिगं गिण्हंति । अह संवच्छरियदाणंते चलियासणो इंदो भत्तीए
अवरो भरहो इव भगवओ समीवंमि उवागच्छइ । सो जलकलसहत्येहिं सुरवरेहिं संम
जगवइणो रज्जाभिसेगुव्व दिक्खामहसवाभिसेगं कुणेइ ।

उसहपट्टणो दिक्खामहसवो —

तओ इंदेण सिग्धं उवणीयं दिव्ववत्थालंकाराईं जगविहू परिहाइ । इंदो पट्टस्स
कर्णं अणुत्तरविमाण्णं विमाणं इव सुदंसणं नाम सिविगं निम्मवेइ, महिंदेण दिण्ण-
हत्थो पट्ट लोयग्गशासायस्स पढमसोवाणमिव तं सिविगमारोहेइ । सा सिविगा पढमं
रोमंचंचियदेहेहिं मच्चेहिं पच्छा य अमच्चेहिं अप्पणो सक्खं पुण्णभारो इव उद्धरिया ।
तया सुरासुरेहिं वाइज्जमाणाईं उत्तममंगलाऽऽओज्जाईं नाएहिं पुक्खलावट्टयमेहा इव
दिसाओ पुरिति, जिणवइणो उभयपासंमि चामरदुगं परलोग-इहलोगाणं मुत्तरुवं निम्म-
लत्तणमिव विराएइ, बंदिणवंदेहिं विव बुंदारगवुन्देहिं नराणं पीणिअ-सवणो जयजया-
रवो सामिणो किज्जइ, सिविगारूढो पढमि गच्छंतो नाहो वि देवविमाणसंठिय-
सायय-पडिमंतनिहो राएइ, तहाविईं आगच्छमाणं भयवंतं दददूणं सव्वे वि पउरजणा
संभमाओ बालगा पियरमिव अणुधावंति, मऊरा जीमूयं इव दूरओ पट्टं दददुं केइ नरा
उच्चयतरुसाहासु आरोहंति, के विय पट्टं दददुं मग्गपासाएणुं आरूढा पचंडं आइ-
च्चायावं चंदायवमिव मन्नेइरे, केवि कालक्खेवाऽसहिरा आसे न आरोहंति किंतु सयं
चिय पढमि तुरियं आसा इव पैंवमाणा गच्छंति, के वि जलेसु मच्छा इव लोगाणं

अभंतरंमि पविसित्ता सामिणो दंसणिच्छाए पुरओ पाउब्भवंति, काओ वि अंगणाओ वेगेण भावंतीओ तुट्ठियदारेण लायंजलिं पिव तिहुवणाहीसं पइ सुंवेइरे, पहुदंसणूसुगा कडिथिअवाला काओ वि ललणाओ आगच्छंतस्स भत्तुस्स अगंमि आरूढवानरा लयाओ इव चिट्ठिन्ति, थणकुंभभरालसा काओ वि अंगणाओ उभयपासंमिसंठियाणं दुण्हं सहीणं हत्थे अवलेखिऊण पैक्खे काऊण इव पहुदंसणाय आगच्छंति, काओ वि मिग-नयणाओ सामिपेक्खणमहूसचवंछाए गइभंगकरे भारभूयनियनियंवे निंदेइरे, काओ रायमग्गपासायकुलाणाओ सुहकोसुंभवसणाओ इंदु-संज्ञासरिससोहं धरंतीओ पुण्ण-पत्ताइं धरंति, काओ वि चवललोयणाओ पहुस्स आलोयणंमि चामराइं इव पाणिप-उमेहिं अंचले चालिति । काओ वि नारीओ निभरं अप्पणो पुण्णबीयाइं ववंतीओ इव नाभिनंदणं अभि लाए निक्खिवंति, काओ वि पहुकुलसुवासिणीओ इव उच्चएहिं चिरं जीव चिरं नंदंति आसीवयणाइं दिंति, काओ वि पुरललणाओ चंचलच्छीओ वि निच्चलच्छीओ मंदगाओ वि सिग्गमणसीलाओ समाणाओ पहुं पासंतीओ अणु-गच्छंतीओ हवंति ।

अह नहंमि महाविमाणेहिं महीयलं एगच्छत्तं कुणमाणा चउव्विहा देवा अवि समा-गच्छंति, ताणं केइ देवा मयजउवरिसेहिं कुंजरेहिं आगच्छंता गयणं मेहमइयं इव विर-यंति, केइ देवा अइवित्थिण्ण-गयण-चारिहिणो तरंडसरिसुत्तमतुरंगमेहिं कसा नावा-दंडसहिया सामिं पेक्खिउं आवडंति, केवि देवा साइसयवेगेण मुत्तिमंतेहिं पवणेहिं पिव रहेहिं नाभिनंदणं उवागच्छंति । केवि सुरा परुप्परं वाहण-कीला-पइण्णाय-पणा इव मित्तंमि न पइक्खन्ते, अयं सामी अयं सामी एवं मिहो कहिंता सुरा पत्तनयरा पहिगा इव वाहणाइं थिरीकुणंति, तथा विमाणपासाएहिं गएहिं तुरगेहिं सेंदणेहिंमि नहंमि बीया विणीया नपरी होत्था, चंदाइच्चेहिं माणुसुत्तरगिरीव पगिट्ठ-सुर-माणवेहिं जय-नाहो परिवरिज्जइ, उसहनाहो उभयपासेसु भरह-बाहुबलीहिं उवसेविओ रौहेहिं जलही इव सोहेइ, इयरेहिं अट्ठाणउईए विणीएहिं तणएहिंमि जगसामी गएहिं जूहनाहो इव अणुसरिज्जइ, माया भज्जाओ पुत्तीओ य अण्णाओ वि असुवईओ इत्थीओ ओसा-यकणजुया पउमिणीओ इव पहुं अणुगच्छंति । एवं तिलोगनाहो पुव्वभवस्स सव्वट्ठसि-द्धविमाणं पिव नाभेगं सिद्धमुज्जाणं उवागच्छेइ, उवागच्छिऊण तत्थ असोगतरुणो तलंमि भवाओ इव सिविगारयणाओ नाभिनंदणो उत्तरेइ, उत्तरिऊण सव्वओ कसाए इव

१ लाजाञ्जलिमिव-आर्द्रतण्डुलाञ्जलिमिव । २ पक्षान् । ३ लाजान्-आर्द्रतण्डुलान् । ४ स्यन्दनैः-रथैः ।

५ रोवोभ्याम्-तट्टीभ्याम् । ६ अवश्यायकणयुताः ।

ताई वत्थाई पुष्कमल्लाई भूसणाई च सिग्धे उज्जेइ । देवराओ पहुणो खंधदेसंमि चंदकिर-
णेहिं वूयंपिव कोमलं धवलं सुहुमं देवदूसं ठवेइ । अह चइत्तबहुलदुमीए उत्तरासाढान-
क्खत्ते चंदजोगमुयाण दिवसस्स पच्छिमे भागे संजायमाणजयजयारावकोलाहलच्छलाओ
हरिसं उगिरंतेहिं पिव नरामरेहिं पेक्खिज्जमाणो पहु चऊसुं दिसासुं सेसं दाउं इच्छंतो
इव चऊहिं मुट्ठीहिं सिरस्स केसे लुंवेइ । सोहम्माहिं वत्थंचलंमि वण्णंतरतंतुमंडणकारि-
णो पहुणो ते कुंतले पडिच्छेइ । अह ताहो पंचमेण मुट्ठिणा अवसेसे केर लुंचंतो इंदेण
एवं पत्थिओ—हे सामि ! तुम्हाणं सुवण्णप्पहखंधेसुं वायाऽऽणीया एसा केसवल्लरी
मरगयसंनिहा विराएइ, तओ एयाए लुंचणेग अलं, 'एसा तहेव चिट्ठउ' ति इंदनिब्बंघ-
वसाओ पहु तं केसवल्लरिं तहेव धारेइ, सामिणो हि एगंतभत्ताणं पत्थणं न खंडेइ ।
सोहम्मवई ते केसे खीरसमुदंमि पक्खिऊण उवेच्च य मुट्ठिसन्नाए रंगायरिओ इव
तुमुलं रक्खेइ ।

अह नाभिन्दणो कयच्छदुत्तवो सिद्धाणं नमो काऊण देवासुरमणूसाणं समक्खं
'सब्बं सावज्जजाणं पच्चक्खामि' ति उदीरंतो मोक्खपहस्स रहमिव चारित्तं पडिवज्जइ ।
सामिदिवस्त्रागहणसमयंमि नारगाणं पि सरयाऽऽयत्तत्तजगाणं अब्भच्छाहीए इव खणं
सुहं संजायं, तथा सामिस्स पवज्जजागहणसंकेपं पिव मणूसखेत्त—वट्ठि—संणि—पंविंदिय
पाणिमणोदव्वययासगं मणपज्जवनानं समुप्पज्जेइ ।

कच्छ-महाकच्छपमुहाणं दिक्खा—

मित्तवग्गेहिं वारिज्जमाणा, बंधूहिं रंधिज्जमाणा भरहनरिंदेण वि सुहुं सुहुं
निसिहिज्जमाणा कच्छ-महाकच्छपमुहा चत्तारि सहस्सा निवा सामिणो अइसयवंतं पुव्व-
पसायं सुमरंता, छप्पया इव पहुपायपोम्मविरहाऽसहा पुत्तकलत्ताई रज्जं च तिण-
मिव चिच्चा 'जा पहुस्स गई सच्चिय अम्हाणं' ति निच्चयं काऊणं हरिसेण दिक्खं
गिण्हंति, सेवगाणं हि एसो कमो उइओ । अह इंदप्पमुहा देवा आइणाहं पण-
मिता विरइयंजलिणो एवं थुइं कुणेइरे—'हे नाह ! तुम्ह जहत्थियगुणे वोत्तुं अम्हे
असमत्था, तहवि अम्हे थुणिमो, तुम्हाणं हि पुण्णपहावाओ अम्हाणं पण्णा अइसयवई
संजायइ, हे सामि ! तस-थावर-जंतूणं हिसापरिहाराओ सव्वजीवाऽभयदाणिक—सत्तागा-
रस्स भवओ नमो, सव्वहा मूसावायवज्जणेण हिय—सच्च—पिय—वयण—सुहारस—सागं-

रस्स तुम्ह नमो, हे भयवं ! अदिण्णाऽऽदाण-पच्चक्खाणरूवसुद्धपहंमि पढमपहिगस्स तुम्हं नमो, हे जगवइ ! वम्महं-ऽधयारमहणस्स अखंडिय-सुद्ध-वम्मचेर-तेयभाणुस्स तुम्हं नमो, हे नाह ! एगपए पुढवीपमुह-सव्वपरिगहं पलालव्व चत्तवंतस्स निल्लोह-सरूवस्स तुभं नमो, हे पट्ट ! पंचमहव्वयभारवहणवसहस्स संसार-सागर-तरणपेत्त-द्वस्स महप्पणो तुम्हं नमो, हे आइणाह ! पंचहं महव्वयाणं पिव पंच वि सोयराओ समिईओ धरितस्स तुम्हं नमो, अप्पाऽऽरामिकचित्तस्स वयणजोग-संवरणरेहिरस्स सव्वकायवेट्टानियद्वस्स तिगुत्तिगुत्तस्स तुम्हं नमो' इअ आइणाहं संयुणिता देवा जम्मा-भिसेगुव्व नंदीसरदीवे गंतूण अट्टाहियामहूसवं किच्चा जहट्टाणं गया, तह य भरह-बाहुबलिआइणो वि नाहं पणमिता अमरा इव कहंचि नियनियट्टाणं गच्छित्था । पट्ट वि मउणवयधरो अणुपव्वइएहिं कच्छ-महाकच्छाइनरवेहिं अणुसरिओ पुढविं विहरिउं पउत्तो ।

उसहपट्टणो अण्णमुणीणं च आहारस्स असंपत्ती—

भयवं पारणादिवहे कत्थइ भिक्खं न पावेइ, तथा हि ऐंगतरिज्जु-लोगो भिक्खादाण-विहिं न अभिजाणेइ, ते हि लोगा नाहं पुच्चमिव रायं चिय मण्णेइरे, तओ भिक्खट्ठं समाग-यस्स भगवओ के वि वेगपराभूयाऽऽइच्चाऽऽसे तुरंगमे, अवरे परक्कम-निज्जिय-दिसागए नागकुंजरे, के वि रुवलायण-विणिज्जिय-देवंगणाओ कण्णगाओ, केइ विज्जु-विम्ममक-राइं आहरणाइं, केयण संज्ञग्माणि इव नाणावण्णवसणाइं, के वि य मंदारदामफेदाका-रगाइं मल्लदामाइं, केइ मेरु-सिहर-सहोयरं सुवण्णरासिं च, अह अन्ने रोहणायलचूला-संनिहं रयणकुडं दित्ति । सामी भिक्खं अलहमाणो वि अदीणमणो जंगमं तित्थं पिव सइ विहरमाणो पिच्छिं पविचेइ, सत्तधाउरहियदेहो इव सुत्थिओ भयवं लुहा-पिवासाइणो परिसहे अहिसहेइ, सयं दिक्खिआ ते रायाणो पोया पवणं पिव सामिं अणुगच्छंता तहेव विहरंति । अह तत्तनाणविज्जिया तवंसिणो लुहापिवासाईहिं किला-मिया ते राइणो नियबुद्धि-अणुसारेण विचारित्ति ।

कच्छमहाकच्छाईणं चिंता—

एसो सामी किंपागफलाइं मिव महुराइं पि फलाइं न खायंति, खारजलाणि इव साऊइं पि पयाइं न पिवंति, परिकम्माऽणविकखो न ण्हाइ न य विलिपइ, भारूव्व

१ प्राप्तार्थस्य—अतिकुशलस्य । २ एकान्तककुलोकः । ३ वेगपराभूतादित्याश्वान् । ४ 'स्पर्द्धा' । ५ पृथ्वीम् ।

वत्थालंकार-मल्लाई च न गिण्हेइ, सेलो इव पवणुद्धयपह-धूलीहिं आलिगिज्जइ, तह य मुद्धंमि तिव्वं भाणुस्स आयवं सहेइ, सयणाऽऽसणाइविहीणो वि परिस्समं नाणुगच्छेइ, गिरिणो वरगयंदो विव सीय-उण्हेहिं न परिकिलिसिज्जइ न हि बुहुक्खं गणेइ, पिवासं पि न जाणेइ, वइरजुत्तखत्तिओ इव निदं पि न सेवेइ, अणुचरीभूए अम्हे कयावराहे इव दिट्ठीए वि न पीणेइ, संलावस्स उ का कहा ?, अवि य पुत्त कलत्ताइ-परिग्गहपरंमुहो पहू जं किंपि माणसंमि चित्तेइ, तं अम्हे न जाणेमो । अह ते एवं चित्ति-ऊण भत्तुणो सया आसण्णसेवगा नियवुंदपुरोगमा ते कच्छमहाकच्छा इअ वुत्ता-हे अज्जा ! लुहाविजयपरो एसो सामी कत्थ ? अम्हे य अण्णकीडगा कत्थ ? । विजियपिवासो वा अयं कत्थ ? जलदहुरा अम्हे कहिं ?, एसो य आयावविजई कत्थ ? अम्हे छायासंकुणा कत्थ ?, सीएण अपरिभूओ अयं कत्थ ?, सीअकविणो अम्हे कत्थ ? । निदारहिओ य अयं कत्थ ! निदाए पराभूया अम्हे कत्थ ?, निच्चं अणासीणो अयं कत्थ ? आसणे पंगुसरिसा अम्हे कत्थ ?, गरुलस्स समुद्धलंघणविहिग्गिमा कागेहिं पिव अम्हेहिं सामिस्स वयगह-णंमि अणुगमणं एयं पारद्धं । आजीविगानिमित्तं किं नियाइं चिय रज्जाइं गिण्हामो ?, अहवा ताणि भरहेण गहियाणि, अओ कत्थ गच्छिज्जइ ? अहुवा जीवणनिमित्तं भरहं चिय किं वच्चामो !, पहुं चइत्ता तत्थ गयाणं अम्हाणं तम्हा चिय भयं सिया, तत्तो हे अज्जा ! पुरा वि तुम्हे पहुणो निच्चं आसण्णवट्ठिणो भावजाणगा होत्था, तत्तो कज्जविमूढाणं अम्हाणं किं कायव्वं ? तं अज्ज वएह । ते वि एवं भासंते-जइ मयंभूर-मणसमुद्धस्स थाहो आसाइज्जइ तथा सामिस्स भावो वि नज्जइ । अग्गे वि सामिणा आदिट्ठं चिय कज्जं निच्चं अकरिंसु, अहुणा उ विहियमउणव्वओ एसो क्विचण न आदि-सेइ । जह तुम्हे नेव जाणेह, तहेव हि अम्हे वि न जाणेमो, सव्वेसिं समाणा गई, तुम्हे ववेह-अम्हे किं कुणेमो ? । अह सव्वे वि ते संभूअ आलोइऊण गंगा-तीर-वणाइं गया, तत्थ सइरं कंदमूलफलाइं भुंजिउं पउत्ता । तओ कालाओ आरंभिऊण वणवासिणो जडाधारिणो कंदमूलफलाहारिणो इह पुढवीए तावसा संजाया ।

नमिविणमीणं आगमणं—

अह कच्छ-महाकच्छतणया विणयजुआ नमि-विणमिनामाणो पहुदिकखागहण-कालाओ पुव्वं सामिणो आणाए दूरदेसंतराई गया, तओ पच्छा आगया ते निय-पियरे वणमज्झंमि पासेइरे, पासिऊण एवं वियारंति-वसहणाहे वि नाहे समाणे अणाहा इव अम्हाणं एए पियरा किं एरिसं अवत्थं पता ?, कत्थ तं चीणंसुगं ?

‘कथ इमं चिलायारिहं वक्कलं ! । कथ देहंमि सो अंगरागो !, कथ पसुणो जोगं भूमिरयं ? । कथ पुष्फमालागब्भिओ धम्मेल्लो ?, कथ वडरुक्खस्स इव जडा ? । कथ गर्यदारोहणं ? कथ एसो पाइक्कोव्व पायचारो ?, एवं चित्तमाणा ते पिउणो पणमि-ऊण सव्वं पुच्छेइरे । ते कच्छमहाकच्छा एवं ववन्ति-जगनाहो भगवं उसहनाहो रज्जं चइऊण, पुढविं विभइऊण भरहपमुहाणं दाऊण वयं गहित्था, तया अम्हेहिं पि सव्वेहिं सामिणा सद्धिं हत्थिणा इक्खुभवखणमिव पुव्वावर-वियारं अकाऊण सहसा वयं अंगीकयं, किंतु खुवा-पिवासा-सी-उण्हाइकिलेस-पीलिएहिं अम्हेहिं तं वयं विमुत्तं, जइवि सामिणो इव अम्हे आयारधम्मं पालित्तं न सक्केमो, तह वि गिहवासं मोत्तूणं एत्थ तवोवणंमि वसामो ।

पहुपासम्मि नमि-विणमीणं रज्जमग्गणं धरणिंदागमणं च—

एवं सोचा ते—‘अम्हे वि सामिणो समीवंमि पुढविभागं पत्थेसु’ त्ति बोत्तूण ते नमि-विनमिणो सामिपायाणं समीवं उवागच्छन्ति, तत्थ गच्चा ‘एसो पहु नीसंगो’ त्ति अयाणमाणा ते उभे वि पडिमाए थिअं पहुं नच्चा एवं विण्णवित्ति—‘हे पओ ! अम्हे दूरदेसंतरं पेसिऊण तुमए भरहाइपुत्ताणं विभागं काऊणं पुढवी दिण्णा, अम्हाणं गोप्प-यमेत्तावि पुढवी तुमए किं न दिण्णा ?, तओ एहिं पि हे बीसणाह ! पसायं काऊण देसु, अहवा देवदेवेणं अम्हासु किं दोसो पेविखओ ?, जं अन्नं दायव्वं तं दूरे अत्थु, किंतु उत्तरं पि न देसि’ एवं वयंताणं ताणं पहु न किंचि वएइ, ‘निम्ममा महप्पाणो हि कास वि एहिगचित्ताए न लिपिज्जिरे’ । जइ वि सामी न बवेइ, तह वि अम्हाणं एसो चिव्व गइ त्ति निच्चयं काऊण ते पहुं उवसेविउं पउत्ता । सामिस्स समीवंमि रयपसमणनिमित्तं कमलिणी-दलेहिं जलासयाओ जलं आणेऊण वरिसित्ति, पच्चूसे घम्मचक्कवट्ठिणो पुरओ सुगंध-मत्त-महुगर-बुंद-सेविअं पुष्फ-पयरं ते मुंचन्ति, अहोनिस्स मेरुगिरिं चंद-सूरा इव आकड्ढियाऽसिणो उभयपाससेठिया सामिं सेवेइरे, तिसंझं च कयंजलिणो पणमित्ता एवं पत्थेइरे—‘हे सामि ! अम्हाणं अवरो न सामी, तुमं रज्जपदायगो होसु’ । एगया सामिपायाणं वंदणं इच्छंतो सद्धावंतो नागकुमारदेवाणं अहीसरो धरणिंदो तत्थ उवागच्छेइ, सो नागराओ बालगे इव सरले सामिणो सइ सेवापरे सिरिं च मग्गमाणे ते नमिविणमिणो अच्छे-रणेण सह पेक्खइ, पेक्खित्ता सो पेऊससंदिरसरिसगिराए वएइ—‘के तुम्हे ? दिहं विरइय-निव्वंधा किं च मग्गेह ?, जगसामी संवच्छरं जाव किं इच्छिअं महादाणं

दासी तयाणिं तुम्हे कर्हि गया होत्था, संपइ सामी निम्ममो निप्परिग्गहो रोस-
तोस-विरहिओ देहे वि निराकंखो वट्ठइ' । एयं सोच्चा ते नमिबिणमिणो' एसो वि
कोइ सामिणो सेवगो' त्ति नच्चा सगउरवं तं नागरायं धरणं कर्हि-अम्हे सामिणो
भिच्चा, एसो अम्हाणं सामी, तया दिक्खागहणाओ पुव्वं कज्जनिमित्तं अम्हे देसं-
तरगमणट्ठं आइट्ठा, सयं सव्वेसिं नियपुत्ताणं विभइऊण रज्जं दाही । दिण्णसव्वधणो
वि अयं अम्हाणं रज्जं दाही, 'अत्थि नत्थि त्ति का चिंता ?' सेवगेहिं सेवा चिय कायव्वा ।
गंतूण भरहं मग्गेह, सामिब्व सामिपुत्तो वि तुम्हाणं दास्सइ त्ति धरणिंदेण
बुत्ता ते कर्हि- 'अमुं जगसामिं पाविऊण अण्णं सामिं नहि कुणेमो, कप्पतरं
पावित्ता को करीरं निसेवइ, अम्हे परमेसरं विहाय अन्नं न पत्थेमो, पयोधरं विमो-
च्छा 'वप्पीहो किं अण्णं जाएइ ? सत्थि अत्थु भरहाईणं, एयाए चिंताए किं ?, एयाओ
सामित्तो जं होइ, तं होउ, किं अवरेण' ! । अह ताण वयजुत्तीए पमुइओ नागराओ इमं वयणं
अव्ववी-अस्सेव सामिस्स किंकरो पायाल-पई एसो अहं अम्हि, हे महाभागा ! मह-
सत्तसालिणो ! 'अयं चिय सामी, न अवरो सेवणिज्जो' त्ति दिट्ठा पइण्णा तुम्हाणं,
साहु साहु तुम्हाणं । तिभुवणसामिणो अस्स सेवाए रज्जसंपयाओ पासेण आकड्ढि-
आओ इव दुअं लोगाणं उवसप्पंति, पलंबमाणफलं व इह नराणं इमस्स यं सेवाए
वेयइदगिरिम्मि विज्जाहरिंदत्तणं अरुचंतसुलहं चिय । पायहिद्विथिअनिहाणमिव अमुणो
सेवामेत्तेण भवणाहिद्विसिरीओ जत्तेण विणा हुंति । इमं च पहुं सेवमाणानं पुरि-
साणं कम्मणवसाओ इव अरुचंतवैसंय्या वंतरिंदिसिरी उवणमेइ, इमस्स पहुणो सेवगं
सयंवरवहु सुहगं पिव जोइसियलच्छी अवि सयमेव सिग्घं वरेइ, अस्स सामिस्स सेवाओ
पुरंदरस्स संपयाओ वसंताओ विचित्ताओ कुसुम-रिद्धीओ इव जायंते, अस्स च्चिअ
सेवणाओ मुत्तीए कणीयसिं बहिणिं पिव दुल्लहं पि अहमिंदिसिरीं लोगा लहंते, अमु-
मेव जगनाहं सेवमाणो भव्वजीवो अपुणरावित्तिं सयाणंदमइयं पयं पावेइ, अस्स चिय
सामिणो सेवाए एसो इव देही इह तिहुवणाहीसो परलोगमि य सिद्धूवो होज्जा ।
अमुस्स सामिस्स अहं दासो, तुम्हे वि सेवगा,

नागराएण नमिबिणमीणं विज्जाहरेस्सरियदानं —

अओ एयस्स सेवाए फलं विज्जाहरेस्सरियं तुम्हाणं देमि, एयं सामिसेवालद्धं
जाणेह, न अण्णहा संकेत्था, जओ भूमिमि अरुणजाओ वि उज्जोओ आइच्चजम्मो
च्चिय होइ एवं संबोहिऊण गउरी-पण्णत्ति-पमुहअडयालीससहस्सविज्जाओ पढणमेत्त-

सिद्धिदाणीओ देइ, आदिसेइ अ वेयड्डगिरिमि गंतूण सेणिदुगंमि नयराणि परिट्ट-
विऊण अक्खयं रज्जं तुम्हे कुणेह । पहुं पणमिऊण ते नमिविणमिणो पुप्फा-
विमाणं विउव्विऊण आरोहिता नागराएण समं चलिया । पुब्बं तु ते नियपियराणं
कच्छ-महाकच्छाणं समीवंमि गंतूणं सामिसेवातरुफलभूय-नवसंपयासंपत्तिं जाणावे-
ऊण तओ ते अउज्झापणो भरहस्स नियरिद्धिं दंसेइरे, माणिपुरिसाणं हि ठाणदंसिआ
माणसिद्धी सहला होइ । पच्छा ते नियसयणं सव्वपरिजणं च विमाणवरं आरोहिऊण
वेयड्डगिरिं पइ निग्गया ।

वेयड्डगिरी —

कमेण गच्छंता-ते एरिसं वेयड्डगिरिं-‘पज्जंतभागे लवण-समुद्द-तरंग-नियर-
चुंविंयं, पुव्वावरदिसाणं माणदंडमिव ठिअं, भरहस्स दाहिणोत्तरभागाणं सीमारूवं,
पण्णासजोयणाइं दाहिणुत्तरदिसाए वित्थिण्णं, स-कोसलजोयणाइं महितलंमि ओगाढं,
पणवीसजोयणुस्सेहं, दूराओ हिमवंतगिरिणा पसारियाहिं वाहाहिं पिव गंगा-सिंधु-
नईहिं समंतओ आसिलिट्ठं, भरहड्डसिरीए लीलावीसामगेहाओ इव खंडपवाया-तमि-
स्साऽभिकखगुहाओ धरंतं, चूलाए सुमेरुगिरिमिव सासयपडिमासहियसिद्धायणकूडेण
अच्चब्भुयसोहिरं, देवाणं नवगेवेज्जाइं पिव नाणारयणमयाइं अच्चुच्च-लीलाठाणभूयाइं
नव कूडाइं धरमाणं, वीसजोयणस्सुवरिं दाहिणुत्तरपासेसुं निवसणाइं पिव दुण्णि वंतरा-
वाससेठीओ धरंतं, मूलाओ चूलां जाव निम्मलयरसुवण्णसिलामइयं पुढवीए चविंयं
देवलोगस्स एगं पायकडगं पिव, पवणकंपियमहातरुसाहा-इत्थेहिं दूराओ आहवंतमिव’
ते पासंति, पमुइयमणा य तत्थ पावेइरे । भूमितलाओ दसजोयणाओ अवरिं नमी
नरिंदो तहिं वेयड्डगिरिमि दाहिणसेणीए पण्णासं नगराइं कुणेइरे, एएसिं पुराणं
मज्झथिय-नयरुत्तमे रहनेऊरचक्कवालपुरंमि सो अहिवसेइ, तहेव य उत्तरसेठीए
विणमी नागरायस्स सासणाओ सिग्घं सट्ठिं नयराइं निम्मवेइ, एएसुं नयरेसुं पहा-
णभूयगयणवल्लहपुरंमि सो सयं अहिचिट्ठेइ । ताओ य दोण्णि विज्जाहरसेणीओ
महद्धिआओ द्विट्ठपडिर्विबिआओ उवरित्थिअवंतरसेठीओ इव सोहित्था । ते दोण्णि
अण्णे वि अणेगे गामे साहानयराइं जहट्टाणं ल जणपए वि ठवंति । जम्हा जम्हा
जणवयाओ नेऊण तहिं मणूसा ठविया, तत्थावि तीए तीए सण्णए तेहिं जणवया
कया । तेसुं तेसुं नयरेसुं ते नमि-विणमिणो हियए इव सहामज्झंमि नाभिन्तदणं
पहुं ठविरे । ‘विज्जाहिं उम्मत्ता विज्जाहरा दुण्णयं मा कुणेज्जा’ तओ धरणिंदो तेसिं
मज्जायं आदिसेइ —

विज्जाहराणं मज्जाया—

जिणाणं जिणचेइआणं तह चरमदेहीणं पडिमापण्णाणं सव्वेसिं च अणगाराणं जे विज्जादुम्मया विज्जाहरा पराभवं लंघणं च करिस्संति, ताणं विज्जाओ पमाईणं सिरिओ इव चस्संति । तह जे इत्थि नरजुगलं च हणिस्संति ताणं, जे वि य अणिच्छंति इत्थि रमिस्संति ताणं खणेण विज्जाओ चइस्संति' ति नागराओ मज्जायं उच्चएण सुणाविज्जण एसा चंद-सूरं जाव सिय ति चित्तिता तं मज्जायं रयण-मिति पसत्थीसुं लिहेइ । तओ ते नमिविणमिणो विज्जाहरपइत्तणंमि सपसायं निवेसित्ताणं ववत्थं च काऊण सो धरणिंदो तिरोहिओ संजाओ । नियनियविज्जानामेहिं सोलस निकाया पसिद्धिं पत्ता, ते इमे-गोरीनामविज्जाराहणाए गोरेया, मणुविज्जाणं आराहगा मणू, गंधारीविज्जाणं आराहगा गंधारा, माणवीविज्जाराहगा माणवा, 'कोसिगीविज्जाणं उवासगा कोसिगा, भूमितुंडाविज्जाणं आराहगा भूमितुंडगा, मूलवीरियविज्जाणं आराहगा मूलवीरियगा, संकुयाविज्जाणं उवासगा संकुगा, पंडुगीविज्जाणं आराहगा पंडुगा, कालीविज्जाणं सेवगा कालिगेया, 'सवागीविज्जाणं भत्ता सवागया, मायंगीविज्जाणं उवासगा मायंगा, पव्वईविज्जाणं आराहगा पव्वयगा, वंसालयाविज्जाणं सेवगा वंसालया, पंसुमूलाविज्जाणं भत्ता पंसुमूलगा, रुक्खमूलविज्जाणं उवासगा रुक्खमूलग ति सोलसहिं विज्जाहिं सोलस निकाया संभूया । तओ विज्जाहराणं सोलसनिकाए विभइऊण अट्ठ निकाया नमिनरवइणा, अट्ठ य निकाया पुणो विणमिनरिंदेण गहिया । तेहि नमि-विणमीहिं निय-निय-निकायंमि नियदेहो इव भत्तोए विज्जाहिवइदेवयाओ ठविआओ । तओ ते दुण्णि निच्चं उसहसामि-पडि मापूअणपरा इव धम्माऽणावाहाए कामभोगे भुंजेइरे । कया ते दुवे जंबूदीवजगईए जालकडंगंमि पियाहिं सह अवरा सक्किसाणा इव कीलंति, कयाइ सुमेरुगिरिणो उज्जाणेषु नंदणाइवणेषु य सया पमुइयचित्ता पवणो इव अपडिवद्धा विहरिते, कयायण सासयपडिमाणं अच्चणाय नंदीसराइतित्थेसुं गच्छेइरे, सद्धानुत्तसमणोवासगलद्धलच्छीणं हि इमं चिय फलं, कयाइ ते महाविदेहखेत्तेसुं अरिहंताणं समोसरणे गंतूण सव्वण्णुदेसणासुहारसं पिवंति, कयाइ ते चारणसमणेहितो धम्मदेसणं उक्कण्णा जुवाणहरिणा गीयमिव सुणेइरे, एवं ते सम्मत्तदंसणवंता अक्खीणकोसा विज्जाहरीवुंदपरिवरिआ धम्मत्थकामाणं अवाहाए रज्जं पालेइरे । ते उ कच्छ-महाकच्छपमुहा रायतावसा गंगाए दाहिणे तडंमि हरिणा इव वणे चरंता जंगमा तरवो इव वक्कलवसणधरा

उव्वंतमिव गिहत्थाणं आहारं अफासंता चउत्थ—छट्ठात्तवसा परिसोसिअधाउमं किसयरं
'रित्त—भत्थुवमं देहं धरंता, पारणदिवहे वि जिण्णपण्णफलाइं सुंजमाणा हिययमज्झंमि
भयवंत—पाय—पउम्माइं ज्ञायमाणा अणण्णगइगा चिट्ठंति ।

उसहपहुणो पढमा भिक्षा, सिज्जंसकुमारस्स पढमं दाणं च—

भयवंतो वि अज्ज—अणज्जदेसेसु निराहारो मोणेणं संवच्छरं जाव विहर-
माणो इमं चित्तेइ—तेल्लेण पदीवा इव, वारिणा तरुणो इव पाणीणं सरीराइं आहा-
रेण च्चिय वट्ठंते । बायालीसभिक्षादोसेहिं अदोसिओ आहारो महुगरीए वित्तीए
जोग्गकाले साहुणा गिण्हियव्वो, अइकंतदिणेसु इव अज्ज वि जइ वा आहारं न
गिण्हेमि किंतु अभिग्गहेण जइ चिट्ठिस्सामि तथा अमुणो कच्छ महाकच्छाणो चउरो
सहस्सा अभोयण—पीलिया इव अवरे मुणिणो वि सामण्णं चइस्संति एवं सामी
मणंसि चित्तिऊण भिक्खुत्थं तओ चलिओ, कमेण पुरमंडलमंडणं गयपुरनयरं पाविओ ।

तंमि पुरंमि बाहुवल्लिपुत्तस्स सोमप्पहराणो तणएण सेज्जंसकुमारेण तथा
सुमिणमज्झंमि परिओ सामलो सुवण्णगिरी मए खीरकुंभेहिं अहिसिंचिऊण अहिगो
उज्जलो विहिओ त्ति दिट्ठं । तह सुबुद्धिसेट्ठिणा आइच्चाओ किरणसहस्सं चुअं सेज्ज-
सेण तत्थ निहियं, तेण सूरुओ वि अइभासुरो संजाओ त्ति पेविखअं । सोमजसेण
राइणा एगो सुहडो बहूहिं परेहिं समंतओ रुद्धो परं सेज्जंसकुमारसहेज्जेण जयं
पत्तवंतो त्ति विविखयं । तओ ते तिण्णि वि सहाए मज्झंमि अण्णमण्णस्स सुमिणे
निहिसंति, ताणं निण्णयं अजाणमाणा ते पुणो नियं नियं ठाणं गच्छित्था । तथा
सामी तयसुमिणनिण्णयं पयडीकाउं पिव हत्थिणाउरनयरं भिक्खुट्ठं पविसेइ, तथा सो
उसहपहु संवच्छरं निराहारो उसहलीलाए आगच्छमाणो संजायहरिसेहिं पउरजणेहिं
दिट्ठो, तओ तेहिं उट्ठाए उट्ठाए ससंभमं धाविऊण धाविऊण देसंतरागयबंधुव्व सामी
वेढिओ । को वि वएइ—हे भयवं एहि, अम्हाणं घराइं अणुगिण्हसु, जओ हे देव !
वसंतूसवो इव दीहकालाओ तुमं निरिविखओ असि' । कोवि कहेइ—'हे देव ! णव-
णिज्जं वसणं जलं तेललं पिट्ठाएगो य सज्जियं, हे सामि ! ण्हाएसु, अम्हाणं पसी-
असु । कोवि बोल्लेइ—हे नाह ! जच्चचंदण—कप्पूर—कत्थूरी—जक्खकइमाइदव्वाणं अप्पणो
उवओग—गहणेण मम कयत्थेसु । कोवि साहेइ—हे जगरयण ! अम्हाणं रयणालंकर-
णाइं नियंगाऽहिरोवणाओ अलंकुणेसु, हे सामि ! किवं करेहि । कोवि एवं

विण्णवेइ-हे सामि ! मज्झ गेहे समुवविसिऊण दुऊलाइं पवित्तेसु । कोई एवं बवेइ-
 देव ! अम्हाणं देवंगणोवमं कण्णं गिण्हेसु, हे पहु ! तुम्हाणं समागमाओ अम्हे
 धण्ण म्हा । कोवि वएइ-हे रायकुंजर ! कीलाए वि कएण पायचारेण किं ? इमं
 सेलसरिसं कुंजरं आरोहेसु । को वि जंपेइ-हे विहु ! आइच्चहयसरिसे मम तुरंगमे
 गिण्हसु, 'आइत्थाऽगहणाओ अम्हे अजोग्गे किं विहेसि ? । कोवि बोलेइ-हे नाह ।
 जच्चतुरंगमेहिं सहिए रहे गिण्हाहि, पायचारिम्मि पहुम्मि इमेहिं णणु किं कायव्वं ? ।
 को वि विण्णवेइ-अम्हाणं अमूइं पक्काइं सहयारफलाइं गहाहि, पणइजणं मा अव-
 मण्णाहि । को वि भासेइ-इमाइं तंबोलवल्लीपत्ताइं 'कमुगाइं च गिण्हेसु, एगंतवच्छल !
 पसीएसु । कोई एवं भासेइ-हे सामि ! मए किं नुअवरद्धं, जं असुणंतो इव उत्तरं न
 पयच्छसि ? इअ पत्थिज्जमाणो अकप्पणिज्जत्तणेण किंपि अगिण्हंतो पहु चंदो 'रिक्खं रिक्खं
 पिव गेहं गेहं उवेइ । तथा पच्चूसकाले नियमंदिरसंठिओ सेज्जंसो पक्खीणं पिव पउ-
 राणं कोलाहलं सुणेइ । 'किं एयं' ति पुट्ठो वेत्तियपहाणो पुरोहोऊण कयंजली इअ
 विण्णवेइ-जो नरिंदेहिं पिव मउडफासियभूयलं पायपीढपुरओ लुढंतेहिं दिढभत्तिमंतेहिं
 इंदेहिं सेविज्जइ, जेण भाणुणा पयत्था इव लोगेसु इक्काणुकपाए आजीविगोवाय-कम्माइं
 दंसिआइं, तथा पच्चज्जं गिण्हउं इच्छमाणेण जेण नियसेसा इव इमा भूमी विमइत्ताणं
 भरहाइणं तुम्हाणं च दिण्णा, जो सयं सव्वसावज्ज-परिहारओ कम्मट्ठग-महापंक-सोसण-
 गिम्हाऽऽयवसरिसं तवं गिण्हित्था, वयाओ आरंभिऊण अयं नाहो नीसंगो ममयारहिओ निरा-
 हारो चलणेहिं महिं पारितो विहरेइ । स्यायवाओ नो 'उव्विएइ, छायं नाणुमोएइ, अयं
 सामी गिरिव्व उभयत्थ वि तुल्लो चिय अत्थि । अयं सीयाओ न विरज्जइ, असीए य
 न रज्जइ, वज्जदेहो इव सामी जहिं तहिं च अवचिट्ठइ । जुगमेत्तं निहियदिट्ठी कीडि-
 यंपि अमइंतो संसारकरिकेसरी पायचारं एसो कुणेइ । पच्चक्खं निदेसणिज्जो
 तिजगदेवो अयं तुम्ह पपियामहो सोहग्गवसाओ इह आगओ अत्थि । अणुगोवालं गावीणं
 पिव अमुं सामि अणुधावंताणं सयलपउराणं एसो अहुणा महुरो कल-कलसदो सुणि-
 ज्जइ । आगच्छंतं पहु दट्ठणं जुवराओ वितंमि खणंमि 'पाइक्के वि अइलंघमाणो पाय-
 चारेण धावेइ, 'छत्तोवाणहं परिचइता जुवराए धावमाणे छत्तोवाणहरहिया 'परिसा
 तस्स छाया इव अणुधावेइरे । संभमाओ उल्ललंत-चवलकुंडलो सो युवराओ सामिणो
 अग्गे पुणो वाललीलं कुणंतो इव सोहेइ, गिहंगणसमागय-सामिणो पायपंकए
 लुढिऊण सो सिज्जंसकुमारो भसल-भमकारीहिं केसेहिं पमज्जेइ, तओ सो उट्ठाय

१ आतिथ्या । २ कमुकाणि-पूरीफलानि । ३ ऋक्षम्-नक्षत्रम् । ४ वैत्रिक-द्वारपाल । ५ उद्विजते ।

६ पदातीन् । ७ छत्रोपानहम् । ८ पर्वद् ।

जगसामिस्स पयाहिणतिगं विहेऊण हरिस-अंसुजलेहिं चलणे पक्खालितो इव नमेइ, तओ सो पुरओ उट्ठाय 'चओरो पुण्णिमाचंदमिव हरिसेण सामिणो मुहपंकयं पेक्खेइ, पेक्खिऊण 'मए एरिसं लिगं कथं वि दिट्ठं' ति चित्तमाणो सो विवेगतस्स बीयं जाइ-स्सरणं पावेइ, एवं च णायं जं पुव्वविदेहंमि अयं वइरनाहो भयवं चक्कवट्ठी होत्था तथा अहं इमस्स सारही संजाओ, तंमि भवंमि सामिणो वइरसेणो नाम पिया एरिसं तित्थयरलिगं धरितो मए दिट्ठो, तस्स वइरसेणस्स पायपउमंते सो वइरणाओ पव्वज्जं गिण्हित्था, अहंपि इमस्स पिट्ठओ दिक्खं गहियवंतो । वइरसेणस्स अरिहंतस्स मुहाओ अहं इअ सुणित्था एसो वइरणाओ भरहखेत्तंमि पढमत्तित्थयो होहिइ' । तओ अमुणा सामिणा सह सयंपहाइणो भवे अहं भमिओ । अहुणा एसो सामी मज्झ पपियामहो वट्ठइ । समत्तजगपाणीणं मे च अणुगहिउं पच्चक्खं मोक्खो इव समागओ एस सामी अज्ज मए पुण्णोदएण दिट्ठो । एत्थंतरंमि केणइ पुरिसेण नव-इक्खुरससंपुण्णा घडा हरिसेण कुमारस्स पाहुडंमि दिण्णा । तओ जाइसरेण विण्णायसुद्धभिक्षादाणविही सो सिज्जंस-कुमारो पहुं वएइ- 'भयवं ! कप्पणिज्जो अयं रसो गिण्हिज्जउ । पहुं वि अंजलिं काऊण पाणिपत्तं धरेइ, सो वि सिज्जंसकुमारो इक्खुरसकुंभे उक्खिवित्ता उक्खिवित्ता भगवंतस्स करपत्तंमि रसं निक्खेवेइ, भगवओ पाणिपत्तंमि भूइट्ठो वि रसो माइ, परंतु सिज्जंसस्स हियए हरिसो न मायइ । तथा सामिणो अंजलिंमि गयणंमि लग्गसिहो इक्खुरसो 'धिण्णीभूओ थंभिओ होत्था, 'पहवो खलु अचित्तिणज्जपहावा हुंति' । तओ तेण भगवया तेण रसेण पुणो सुरासुरनराणं नयणेहिं भगवत्तस्स दंस-णाऽमियरसेहिं च पारणं कयं । तथा सिज्जंसंसेयाणं पसिद्धिकरा वेयालिआ इव गयणे पडिणायवुद्धिपत्ताओ दुंदुहीओ नदंति । आणंद-संभूय-जण-नेत्त-अंसुवुट्ठीहिं समं देवकयरयणवुट्ठीओ सिज्जंसमंदिरंमि संजायंति । सामिचरणपविच्चियं पुहविं पूइउं पिव आगासाओ देवा पंचवण्णपुप्फवुट्ठिं पित्तणेइरे । तथा सुरा सयलकप्परु-क्खकुसुम-णीसंदिरेहिं पिव संचिएहिं गंधंबूहिं वुट्ठिं कुणंति । सुरवरेहिं पयासंतविचित्त-अब्भमइयं पिव गयणं कुणंतो चामरसरिसो चेलुक्खेवो किज्जइ । एवं वइसाहसुक्क-तइयाए तं दाणं अक्खयं आसि, तओ 'अक्खयतइयं' ति पव्वं अज्जावि पवट्ठइ । इमाए ओसप्पिणीए भरहखेत्तंमि असेसववहारनयमग्गो जह उसहसामित्तो पउत्तो तह अव-णीए दाणधम्मो सिज्जंसकुमाराओ पयडीभूओ । अहं सामिणो पारणाओ देवाणं च संपायाओ विम्भिया रायाणो अन्ने य पउरा सिज्जंसमंदिरे समागया । ते य कच्छ-महा-

१ चकोरः-पक्षिविशेषः । २ स्त्यानीभूतः-कठिनीभूतः । ३ श्रेयसाम् । ४ वैतालिकाः-स्तुतिपाठकाः ।

५ सम्पातात्-आगमनात् ।

कच्छाइणो खत्तियतावसा सामिपारणवत्तासवणेण अच्चंतहरिसा तत्थ आगच्छंति ।
 रायाणो नागरा य अण्णे जणा जाणवया यावि पुल्लुप्फुल्लदेहा सिज्जंसकुमारं
 इमं ववेइरे भो-भो कुमार ! धण्णो सि, नराणं सिरोमणी असि, जं तुमए
 सामिणा इक्खुरसो गाहिओ । अम्हेहिं सव्वस्सं पि दिज्जमाणं न गहियवंतो,
 तिणसमं पि न मण्णियं, अम्हासु पहु न पसण्णो । संवच्छरं गामाऽऽगरनयराऽड
 वीओ अडंतो सामी कास वि आतिथं न गिण्हित्था, भत्तिवहुमाणीणं अम्हाणं
 धिरत्थु, वत्थुगहणं दूरे अत्थु, 'पासाएसु विस्सामो दूरे सिया, अज्ज जाव वायाए
 वि सामी अम्हे न संभावित्था । पुत्तु व्व अणेगसो पुव्वलक्खाइं अम्हाणं जो पहु
 पालगो होऊण एण्हि अपरिचिओ इव अम्हासु वट्ठइ । तया सेज्जंसो ताणं एवं वएइ-
 किं एवं वुच्चइ ?, जो सामी पुव्वमिव परिगहपरो नरिंदो न, इयाणि सामी भवाऽऽव-
 ट्ठाओ निवट्ठिउं कयनिस्सेस-सावज्ज-वावार-विरई मुणी वट्ठइ । जो भोगेच्छू सो
 सिणाण-अंगराग-नेवत्थ-वत्थाणि अंगीकरेइ, तओ विरत्तस्स सामिस्स हि तेहिं किं ? ।
 जो कामविक्सो जणो सो हि कण्णगाओ गिण्हेइ, जियमयणस्स पहुणो कामि-
 णीओ कामं पाहाणसरिसाओ संति । जो महीरज्जं इच्छइ सो इत्थितुरंगाइणो गिण्हेइ,
 संजम-सामज्जसालिणो भत्तुणो तं दइढवत्थं पिव । जो हि हिंसणो सो सचित्तं
 फलाइयं गिण्हेइ, अयं सामी उ अहिलजंतूणं अभयपदायगो अत्थि । एसो जगवई एस-
 णिज्जं कप्पणिज्जं पासुगं च अन्नाइं गिण्हेइ, परंतु मुद्धा भवंतो तं न हि जाणेइरे ।
 तओ ते युवरायं वयंति-युवराय ! पुरा सामिणा जं किंचि वि सिप्पाइअं जाणाविअं
 तं चिय जणा जाणेइरे, इमं भत्तुणा न जाणावियं, तओ अम्हे न जाणामो, तुमए
 पुणो जं कहियं, तं कुओ भवया जाणियं ति अम्हाणं संसिउं अरिहेसि । तओ
 कुमारो वाहरेइ-लोगा ! गंधदंसणाओ बुद्धी इव भगवंतदंसणाओ मम जाईसरणं
 समुप्पणं, अमुणा सामिणा सद्धिं किं करो गामंतराई इव अहं देवलोगमच्चभवेसुं
 अट्ठ जम्मंतराणि परिअट्ठित्था, इओ भवाओ अइकंततइयभवमि पहुणो पिया महाविदेह-
 भूमीए वइरसेणो तिथयरो होत्था । तस्स अंतियंमि एसो सामी पच्छा पुणो अहं
 पि पव्वइओ, तं एयं सयलं जाइस्सरणाओ मए णायं । तह मज्झ तायपायाणं
 सुबुद्धिसेट्ठिणो वि य तिण्हं पि सुमिणाणं फलं अहुणा पच्चक्खं संजायं, -मए सुमि-
 णंमि जं सामो मेरु दिट्ठो खालिओ य, तेण सो हि तवक्खीणो सामी इक्खुरस-

१ प्रासादेषु—गेहेषु । २ प्रसन्नोः भूत्वा आनन्दं न समपादयेत् । ३ 'साम्राज्य' । ४ दग्धवस्त्रवत् ।

पारणाओ विराडओ । तह रण्णा अरीहिं सह जुज्झमाणो जो सुहडो सुमिणंमि दिट्ठो तेण सो सामी मए कारियपारणगसहेज्जाओ परीसहे जिणित्था । तहा खुबु-द्विसेट्ठिणा आइच्चमंडलाओ किरणसहस्सं चुयं जं च दिट्ठं, मए तं तत्थच्चिय ठवियं, तओ सो अक्को अहिगं भासियवंतो । एत्थ एसो भगवंतो आइच्चो, किरणसहस्सं तु केवलनाणं, भट्ठं तं अज्ज मए पारणेण जोइयं, तेण एसो सामी दित्तिमंतो संजाओ' एयं सोच्चा ते सव्वे सिज्जंसं साहु साहु त्ति भासमाणा पमुइया निय-नियठाणं गया । कयपारणगो सामी सिज्जंसमंदिराओ निग्गंतूणं तओ अण्णत्थ विहरेइ, छउमत्थतित्थयरो हि एगत्थ ठाणंमि न चिट्ठेज्जा । भगवंतपारणट्ठाणं न को वि अइक्कमेज्ज त्ति चित्तिज्जण तत्थ थाणंमि सिज्जंसकुमारो रयणमइअं पीढगं रयावेइ । भत्तिभरनमिरो सिज्जंसकुमारो सव्वखं पहुणो पाए इव तं रयणपीढं तिसंखं पि पूएइ । लोणेण किं एयं ति पुट्ठो सोमप्पहतणओ 'इमं आइगरमंडलं' त्ति तं जणाणं संसेइ । तओ जत्थ जत्थ पहु भिक्खं गिण्हेइ तहिं तहिं च लोगो पीढं कुणेइ, तं च कमेण 'आइच्चमंडलं' त्ति पसिद्धं जायं ।

उसहप्पहुणो बहलीदेसे गमणं बाहुबलिणो वंदणहुं आगमणं च—

एगया सामी विहरमाणो कुंजरो निउंजं पिव बहलीदेसे बाहुबलिणो तवखसिलापुरीए समीवं समागओ ।

तीए नयरीए बाहिरुज्जाणे पहु पडिमाए संठिओ । तया उज्जाणपालगो गंतूणं बाहुबलिस्स तं वुत्तंतं निवेएइ, अह तवखणे बाहुबलिनरिंदो पुरारक्खगं आदिसेइ—नयरमज्झमि विचित्तं हट्ठसेणिसोहाइं कुणिज्जउ त्ति । तया नयरंमि पए पए लंब-माण—'महालुंवि—चुंविय—पहिय—मउलिया कयली—थंभ—तोरणमालाओ सोहंते, भगवंत-दंसण-समागय—सुराणं विमाणाणि इव पइ—मग्गं रयणभायणभासुरा मंचा ठविया संति, तह नयरी पवण—अंदोलिय—उदामपडाया—सेणिमिसाओ सहस्सहत्येहिं नच्चेइ इव, अभिओ नव्वकुकुंमपाणीयच्छंटाहिं सज्जो रइयमंगलिय—अंगरागा इव पुढवी रेहइ । भयवंतदंसणुकंठाससिसंगमाओ तयाणिं तं नयरं कुमुयवणखंडुव्व वियसिअं होइ । पभायंमि सामिदंसणाओ अप्पाणं लोगं च पवित्तइस्सामि त्ति इच्छंतस्स बाहुबलि-स्स सा रयणी मासोवमा संजायइ । जगप्पहु तीए ईसिं विभायाए रयणीए पडिमं पारि-त्ताणं पवणो व कत्थइ अण्णत्थ गओ । पभाए पहुंचदंसणाय निग्गच्छंतो बाहुबलिनरिंदो

भूइहेहिं भक्खरेहिं इव निबद्धमउडेहिं महंतेहिं मंडलेसरेहिं परिओ परिवारिओ, उवा-
याणं गेहेहिं पिव सरीरधारि-अत्थसत्थेहिं पिव असुरगुरुपमुहसरिसेहिं बहहिं वरि-
हेहिं मंतीहिं वरिओ, गूढपक्खेहिं 'पक्खिराएहिं पिव जग-लघण-^२जंघालुएहिं लक्ख-
संख-तुरंगमेहिं ^३बीसुं विराइओ, सनिज्झरेहिं गिरीहिं पिव झरंत-मय-जलासार-समिअ-
पुढविरेणुहिं उत्तुंगेहिं गयराएहिं सोहिओ, असुरदंसणिगाहिं पायाल-कण्णगाहिं पिव
सहस्ससो वसंतसिरिपमुह-अंतेउरीहिं संवरिओ, रायहंस-सहियाहिं गंगाजउणाहिं पैया-
गुव्व सचामराहिं वारंगणाहिं सेविय-पासओ, पुण्णिमारयणिचंदेण सिहरीव अइमणोहारि-
उवरिथिय-धवलच्छत्तेण सोहिओ, पडिहारदेवेण देविंदो इव सुवण्णदंडहत्येण
पडिहारेण अग्गओ सोहिज्जमाणपहो, सिरिदेवीए तणएहिं व रयणाभरणभूसिएहिं
तुरंगारूढेहिं असंखेज्जेहिं पउरेहिं इअमेहिं अणुसरिज्जमाणो, जोव्वणवंतसीहो
पव्वयसिलापिट्ठं पिव सुरिंदसरिसो सो भद्दगयरायखंधमारूढो, चूलाए मंदरो
इव तरंगीभूयकिरणेण रयणमयमउडेण सिरंमि विरायमाणो, वयणस्स सिरिए
जिया जंबूदीवस्स दोण्णि चंदा सेवणत्थं समागया इव मुत्तामइयकुंडलाइं धरमाणो,
लच्छीए मंदिरंमि वप्पसरिसं थूलमुत्तामणिमइयं हारलट्ठिं हिययंमि धरंतो, भुय-
तरुणो उच्चएण दिदं नवलयावेढणं पिव बाहुमूलेसुं जच्चजंबूणयकेऊरे धरंतो,
लायणसरियाए तीरवट्ठिकेण-च्छडासंनिहे मणिबंधेसुं मुत्तामणिमइए कंकणे धरमाणो,
फणि-फणसरिसपाणीणं दुण्णि महंतमणिणो इव कंतिपल्लवियगयणे दोण्णि अंगु-
लीयगे धरंतो, देहे सिरिचंदणविलेवणाओ अंदंसणिज्ज सरीरवैसणभेएण अंग-
लग्गमुहुमसेय-वत्थेण सोहिओ, पुण्णिमामयंको चंदिमं पिव गंगातरंग-निगर-फट्ठं
कुणंतं पडं धरंतो, नाणा-धाउ-मइअ-भूमीए निसेविओ अयलुव्व विचित्त-वण्ण-रूइरेण
अंतरिज्जेण रोइओ, सिरिणं आकरिसणे कीलासत्थमिव महाबाहु सो पाणीहिं अंकुसं
वट्ठाविंतो, वंदि-बुंदजयजयाराव-पूरिय-दिसामुहो सो सामिपायपवित्तस्स उववणस्स
अंतियं उवागओ । अंबराओ गरुलो व्व सो बाहुबलिनरिंदो करिखंधाओ ओरोहिता
छत्ताइं चइऊण तं उज्जाणं पविसेइ, पविसिऊण तं उज्जाणं चंदरहियं वोममिव सुहा-
रहियं च सुहाकुंडमिव सामिरहियं पासेइ, तओ पहुमुहचंददंसणाऽऽउरो नयणाणंददाइणो
पूयणिज्जपाया भगवंतो कत्थ संति त्ति सव्वे उज्जाणबालगे पुच्छेइ । ते वयंति-जामिणी
इव विहू अग्गे कत्थवि गओ त्ति जाव कहिउं अम्हे आगच्छामो ताव देवो समागओ ।

२ पक्षिराजैः-गरुडैः । ३ जङ्घालैः-वेगवज्जिः । ४ विस्वक् । ५ प्रयागवत् । ६ वसनभेदेन-वस्त्रभेदेन ।
६ अन्तरीयेण-अभ्यन्तरबलेण रोचितः । ७ वर्तयन्-भ्रमयन् ।

સામિણો અદંસણે બાહુબલિણો પચ્છાયાવો—

एयं सोच्चा 'तम्मंतो तक्खसिलानई हत्थेविण्णसियचिबुओ 'बाहंचियलोयणो इमं चित्तेइ—परिजणेहि समं पहुं पूइस्सामि त्ति मम मणोरहो हिययंमि ऊसरे बीयं व मुहा जाओ । लोगाणुग्गहकरणिच्छाए चिरं कयविलंबस्स मम धिरत्थु, निय—अत्थ-भंसेण इयं मुखया जाया । सामिपाय—पउमावलोयणे अंतरायकारिणी इयं वइरिणी रत्ती, तं धिरत्थु, समए य एरिसी मई समुवण्णा तं पि धिरत्थु । जओ सामि न पासामि तओ विभायंपि अधिभायं, स भाणू वि अभाणू, नेत्ता वि अनेत्ता चिय । एत्थ उज्जाणे तिभुवणेसरो पडिमाए सંठिओ, अयं पुणो बाहुबली उ निल्लज्जो पासायंमि सुवइ । अह चिंता—संताण—संकुलं बाहुबलिं ददूणं मंती सोग—सल्लुद्धरणसमत्थवायाए वएइ—इह आगयं सामि न पासीअ त्ति किं सोएसि ?, जओ तुम्ह हिययंमि सो प्हू निच्चं वसिओ एव, तह इह कुलिसंउकुस—चक्क—कमल—ज्झय—मच्छाइलंछिएहिं सामि—पाय—विन्नासेहिं दिट्ठेहिं भावओ सामी दिट्ठो चिय इअ मंतिवयणं सोच्चा अंतेउरपरिवारसहिओ सुणंदातणओ सामिणो ताइं पाय—पडिबिंबाई भत्तीए वंदेइ, एयाईं पयाईं मा कोवि अइक्कमेउ त्ति त्रियारिऊण बुद्धीए तत्थ बाहुबली रयणमइयं धम्मचक्कं विहेइ, तं च अट्टजोयणवित्थारं एगं जोयणं उच्चयं सहस्साऽरं सहस्सकिरणस्स अवरं बिंबं पिव भाइ । बाहुबलिणा कयं तं धम्मचक्कं अइसयसालिणो तिजगपहुणो पहावाओ देवाणंपि दुक्करं जणेण दिट्ठं, सो बाहुबली नरिंदो तं धम्मचक्कं सव्वओ आणीएहिं पुप्फेहिं तह पूएइ, जह पउरेहिं पुप्फाणं गिरी इव संलक्खिअइ, तत्थ पवरसंगीयनाडयप्पमुहेहिं उब्भट्ठं अट्ठाहियामहूसवं नंदीसरे सक्को विव सो कुणेइ, तत्थ आरक्खगे पूअणकारगे य स बाहुबलीनरिंदो आइसिऊण धम्मचक्कं नमंसिऊण य नियं नयरिं गच्छेइ ।

उसहसामिणो केवलणाणुप्पत्ती—

भयवंतो वि पवणो इव अपडिबद्धो अक्खलंतो नाणाविहतवनिरओ विविहा-भिग्गहोज्जओ मउणवयधरो जवणा—ऽडंब—इल्लाइमिलेच्छदेसेसु अणज्ज—पाणिणो दंसणेणावि कल्लाणं कुणंतो उवसग्गेहि अफासिज्जमाणो परीसहे य सहमाणो वरि-साणं एगं सहस्सं दिवसलीलाए पुढवीए विहरेइ । विहारकमेण सो उसहज्जओ भय-वंतो अउज्झामहापुरीए पुरिमतालाभिव्खं उत्तमं साहानयरं समागच्छेइ, तस्स उत्तरदि-साए बीयं नंदणं व सयडमुहं उज्जाणं सो प्हू पविसेइ, तत्थ नग्गोहतर्णो दिट्ठमि

कय-अट्टमतवो पडिमासंठिओ अपमत्ताभिहाणगुणट्ठाणं पविसेइ, तओ य अपुब्बकरण-
मारूढो पढमं पुहुत्त-वियक्कजुयं सवियारं सुक्कज्झाणं पडिवज्जेइ, तओ अनियट्ठि-
गुणट्ठाणे वायरकसाए खयं नित्तो तत्तो अ सुहुमसंपरायगुणट्ठाणे सुहुमलोहं खयंतो
खणेण जगगुरू खीणकसायत्तणं पावेइ, खीणमोहगुणट्ठाणस्स चरिससमए बीयं एगत्त-
वियक्कजुयं अवियारं सुक्कज्झाणं खणाओ आसासेइ तेण ज्ञाणप्पहावेण पंच नाणावर-
णाइ दंसणावरणचउक्कं पंच अंतराए य त्ति सेसघाइक्कम्मं विणासेइ, अह वयाओ
वरिससहस्से मए फग्गुण-किण्ह-एगारसीए उत्तरासाढानक्खत्तेण सद्धिं चंदे जोगमु-
वागए पभायकालंमि असेसं सुवणत्तयं करत्थियमिव पयासमाणं तिकालविसयं केवल-
नाणं पहुस्स समुप्पज्जेइ । एयंमि समए—

दिसा पसण्णमावण्णा, वायवो सुहदाइणो ।

नारगाणमवि तया, खणं संजायए सुहं ॥

अह सामिकेवलनाणमहूसवक्कम्मकरणट्ठं ताणं पेरिउं पिव असेसाणं इंदाणं
आसणाइं कंपेइरे, तओ नियनियविमाणवासिदेवाहवणट्ठं दूईओ विव इंदलोगेसुं
सज्जो महु-सदाओ महा-घंटाओ नदंति । सामिपायपउमगमणेच्छुसक्कस्स
पुरओ एरावणो देवो चिंतामेत्तेण उवचिद्धेइ, तया सो सामिणो मुहचंद-
दंसणट्ठं जंगमत्तणं पत्तो मेरु इव लक्खजोयणपमाणदेहेण विरायंतो, हिमधवलार्हि
अंगप्पहारिं समंतओ चंदणचच्चियमिव दिसं विलिंपंतो, अइसुगंधीहिं गंडत्थल-
गलंत-मय-जलेहिं सागं-ऽगणभूमिं कत्थूरीगुच्छ-चिन्हियं समायरंतो, 'तालविटेहिं
पिव लोल-कण्ण-तालेहिं कवोल-तल-समावडंतगंधंऽधीभूय-भसलपंतिं निवारितो,
कुंभत्थल-तेय-पराभूय-वाल-मायण्ड-मंडलो, आणुपुव्वी-पीण-वट्ट-सोंडाऽणुकय-नाग-
राओ, महुसरिसनेत्त-दसणो तंबपत्तनिह-तालुओ भंभानिह-वट्ट-मुह-मीवो विसाल-
सरीर-अंतरालभागो आरूढधणुहसरिस-पिट्ठिवंसो चंदमंडल-संनिह-नह-मंडल-
मंडिओ, सुगंधि-दीहर-नीसासो चल-दिग्गमुंडग्ग-भागो दीह-ओट्टपल्लव-मेहण-
पुच्छो, चंदाऽऽच्चवेहिं मेरु इव दोसुं पासेसुं घंटाहिं अंकिओ, देवतरुकुसुम-वेडिअं
कच्छानाडिं धरितो । तस्स य सुवण्णपट्टंचियभालाइं अट्टमुहाइं अट्टदिसासिरीणं विला-
सभूमीओ इव छज्जंते । मुहे मुहे 'तिरिच्छा-ऽऽयओन्नया दिदा दंता महगिरिणो
दंतगा इव पयासिरे, दंते दंते वासहरे वासहरे दहो इव साउ-निम्मलजला पुक्ख-

१ तालवृन्तैः । २ अमरपट्टिकम् । ३ 'नखमण्डल' । ४ दीर्घनिःश्वासः । ५ मेहनम्-पुरुषलिङ्गम् ।

६ तिरश्चीनायतोन्नताः ।

रिणी अत्थि, पुक्खरिणीए पुक्खरिणीए अट्ठ कमलाइं जलदेवीहिं जलाओ बाहिरं कयाइं मुहाइं पिव रेहंते, कमले कमले अट्ठ विउलाइं दलाइं कीलंतदेवंगणा-वीसाम-अंतरदीवाइं पिव रायंते, दलंमि दलंमि 'पिहं पिहं चउज्जिहाभिणएहिं सहियाइं अट्ठ नाडगाइं 'अग्घेति, पइनाडयं च सुसाउ-रसकल्लोल-संपत्तिजुआ 'ओज्झरा इव बत्तीसं 'पत्ताइं संति । तओ एयारिसं तं गयवरं कुंभ-उग्ग-च्छण-नाभिओ सपरीवारो सक्को अग्गासणे समारोहेइ । आसीणपरिवारसहियवासवो सो चारणाहिवो सयल-सोहम्मकप्पो विव तओ चलेइ, सो पालगो इव कमेण नियदेहं संखिवंतो उसह-सामिपवित्थियं तं उज्जाणं खणेण पावेइ, अन्ने वि अच्चुयाइणो इंदा देववुंदेहिं समं अहमहमिगाए सिग्घं तत्थ आगच्छेइरे ।

समोसरणं—

इओ समोसरणस्स एगजोयणपमाणभूमिं अहिमाणरहिया वायुकुमारदेवा सयं पमज्जंति, मेहकुमारदेवा गंधंनु-वुट्ठीहिं पुढविं सिंचंति, तइया समागमिस्समाणस्स पहुणो 'सुगंधिवाहेहिं धूव-अग्घदाणाय उज्जया इव भूमी अग्घेइ । वंतरदेवा उग्गाय-अंसुहिं सुवण-माणिक रयणपाहाणेहिं भत्तीए अप्पाणं पिव तं वसुहायलं बंधंति, तत्थ ते देवा भूमितलाओ उग्गायाइं व हिट्ठमुह-विंटाइं पंचवणाइं सुगंधीइं पुप्फाइं विकिरंति, तह दिसाणं कंठाभरणभूयकंठिगा इव चऊसुं दिसासुं रयण-माणिक-हिरण्णेहिं तोरणाइं विउव्वंति । तत्थ थिआओ रयणमइअसालभंजिगाओ अण्णुण-देह-संकंतप-डिविवेहिं सहीहिं आलिंगियाओ इव भासेइरे, तेसु निद्ध-इंदणीलमणिघडिया मगरा 'पणासंत-मयरकेउ-चत्त-निय-चिन्ह-भम-पयायगा छज्जंते, तहिं च सेयच्छत्ताणि भगवंत-केवल-नाणुभभवहरिसेण दिसाणं हासा इव अग्घेइरे, तत्थ झया अइपमोयाओ सयं नट्ठिउं इच्छंतीए भूमिदेवीए उत्तंभियाओ भुयाओ इव विरायंति, तेसिं तोरणाणं हिट्ठंमि बलिपट्टेसु इव उच्चएहिं सत्थिगपमुहाइणि अट्ठमंगलस्स चिन्हाणि भासेइरे । तत्थ समवसरणे वेमाणियदेवा रयणगिरित्तो आणीयं मेहलं पिव उवरियणपढमं वर्षं रयणमइअं निम्मेति, तत्थ नाणामणिमयाइं कविसीसगाइं अंसुहिं गयणं चितवणअंसुकं कुणंताइं पिव सोहेइरे । जोइसियदेवा तत्थ मज्झभागंमि पिंडीभूय-निय-देह-तेएहिं पिव सुवण्णेहिं बीयं पायारं कुणंति, तत्थ य सुरासुरवहुमुहदंसणट्ठं रयणदप्पणा इव रयणेहिं कविसीसगाइं रएइरे । बाहिरभागंमि भवणवइदेवेहिं भत्तीए रूपमइओ तइओ पागारो मंडलीभूओ वेयइहगिरी इव विरइओ, तस्स उवरिं विसालाइं कविसीसगाइं

देववावीजले सुवण्णमइयाई पंकयाई इव रेहंति । वण्णत्तयमई सा समोसरणभूमी भव-
णाहिइ—जोइसिय—वेमाणिय—देवसिरीणं एकिककुंडलसरिसा विभाइ । तत्थ पडागावुं-
दविराइआ माणिकतोरेणा किरणजालेहिं विरइयाऽवरपडागा इव संति । पइवण्णं च
चत्तारि गोपुराई चउव्विहधम्मस्स कीला—वायायणा इव पयासिंति, दुवारे दुवारे
वंतरामरेहिं इंदनीलमणिंयंभाइय—धूम—लयाउ मुंचंतीओ धूवयडीओ मुक्काओ, तह
तेहिं पइदुवारं दुवारचउकधरो समोसरणपागारो इव चउद्वारवई सुवण्णपंकया वावी
विउव्विया, विइयपागारमज्झमि उत्तरपुरच्छिमदिसाए सामिबीसामनिमित्तं ते देवा
देवच्छंदं विउव्विरे । तत्थ पढमवण्णस्स पुव्वदुवारंमि उभयपासेसुं दुण्णि सुवण्णवण्णा
वेमाणियदेवा दुवारपाला चिहंति, तस्स च्चिय दाहिणदार—उभयपासेसुं दोण्णि सेयवण्णा
वंतरदेवा अण्णुणपडिबिबिया इव दुवारपालगा चिट्ठेइरे, तस्स य पच्छिमद्वारे उभयपासाओ दुवे
रत्तवण्णा जोइसियदेवा संज्ञाए ससि—रविणो इव दुवारपाला संचिट्ठंति, तस्स य उत्तर-
दुवारपासेसुं दुण्णि किण्हवण्णा भवणाहिइदेवा समुण्णया मेहा इव पडिहारा चिट्ठे-
इरे । वीयपागारे पुव्वकमेण चऊसु वि दुवारेसु अमय—पास—अंकुस—मुग्गरहत्थाओ
कमेण य चंदकंत—सोणमणि—सुवण्ण—नीलमणिपहाओ जया विजया अजिया अवराइया
य देवीओ चिहंति, अंतिमपायारे पइदुवारं तुंबुरु खड्गधरो नर—सिर—मालाधरो
जडा—मउडमंडिओ इअ चउरो देवा पडिहारा चिट्ठेइरे । समोसरणस्स मज्झभागंमि
वंतरदेवा रयणतिगोदयं उदिसंतं पिव कोसत्तिगुच्चयं चैइयतरं विउव्वंति, तस्स य
हिट्ठंमि विविहरयणेहिं पीढं विहेइरे, तस्स य पीढस्स उवरिं अपडिम—मणिमइयं
छंदगं कुणंति, तस्स य मज्झभागंमि पायपीढिगासहियं सव्वसिरीणं सारं इव रयण-
सिंहासणं रएइरे, तस्स य सिंघासणस्स उवरिं सामिणो तिजग—पहुत्तण—सूयमचिन्ह
मिव निम्मलं उत्तत्तयं ते विउव्विति, तत्थ य सिंहासणस्स दोसु पासेसु दुण्णि जक्खा
हियए अमायंते बाहिरभूए सामिमत्तिभरे इव दोण्णि चामरे धरेइरे । तओ समोस—
रणदुवारंमि अच्चबभ्रुयपहाभासियं सुवण्णपंकयसंठियं धम्मचक्कं विउव्विति, तत्थ अन्नं
पि जं तं सच्चं वंतरदेवा विहेइरे, जओ साहारणसमवसरणंमि ते देवा अहिगारिणो ।

अह पभायकाले चउव्विहदेवाणं कोडीहिं परिवरिओ भयवं समोसरिउं चलेइ,
तया सुरा सहस्सपत्ताई सुवण्णमइयाई नवकमलाई रयंति रइत्ता सामिणो य पुरओ
ठवेइरे, पहू ताणं दोसुं दोसुं सुवण्ण—पंकएसुं पयन्नासं विहेइ, देवा य सेसाई कमलाई
आसु आसु पुरओ संचारिंति, एवं संचरंतो सामी पुव्वदुवारेण समोसरणं पविसेइ, तओ

जगणाहो चेइयरुक्खस्स पयाहिणं कुणेइ 'नमो तित्थस्स' ति वोत्तूण जग-मोहंधयार-विच्छेदणत्थं सूरु पुब्बायलमिव पुब्बमुहो पड्ढु सिंघासणं आरोहेइ, तक्खणंमि अण्णासु वि तीसुं दिसासुं वंतरदेवा रयणसीहासणत्थाइं तिणिण भगवंतपडिबिंवाइं करिंति, ते देवा पडुस्स अंगुट्ठस्सावि सरिसखुं निम्मिउं न समत्था, पुणो ताणि पडिबिंवाइं सामिपद्दावओ पडुखुवसरिच्छाइं जायंते । तथा पडुणो सिरपच्छाभागे पगासमइयं भामंडलं पयडीहोइ, जस्स पुरओ सूरमंडलं खज्जोयबालो इव सिया । गयणे पइसहेहिं चउरो वि दिसाओ भिसं मुहरंतो मेहुव्व गहीरो दुंदुही नएइ । 'धम्मंमि अयं भगवं एक्को चियं सामी' इअ उइढीकयधुओ रयणमइओ सओ पडुणो अग्गम्मि विराएइ ।

अह वेमाणियदेवीओ समोसरणम्मि पुव्वदुवारेण पविसित्ता पयाहिणतिगं काऊणं तित्थनाहं तित्थं च नमिऊण पढमपागारंमि साहूणं साहूणीणं च ठाणं पमोत्तूणं तयं-तरम्मि 'पुव्वदाहिणदिसाए उइढत्थिआ चिट्ठंति, भवणवइ-जोइसिय-वंतर-देवंगणाओ दाहिणदारेण पविसिऊण तेण विहिणा कमेण 'दाहिण-पच्छिमदिसिभागे चिट्ठिरे, भवणवइ-जोइसिय वंतरसुरा पच्छिमदुवारेण पविसिय पुव्वविहिणा वायव्वदिसाए संचिट्ठेइरे, वेमाणियदेवा नरा नारीओ य उत्तरदिसादारेण पविसिउआण तेण चिय विहिणा 'उत्तरपुरत्थिमे अवचिट्ठेइरे । तत्थ समोसरणंमि पढमं समागओ अप्पड्ढिओ सो महड्ढिअं समागच्छंतं नमेइ, सोवि महड्ढिओ पुव्वं समागयं अप्पड्ढिअं साह-म्मियत्तणेण नमंतो चिय गच्छेइ । तत्थ समवसरणंमि कास वि 'निअंतणं न सिया, विकहा न, विरोहीणं पि परुप्परं मच्छरियं न, भयं च न होज्जा । विइयपागारऽ-ब्भंतरे तिरिअंचा चिट्ठंति, तइयपागारमज्झम्मि वाहणाइं संति । तीयपागारबाहिरभा-गम्मि तिरिय-नर-देवा के वि पविसंता केवि य निगच्छंता हुंति ।

इंदकयउसहजिणथुई—

अह सोहम्मकप्पिदो, नमंसित्ता कयंजली ।

रोमंअओ जगन्नाहं, इअ थोउं पयडुइ ॥

सामि ! बुद्धिहीणो अहं कत्थ ? कत्थ य तुमं गुणगिरी ?, तह वि भत्तीए मुहरी-कओ अहं तुमं थुणिस्सामि । अणंतदंसण-नाण-वीरिया-ऽऽणंदेहिं रयणेहिं रयणागरो

१ अग्निकोणके । २ नैर्ऋतकोणके । ३ उत्तरपौरस्त्ये-ईशानकोणके । ४ नियन्त्रणं—बन्धनम् ।

विव जगवइ ! तुमं इह एगोच्चिय विरायसि । देव ! इह भरहखित्तंमि चिरं सव्वहा नटुस्स धम्मस्स परोहणं तरुस्स एगवीयमिव तुमं असि । तत्थ देवलोगथिआणं अणुत्तरसुराणं इह ठिओ तुमं संदेहं छिंदेसि, तुम्हाणं पहावस्स 'ओही न । महिद्धिद-^१जुइ-भासमाणानं सव्वेसिं सुराणं देवलोगभूमिसुं जं निवासो, तं तुम्हेच्चयभत्तिलेसस्स एव फलं । देव ! तुम्हकेरभत्तिविहीणानं महंताइं पि^२ तवाइं मुरुक्खाणं गंथ-अज्झयण-मिव केवलं दुक्खाय एव । जो तुमं थुणेइ, जो य तुमं^३ विदिसेइ, तेसुं उभेसुं तुमं समो एव, किंतु ताणं जं भिण्णं सुहमसुहं च फलं तं हि अम्हाणं अच्छेरं जणेइ । सग्गसिरीए वि मम न आणंदो, तओ नाह ! तुमं इमं पत्थेमि—'हे भयवं ! तुमम्मि मम अक्खया 'भूइट्ठा भत्ती होज्जा' इअ संथुणिऊण नमंसित्ताणं च कयंजली इंदो नारी-नर-नरवइ-देवाणं अग्गओ निसीएइ ।

मरुदेवाए विलावो—

इओ य विणीयानयरीए विणीओ भरहेसरो नरिंदो पभायकालम्मि मरुदेवा-मायरं नमंसिउं आगच्छेइ । पुत्त-विरहुब्भूयाऽविरलअंमुवारीहिं संजायनीलिगाए विलुत्त-नेत्त-पंकयं पियामहिं^४ देवि ! एसो तुम्हाणं जेट्ठो^५ पोत्तो तुम्ह पायंयुयाइं सयं नमइ^६ एवं विण्णवंतो भरहो नमेइ । मरुदेवा सामिणी वि भरहस्स आसीसे देइ, तओ हियए अमायंतं सोगमिव इअ गिरं^७ उग्गिलेइ-हे पोत्त ! भरह ! तया मे पुत्तो वसहो मं तुमं महिं^८ पयं लच्छिं च तिणमिव चइत्ताणं एगागी गर्ओ, अहो ! दुम्मरा मरुदेवा न मरेइ । मज्झ पुत्तस्स मुद्धम्मि चंदायवच्छाय आयवत्तं कत्थ ? सव्वंगिय-संतावकरो तवणाऽऽतवो कत्थ ? सलीलगइ-हत्थि-पमुह-^९जाणेहिं तं गमणं कत्थ ? एहिं वच्छस्स पेहिगोइयं पायचारित्तणं कत्थ ? । मज्झ सूणुस्स वारंगणुक्खित्त-चारुचामरवीयणं कत्थ ? अहुणा डंस-मसगाईहिं उचइवो कत्थ ? । मे तणयस्स तं देव-समाणीय-दिव्वऽऽहारुवजीवणं कत्थ ? संपइ तस्स भिक्खाभोयणं वाऽवि कत्थ ? , मज्झ महिद्धिणो अंगजायस्स रयणसिंघासणुच्छंमे तं आसणं कत्थ ? अहुणा स्तग्गि-पसुणो विव निरासणया कत्थ ? , आरक्खगेहिं अप्परक्खगेहिं च रक्खिए पुरे नंद-णस्स थिई कत्थ ? संपयं^{१०} सीहाइ-दुस्सावयगणभीसणमे वणे वासो कत्थ ? , मे सूणुस्स कण्णमायरसायणं तं दिव्वंगणासंगीयं कत्थ ? कण्णसुइसरिच्छा उम्मत्त-सियाल-फेकारा कत्थ ? ।

१ अवधिः-मर्षादा । २ बुति । ३ तपांसि । ४ विद्वेष्टि । ५ भूयिष्ठा । ६ नीलिका-छारिका=अक्षिरिग-विशेषः । ७ पौत्रः । ८ उद्गिरति । ९ प्रजाम् । १० यानैः-वाहनैः । ११ पथिकोचितम् । १२ सिंहादिदुःस्वायदगणभीषणके ।

अहो ! कटं अहो कटं, जं मे पुत्तो 'तवच्चए ।

पोम्मखंडु व्व मउओ, सहए जलुवहवं ॥

सीयाले हिम-संपाय-किलेस-विवसं दसं ।

अरण्णे मालई-थंबो, इव जाइ निरंतरं ॥

उण्हयाले पयंडेहिं, किरणेहिं च भाणुणो ।

संतावं चाणुहवइ, थंबेरमो इवाहिगं ॥

ता एवं सव्वकालेसुं, वणेवासी निरासओ ।

तुच्छजणो व्व एगागी, वच्छो मे दुक्खभायणं ॥

एवं तय-तय-दुक्खाउलं वच्छं नेत्ताणं पुरओ इव पासंती तुम्ह अगगओ वि एवं वयंती हा ! तुमं पि अहं 'दमेमि इअ वयंतिं दुहवाउलं मरुदेवि देवि भरहो कयंजली सुहासरिच्छवायाए वएइ—हे देवि ! 'थिरिमगिरिस्स वइरसारस्स महासत्तसिरो-मणिस्स तायस्स जणणी होऊण एवं किं तम्मेसि ?, ताओ सहसा संसारसमुदं तरिउं समुज्जओ कंठवद्धसिलासरिसे अम्हे इह थाणंमि पहू चइत्था । वणंमि विहरंतस्स भत्तुणो पहावाओ सावयगणा अवि पाहाणघडिया इव उवहवं काउं न अलं । खुहा-पिवासाऽऽयवाइणो दूसहा जे परिसहा, ते वि कम्मवेरिविणासणे तायस्स खल्ल सहेज्ज-कारिणो च्चिय । मम वायाए न वीससेसि, तह वि हि तायस्स 'अइरा संजाय-केवलनाणमहूसवकहाए वीससिस्ससि ।

भरहनरिंदस्स पुरओ सामिणाणुप्पत्तीए चक्करयणुप्पत्तीए य जुगवं निवेअणं—

एत्थंतरम्मि वेत्तिएण जाणाविआ नायेण जमग-समगा दुष्णि पुरिसा मही-वइस्स पुरओ समागच्छेइरे, तत्थ जमगो पणमिऊण भरहनरिंदं निवेएइ—'देव ! पुरिमतालनयरे सयडाणणंमि उज्जाणे सिरिजुगाइपहुपायाणं केवलनाणं समुवण्णं ति एयाए कळाणकहाए अज्ज पुण्णोदएण वड्हसु' । समगोवि नमंसिऊण उच्चसरेण विण्ण-वेइ—हे देव ! एहिं आउहसालाए चक्करयणं उप्पणं, एवं सोच्चा नरिंदो 'इओ संजाय-केवलो ताओ, इओ य चक्करयणं उप्पणं, पढमं कास पूअणं करोमि' ति खणं श्रियाइ, तओ 'सयलजीवाभयदायगो ताओ कत्थ ?, कत्थ जीवघायगं चकं ति विमंसित्ता सामिप्प-अणनिमित्तं सो नियजणे आदिसेइ ।

१ तपात्यये-वर्षाकाले । २ शीतकाले । ३ स्तम्बेरमः-हस्ती । ४ तत्तद्दुःखाकुलम् । ५ दूनोमि-दुःखितं करोमि । ६ स्थैर्यगिरेः । ७ अचिरात् । ८ वैत्रिकेण—द्वारपात्रेन ।

मरुदेवाए सइ भरहस्स सामिवंदणइ आगमणं—

अह भरहो ताणं जहोइयं पुक्खलं पारितोसियं दाऊण ते विसज्जिऊण मरु-
देविं वणइ—हे देवि ! तुं सव्वया वि करुणक्खरं इमं कदित्था 'जं मज्झ पुत्तो एगगो
भिक्षाहारो दुक्खभायणं सिया' अहुणा तेलुक्क-सामित्तण-भाइणो तस्स नियपुत्तस्स
समिद्धिं पासाहि' त्ति वोत्तूणं तं मरुदेविं गयवरं समारोहेइ, तओ मुत्तिमंतसिरिमएहिं
सुवण्ण-वज्ज-माणिककभूसण-भूसिएहिं तुरगेहिं गयवरेहिं पाइक्केहिं रहेहिं च स
चलेइ, भूसण-पहा-पुंज-कय-जंगम-तोरणेहिं सेण्णेहिं समं चलमाणो भरहनरवई
दूराओ वि रयणमइअं-अयं पुरओ पासेइ । अह भरहो मरुदेवं वणइ—देवि ! देवेहिं
विनिम्मियं इमं समोसरणं अग्गओ पासेसु, ताथपायकमलसेवामहूसव-हेउ-समागयाणं
देवाणं अयं जयजयारावतुमुलो सुणिज्जइ, हे मायरे ! पहुणो वेयालिओ इव गहीरमहुरं
झुणिं कुणंती इमा दिव्वा दुंदुही हिययाणंदं जणेइ, सामिपायपंकय-वंदारु-बुंदारग-
विमाणुप्पणो महंतो किंकिणीनाओ कण्णगोयरो होइ, पहु-दंसण-पहिट्ट-देवगणाणं
जलहराणं थणियं पिव सिंघनाओ गयणंमि सुणिज्जइ, गंधव्वाणं गाम-रागपवित्तिथा
इयं गीई सामिदेसणाए किंकरी पिव अम्हाणं हरिसं अज्ज पोसेइ ।

मरुदेवीए मोक्खो—

तओ एयं सुणमाणीए मरुदेवीए हरिसंसु-जल पवाहेहिं नयणाणं पंकुव्व नीलिगा
विलीणा, सा नंदणस्स अइसय-समन्नियं तित्थयरलच्छिं पासेइ, पासिऊण तदंसण-
संजायाणंदाओ सा तम्मइयत्तणं संपत्ता, तक्खणंमि अपुव्वकरणकमेण खवगसेणिं समा-
रोहिऊण खीणट्ठकम्मा जुगवं केवलनाणं पावेइ, गयवर-खंधारूढा चिय सामिणी
मरुदेवा अंतगडकेवलित्तणेण सिवं अयलं अरुयं अणंतं अक्खयं अच्चावाहं सिद्धिगड-
नामधेयं ठाणं पावेइ, एयाए ओसप्पिणीए एसा मरुदेवा पढमा सिद्धा, तओ देवा
तीए देहं सक्कारित्ता खीरसमुदग्गि निहेइ । तओ पभिई लोगम्मि मयगपूअणं पव-
ट्ठिअं, 'महंता हि जं कुणंति तं आयरणाय पक्कप्पइ' । तओ तीए मोक्खसंपत्तिं विया-
णित्ता भरहनरिंदो अब्भच्छाय-सूरतावेहिं सरयकालुव्व हरिस-सोगेहिं समं भरिज्जइ,
तओ सो सपरिच्छओ पाइक्को होऊण रायचिन्हाई संचइत्ता उत्तरदुवारेण समोसरणं
पविसेइ, तया भरहनरिंदेण चउहिं देवनिकाएहिं परिवरिओ नेत्त-चओरचंदो सामी
दिट्ठो, तिउणपयाहिणं काऊणं भगवंतं पणमित्ता मत्थयंमि निवदंजली भरहचक्की
इअ धुणिउं पक्कम्मेइ—

भरहंनरिंदकयजिणथुई—

जयाहिलजगन्नाह !, जय विस्साऽभयप्पय ! ।

जय पढमत्तिथेस !, जय संसारतारण ! ॥

अज्ज ओसप्पिणी—लोग—पउमागरदिवागर ! हे पहू ! तुमग्गि दिट्ठग्गि पणढ-
मोहस्स मज्झ पभायं संजायं, कारुण-खीर-सागर ! हे नाह ! जे तुम्ह सासणमहारहं
समारोहंति, तेसिं लोगगपयं दूरग्गि न । देव ! जत्थ निक्कारणजगवंधू तुमं
पच्चक्खं दीसइ, तओ लोअग्ग-थाणाओ वि संसारं पहाणं मण्णेमो । नाह !
'भव्वजंतु-चित्त-जल-निम्मल-कारण-कैयग-चुण्ण-सरिसा तुम्हाणं वाणी जयउ',
सामि ! भवंतदंसणमहाणंद-रस-नीसंदिर-लोयणेहिं लोमेहिं संसारे वि मोक्ख-
सुंहाऽऽसाओ अणुभविज्जइ । पहू ! रागदोस-कसायप्पमुहवेरीहिं संरुद्धं इमं जगं
अभयदाणदाणसालिणा तुमए च्चिय उँव्वेडिज्जइ, नाह ! नाणाऽवक्खंद-संगाम-हय-गाम-
भूमिणो इमे राइणो मित्तत्तणं पाविऊण इह तुम्ह परिसाए चिट्ठेइरे, तुह परिसाए
आगओ अयं कैरडी करेण केसरिकरं करिसित्ता कँरडथलिं मुहुं कंडुएइ, इओ य अयं
महिसो महिसं मिव मुहुं मुहुं नेहाओ जीहाए हेसंतं हैयं पमज्जइ, इओ य इमो
हरिणो लीला-लोलियणंगूलो उक्कण्णु-अमियाणणो घाणेण वग्घवयणं जिग्घेइ, अयं
तरुणमंजारो पासेसुं अग्गओ पच्छा ललंतं मूसगं नियबालुव्व समासिलिसेइ, अयं च
निब्बओ झुजंगमो देहं कुंडलीकाउं नउलस्स समीवे वयंसो विव निसीएइ, देव !
अण्णे वि जे के वि जाइवेरिणो जीवा वेररहिआ इहयं चिट्ठंति, एयं हि तुम्हाणं
असमो पहावो इअ जगनाहं थुणिऊण अवसरिऊण अणुक्कमेण भरहनरिंदो सुरवइणो
पिट्ठओ निसीएइ । एयंमि जोयणमेत्ते वि खित्तंमि पाणीणं कोडाकोडीओ तित्थनाह-
प्पहावाओ निरावाहं मायंति । उसहणाहो सव्वभासाफरिसिणीए जोयणंगामिणीए गिराए
पणत्तीसाइसयजुयं देसणं विहेइ ।

उसहजिणस्स देसणा, संसारसरुवं च—

आहि-वाहि-जरा-मच्चु-जाला-सय-समाउलो ।

पलित्तागारकप्पोऽयं संसारो सव्वदेहिणो ॥

तओ एत्थ मणयंपि विउसाणं पमाओ न जुज्जइ, रत्तीए उल्लंघणीए मरुत्थ-
लंमि बालो वि को एत्थ पमज्जेज्जा ? । इह अणेग-जोणि-भीसणा-ऽऽवट्ठाउल-

१ 'कतकचूर्णं'— निर्मलीफलचूर्णम् । २ सुखास्वादः । ३ उद्वेग्यते—कर्मबन्धनाद् विमुच्यते ।
४ करटी—हस्ती । ५ करटस्थलीम्—गण्ड स्थलम् । ६ हयम्—अश्वम् । ७ 'लाङ्गूलः' ।

संसारमहोयहिंमि भमंताणं जणाणं महारयणं पिव उत्तमं माणुसं जम्मं अचंचंतं दुल्लहं,
'दोहलेण पायवो इव देहीणं मणुअत्तणं पि परलोगसाहणेणं धुवं सहलीहोइ ।

आवाय-मेत्त-महुरा, परिणामेऽहदारुणा ।

'सहवाया इवाऽचंचंतं, विसया 'वीस-वंचगा ॥

संसारभ्रमंतरवट्टिसमग्गपयत्थाणं संजोगा 'ऊसया पडणंता इव विप्पओग-पज्जंता
संति, एयंमि संसारे पाणीणं आउं जोव्वणं च परुप्परं फट्ठाए चिय सिग्गं 'गमिराइं
चिय, अस्स संसारस्स चउसु वि गईसु मरुम्मि जलमिव कयाइं सुहलेसो वि नत्थि
त्थिअ, तहाहि-खेत्तदोसेणं परमाहम्मिएहिं पि मिहो य संकिलेसिज्जमाणानं नेर-
इयाणं कुओ सुहं ?, सीय-वाया-ऽऽयव-जलेहिं वह-बंध-खुहाईहिं च विविहं वाहि-
उजमाणानं तिरियाणं पि किं सुहं ?, गब्भवास-जम्मण-वाहि-जरा दालिह-मच्छु-
जायदुक्खेहिं आलिगियाणं मणूसाणं कुओ सुहं ?, अणुण्णामेच्छराऽमरिस-कलह-चव-
णुप्पण्णदुहेहिं देवाणं पि कयाइं सुहलेसो वि णेव अत्थि, तह वि नीयाभिमुहगामि-
जलं व अन्नाणाओ पाणिणो भुज्जो भुज्जो संसार-संमुहं परिसपंति, तम्हा
सचेयणा भव्वा ! अप्पणो अणेण जम्मणेण दुद्धेण भुजंगमं पिव मा पोसेह, तओ हे
विवेगवंता ! जणा ! संसारनिवासुब्भवं अणेगविहं दुहं विआरिऊण सव्वप्पणावि
मोक्खाय जएह, निरयदुहसंनिहं गब्भवाससंजायं दुक्खं संसारे विव जीवाणं मोक्खे नत्थि,
घडीमज्झाऽऽकडिहज्जमाण-नारग-पीला-सरिसा इह पसवजायवेयणा वि कयावि परम-
पए न सिया, अर्भिभतर-बाहिर-परिक्खित्त-सल्ल-सरिच्छाओ बाहानिबंधणं न 'आहीओ
न वि वाहीओ तत्थ हुंति, कयंतस्स अगदूई सव्वतेयहरणी पराहीणजणणी जरा तत्थ
सव्वहा न, नेरइय-तिरिच्छ-नर-देवाणं पिव भवभमणकारणं भुज्जो मरणं तत्थ न संजा-
यइ, किंतु तत्थ महाणंदं सुहं, अवीयं अव्वयं रूवं, सासयं केवलाऽऽलोग-भक्खरं नाणं
अत्थि, निम्मलं नाण-दंसण-चारित्तरयणतिगं निरंतरं पालिता भव्वजीवा तं च
मोक्खं पावंति । तत्थ जीवाजीवाइनव-तत्ताणं संखेवओ वित्थरओ वि जहट्ठा-
वबोहो जो तं सम्मन्नाणं वुच्चइ, अवंतरमेएहिं मइसुओ-हि-मणपज्जवेहिं केवल-
नाणेण य तं नाणं पंचविहं संमयं, अवगहाइमेएहिं बहु-पमुहेहिं इयरेहिं पि मेएहिं
भिन्नं इंदियाऽर्णिदियसंभवं मइनाणं पण्णत्तं १ । पुच्चसुएहिं अंगुवंगेहिं पइन्नगेहिं
पि बहुप्पयारेण वित्थडं, 'सियासद्वलंछियं सुयनाणं अणेगहा विण्णेयं २ । देव-

१ दोहदेन । २ शठवाचा । ३ विश्ववज्यकाः । ४. उच्छ्रयाः-वृद्धयः । ५ यत्तराणि । ६ मत्सरः-
ईर्ष्या । अमर्षः-असहिष्णुता । ७ आश्रयः-मानसिकपीडाः । ८ स्याद्-शब्दलाङ्घितम् ।

नेरइयाणं भवसंभवं, सेसाणं च मणुअ-तिरिआणं खउ-वसम-लक्खणं छन्विहं ओहिनाणं सिया ३ । 'रिउ-विउलभेएहिं मणपज्जवनाणं दुहा अत्थि, तत्थ विमुद्धि-अपडिवा-एहिं विउलमइमणपज्जवनाणस्सं विसेसो जाणियव्वो ४ । असेस-दव्व-पज्जा-यविसयं वीसलोयणं अणंतं इवकं इंदियाईअं केवलनाणं वुच्चइ ५ । आगम-वुत्त-तत्तेसु रूई तं सम्मदंसणं जेयं, तं च निसग्गेण गुरुणो अहिगमाओ वा जायइ ।

सम्मदंसणलाहो—

आगमकहिए तत्ते, रूई तं सम्मदंसणं जेयं ।

तं च निसग्गाहिगमा, गुरुणो भवियाण जायइ ॥

तहा हि अणाइ-अणंत-भवाऽऽवट्ट-वट्ठीसुं पाणीसुं नाणावरणीय-दंसणावरणीय-वेयणिज्जं-तरायाभिहक्कमाणं तीसं सागरोवमकोडाकोडीओ उक्किट्ठा ठिई, नाम-गोत्तक्कमाणं वीसं, मोहणीयस्स सत्तरी कोडाकोडीओ परा ठिई अत्थि । तओ गिरिसरिय पत्थर-घोलणानापण फलाणुभावाओ झिज्जमाणाणं सत्तणं कम्माणं कमेण एगूणतीस एगूणवीस-एऊणसत्तरीओ सागरोवमाणं कोडाकोडीओ ठिई उम्मुलित्ता पल्लुवमासंखिज्जभागूणिवरुसागरोवमकोडाकोडीसेसे समाणे पाणिणो अहापवट्टिकर-णेण गंठिदेसं समागच्छति । राग-देसपरिणामो दुब्भेओ दुरुच्छेओ कट्ठाइणो इव दिट्ठयरो गंठी वुच्चइ । वुत्तं च—

मोहे कोडाकोडी, सत्तरि वीसं च नामगोयाणं ।

तीसायराणि चउण्हं, तित्तीस-ऽयराइं आउस्स ॥१॥

अंतिमकोडाकोडी, सव्वं कम्माण आउवज्जाणं ।

पलियाऽसंखिज्जइमे, भागे खीणे हवइ गंठी ॥२॥ [वि. आ. ११९४]

गंठि त्ति सुदुब्भेओ, कक्खड-घण-रूढ-गूढ-गंठिव्व ।

जीवस्स कम्मजणिओ, घण-राग-द्वोसपरिणामो ॥३॥ [वि. आ. ११९६]

तओ पुणो केवि जीवा रागाइपेरिआ तीरसमीवाओ वायसमाइया महापोया इव गंठिपप्साओ वावट्टेइरे, अन्ने थलखलियगमणाइं नईणं जलाइं पिव तारिसपरिणाम-

विसेसेण तत्थच्चिय गंठिपएसंमि 'अच्छंति, अवरे पुणो जे भव्वा भाविमहा देहिणो ते अपुव्वकरणेण उव्विकटं वीरियं पयडीकाऊण दुरइक्कमणिज्जं तं गंठि अइक्कंतमहा-
पहा पहिगा भयठाणं यिव सहसा अइक्कमेइरे, अह अनियट्टिकरणेण अंतरकरणे
कए मिच्छत्तं विरलीकाऊणं केवि चउग्गइजंतुणो 'अंतोमुहुत्तियं सम्मदंसणं जं पावंति,
तं इमं निसग्गहेउयं सम्मं सद्धानं बुच्चए, गुरूणं उवएसमालंबिऊण भव्वजीवाणं इह
जं सम्मं सदहणं तं अहिग्गमुब्भवं होज्जा । जओ उत्तं—

जा गंठी ता पढमं, गंठि 'समइच्छओ भवे वीयं ।
अनियट्टीकरणं पुण, सम्मत्त पुरक्खडे जीवो ॥४॥ [वि. आ. १२०३]

पावंति खवेऊणं, कम्माइं अहापवित्तिकरणेण ।
उवलनायेण कहमवि, अभिन्नपुण्वि तओ गंठि ॥५॥

तं गिरिवरं व 'भेत्तुं, अपुव्वकरणुग्गवज्जधाराए ।
अंतोमुहुत्तकालं, 'गंतुमनियट्टिकरणंमि ॥६॥

पइसमयं सुज्झंतो, 'खविउ' कम्माइं तत्थ बहुआइं ।
मिच्छत्तंमि उइण्णे खीणेऽणुइयंमि उवसंते ॥७॥

संसार-गिम्ह-तविओ, तत्तो गोसीसच्चंदणरसोव्व ।
अइपरमनिव्वुइकरं, तस्संते लहइ सम्मत्तं ॥८॥

ऊसरदेसं दंड्हिल्लयं च, विज्झाइ वणदवो पप्प ।
इय मिच्छस्स अणुदए, उवसमसम्मं लहइ जीवो ॥९॥ [वि. आ. २७३४]

उवसामगसेदिगयस्स होइ उवसामिअं तु सम्मत्तं ।
जो वा अकयतिपुंजो, अखवियमिच्छो लहइ सम्मत्तं ॥१०॥ [वि. आ. ५३०]

खीणम्मि उइण्णम्मि य, अणुदिज्जंते सेसमिच्छत्ते ।
अंतोमुहुत्तमेत्तं, उवसमस्समं लहइ जीवो ॥११॥ [वि. आ. ५३०]

१ आसते । २ अन्तर्मुहूर्तप्रमाणम् । ३ समतिक्रामतः । ४ भित्त्वा । ५ गत्वा । ६-क्षपयित्वा ।

तं च सम्मदंसणं ओवसमिय-सासायण-खाओवसमिय-वेयग-खाइगभेयाओ पंचविहं होज्जा, तत्थ भिण्णकम्मगंठिणो देहिणो पढमे समत्तलाहे अंतमुहुत्तमाणं ओवसमियं सम्मदंसणं जायए, तह उवसमसेणिसमारोहेण उवसंतमोहस्स मोहोवसमजायं ओवसमियं तु बीअं णेयं १ । तह चत्तसम्मत्तभावस्स मिच्छत्ताभिमुहस्स उदिण्णाणंताणु-बंधिगस्स देहिणो उक्कोसेण छावलिओ जहण्णेण य इक्कसमयमाणो जो समत्तपरिणामो तं सासायणं उदीरियं २ ।

‘उवसमसमत्ताओ, चयओ मिच्छं अपावमाणस्स ।

सासायणं मम्मत्तं, तथंतरालंमि छावलियं ॥१२॥ [वि. आ. ५३१]

मिच्छत्तमोहणिज्ज-खओवसम-समुब्भवं सम्मत्तमोहणीय-पुग्गलोदयपरिणामवंत-जीवस्स तइअं खाओवसमियं भवेइ । खवगसेदिसमारूढस्स अणंताणुबंधिकसायाणं मिच्छ-त्तमोहणीयस्स मीसमोहणीयस्स य सव्वहा खए जाए खाइगसम्मत्तसंमुद्दीकयस्स सम्म-त्तमोहणिज्जपुग्गलचरमंसोदयवंतस्स भव्वीवस्स चउत्थं वेयगसम्मत्तं सिया ४ । पही-णसत्तगस्स सुहभावस्स, खाइगसम्मत्तं ५ नाम पंचमं पुणो होइ, जओ उत्तं—

मिच्छत्तं जमुइण्णं, तं खीणं अणुइयं च उवसंतं ।

मीसीभावपरिणयं, वेइज्जंतं खओवसमं ॥१३॥ [वि. आ. ५३२]

वेयगसम्मत्तं पुण, सव्वोइयचरमपुग्गलावत्थं ।

खीणे दंसणमोहे, तिविहंमि वि खाइयं होइ ॥१४॥ [वि. आ. ५३३]

सम्मदंसणं एयं, गुणओ तिविहं भवे ।

रोयगं दीवगं चेव, कारगं च त्ति नामओ ॥१५॥

तत्थ सुअवुत्तत्तेसुं हेउ-दिट्ठंतेहिं विणा जा दिढा पैच्चउ-प्पत्ती तं रोयगं सम्मत्तं उदीरियं, जं अणोसिं पि धम्मकहाहिं सम्मत्तं दीवेइ तं दीवगसम्मत्तं, जं तु संजम-तवप्पमुहाणुद्दाणं कारवेइ तं कारगसम्मत्तं ।

१ उपशमसम्यक्कात् पततः । २ प्रत्ययोत्पत्तिः ।

जओ उत्तं सम्मत्तत्थवे—

तिविहं कारग-रोअग-दीवग-भेएहिं तुहमयविज्झिं ।

खाओवसमो-वसमिय-खाइयभेएहि वा कहियं ॥१६॥

जं जह भणियं तुमए, तं तह करणमि कारगो होइ ।

रोअग सम्मत्तं पुण, रुइमित्तकरं तु तुह धम्मे ॥१७॥

सयमिह मिच्छदिट्ठी, धम्मकहाईहिं दीवइ परस्स ।

दीवगसमत्तमिणं, भणंति तुह समयमइणो ॥१८॥

विहियाणुट्ठाणं पुण, कारगमिह रोअगं तु सद्वहणं ।

मिच्छदिट्ठी दीवइ, जं तत्ते दीवगं तं तु ॥१९॥

सम्मदंसणलक्खणाइं—

सम-संवेग-निव्वेया-ऽणुकंपऽस्थिक्कलक्खणेहिं पंचहिं लक्खणेहिं तं सम्मत्तं सम्मं तु लक्खिज्झइ । तत्थ अणंताणुबंधिकसायाणं अणुदयाओ स समो होइ, अहवा कसायाणं विवाग-दंसणेण सहावओ समो जायइ १ । कम्मविवागं संसारासारत्तणं पिय वियारंतस्स इंदियविसएहिं जं वेरगं सिया, सो संवेगो त्ति विण्णेओ २ । संसारवासो कारागारो चिय, बंधवो बंधणाइं चिय त्ति ससंवेगप्पणो जा चिंता सो निव्वेओ वुच्चइ ३ । भवसमुदंमि निमज्जमाणाणं एगिंदियाईणं सच्चपाणीणं दुक्खं पासमाणस्स हिययऽदया, ताणं च दुहेहिं दुक्खित्तणं, तेसि च दुक्खपडियारहेऊसुं जहसत्ति पवट्ठणं ति अणुकंपा कहिज्झइ ४ । अणदंसणमयतत्ताणं सवणे वि अरिहंत-परुषिएसुं तत्तसुं निराकंखा पडिवत्ती तं अत्थिक्कं उइरिअं ५ ।

देहिणो खणमेत्तेणावि सम्मदंसणसंपत्तीए जं पुरा मइअन्नाणं तं तु मइनाणत्तणं, सुयअण्णाणं च सुयनाणयं, विभंगनानं च ओहिनाणभावं पावेइ । सच्चसावज्ज-जोगाणं चाओ तं चारित्तं वुच्चइ, तं अहिंसाइ-वयभेएण पंचहा किट्ठियं, एए अहिंसा-सच्चाऽचोरिय-बंधवेरा-ऽपरिग्गहा पंचहिं पंचहिं भावणाहिं संजुत्ता परमपयसंपत्तीए कारणं सिया । पमायपच्चएण तसाणं थावराणं च पाणाणं जं न वैवरोवणं तं अहिंसावयं १, पियं हियं तैच्चं जं वयणं तं सच्चवयं, जं च अप्पियं अहियं सच्चं पिय नो तं सच्चं २ । अदिण्णस्स अणादाणं तं अचोरियवयं उदीरियं, नराणं अत्थो बाहिरा पाणा

१ हृदयद्रवता । २ निराकाङ्क्षा । ३ आस्तिक्यम् । ४ व्यपरोपणम्-प्राणापहणम् । ५ तथ्यम्-वास्तविकम् । ६ अनादानम्-अग्रहणम् ।

तं अत्थं हरंतेण ते वि पाणा हया चिय ३ । कयाऽणुमयकारिएहिं दिव्वोयारियकामाणं मण-वय-काएहिं जं चाओ तं वंभचरियवयं अट्टारहविहं पणत्तं ४ । सव्वभावेसुं मुच्छाए चाओ सो अपरिग्गहो सिया, असंतेसुं वि भावेसुं मुच्छाए संकिलिहं चित्तं होज्जा ५ ।

सव्वप्पणा मुणिदाण-मेयं चारित्तमीरियं ।

मुणिधम्ममाणुरत्ताणं, गिहीणं देसओ सिया ॥

बुद्धिमंतो पंगु-कुट्टि-कुंणिअत्तणाइं हिंसाए फलं दट्टणं निरवराहितसजंतूणं हिंसं संकप्पओ चएज्जा १ । मम्मत्तण-काहलत्तण-मूगत्तण-मुहरोगित्तणाइं मोसावाय-फलं पेक्खिज्ज कन्नाऽलीगप्पमुहाइं असच्चं चएज्जा । कण्णा-गो-भूमि-अलीगाइं नासावहरणं कूडसक्खित्तणं च इअ पंच थूलासच्चाइं संचएज्जा २ । दुब्भगत्तणं पेसत्तणं दासत्तणं अंगच्छेदं दालिहं च अदिण्णादाणफलं नच्चा थूलच्चोरियं विवज्जए ३ । संढत्तणं इदिअच्छेदं च अवंभफलं पेक्खित्ता मेहावी सदारसंतुट्ठो होज्जा, परदाराइं वा विवज्जेज्जा ४ । असंतोस-मवीसासं आरंभं दुक्खकारणं मुच्छाए फलं णच्चा परिग्गह-नियंतणं कुज्जा ५ । दससु दिसासु कया मज्जाया जत्थ न लंघिज्जइ, सा दिसावि-रइ त्ति पढमं गुणव्वयं तं विण्णेयं ६ । जत्थ भोगुवभोगाणं संखापरिमाणं जहसत्ति विहिज्जइ, तं भोगुवभोगमाणं वीयं गुणव्वयं, ७ । अट्ट-रोहूवापसत्थज्झाणं पावक-म्मोवणसो हिंसोवगरणप्पयाणं पमायाऽऽयरणं च जो देहाइअत्थदंडस्स पडिपक्खत्तेण ठिओ सो अणत्थदंडो, तस्स परिच्चायरूवं तइयं गुणव्वयं विण्णेयं ५ ।

चत्त-ट्ट-रोहज्झाणस्स, चत्तसावज्जकम्मणो ।

मुहुत्तं समया जा तं, बूम समाइयं वयं ॥

अट्ट-रउहज्झाणरहियस्स चत्तसावज्जकम्मस्स भव्वजीवस्स मुहुत्तपमाणं जं सम-भावेण वट्ठणं तं पढमं सामाइयसिक्खावयं णेयं ९ । दिसिक्खएसुं जं परिमाणं कयं तस्स पुणो दिणंमि राईए य संखेवणं तं देसावगासियं बोयसिक्खावयं वुच्चए १० । चउपव्वतिहीए चउत्थाइतवकरणं गिहवाचारनिसेहणं वंभव्वयपालणं सिणाणाइसक्का-रच्चाओ एयं पोसहाभिहाणं तइयं सिक्खावयं विण्णेयं ११ । अतिहीणं मुणीणं चउ-व्विहाऽऽहार-पत्त-वत्थ वसहिप्पमुहवत्थूणं जं दाणं तं अतिहिंसंविभागनामं चउत्थं

१ कुणित्वादि-हस्तविकलत्वादि । २ मम्मनत्वम्-अव्यक्तवचनत्वम्; काहलत्वं कतरत्वम्, अथवा काहलोऽस्फुटवचनः । ३ प्रेष्यत्वम्-कर्मकरत्वम् । ४ चतुर्थादितपः-उपवासादितपः ।

सिक्खावयं जाणियव्वं १२ । इमं दंसण-नाण-चरित्तखुवं रयणतिगं जईहिं सावगेहिं
च निव्वाणपय-संपत्तिनिमित्तं सम्मं सययं आसेवणिज्जं । एवं एरिसिं देसणं आय-
णिऊण भरहनरिंदस्स पुत्तो उसहसेणो अवरनामेण पुंडरीओ उट्ठाय उसहजिणीसरं
पणमिऊण विण्णवेइ-

उसहसेणाईणं दिक्खा—

सामि ! इह कसायदवदारुणे भवारणंमि नव्व-जलहराव्व अणुत्तरं तत्ताऽमयं
वरिस्तिथा । हे जगवइ ! जलहिंमि मज्जमाणेहिं पाणीहिं पव्वहणमिव, पिवासिएहिं
पैवा पिव, सीयपीलिएहिं वन्हीव, आयावदुक्खिएहिं पायवो व्व, अंधयार-मग्गेहिं दीवो
इव, निद्धणेहिं निहिव्व, विसऽदिएहिं सुहा मिव, रोगगसिएहिं भेसयमिव, विक्कंताऽ-
रिगणपराभूएहिं दुग्गं व भवभीएहिं अम्हेहिं तुमं पत्तो सि, दयानिहि ! अम्हे रक्ख
रक्खसु, भवभमण-हेऊहिं पियरेहिं भायरेहिं भाउपुत्तेहिं अण्णेहिं च वंधूहिं दुज्जणेहिं
पिव पैज्जत्तं, जगसरण ! संसारसमुद्दतारग ! तुमं चिय सरणं अहं पवण्णो सि, पसी-
एसु मम दिक्खं देसु त्ति वोत्तूण भरहनिवस्स पुत्ताणं एगूणपंचसएहिं पुत्तेहिं सत्त-
सयपोत्तेहिं च सह सो पव्वएइ । भरहतणओ मरीई वि, सुरासुरेहिं किज्जमाणं
सामिस्स केवलनाणमहिमं पासित्ता वयं गिण्हेइ ।

चउव्विहसंघस्स गणहराणं च ठवणा—

भरहराएण अणुण्णाया वंभी वि पव्वज्जं गिण्हेइ, पाएण लहुकम्माणं गुरुवएसो
निमित्तमेत्तमेव सिया । बाहुबलिणा दिण्णाणुण्णा वयग्गहणलालसा भरहेण निसिद्धा सुंदरी
वि षट्मा साविगा होत्था । भरहराया पहुपायपंकयंमि सावगतणं अंगीकरेइ, जओ भोगफलंमि
-कम्मंमि अभुत्ते वयं न संभवइ । नरतिरियसुराणं केई तयाणि वयं गिण्हंति, अन्ने उ सावगवयं,
अवरे पुणो सम्मत्तं गहिति । कच्छ-महाकच्छं वज्जिऊण अण्णे ते रायतावसा सामिणो
पासंमि समागतूण सहरिसं दिक्खं गिण्हेइरे । पुंडरीयप्पमुहा साहवो, वंभीपमुहाओ साहुणीओ,
भरहाइणो सावगा, सुंदरीपमुहाओ साविगाओ त्ति चउव्विहसंघस्स इयं ववत्था तया तत्थ
संजाया, धम्मस्स परमपासायसरूवा सा इसा ववत्था अज्जावि जाव वट्ठइ । तयाणि गण
हरनामकम्मवंताणं धीमंतउसहसेणप्पमुहमुणिवराणं चैउरासीए सव्वपवयणमायरं 'उप्पाओ
विगमो धुवं' ति पवित्तं तिवई जगन्नाहो उट्ठिसेइ । तओ ते तत्तिपदी-अणुसारेण कमेण

चउदसपुव्वसहिय-दुवालसंगि विरयंति, अह देवेहिं परिवरिओ पुरंदरो दिव्वचुण्णपुण्णं
रयणमइयं थालं गहिऊण नित्थयरपायसमीवंमि समुवचिहेइ । अह उसहपहू उट्ठाय
गणहराणं मत्थएसुं जहक्कमं वासक्खेवं कुणमाणो 'सुत्तेणं अट्ठेणं तदुभएणं दव्वगुणप-
ज्जवेहिं नएहिं पि' सयं अणुओगाणुण्णं गणाणुण्णं पि देइ । तओ सुरा नरा नारीओ
य दुंदुहिनायपुव्वयं तेसिं गणहराणं उवरिं सव्वओ वासक्खेवं कुणेइरे । ते चि गणहरा
रइयंजलिसंपुडा तरुणो मेहजलं पिव सामिवयणं पडिच्छंता चिट्ठंति । सामी पुणो
सिंघासणं समारुहिय पुव्वमिव पुव्वदिसिमुहो अणुसासणमइयं देसणं विहेइ । तया
सामिसमुहसंजाय-देसणोदामवेलासरिच्छसीमाए पडिरुवा पढमा पोरिसी परिपुण्णा
जाया । एत्थंतंरमि य अखंड-^१नित्तुसु-ज्जल-कलमसालीहिं विनिम्मिओ चैउपत्थप-
माणो थालसंठिओ देवनिहियमंग्रेहिं दुगुणीकयसोरहो पहाणपुरिसेहिं उक्खित्तो भरहे-
सरनरिंदकारिओ देवदुंदुहि-निणाय-पडिसइ-योसियदिसिमुहो मंगलगीय-गाणपर-
ललणाजणेहिं अणुसरिज्जमाणो पउरेहिं पहूप्पहावुत्थपुण्णरासिक्ख आवरिओ बली
पुव्वदुवारेण समवसरणंमि पविसेइ, पहुं पदक्खिणिऊण कल्लाण-सेस्साणं अणुत्तमं वीयं
वविउमिव पहुणो पुरणो बलिं पक्खिवेइ । गयणाओ निवडंतस्स तस्स अद्भभागो अंत-
राले चायगेहिं मेहपाणियमिव अमरेहिं गिण्हज्जइ, भूमिगयस्स तस्स बलिस्स अद्भभागं
भरहनरेसो गिण्हेइ, सेसं तु गोत्तिणो इव जणा विभइऊण गिण्हेइरे । इमस्स बलिस्स
माहपं—

पुव्वुप्पण्णा पणासंति, रोगा सव्वे नवा पुणो ।

छम्मासं नेव जायंते, बलिणोऽस्स प्पहावओ ॥

अह पहू उट्ठाय भसलेहिं पउमखंडो इव देविदेहिं अणुसरिज्जमाणो समोसरणस्स
उत्तरदुवारमग्गेण निग्गच्छेइ, निग्गच्छिऊण रयममइय-सुवण्णमइयवप्पाणं अंतट्ठिए
ईसाणदिसिथिअ-देवच्छंदए भगवंतो वीसमेइ । तयाणिं गणहरमुहमंडणं जेट्ठो उसह-
सेणगणहरो भगवंत-पायपीढमि उवविमिक्खिणं धम्मदेसणं विहेइ । 'सामिणो खेय-
विणोओ, सीसाणं गुणदीवणं, उभयओ पच्चओ अ' ति गणहरदेसणाए गुणा । तंमि
गणहरंमि धम्मदेसणाविरए सभाणे सव्वे पाणिणो पहुं नमंसिऊण नियनियट्ठाणं गया ।

पहुणो जक्खजक्खिणीओ, चिहारो, अइसया य—

तत्थ तित्थंमि गोमुहो नाम जक्खो समुप्पण्णो, सो दाहिणपासओ वरय-^२डक्ख-
मालारेहिरेहिं दोहिं हत्थेहिं, वामओ य माउलिं-पासधरेहिं दोहिं हत्थेहिं सोहिरो

हेमवण्णो गयवाहणो पहुणो पोसत्थो सासणजक्खो संजाओ । तह नामओ अपडि-
चक्का सुवणवण्णा गरुलाऽऽसणा वरय वाण-चक्क-पासधरेहिं चऊहिं दाहिण-
भुएहिं चउहिं धणुह-वज्ज चक्कंकुसधरवामहत्थेहिं सोहिरी सामितित्थुप्पणा
पहुस्स पासम्मि सासणदेवया होइ । तओ नक्खत्तेहिं चंदो इव महरिसीहिं परिवरि-
ओ पहु वि अणत्थ विहरिउं वच्चेइ । गच्छंतस्स पहुस्स तरवो भत्तीए चिय नमिरा
हुंति, कंटगा अहोमुहा, पक्खिणो पयाहिणा, इंदियविसयाणुकूलो उंऊ, पवणो वि
अणुकूलो, भत्तुणो समीवंमि जहण्णओ देवाणं कोडी सैएव चिट्ठेइ, भवंतरूभूयकम्म-
विणासावल्लोयणभयाओ इव तिजगपहुणो केसा मेंस नहा य न वड्ढंते । सामी जत्थ
विहरेइ तत्थ वडर-मारि-ईइ अबुद्धि-दुब्बिक्खाऽइबुद्धि-सचक्क-परचक्कभयं न सिया
इअ जगविम्हयगराऽइसयगणेहिं संजुत्तो भवभमणजगजंतूवयारिक्कबुद्धी नाहिनंदणो
उसहपहू पुढविं वाउव्व अपडिबद्धो विहरेइ ।

इअ वय-विहार-केवल-, नाण-समोसरणरूवओ तइओ ।

उदेसो इह पुण्णो, जाओ सिरिउसहचरियस्स ॥१॥

इअ सिरितवागच्छाहिवइ—सिरिकयंबप्पमुहाणेगतिथोद्वारग—सासणप्पहावग—आबाल-
बंभयारि-सूरीससेहरआयरियविजयनेमिसूरीसरपडालंकार-समयण्णु-संतमुत्ति-वच्छल्ल-
वारिहि-आइरियविजयविन्नाणसूरीसर-पट्टधर-सिद्धंतमहोदहि-पाइअ-
भासाविसारय-विजयकत्थूरसूरि-विरइए महापुरिसचरिए पढम-
वगम्मि सिरिउसहपहुणो दिक्खा-छउमत्थविहार-केवलनाण-
समोसरणवण्णरूवओ तइओ उदेसो समत्तो ॥

१ पार्श्वस्थः-निकटस्थः । २ ऋतुः । ३ सदैव । १ इमंशु ।



चउत्थो उद्देसो

चक्कपूअणं—

इओ य भरहचक्कवट्ठी अतिहिणो इव चक्कस्स उक्कंठिओ विणीयानयरी-
मज्झमग्गेण आउहसालं गच्छेइ । चक्कस्सावलोगणमेत्ते वि महीवई पणमेइ, 'खत्तिया
हि सत्थं पच्चक्खं अहिदेवयमिव मण्णेइ' । भरहनिवो लोमहत्थयं गिण्हित्ता तं
पमज्जेइ, 'भत्ताणं हि एसो पक्कमो, तारिसंमि रयणे रेयं न सिया' । तओ महीवई
पवित्तजलेहिं तं पुव्वसमुदो उदितं दिणयरमिव ण्वेइ, तओ राया गोसीसुचंदणेहिं
गयरायस्स पिट्ठे इव पूयणिज्जभावसंसिणो थासगे तत्थ चक्कंमि ठवेइ, तो नरिंदो
सक्खं जयसिहिं पिव पुप्फ-गंध-चुण्णवास-वत्थ-भूसणेहिं तं पूएइ, सो नरिंदो तस्स
चक्कस्स पुरओ समागमिस्संतऽट्ठदिसिसिरीणं मंगलाय च्चिय रूपगानिप्पणतंदुलेहिं
'पिहं पिहं अट्ठमंगलं लिहंइ, तस्स अगगओ पंचवण्णेहिं कुसुमेहिं विचित्तचित्तभूमिं कुण-
तं उवहारं कुणेइ, अइ निवो चक्कस्स अगगंमि दिव्वचंदण-कप्परमइयं उत्तमं धूवं अरि-
जसं पिव जत्तेण डहेइ, तओ चक्कधरो चक्कं तिक्खुत्तो पयाहिणेइ, तओ गुरुणो इव
अवग्गहाओ सत्त-ट्ठ-पयाइ अवसरेइ, तह य वामं जाणुं समाकुंचिज्ज दाहिणं च
जाणुं भूमीए ठविज्जण राया नेहालुजणो तंमिव चक्कं नमंसेइ, तत्थेव
कयनिवासो भूमिवई मुत्तिमंतो पमोओ इव चक्कस्स अट्ठाहियामहूसवं कुणेइ, मह-
ड्ढीहिं पउरेहिंपि चक्कपूआमहुच्छवो किज्जइ, 'पूइएहिं पूइज्जिमाणो हि
केण केण न पूइज्जइ' । तस्स चक्करयणस्स उवओगेण दिसाविजयं काउं
इच्छंतो भरहराया मंगलसिणाणनिमित्तं सिणाणागारं जाइ, विमुत्ताभरणवुंदो सुह-
सिणाणोइयवसणधरो नरिंदो सिणाणसीहासणंमि पुव्वमुहो तत्थ निसीएइ । मइणि-
ज्जाऽमइणिज्जठाणविउसा कंलाविण्णुणो संवाहमनरा कप्परक्खपुप्फ-निज्जासमइए-
हिं पिव सुगंधिसदस्सप्पमुहतेललेहिं भूवई अब्भंगिति, मंस-ट्ठि-तया-लोमसुहहेऊहिं
चउत्विहसंवाहणाहिं मउय-मज्झ-दिदेहिं तिविहेहिं करलाहवप्पयारेहिं नरिंदं संवा-
हिति । तओ ते आयंसमिव अमिलाणकंतिभायणं भूवालं सुहुम-दिव्वचुण्णेण आसु

१ रजः । २ स्थासकान्—दर्पणाकाराभूषणविशेषान् । ३ पृथक् पृथक् । ४ नृपमिव । ५ कलाविज्ञाः ।

६ कल्पवृक्षपुष्पनिर्घातमयैः । ७ अभ्यञ्जन्ति । ८ आदर्शमिव ।

उव्वहँति । तओ काई हत्थुद्धरिअसुवणजलकुंभाओ सुंदरीओ, कीओ विय रययमइय-
पयकलसे धरंतीओ अंगणाओ, अन्नाओ य नीलुप्पलब्धमकारि-इंदनीलपयकुंमे चारुपा-
णीसुं धरंतीओ इत्थीओ, अवर य नह-रयण-पहाजाल-वड्ढमाणाहिगसोहिरे कुंभे
धरंतीओ ललणाओ सुगंधिपवित्तंऽनुधाराहिं पुढवीपइं देवया जिणिंदमिव कमेण ण्वेइरे ।

अरहस्स दिसिजयहं पयाणं—

अह कयसिणाणो भूवालो कयदिव्वविलेक्खणो सेयवसणेहिं सोहिओ, णेलाडपट्टे
जसहुमस्स परोहंताहिणवंडकुंरं पिव चंदणतिल्लं धरंतो, नियजसपुंजनिम्मलयर-मुत्ता-
मइयालंकारे महंततारागणे गयणं पिव उव्वहंतो, कलसेण पासाओ त्रि किरणजालवी-
लिय-उण्हंमुणा किरीडेण विहसिओ, अरंगणाकरकमलेहिं मुहुं उक्खिविज्जमाणेहिं क-
ण्णुत्तंसायमाणेहिं चामरेहिं विराइओ, सिरिगेहपोम्म^१रपउमद्वहेण हिमवंतो गिरीव
सुवणकुंभधर-सेयच्छत्तेण उव्वसोहिओ, पतिहारेहिं पिव सव्वया मव्वओ सण्हिय-भत्त-
सोलसजक्खसहस्सेहिं परिअरिओ, उत्तुंगकुंभसिहर-थगिय-दिसाणणं हत्थिरयणं वास-
वो एरावणं पिव आरोहेइ । तवखणंमिउज्जियं गज्जंतो सो गयराओ उदाम-मय धाराहिं
अवरो धाराधरो इव होत्था । पाणिणो उक्खेविज्जण गयणं पल्लवियं कुणंतेहिं बंदि-
कुंदेहिं जुगवं जयजयारवो कुणिज्जइ । अह ताडिज्जमाणहुंदुही उच्चअं नदंतो पहाणगा-
यणो गाइगाओ इव दिसाओ वि नदावेइ । नीसेस-सेणिगाऽऽहवणकज्जंमि दूईभूयाइं
अवराइं पि मंगलियवर-तुरियाइं पणदंति । धाउसहियगिरीहिं पिव सिंदरधरकुंभेहिं
गएहिं, अणेगरूवधररेवताऽऽसभमकरेहिं तुरंगेहिं, नियमणोरहेहिं पिव विसालमहा-
रहेहिं, सीहेहिं पिव वंसवयमहापरकमपाइक्केहिं च सह महीवालो सइण्णुत्थयंसहिं दिसं
पच्छायणवत्थमिव कुणंतो पुव्वं पुव्वदिसं चलेइ ।

चक्कीणं रयणाइं—

तंमि समए जक्खसहस्साऽहिट्ठियं चक्करयणं भाणुबिबमिव नहंमि चलंतं सेणाए
पुरओ चलेइ, तओ दंडेरयणधरो नामेण सुसेणो सेणाणीरंयणं आसरंयणं आरोहिय
चक्कमिव चलेइ, नीसेस-संतिय-विहिम्मि मुत्तिमंतो संतिमंतुव्व पुरोहरंयणं अरह-
नरिंदेण समं चलेइ, सेणंमि पइनिवासं दिव्वभोयणसंपायणक्खमं गिहवइरयणं जंगमा
दाणसालेव गच्छइ, खंधावाराइकम्मं सत्तरं निम्माउं वीसकम्मेव खमो वड्ढइरयणं
नरिंदेण सह वच्चेइ, चक्कवट्ठिणो सयलखंधावारपमाण-वित्थरणसत्तिमंतं अच्चब्भुयं

१. ललाटपट्टे । २. ब्रीडितोष्णांशुना । ३. शान्तिकविधौ । ४. शान्तिमन्त्र इव पुरोधारेत्नम् । ५. सत्वरम् ।
६. विश्वकर्मेव-देवशिल्पीव ।

चम्मरयणं छत्तरयणं च निज्जाइ, अंधयार-विद्धंसणक्खमाइं पहाहिं सूर-ससिणो इव
दुष्णि मेणि-कागिणीरयणाइं भूवइणा सह पचलेइरे, सुरासुरवरसत्थाणं सारपुगगलेहिं निम्मियं
पिव भासुरं खगैरयणं नरिंदेण सह जायइ । तओ चमूचक्केण परिवरिओ चक्कधरो भरहे-
सरो पडीद्वाराणुगो इव चक्काणुगो पंहमि गच्छेइ । तया जोइसिएहिं व अणुकूलेण पवणेण
अणुकूलेहिं सउणेहिं पि तस्स सच्चओ दिसिविजओ सुइओ । करिसगो हलेण पुढविं व
सेणणस्स पुरओ वच्चंतो सुमेणसेणाणी दंडरयणेण विसमं मग्गं समीकुणेइ, सेणुब्भव-
रय-कय-दुद्धिं अंवरं रह-गय-पडागाहि बलागाहि पिव सोहेइ, अपासिज्जमाण-
पज्जंता चक्कवट्टिणो सा सेणा सच्चत्थ वि अखलंतगई बीया गंगेव लक्खिज्जइ । दिसावि-
जयमहूसवकम्मट्ठं संदणा चिक्कारसद्धेहिं, तुरंगमा हेसिएहिं, गया गज्जिएहिं अणुण्णं तुव-
रिति इव । सेणुक्खयधूलीए वि साईणं कुंता रयच्छाइयभाणुकिरणे हसंता इव
पयासंति, भत्तिमंतेहिं आवद्धमउडनरवईहिं परिवरिओ रायकुंजरो गच्छंतो भरहनरी-
सरो सामाणियदेवेहिं इंदोव्व विराएइ । तं च चक्कं जोयणपज्जंते गंतूण अवचिट्ठइ,
तओ य तप्पयाणाणुमाणाओ जोयणमाणं समुप्पण्णं । तओ जोयणपमाणपयाणेण
वच्चंतो भरहनरिं कइवयदिणेहिं गंगाए दाहिणकूलं पावेइ, तत्थ भरहनिवो निरं-
तर-विविह-निय-सेणानिवासेहिं गंगायड-विउलभूमिं संकडीकुणंतो बीसामं विहेइ ।
तया मंदाइणीनईए तडमेइणी अरंतगय-मयजलेहिं पाउसकालु व्व पंकिला होइ, गंगा-
नईए निम्मलप्पवाहे करिवरा वारिहिम्मि वारिधरुव्व सेच्छाए वारीइं गिण्हेइरे, मुहुं
मुहुं अइवेगेण उप्पवमाणा तुरंगमा तरंगभमदाइणो तत्थ सिणायंति, परिस्समाओ
अब्भंततरसंपविट्ठ-गयाऽऽस-महिस-वसहेहिं वीसुं सा सरिया जायनूयण-मगरा इव कीरइ,
तडत्थिनरिंदं सिग्घं अणुकूलं होउं इच्छंतीव गंगा तरंगसंजायसीयरेहिं सेणाए परि-
स्समं हरेइ, महीभ्रुयस्स तीए महईए सेणाए सेविज्जमाणा गंगा वि अरीणं जसो इव
सज्जो किसी होइ, भागीरहीतीरूपण-देवदारुव्वखा तस्स सेणगयरायाणं जत्तेणं
विणा आणालथंभयं जंति, तक्खणे हत्थारोहा हत्थीणं कए आसत्थ-सल्लगी-कणि-
आरु-उंवरपल्लवे परसुहिं छिंदंति, सेणीभूया सहस्ससो निवद्धा वाइणो उण्णयक्कण-
पल्लवेहिं तोरणाइं कुणमाणा इव विरायंति, आसपालगा बंधूणं व आसाणं पुरओ जवेण
मउट्ठ-मुग्ग-चणग-जवप्पमुहाणि णिहिति, विणीयानयरीए इव तत्थ सिबिरंमि तया
चच्चराइं तिगाइं च हट्ठागं च पंतीओ हवंति, चारुपडविणिम्मिय-गूढ-मह-धूल-

१ श्रेष्ठशस्त्राणाम् । २ अम्बरम्-गगनम् । ३ साविनां-अश्ववाराणाम् । ४ मन्दाकिनीनद्याः-गंगानद्याः ।

५ परिव्रमात् । ६ आनालस्तम्भताम् । ७ अश्वत्थ-सल्लकी-कर्णिकारी-दुम्बरपल्लवान् । ८ मकुटः-मठ ।

‘पडउडीहिं सुसंठिआ सव्वसेणिगा पुव्वनियपासाए न सैरंति, सइण्णाणं कंटगसोहणकज्जं दिंसंता इव उट्टा समी-^१कक्कंधु-बब्बूल-सरिस-कंटकिल्लतरुणो लिहेइरे, ‘सिगयाम-इयभागीरहीतीरतलंमि वेसरा सामिणो अग्गे भिच्चा इव लुट्ठंति । केई जणा कट्ठाई आहरंति, केयण सरियाजलाई, केइ दुव्वाइभारे, केइ सागफलाई, केई चुल्लिगाओ खणंति, केवि तंडुले खंडेइरे, केई अग्गि जालेइ, केई ओयणं पएइ, केवि तत्थ नियघरंमिच्च निम्मलजलेहिं एगत्थ सिणाइरे, सिणाया केवि अप्पाणं सुगंधिधूवेहिं धूवेज्जा, पुरओ भुंजमाणपत्तिणो केवि ‘सइरं भुंजंति, केयण इत्थीहिं सह विलेवणेहिं अंगं विलिंपंति, कीलामेत्तेण लहणिज्जसव्वट्ठे चक्कवट्ठिस्स सिबिरंमि कोवि अप्पाणं मणयं पि कंडगायायं न मण्णंते ।

दिसिजत्ताए मागहतित्थाहिगारो—

तंमि अहोरत्ते वड्ढकंते पभायकाले पुणो वि चक्करयणं चक्कवट्ठी वि एगं जोयणं गच्छेइ, एवं दिणे दिणे जोयणपमाणप्पयाणेण गच्छंतो चक्काणुओ चक्की मागहं तित्थं समासाएइ । पुव्वसमुदतडंमि भरहनरिंदो नवजोयणवित्थरं दुवालसजोयणायामं खंधावारं निवेसेइ, तत्थ वड्ढइरयणं सव्वसइण्णाणं आवासे विहेइ, तह य धम्मिक्कहत्थिणो सालमिव एगं पोसहसालं निम्मवेइ । राया पोसहसालाए अणुट्ठाणविहाणट्ठं पव्वयाओ केसरीव गयखंधाओ उत्तरेइ, पोसहसालाए गंतूण तत्थ भरहराया संजम-^२सामज्ज-लच्छी-सीहासणुवमं नवं दब्भसंधारयं संथरेइ, मागहतित्थकुमारदेवं च मणंसि काऊणं सो अत्थसिद्धीए पढमदुवारं अट्ठमं भत्तं पव्वज्जइ, स धवलवत्थधरो चत्तनेवत्थ-मालाविलेवणो चत्तसत्थो पुण्णपोसोसहं पोसहव्वयं गिण्हेइ, तंमि दब्भसंधारए सो पोसहं जागरमाणो अव्वयपए सिद्धो इव निच्चलो नरिंदो चिट्ठइ, अट्ठम-तवंते पुण्णपोसहो नरिंदो पोसहसालाए सरयब्भाओ आइच्चुव्व अहिगज्जुई निज्जाइ, तओ सिणाणं काऊण सव्वत्थसंपायणकुसलो राया जहविहिं बलिविहिं विहेइ, ‘विहिण्णुणो हिं विहिं नहि वीसरंति’ । जंगमं पासायमिव उड्ढपडागाझयथंभं, सत्थागारमिव अणेगसत्थ-सेणि-बिहूसिअं, चउदिसाविजयसिरीणं आहवणत्थं पिव उच्चएहिं टण-क्कारकरचारुचउवंटाओ धरंतं, पव्वणेहिं पिव वेगवंतेहिं, पंचाणणेहिं पिव धीरेहिं तुरंगमेहिं संजुत्तं रहं रहिपुंगवो भरहनरिंदो उवविसेइ । इंदस्स मायलिसारहिच्च रण्णो भावविसेसण्णू सारही रस्सि-चालणमेत्तेण तुरंगमे नोएइ । महागयगिरि-संघो महा-

१ पटकुटी-तंडु, रावटी. २ स्मरन्ति । ३ कर्कन्धु-बदरी । ४ सिकतामय-वाळुकामयः । ५ स्वैरम् । ६ कटकायात-सैन्यागतम् । ७ ‘साम्राज्यलक्ष्मी’ । ८ रश्मि-रज्जुः ।

सयड-^१मगरुक्केरो चवल-^२हय-^३कल्लोलो विविह सत्याऽहि-भीसणो उच्छलंतभूमिरय-
वेलो रहनिग्घोसगज्जिओ भरहनरिंदो बीओ समुहो इव समुदं पइ गच्छेइ । तओ
तसियमगरसमूहाऽऽरावेहिं संवडिदयजलनिग्घोसो सो रहेण समुहरस नाहिपमाणं जलं
अवगाहेइ । तओ एगं हत्थं धणुहमज्झमि बीअं तु ^४जीआरोवणट्ठाणमि ठविऊण सो
पंचमीमयंकविडंबगं धणुं ^५जीआरुढं विहेइ । भरहेसरो हत्थेण धणुहजीअं किंचि आय-
डिदऊण ^६धणुव्वेओकारमिव उच्चएणं टंकारं कारवेइ, तओ निवो पायालहारनिग्ग-
च्छंतनागरायाणुहारगं निधनामंकिर्यं बाणं तूणीराओ आकड्ढेइ, सिंहंगुलिसरिसमुट्ठीए
पुंखग्गभागमि धरिऊण अरीणं वडरदंडमिव बाणं ^७सिजिणीए निहेइ, सोवण्णकण्णाभूसणस्स
पउमनालसोहाधरं तं सोवण्णं सरं कण्णंतं जाव सो आकड्ढेइ, महीभत्तुणो पसरंतनह-
रणमरीईहिं सोयरेहिं पिव वेढिओ स सायगो सोहेइ, आकडिदयधणुमज्झत्थिओ
दिप्पमाणो स सरो पसारिय-जमाऽऽणचलंतजीहा-लीलं धरेइ, धणुहमंडलमज्झत्थो
सो मज्झमो पुढवीवई मंडलळमंतरवट्टिसूख्व दारुणो विराएइ, तथा ^८मं थाणाओ
चालिस्सइ, अहंवा मं निग्गहिस्सइ^९ ति चिंताउरो इव लवणंबुही खुहिओ संजाओ । अह
नरवरिंदो नागकुमाराऽऽसुरकुमार-सुवण्णकुमाराइदेवेहिं बाहिं मज्झे सुहे पुंखंमि य
सव्वया अहिद्वियं सिक्खादाणभयंकरं आणागरं दूयं पिव महावाणं मागहतिथेसं अहि
विसज्जेइ, उद्दामपक्ख-सुक्कार-रव-वायालिय-नहंगणो सो सरो गरुलव्व तक्खणं
निज्जाइ, तथा नरिंदकोदंडाओ निग्गच्छंतो सो सायगो जलहराओ विज्जुदंडो इव
गयणाओ ^{१०}उक्कमी व वन्धिणो ^{११}फुलिंगो मिव तावसाओ तेउलेसेव धूरकंतमणित्तो अग्गीव
सकहत्थाओ वडरं पिव सोहेइ । सो सायगो खणेण दुवालसजोयणाइं अइक्कमित्ता
मागहवइणो सहाइ द्वियए सल्लं व पडेइ । तथा अकम्हा तेण कंडपडणेण मागहति-
त्थराओ दंडाभिघाएण पन्नगो इव भिसं कुप्पइ । दारुणं कोदण्डं पिव ^{१२}भमुहाणं
जुगं वंक्कं कुणंतो, पलीत्तवण्हिकणे इव तंवाइं लोयणाइं धरंतो, ^{१३}भत्थापुडाइं इव
नासिगापुडाइं ^{१४}उप्फुल्लाइं कुणंतो, तक्खमसप्परायस्स अणुजायं इव अहरदलं ^{१५}फोरंतो,
नहयलंमि ^{१६}केउणो व्व णिडालंमि लेहाओ घडेंतो सो मागहतिथवई गारुलिओ
सप्पमिव दाहिणहत्थेण सरं गिण्हमाणो वामहत्थेण सत्तुकवोलव्व आसणं तालित्तो विस-
जालासरिसिं वायं वएइ । अरे अपत्थिय-पत्थओ वीरमाणी अविचारिय-कज्जकारी
हुदुबुद्धी को अम्हाणं एइए सहाए सरं पक्खिवित्था ? , एरावणदंतो छिंदिऊण ^{१७}ताडंके

१ मकरोत्तरः । २ ज्यारोपणस्थाने । ३ ज्यारुढम् । ४ धनुर्वेद-ओकारमिव । ५ शिजिन्या-धनुर्गुणे ।
६ ओलाकारम् । ७ उलकाग्रीव । ८ स्फुलिज्ज इव । ९ भ्रुवोर्युग्मं वक्कम् । १० भस्त्रापुटे । ११ उम्फुल्ले-विकसिते ।
१२ स्फोरयन् । १३ केतुमिव । १४ ताडङ्कान्-कर्णभूषणविशेषान् ।

काउं को इच्छेज्जा ?, गरुलस्स पक्खेहिं सिरिभूसणं विहेउं को इच्छइ ?, नागरायस्स सिरमणिमालं वेत्तुं को चित्तेइ ?, भाणुणो तुरंगमे हरिउं को वा वियारेइ ?, पक्खि-
राओ सप्पस्स गच्चं मित्र तस्स दप्पं अहं हरिस्सं एवं बवंतो मागहाहिवो वेगेण उट्ठेइ,
बिलाओ उरगं पिव सो कोसाओ खग्गदंडं करिसेइ, करिसिज्जण गयणंमि धूमकेउब्भम-
प्पयं तं कंपावेइ । तक्खणंमि सागरवेलेव दुव्वारो अस्स सयलोऽवि परिवारो जुगवं
सकोवाडंवरं उट्ठेइ । तथा केई खग्गेहिं आगासं किण्ह—विज्जुमइयमिव कुणेइरे, केवि
य निम्मल—‘वसुनंदएहिं अणेगमयंकमइयं गयणं कुणंति, केई अंतलिकंमि कयंतदंत-
सेणीहिं निम्मिए इव अच्चंतनिसिए कुंते उल्लालंति, केई वन्हिजीहासरिसपरसुणो
भभाडंति, केवि राहुसरिसभयंकरपज्जंतभामे मोगारे गिण्हेइरे, अण्णे वइर—कोडि-
पयंडसुलसत्थाइं करंमि धरंति, अवरे जम—दंड—चंडे दंडे उक्खिवंते, केवि वेरि-
विप्फोडण—कारणं करप्फोडणं कुणेइरे, केइ उज्जियं मेहनायं व सीहनायं विहेइरे,
केवि हण हणत्ति, केइ गिण्ह गिण्ह त्ति, केइ य चिट्ठसु चिट्ठसु, केयण जाहि जाहि
त्ति बवंति । इअ जाव तस्स परिवारो चित्त—सरंभचेट्ठो होत्था ताव अमच्चो तं
बाणं सम्मं निरिक्खेइ, सो तत्थ सरंमि दिव्वमंतक्खराणी व महासाराइं उदाराइं
अक्खराइं अवलोएइ, जहा—

रज्जेण जइ ‘भे कज्जं, जीवियव्वेण वा जइ ।

कुणेह णो तओ सेवं, नियसव्वरस दाणओ ॥

इअ सुरासुरनरिंदिसमच्चिय—सिरिउसहसामिणो नंदणो अयं भरहचक्कवट्ठी
तुम्हाणं पच्चक्खं समादिसेइ । एवं मंती अक्खराइं ददट्ठण ओहिणाणेण य तं नच्चा
सामिणो बाणं दंसितो उच्चएणं एवं ववेइ—भो भो सव्वे रायलोगा ! अवियारियकज्ज-
कारीणं अंत्यबुद्धीए य सामिणो अणत्थदाईणं भत्तमाणीणं तुम्हाणं धिरत्थु, इह भरह-
खेत्तंमि पढमतिथयरुसहसामिणो हि इमो भरहो पढमचक्कवट्ठी अत्थि, स एसो दंडं
मग्गेइ, इंदुव्व चंडसासणो य सो तुम्हाणं नियं सासणं धराविउं इच्छइ, कयाई समुदो
सोसिज्जेज्जा, मेरुगिरी वि उद्धरिज्जेज्जा, कयंतो वि निहणिज्जेज्जा, दंभोली वि दली-
एज्जा, वउवानलो वि विज्झाविज्जेज्जा तह वि कहंचण महीयलंमि चक्कवट्ठी न जिणि-
ज्जइ । तओ विउसवर ! देव ! मंदबुद्धी इमो लोगो वारिज्जउ, दंडो पउणीकीरउ, चक्क-

१ उत्तमखड्गविशेषः । २ उन्नमयन्ति । ३ कोटिः—अग्रभागः । ४ चित्रसंरम्भचेष्टः । ५ युष्माकम् ।
६ नः—अस्माकम् । ७ अर्थबुद्ध्या—हितबुद्ध्या ।

वट्टिस्स य पणमिरो भवाहि । तथा सो मागहाहिवो तं मंतिणो वायं सोच्चा ताणि य अक्खराइं दट्ठूण गंधहत्थिणो गंध अग्घाइऊण अण्णकरी इव उवसमेइ । तओ सो उवहारं तं च सरं गिण्हिऊण भरहनरिंदं उवेच्च पणमिता य एवं विण्णवेइ—हे सामि ! कुमुय-वणस्स पेव्वससंकुव्व राय ! मज्झ अहुणा दइव्वजोगेणं दिट्ठिपहंमि पाविओ सि, जह पढमतित्थयरो भयवंतो उसहसामी विजयइ, तह तुमंपि पढमो चक्कवट्टी विजयसु । एरा-वणसरिसो अण्णो को वि हत्थी नत्थि, चाउसरिच्छो अण्णो को बली नत्थि, आगासाओ परं पइमाणं न सिया तह तुम्हाणं सरिक्खो जगंमि अण्णो को वि पइ-मल्लो न । आकण्णाऽऽयड्ढियकोदंडाओ निग्गयं तुम्ह सायगं सकस्स वज्जमिव सहिउं को समत्थो ?, पमत्तस्स मज्झोवरिं पसायं कुणंतेण तुमए कायव्वविण्णवणट्ठं वेत्तिअ-पुरिसो व्व एसो सरो पेसिओ, हे नाह ! महीनाहसिरोमणि ! अओ परं अहं तुम्हाणं आणं सिरंमि सिरोमणिं मिव धारिस्सं, सामि ! इमंसि मागहतित्थंमि तुमए ठविओ तुम्हाण पुव्वदिसाए विजयत्थंभो इव निदंभभत्तिभरो अहं ठास्सामि, एए अम्हे इमं च रज्जं एसो सव्वो परिच्छओ अण्णं पि जं तं तुम्हेच्चयं चेव, नियपाइक्कव्व अम्हे पसासाहि इअ वोत्तूणं सो देवो चक्कवट्टिणो तं सरं तं च मागहतित्थजलं किरीडं कुंडले वि अप्पेइ । भरहनरिंदो तं च पडिच्छेइ, मागहाहिवइं च सकारेइ, महंतपुरिसा हि सेवोवणयवच्छला हुंति' । अह पत्थिवो रहं वालिऊण तेणच्चिय पहेण नियखंधावारं इंदो अमरावइमिव आगच्छेइ । रहाओ अवरोहिऊण अंगं च प-क्खालिऊण सपरिवारो भरहनरिंदो अट्टमभत्तस्स पारणं कुणेइ, तओ वसुहाधवो चक्कस्सेव उवणयस्स मागहणाहस्स महिड्ढीए अट्ठाहियामहूसवं विहेइ । अट्ठाहिया-महंमि समत्ते आइच्चरहनिग्गयमिव तेएहि उव्वणं चक्करयणं गयणंमि चलेइ ।

दिसिजत्ताए वरदामतित्थाहिगारो—

तओ चक्कं दाहिणदिसाए वरदामतित्थं पइ वच्चेइ, चक्कवट्टी य पाइ—उवसग्गा धाउगणं पिव तं चक्कं अणुगच्छेइ । राया पइदिणं जोयणमेत्तपयाणेहि गच्छंतो माणसं रायहंसुव्व दाहिणंबुनिहिं पावेइ, एला—लवंग—लवली—कक्कोल—बहले दाहिण-सागरतंडमि सेण्णाइं आवासेइ, तत्थ वड्ढमी पुव्वमिव चक्कवट्टिस्स सासणाओ सयल-सेण्णस्स आवासे पोसहसालं च राएइ । भरहनरिंदो वरदामदेवं चित्तंमि काऊण अट्टमतवं कुणेइ, पोसहागारंमि पोसहव्वयं च गिण्हेइ, पुण्णंमि पोसहंमि नरिंदो पोस-

हसालाओ बाहिरं निगंतूण धणुहधराणं वरो सो कालपुटं धणुं उवादेइ, सव्वओ सुवण्ण-
 रइयं रयणकोडीहिं खइयं जयसिरीए वासागारं रहं सो आरोहेइ, देवेण पासाओ
 इव स महारहो 'उरालामारधारिणा नरदेवेण अईव सोहेइ, अणुकूलपवणलोलपडा-
 गामंडियंऽवरो सो संदणवरो अंभोनिहिंमि जाणपत्तमिव पविसेइ । तत्थ रंहंगनाहि
 प्पमाणं जलनिहिणो जलं गंतूण रहगत्थिअ-सारहिखलियहएहिं रहो चिट्ठइ । तओ
 सो आइरियो सीसमिव पुढवीवई धणुहं आणमिऊण गुणारूढं विहेइ, संगाम-नाड-
 थारंभनदिनिग्घोससमं कालस्स य आहवणमंतमिव 'जीयाटंकारं सो कुणेइ, सैरहिणो
 भालंतरालरइयतिलगसिरिसोहाहरं बाणं आकरिसित्ता निवो सरासणंमि निहेइ, वंकी-
 कयधणुहस्स मज्झंमि धुरा-भमगरं सरं महीनाहो कणपज्जंतं उवाणेइ, कणंतसमा-
 गयं 'हं किं कुणेमि' त्ति विण्णत्तितल्लिच्छं तं बाणं राया वरदामाहिवइं पइ विसज्जेइ ।
 सेल्लेहिं पडंतवइरभमेण, पण्णगेहिं गरुलभमेण, समुदेण अवरवडवग्गिभमेण य सभयं
 पेक्खिओ सो सायगो गयणं पयासितो दुवालसजोयणं गंतूण वरदामपइणो परिसाए
 'उक्केव सो पडिओ । तया सो वरदामवई 'विहेसि-पेसियघायकारगनरमिव पुरओ
 पडियं तं बाणं पेक्खिऊण कुप्पइ, उच्छलंतसागरुव 'उब्भमिय-भमुह-तरंगिओ वरदा-
 मेसो उद्दामं वायं वएइ-केण अज्ज सुत्तो सिंघो पाएण फासिऊण पवोहिओ !, मच्चुणा
 अज्ज कास पत्तं वाइउं उक्खेविअं !, अहवा कुट्ठिअ जीवियव्वाओ उप्पण्णवेरगो को रहसा
 मम परिसाए सरं पेक्खिवित्था ? तं अणेणच्चिय बाणेण हणेमि त्ति वरदामराओ उट्ठाए
 सकोवं हत्थेण तं बाणं गिण्हेइ, तओ मागहाहीसरो इव सो वरदामेसरो चक्किस्स सरंमि
 ताइं अक्खराइं पेक्खेइ, अही नागदमणिमिव ताइं अक्खराइं पेक्खिऊण वरदामपई वि
 सज्जो उव्वसमेइ, इइ य ववेइ-किण्हसप्पस्स चेविलं दाउं उज्जओ मंडूगो पिव, दंतिणो
 सिंगेहिं पहरिउं इच्छंतो उरब्भो इव, दंतेहिं गिरिं पाडिउं इच्छमाणो हत्थिअ मंदबुद्धी
 अहं भरहेण चक्कवट्ठिणा सद्धिं जुज्झिउं इच्छामि, होउ, अज्जावि नो किंचि विणट्ठं ति
 सो बवंतो दिव्वाइं पाहुडाइं उवाणेउं निए नरे समादिसेइ ।

तओ तं सरं अब्भुयाइं च पाहुडाइं गिण्हिऊण सो ईदो सिरिसहज्झयं व भरह-
 नरिंदं अभिगच्छेइ, सो नमिऊण तं एव वएइ-हे पुढवीवइ! तुम्ह दूएणेव सरेण समाहओ
 इ इह समागच्छित्था, इहागयं तुमं भूमीस ! जओ सयं न समागओ, तओ अन्नाणिणो

१ खचित्तं-व्यासम् । २ उदाराकारधारिणो । ३ रथाङ्गम्-चक्रम् । ४ ज्या° । ५ शरथेः-तूणीरस्य ।
 ६ उक्केव । ७ विद्वेषि-शत्रुः । ८ उद्भ्रान्तभ्रुतरङ्गितः । ९ वपेटाम् ।

मज्झ दोसं सहसु, 'जं अण्णाणया दोसं निन्हवेइ', परिस्संतेण आसमो इव, तिसाउरेण पुण्णसरोवरं व हे सामि ! सामिरहिण्ण मए संपइ तुमं सामी पत्तो असि, हे भूनाह ! अज्ज पभिइं तुमए ठविओ अहं इह उदहिणो गिरिव्व भवंतस्स मज्जायाधरो चिट्ठि-सामित्ति वोत्तूण भत्तिभरनिम्भरो इमो भरहनरिंदस्स अग्गओ 'नासीकयमिव तंवाणं सम्पेइ, तह य भाणुपहाहिं मुंफियमिव पहा-पहासियदिसामुहं रयणमइअकडीसुत्तं सो भरहरायस्स देइ तह य भरहनरिंदस्स पुरओ चिरसंचियनियजसरासिमिव उज्जल-मुत्तारासिं' इक्केइ, तइ महीवइणो निम्मलुज्जयजुइं रयणागरस्स सब्बस्समिव रयणुकरं च उवदेइ । राया तं सब्बं गिण्हेइ, वरदाममइं च अणुगिण्हिऊण तं नियं कित्तिकारणं विव तत्थच्चिय ठवेइ, तओ वरदामपइं सपसायं आभासिऊण विसज्जित्ता य विजयवंतो पुढवीनाहो नियं सिविरं समागच्छेइ, रहाओ अवरोहिऊण सिणाणं च किच्चा सो रायमयंको अट्टमभत्तस्स अंते परिजणेहिं समं पारणं कुणेइ, तओ सो वरदामप-इस्स अट्ठादियामहस्सवं विहेइ, 'महंता हि लोणंमि महत्तणदाणट्ठं अप्पकरं जणं समाणिंति' ।

तओ परक्कमेण अण्णो इंदुव्व चक्कवट्ठी चक्काणुसारी पच्छिमदिसाए पहा-सामिमुहं चलेइ, 'नीरंधेहिं' सइण्णरेणुहिं सग्ग-पुढवीओ पूरितो कइपयपयाणेहिं सो पच्छिमसमुहं पावेइ, पूगी-तंबूली-नालीपरीवणाउलंमि उदहिणो पच्छिमतडंमि खंधावारं विणिहेइ, तत्थ राया पहासनाहं उदिसिय अट्टमभत्तं विहेइ, पुव्वं व पोसहागारंमि पोसहं गिण्हेइ, पोसहवयपुण्णंमि मेइणीवई रहं समारुहिऊण अवरो वरुणदेवुव्व जल-निहिं पविसेइ, चक्कनाहिपमाणं जलं अइक्कमिऊण संदणं ठविऊण धणुहं जीआरुहं विहेइ, जयसिरिकीलावीणासरिसधणुहस्स तंतिमिव 'सिंजिणिं' हत्थेण उच्चएहिं वाएइ, नीरनिहिणो वेत्तदंडं व बाणपत्ताओ सरं कइडेइ, आसणे अतिहिमिव तं नरिंदो वाणा-सणंमि निवेसेइ तओ नरवई आइच्चविवाओ 'आगिट्ठं' एगं किरणमिव तं 'सिलीमुहं पहासाहिमुहं' खिवेइ, किरणेहिं गयणं पयासितो स सरो वाउव्व वेगेण समुदस्स दुवालसजोयणं उलंघिऊण पहासेसस्स सहाए पडेइ । सरं पेक्खिऊण सोवि कुड्ढो, तत्थ य अक्खराई देक्खिऊण पयडीकय-रसंतरो नडुव्व सज्जो सो उवसमेइ, तं सायगं अण्णंपि उवाहारं च सयं घेत्तूण सो पहासवई भरहनरिंदं उवगच्छेइ, नमिऊण य एवं विण्णवेइ-अज्ज देव ! तुमए सामिणा भासिओ हं पहासो अम्हि, 'रविणो

१-न्यासीकृतमिव । २ ढौकते । ३ नीरन्ध्रेः-निश्छिद्रैः । ४ शिञ्जिनीम्-धनुर्जीवाम् । ५ बाणयात्रा-तन्त्रारथः । ६ आकृष्टम् । ७ शिलीमुखम्=बाणम् ।

करेहिं हि कमलाइं पहासियाइं हुंति' । पहु ! अहं पच्छिमदिसाए तुम्ह सामं तराया
 इव ठाइस्सामि, अवणिसासण ! सव्वया य तुह सासणं मत्थएण धरिस्सामित्ति वोतूण
 भरहनरिंदस्स पढमं पेसिअं तं सरं पाइक्को इव पहा सव्वई अप्पेइ, तओ मुत्तस-
 रूवनियतेयं व कडगाइं कडीसुत्तं चूडामणिं उरोमणिं दीणाराइं च रण्णो अप्पेइ,
 पुढवीवई तस्स आसासणकए तं सव्वं गिण्हेइ, 'पढमं पाहुडगहणं तं हि पहुणो पसाय-
 चिन्हं—', आलजालंमि पायवमिव तत्थच्चिय तं ठविउआण वेरिनिवारणो भरहनरिंदो
 पुणो खंधावारं समागच्छेइ, तइआ सो तत्कालं कण्णरुक्खेणेव गिहिरयणेण उवणी-
 यदिव्वभोयणेहिं अट्टमतवपारणं विहेइ । तओ नरिंदो पहासदेवस्स अट्ठाहियामहूसवं
 कुणेइ, पुव्वं हि सामंतमेत्तस्सावि पडिवत्तीओ उइयाओ । तओ भूवई पयासो अणु-
 दीवमिव अणुचक्कं गच्छंतो समुदस्स दाहिणदिसाए सिंधुमहानईए तडं पावेइ,
 तेणच्चिय 'नईरोहमग्गेण पुव्वाभिमुहं गंतूण पुढवीसो सिंधुदेवीसयणसमीवंमि खंधावारं
 निवेसेइ । सो सिंधुदेविं मणंसि काऊणं अट्टमं तवं विहेइ, तओ वायाहयतरंगुव्व
 सिंधुदेवीए आसणं चलेइ, तओ सा ओहिनाणेण समागयं चक्कवट्ठिं जाणिऊण
 दिव्वेहिं पभूएहिं पाहुडेहिं तं अच्चिउं उवागच्छेइ, तओ गयणत्थिआ सा जय
 जयत्ति आसीसापुव्वयं वएइ—तुम्हाणं किंकरी होऊण इह अहं चिट्ठामि, आदिससु,
 किं तुव कुणेमु ? त्ति वोत्तूण सा सिरिदेवीए सव्वस्समिव निहीणं संतइमिव अट्टत्तरं
 रयणभरियकुंभसहस्सं, तह कित्ति—जयसिरीणं सह उव्वहिउं जोम्माइं दुण्णि रयण-
 भद्दासणाइं च, नागरायसिरोरयणाइं उद्धरिऊण विणिम्मिए दिप्पंतरयणमइए बाहुरक्ख-
 ने य, मज्झभागंमि उक्किण्ण—सूरविंवसोहे कडगे, मउयमुट्ठिगेज्झाई दिव्ववसणाइं च
 नरिंदस्स देइ । सिंधुराओ इव स नरिंदो सिंधुदेवीए तं सव्वं पडिगिण्णिऊण तं च
 पसायालावेण पमोइत्ता विसज्जेइ । अह सो भूवईणं वरो अहिणव—पुण्णिमा—चंद-
 सोयर—सुवण्णभायणे अट्टमभत्तस्स पारणं करेइ । तओ सो नरदेवो सिंधुदेवीए
 अट्ठाहिआमहं विहेऊण अग्गागामिणेव चक्केण दंसिज्जमाण पढो पुरओ चलेइ । भर-
 हेसरो उत्तरपुरच्छिमदिसाए कमेण वच्चंतो भरहखेतड्ढदुगसीमाधरं वेयड्ढपव्वयं
 पावेइ, तस्स य दक्खिणिल्लनियंबभागे वित्थारायामसोहियं निवसणमिव खंधावार
 निवेसेइ । तत्थ य पुढवीवई अट्टमभत्तं कुणेइ, तेण य वेयड्ढगिरिकुमारस्स आसणं परि-
 कंप्पेइ, सो वेयड्ढदिकुमारो ओहिनाणेण 'भरहखित्तंमि अयं पढमो चक्कवट्ठी समु-
 वण्णो त्ति जाणेइ । अह सो तत्थ समागंतूण आगासथिओ समाणो इमं ववेइ—'पहु !

जयसु जयसु एसो अहं तुव सेवगो अम्हि, मं पसाससु' ति वोत्तुणं सो कोसाहिवो व्व महग्घाईं रयणाईं रयणालंकरणाईं च देवदूसाईं च तह पयावसंपयाए कीलागेहसरिसाईं बहुआईं भदाईं भदासणाईं अप्पेइ । महीवई तस्स तं च सव्वं पडिगिण्हेइ, 'भिच्चाणु-ग्गह्हेउणा अलुद्धा वि सामिणो उवहारं गिण्हेइरे' । अह निवो तं संभासिऊण सेगा-रवं विसज्जेइ, 'महंता हि समस्सियं साहारणजणं पि नावमण्णेइरे', तओ पुढवीवई अट्ठ-मभत्तस्स पारणं तह य वेयड्ढगिरिदेवस्स अट्ठाहियामहूसवं कुणेइ । तओ चक्करयणं तमिस्सगुहं उदिसिऊण चलेइ, राया वि पयण्णेसंगस्सेव तस्स पिट्ठओ गच्छेइ, कमेण तमिस्सगुहासमीवे गंतूण नरिंदो गिरिणो हिट्ठंमि ओइण्णाईं विज्जाहरपुराणीव सेण्णाईं आवासेइ ।

कथमालदेवाहिगारो —

अह भूवालो कथमालदेवं मणंसि काऊणं अट्ठमं तवं समायरेइ, तस्स य देव-स्स आसणं चलेइ, सो अवहिनाणाओ समागयं चक्कवट्ठिं नच्चा चिरेणागयं गुरुमिव तं च अतिहिं अच्चिउं आगच्छेइ, 'हे सामि ! एयंमि तमिस्सादुवारंमि तुम्ह दुवारपालुव्व अहं अम्हि' ति बवंतो महीभत्तुस्स स सेवं पडिवज्जित्ता इत्थोरयणोइयं अणुत्तमं तिलग-चउदसं दिव्वाभरणसंभारं सो वियरेइ, तह य पुव्वं तयट्ठमिव धारियाईं तस्स जोग्गाईं मल्लाईं, दिव्वाईं च वसणाईं आयरेण देइ । राया तं सव्वं गिण्हेइ, 'कयत्था वि नरिंदा दिसिविजयसिरीए चिन्हरूवदिसादंडं न चयंति', अइमहंतेण पसाएण भरहनिवो तं संभासिय अज्झयणपज्जंते उवज्झाओ सीसमिव विसज्जेइ । 'पिहव्वभूएहिं नियंसेहिं इव भूमिठवियभायणेहिं भुंजमाणेहिं रायकुंजरेहिं समं सो पारणं कुणेइ, तओ सो कथमाल-देवस्स अट्ठाहियामहोच्छवं कुणेइ, 'पणिवाएण गहिया पहवो किं न कुणंति' ।

सिंधुनईए परतडत्थिअमिलिच्छाणं विजओ ।

अणया इलावई सुसेणनामं सेणावइं आहविऊण हरिणेगमेसिदेवं इंदोव्व आदि-सेइ, तुमं चम्मरयणेण सिंधुनइं उत्तरिऊण सिंधु-सागर-वेयड्ढसीमाधरं दाहिणिल्ल-सिंधु निक्खुडं साहेसु, तत्थ मिलिच्छे 'बोरीवणव्व आयुहलट्ठीहिं तालिऊणं चित्तचम्म-रयणस्स सर्वस्सफलं आहरेहि । तओ स सेणाहिवई तत्थुप्पन्नो इव जलत्थलजायनि-

१ सगौरवम्=सादरम् । २ पदान्वेषकस्येव । ३ पृथग्भूतेर्निजाशैरिव । ४ निष्कुटम्-पर्वतविशेषम् ।

५ बदरीवनवत् । ६ सर्वस्वफलम् ।

म्मुण्णयभागाणं अण्णेसिं च दुग्ग-थलाणं 'मग्गविऊ, परक्कमेण सिंहो, तेएण सूर्रो,
 धिसणागुणेहिं विहप्पई, संपुण्णलक्खणो सव्वमिलेच्छमासाविसारओ सामिणो सासणं
 पसायमिव सिरसा अंगीकरेइ । भरहनरक्कं पणमित्ता नियावासे गंतूणं अप्पणो पडि-
 विवरूवे इव सामंताइणो पयाणट्ठं निदिसेइ । अह सो सिणाणं काऊण कयवलिकम्मो
 महामुल्ल-थेवभूसणो संवम्मिओ कयपायच्छित्त-कोउय-मंगलो, जयसिरीए आलिं-
 णाय पक्खित्तवाहुल्यं व दिव्व-रयण-गेवेउजयं कंठे धरितो, पट्टहत्थिच्च चिन्हपट्टेण
 सोढमाणो, उच्चएहिं गहियसत्थो, कडीभागे मुत्तसरूवसत्तिमिव छुरियं धरंतो, जुद्धं
 काउं पिट्ठओ विउव्विए बाहुदंढे इव अतुच्छ-सरलागिइ-सुवण्णमइए दुण्णि सर-
 हिणो धरंतो, गणनायग-दंडनायग-सेट्ठि-सत्थवाह-संधियाल-चरप्पमुद्देहिं जुवराओ
 इव परिवरिओ सो सेणावई निच्चलऽग्गासणो तेण आसणेण सहप्पणो इव नंगु-
 णयं गयरयणं आरोहेइ । सेयच्छत्तचामरेहिं सोहिरो असरोवमो सो चरणगुट्टसणाए
 वारणं पेरेइ, भरहनरिदस्स अइहसेणेण सह सिंधुनईतडंमि गंतूण उड्ढय-धूलीए
 सेउबंधमिव कुणंतो सो तत्थ चिट्ठइ । जं फासियं समाणं दुवालस जोयणाइं वइहइ,
 जत्थ य पभायसमयंमि उताइं धणाइं दिणच्चए निष्फज्जंति, जं च नई-द्रह-समुद्द-
 जलेसुं तारणक्खमं, तं चम्मरयणं सेणावई हत्थेण संफासेइ । तं चम्मरयणं सळिलो-
 वरिं पक्खित्तं तेल्लमिव नेसग्गियपहावेण तीरदुगं पमरेइ । तओ सो चमूनादो तेण
 चम्मरयणेण सेणाए सह मग्गेणेव उत्तरिऊण नईए परं तीरं पावेइ, सिंधुनईए तं
 सव्वं दाहिणनिक्खुडं साहिउं इच्छमाणो सो सेणावई तत्थ कप्पंतकालसमुद्दो व्व पस-
 रेइ, तओ धणुनिग्घोसबुंकार-दारुणो रणसुगो सिंघो व्व स लीलामेत्तेण च्चिय सिंह-
 लज्जे पराजिणेइ, बव्वरलोगे मुल्लगहिए किंकरे इव वसीकुणेइ, टंक्कणनरे तुरंगमे
 इव रायचिन्हेण अंकेइ, जलरहियरयणागरमिव रयणमाणिकभरियं जवणदीवं स नर-
 सिंहो लीलाए जएइ । तेण कालमुद्दा मिलेच्छा तहा जिणिज्जंति, जहा अंभुजमाणा
 अवि ते मुहंमि पंचगुलीदलाइं पक्खिवंति । तस्स पसरंतस्स समाणस्स जोणगनामा
 मिलेच्छा पयणाओ पायवपल्लवा इव परंमुहा हुंति । अवराओ अवि वेयइहगिरिसमा-
 सण्णसंठिआओ मिलेच्छजाईओ सो गारुलिओ अहीणं जाईओ इव जिणेइ । पोढपयावप-
 सरो अणिवारियं पसरंतो सो सेणाणी सूर्रो आगातमिव सव्वं कच्छदेसभूमिं अक्कमेइ, एवं
 सीहो वणमिव सव्वं निक्खुडं अक्कमित्ता कच्छदेसमग्गभूमीए सो सेणावई सत्थो होऊण
 चिट्ठइ । तत्थ मिलेच्छभूवइणो विचित्तोवायणेहिं सद्धिं भत्तीए इत्थीओ पियमिव सेणा-

वई समावडंति, केई सुवण्णगिरिसिहरसरिसे रयणसुवण्णकरे, केवि य चलियविज्ञ-
पव्वयसरिच्छे गए दिंति, केई अइक्कंतभाणुतुरंगमे तुरंगमे, केई अंजणनिप्पणे देव-
रहुवमे रहे, अण्णं पि जं तत्थ सारभूयं तं सव्वं तस्स वियरंति, 'गिरित्तो वि सरियाए
आकड्हियं रयणं रयणागरंमि गच्छेज्जा' । तओ ते सव्वे सेणावई वयंति — अम्हे
अओ परं त्थम्ह नियोगिणो इव निदेसगरा नियनियविसएसुं ठाडरसामो चि । तओ
सो सेणावई जहरिहं ते सव्वे राइणो सक्कारिऊणं विसज्जेइ, पुव्वं व सिद्धुनई सुहेण
उत्तरिऊणं कित्तिवल्लीणं दोहलमिव मिलेच्छेहिंतो ओहडं सव्वं तं दंडं दंडनायगो
चक्कवट्टिस्स पुरओ डुक्केइ । अह चक्केवट्टिणा पसाएणं सो चमूवई सक्कारिओ विस-
ज्जिओ य समाणो पहिट्ठो नियावासं समागच्छेइ । भरहनरिंदो अउज्झाए व्व तत्थ
चिट्ठेइ, 'सिंहो हि जत्थ वि पयाइ तस्स तं चिय नियं ठाणं' ।

तमिस्सगुहाए दुवारुग्घाडणं—

एगया भूवई चमूवई बोलाविऊण आदिसेइ—'तमिस्सगुहाए कवाडदुगं उग्घा-
डेसु' एयं सोच्चा सेणावई नरवइणो आणं मालमिव मत्थएणं वेत्तूणं तमिस्सागुहाए अवि
दूरं गंतूणं चिट्ठेइ । अह तत्थ कयमालदेवं मणंसि किच्चा सो सेणावई अट्टमतवं कुणेइ,
'सव्वाओ हि सिद्धिओ तवमूलाओ हुंति' । अट्टमतवंमि पुण्णे सो सेणावई सिणाणं काऊणं
सेयवसणपक्खवरो सिणाणवराओ सरोवराओ रायहंसुव्व निज्जाइ, तओ लीलासुवण्णार-
विंदव्व सुवण्णनिम्मियं धूवदहणं पाणिणा वेत्तूणं तमिस्सगुहादुवारं समासादेइ, तत्थ कवा-
डदुगं अवलोइऊण सो पणमेइ, 'सत्तिमंता वि महंतपुरिसा पढमं सामनीइं पउंजंति' । तत्थ
सो वेयइड-संचरंत-विज्जाहर-थी-थंभणोसहं अट्ठाहियामहसवं महिइढीए विहेइ । तओ
सो सेणाणी मंतवाई मंडलमिव अखंडतंदुलेहिं मंगलकारणं अट्टमंगलं आलिहेइ, आलिहि-
ऊण इंदस्स वज्जमिव वइरिक्खिणासणं चक्कवट्टिणो दंडरयणं नियहत्थेण उवादेइ । कवाड-
दुगं पहरिउं इच्छंतो सो सत्तट्ठपयाइं ओसरैइ, 'गयंदो वि हि पहरिस्समाणो मणयं अवसरइ
च्चिय', ओसरिऊणं आओज्जमिव तं कंदरं उच्चएहिं गज्जाविंतो सेणाणी तिव्वुत्तो तेण
दंडेण कवाडदुगं ताडेइ । तथा वेयइडगिरिणो वाढं निमिल्लियलोयणा इव वज्जनिम्मिया
ते दुण्णि कवाडा उग्घडंति । तओ दंडताडणाओ ते कवाडा उग्घडंता तड-तडत्ति कुणंता
उच्चएण कंदंतीव । सेणानाहो उत्तरभरहखंडाणं जयपत्थाणमंगलरूवं तं कवाडुग्घाडणस-
मायारं चक्कवट्टिणो विण्णवेइ । अह भरहनरिंदो चंदुव्व परूढपोढविवक्को हत्थिरयणं
समारूढो तमिस्सगुहाए आगच्छेइ ।

मणिरयण-कागिणीरयणाणं वण्णणं—

सिहाबंधणेणव्व सिरसंठिएण जेण कयावि हि तिरियनराऽमरुव्भवा उवसग्गा न जायंते, जेण अंधयारं पिव असेसं दुहं पणासेइ, जेण य सत्थयाया विव रोगा न पभवन्ति, तं जक्खसहरसेण अहिद्वियं चउरंगुलपमाणं भक्खरुव्व उज्जोयगं मणिरयणं भरहनरिंदो उवादेइ । हत्थिणो दाहिणे कुंभत्थलंमि पुण्णकलसे सुवण्णपिहाणं व्व तं निहेऊण सत्तुनिस्सअणो चउरंगचमूचक्कजुत्तो चक्काणुसारी केसरीव नरकेसरी गुहादुवारं पविसंतो सो नरिंदो अट्टसुवण्णपमाणं छेदलामारं दुवालसंसियं समयलं माणुम्माणपमाणसंजुयं जक्खसहरसेण सव्वया अहिद्वियं अट्टकणियाजुयं दुवालस-जोयणभूमिपज्जंतंऽधयारविणासकारणं अहिगरणीसंठाणसरिसं सूर-ससि-अनल-सरिसप्पहं चउरंगुलपमाणं कागिणीरयणं गिण्हेइ । तेण कागिणीरयणेण सो गोमुत्तिगा-कमेण दोसुं गुहा-पासेसुं जोणयंते जोयणंते इक्किक्कजोयणुज्जोयकारगाइं मंडलाइं आलिहंतो वच्चइ । ताइं सव्वाइं मंडलाइं तत्थ धणुहपंचसयाऽऽयामाइं एगूणपणासं जायाइं । कल्लाणकारगो चक्कवट्ठी महीयलंमि जाव जीवइ ताव य सा गुहा उग्गाडियाणणा ताइं च मंडलाइं थाइइं चिट्ठंति । चक्करयणाणुसारिचक्कवट्ठिस्स पिट्ठाणुगामिणी सा सेणा मंडलाणं तेण पयासेण अक्खलिया सुहं संचरेइ । तथा चक्कवट्ठिणो संचरंतीहि चमूहिं सा गुहा असुराइवलेहिं रयणप्पहामज्झभागं पिव आभासेइ, मंथणदंढेण मंथंणिआ इव अब्भंतरसंचरंतचमूचक्केण सा गुहा उदामनिग्घोसा जाया, तथा संचाररहिओ वि गुहापहो रहेहिं सीमंतिओ, सज्जो य तुरंगमखुरेहिं खुण्णक्ककरो नयरीपहो इव जाओ । अंतग्गएण तेण सेणालोएण तिरिच्छत्तणमावण्णा सा कंदरा लोगनालीव होत्था ।

उम्मग्ग-निमग्गानईओ ।

अह अणुक्कमेण गच्छमाणो भरहनरिंदो तमिस्सागुहाए मज्झभागंमि हिट्ठवसणोव-रित्थिय-कडीमेहलाओ विव उम्मग्गा-निमग्गानामाओ नईओ पावेइ । दाहिणुत्तरभरहखे-त्तद्धभागाओ आगच्छमाणं नराणं नदीमिसेण वेयइहगिरिणा आणालेहाओ कयाओ इव ताओ नईओ संति । तासु उम्मग्गानईए सिला वि हि तुंबीफलं पिव उम्मज्जेइ तरेइ अ, तह निमग्गानईए सिला इव तुंबीफलंपि उ निमज्जइ । तमिस्सागुहाए पुव्वभित्तीओ विनिग्गयाओ ताओ नईओ पच्छिमभित्तीए मज्जेण गंतूणं सिंधुनईए संगमं पावेइरे ।

१ षड्-दलाकारं-षट्पत्रस्वेव शोभावत् । २ द्वादशाश्रिकं द्वादशकोणकम् । ३ लोहकारोपकरणविशेषः । ४ स्थायीनि(स्थितिमन्ति) । ५ मन्थनकलशः । ६ सीमन्तितः-खण्डितः छिन्नश्च । ७ तिरश्चीनत्वम् ।

तासु नईसु वड्डइरयणं वेयड्डगिरिकुमारस्स एगंतसेज्जमिव अणवज्जं आयामं पेज्जं निवंधेइ, सा पज्जा खणेण होइ, चक्कवट्टिस्स वड्डइणो खलु गेहागारकप्पतरुत्तो हि गेहाइ-निम्मवणे कालक्खेवो न होज्जा । सुसिलिट्ठसंधीहिं बहूहिं पि पाहाणेहिं कया सा पज्जा तावंत-पमाणिक-पासाणघट्टिआ विव विराएइ, पाणिच्च समयला, वज्जमिव दिट्ठयमा सा पज्जा गुहादुवारकवाडेहिं निम्मिया इव लक्खिज्जइ । सेणासहियचक्कवट्टी सुहेण च्चिय दुहतराओ वि ताओ नईओ उत्तरेइ । कमेण मेइणीवई चमूए सह गच्छंतो उत्तरदिसामुहो-वमं गुहाए उत्तरं दुवारं आसादेइ । तीए गुहाए कवाडा दाहिणदुवारकवाडाणं आघाय-निग्गोसं आयणिज्जण भीया विव खणेण समयेव उग्घडेइरे । तथा विघडमाणा ते कवाडा सरसरत्ति सहेण चक्कसेणस्स गमणपेरणं कुणंति इव नज्जंति । गुहाए पासभित्तीहिं सह ते कवाडा तह संसिलिसिय संठिया जह तत्थ अभूयपुच्चा विव कवाडा लक्खिज्जंति ।

गुहाओ बाहिरं निग्गमणं—

अह पढमं अब्भमज्झाओ आइच्चो इव चक्कवट्टिणो पुरोगं चक्कं गुहामज्झाओ निस्सरेइ, तओ पायालविवरेण बलिंदो इव महंतेण तेण गुहादुवारेण महीनाहो निज्जाइ, तओ विज्जगिरिगंभराओ इव तीए गुहाए नीसंकलीलागमणसोहिरा दंतिणो निगच्छंति, अंभोहिमज्झनिग्गच्छंत-सरवाइ-विडंबिणो वाइणो वैग्गुं वग्गंता गुहाओ निज्जंति, सिरिमंतगेहगव्वाओ इव वेयड्डकंदराओ अक्खया संदणा अवि नियनिणाएहिं गयणं नादयंता नीसरंति, फुंडियवम्मीअवयणाओ पन्नगा इव गुहामुहाओ महोयंसिणो पाइक्का वि सज्जो विणिवडंति । एवं भरहनरिंदो वेयड्डगिरिणो पण्णासजोयणायामं तं कंदरं अइक्कमिय उत्तरभरहक्खेत्तं विजेउं पविसेइ । तत्थ आवाया नाम च्चिळैया भूमिथिआ दाणवा विव दुम्मया अइडा महोयंसिणो दित्ता निवसंति । ते अविच्छिण्ण-महापासायसयणासणवाहणा अणप्पमुत्तण्णरयया कुबेरस्स गोत्तिणो विव संति, बहु-जीवणया बहुदासपरिवारा देवुज्जाणदुमा इव पाएण अनायपरिभवा, अणेगजुद्धेसुं निव्वूढबलसत्तिणो ते सइ महासयडभारेसुं वसहवरा इव । तत्थ कयंतुव्व पसज्झ भरहनरिंदमि पसपंतंमि ताणं अणिट्ठसंसिणो भयंगरा उप्पाया संजाया । तथा चलंतभरहसज्जणपेव्वभारभारेहिं पीलिया पकंपियचरोज्जाणा वसुंधरा पकंपेइ, चक्क-

१ पयाम्-मार्गम् । २ गह्वरात् । ३ वाजिनः । ४ वल्लु=सुन्दरम् । ५ विदीर्णवल्मीकमुखान् । ६ महौजस्विनः । ७ किराताः । ८ निर्व्यूढः=पारश्रोतः । ९ प्राग्भारः=प्रकृष्टः ।

वट्टिणो दिगंतगामि-पोदपयावेहिं इव दावाणलसोयरा दिसासुं दाहा संजायंते, खरं-
तेण रएण सव्वाओ दिसाओ रयस्सलाओ इत्थीओ इव अच्चंतं अणालोगणमायणं
हवंति । जलहिमि दुस्सैव-कूरनिग्घोसा परुप्परं अप्फालंता गाहा इव दुव्वाया वियं-
भेइरे, उम्मुआइं पिव समंतमिलेच्छवग्गाणं खोमणस्स निबंधणं गयणाओ सव्वओ
उक्का निवडंति, कुड्डुट्ठिकयंतस्स भूमीए हत्थदिण्णपहारा इव महानिग्घोसभीसणा
वज्जनिग्घोसा हुंति, समुवसपंतीए कयंतसिरीए छत्ताइं पिव नहयलंमि थाणे थाणे
काग चिल्लायणं मंडलाइं भमंति । अह सुवण्णसण्णाह-परसु-कुंतरस्सीहिं गयणंमि थिअं
सहस्सरस्सि क्कोटिरस्सिमिव कुणंतं, पयंड दंड-क्कोदंड-मोग्गरेहिं आगासं दंतुरं कुण-
माणं, झययिय-वग्ग-सिन्ध-सप्प-तसिय-खेयरीगणं, महागय-घडा-जलहरेहिं अंधगारियदि-
साणणं, जमाणण परिफट्ठि-रहगयियमगराणणं, तुरंगाणं खुवावाएहिं भूमिं फाडंत-
मिव, घोरजयतुरियरवेहिं अंबरं फोडंतमिव, अग्गगामिणा मंगलगहेण आइच्चमिव
चक्केण भीसणं आगच्छंतं भरहं ददट्ठणं ते चिलाया अईव कुपंति ।

उत्तरभरहम्मि किरायाणं विजओ ।

ते चिलाया कूरगहमेतिविडंबिणो मिहो संमिलिऊण अवणिं संहरिउं इच्छ-
माणा इव सक्कोडं बवेइरे-मुक्ख-पुरिसो विव सिरी-हिरी भिइ-कित्ति-विज्जिओ,
वालुव्व मंदबुद्धी, अपत्थियपत्थगो इमो को अत्थि ?, परिकखीणपुण्णचउइसीओ
हीणलक्खणो हरिणो सीहगुहं इव अम्हाणं विसयं आगच्छेइ, तओ महावाया
जलहरं पिव उद्धयागारं पसरंतमवि एयं दिसोदिसिं खणेणं पक्खिवाभोत्ति
उच्चएहिं ववमाणा संभूय सैरहा पइमेहं पिव जुद्धाय भरहं पइ उट्ठंति । अह ते
किराडवणो कुम्म पिट्ठि-हँडु-खंडेहिं निम्मियसन्नाहे धरेइरे । मत्थयधरियउड्ढकेसेहिं
निसायर-सिर-सोडं दिसंताइं, रिच्छाइकेसच्छण्णाइं सिरत्ताणाइं ते धरंति । ताणं रणु-
क्कंठया अहो ! जेणं महूसाहेण ऊससंतदेहत्तणाओ सण्णाहजालिया पुंणरुत्तं तुट्टे-
इरे, 'अम्हाणं कि अवरो रक्खगो' ति अमरिसवसाओ इव ताणं उड्ढकेससिरेसु सिरं-
क्काइं न चिट्ठंति, केइ किराडा कुविय-कीणास-भिउडि-कुडिलाइं सिंग-घडियाइं धणु
काइं जीवारूढाइं लीलाए धरंति, के वि जयसिरिलीलासेज्जासरिच्छे संगामदुव्वारे
भयंकरे खग्गे कोसाओ आकरिसंति, केइ जमस्स अणुबंधवो विव दंडे धरेइरे, केवि

१ रजसा=शूल्या । २ दुःश्रवः । ३ उल्लुकाणि=उंबाडोयु । ४ उल्लुका=ज्वालारहिततेजःसमूहः ।

५ चिह्नः=समूहः । ६ शरभाः=अष्टापदाः । ७ अस्थि । ८ शिरस्त्राणानि । ९ वारंवारम् । १० शिरस्कानि ।

नहयले केउणो विव कुंते नट्टयंति, केवि रणूसवे आमंतियजमरायस्स पीइसंपाय-
णट्ठं सत्तूणं खूलाए आरोविउं पिव खूलाइं धरेइरे, केई अरि-चडग-चक्कपाणहरे सेण-
पक्खिणो इव लोहसल्ले करंमि निहेइरे, अवरे नहयलाओ तारागणं पाडिउं इच्छंता
इव उंद्धुरेहिं हत्थेहिं मोगारे सज्जो गिणहेइरे, अण्णे वि संगामकरणिच्छाए विविहाइं
सत्थाइं धरंति, विसं विणा उरगुव्व तत्थ सत्थं विणा कोवि न होज्जा । अह
एणेण समएणं एगप्पाणो इव रणरसलालसा ते सव्वे भरहसेणं समुदिसित्ता
अहिधावंति । ते मिलेच्छा उप्पायमेहा करमे इव सत्थाइं वरिसमाणा वेगेणं भर-
हस्स अगसेणणेण सह जुज्झंति । तया भूमिमज्झाओ इव दिसामुहेहिंतां इव आगा-
साओ इव मिलेच्छेहिंतां सव्वओ सत्थाइं पडंति । तया चिलायाणं बाणेहिं दुज्ज-
णवयणेहिं इव भरहनरिंदसेणाए जं न भिण्णं तं न आसि, मिलेच्छसेणणेण पैलो-
ट्ठिआ भरहेसपुरोगसाइणो वारिहिवेलाए नईमुहुम्मीओ व्व वलंति, मिलेच्छसीहेसुं
तिक्ख-सिलीमुहनहेहिं हणमाणेसुं समाणेसुं विरससरं रसंता चक्कवट्ठिणो हत्थिणो तसे-
इरे, मिलेच्छसुहदेहिं चंडदंडाउहेहिं पुणरुत्तं ताडिया चक्किणो पाइक्का गेंदुगा इव पलो-
ट्टमाणा पडंति, मिलेच्छसेणणेण नरिंदसेणारहा गयाघाएहिं वइरघाएहिं गिरिणोव्व
सच्छंदं विभइज्जंति, तंमि समरसागरंमि^१तिमिगलेहिं पिव मिलिच्छेहिं नरिंदचमूनक्क-
चक्कं गसिय-तसियं संजायं । अह अणाहमिव पराजियं तं सेणं पासमाणो सुसेणसेणा-
नाहो रण्णो आणाए व्व कोवेण णोदिओ स खणेण अरुणनयणो तंववयणो नरख-
वेण अग्गी पिव सयं दुरिक्खणिज्जो होत्था । रक्खसराओ विव असेसे परसेणिगे
गसिउं सुसेणसेणावई सयं सणद्धो जाओ । तथा ऊसाहससंतदेहत्तणेण अइगादत्तणं संपत्तं
सेणावइणो तं सुवणमइयं कवयं तैयंतरमिव सोहइ । सो चमूवई उच्चत्तणंमि असीइ-अंगुलं,
वित्थारंमि एगूणसयंगुलं दीहत्तणंमि पुणो अट्ठुत्तरसयंगुलं, वत्तीसंगुलस्सेह-निरंतरुण
यमत्थयं चउरंगुलकणं वीसंगुल-बौहुगं, सोलसंगुलजंयं चउरंगुलजाणुअं, चउरंगुलच्चसुरं,
वट्ठं, वलियमज्झं, विसाल-संगय-नय-पसण्ण-पिट्ठिसोहिरं, दुउलतंतूहिं पिव मउयलोमेहिं
संजुयं, पसत्थदुवालसावट्ठं, सुद्ध-लक्खण-लक्खियं, सुजाय-जोव्वणपत्तं सुगपिच्छ-हरि-
यच्छविं, कसानिवायरहियं, सामिचित्ताणुगमणं, रयण-सुवण-वैग्गामिसाओ सिरीए बाहाहिं
आसिलिट्ठमिव, महुरसरं कणंत-कंचणमय-खिंखिणीजालेहिं अब्भंतरझणझणंतमहुगर-

१ दट्टैः=उच्चकैश्च । २ पर्यस्ताः । ३ महामत्स्यविशेषः । ४ त्वगन्तरमिव । ५ बाहुकम्=अग्रपादम् ।
६ धत्तामिषाद् ।

पंकयमालेहि पिव अच्चियं, पंचवणमणि-मिस्स सुवण्णालंकारकिरणेहि अणुवमखवपडागंकि-
यमिव सोहियाणणं, भोमग्गहंकियं अवरमिव कंचणकमलतिलगं, चोमरुत्तंसमिसाओ अण्णे
कण्णे धरंतं पिव, चक्कवट्टिस्स पुण्णेण आकड्हियं इंदस्स वाहणं पिव, लालणाओ इव
पडंत-वंक-चलणे मुंचमाणं, अण्णरूवेण गरुलं पिव, मुत्तिभंतपवणमिव खणेण जोयण-
सय-उल्लंघणे दिट्ठविकमं, कदम-जल-पाहाण-सक्करा-गँडडाइ-विसम पएसओ
महाथली-गिरि-दैरी-दुग्गाइ-थलाओ य उत्तारणक्खमं, ईसिं भूमिलग्गपायत्तणेण
गयणंमि संचरंतं पिव, धीमंतं त्रिणीयं पंचधाराजियस्समं कमलामोयनीसासं सक्खं
जयं पिव नामेणं कमलावीलं तुरंगरायं आरोहेइ । तओ सो सेणावई दिग्घत्तणे
पण्णासंगुलं वित्थारंमि सोलसंगुलं बाहल्लंमि अड्ढंगुलं, सुवण्णरयणमइयंच्छं विमुत्तनि-
म्मोअं-पण्णमिव कोसाओ निग्गयं, तिण्णधारं, वीयवज्जं पिव अइदिहं, विचित्त-
पुक्खर-पंति-फुडवण्णविराडयं कयंतो पत्तं पिव सत्तूणं खयगरं खग्गरयणं गिण्हेइ ।
तेण खग्गरयणेण सो सेणाणी जायपक्खो नागराओ इव, सण्णद्धो केसरीव संजाओ ।
तत्तो चमूपई गयणंमि त्रिज्जुदंडमिव चवलं असिं भमाडंतो रणकुसलं तुरंगवरं पेरेइ,
जलकंतमणी जलं पिव सत्तूणं बलं फाडितो तेण वाइणा सह समरंगणं पविसेइ ।
तथा सुसेणसेणावइणा हणिज्जमाणा केवि अरिणो हरिणा इव तसेइरे, के वि ससगा
विव पडिऊण नेत्ताइं निमीलिऊण चिट्ठंति, अवे खेयमावण्णा रोहियवच्छा इव उड्ढं
चिट्ठेइरे, अण्णे कंविणो व्व विसमट्ठाणं आरोहंति । केमिपि तरुणं पत्ताइं विव सत्थाइं,
कासइ समंतओ कित्तीओ इव आयपत्ताइं पडेइरे, काणं पि मंतथंभिया उरगा इव तुरगा
चिट्ठंति, कास वि मट्टियामइया विव संदणा भंजिज्जंति, केयण नियं पि अपरिचियमिव
न पइक्खंति, नियनियपाणाइं चेत्तूणं सव्वे मिलेच्छा उ दिसोदिसं पलार्यंति, एवं
जलपूरेण तरुणो विव सुसेणसेणावइणा पलोदिया तेयरहिया ते बहूइं जोयणाइं दूरं
ववगच्छंति । ते वायसा इव एगत्थं संमिलिऊण खणं आलोइत्ताणं आउरा मायरं व
सिंधुमहानइं गच्छंति, तीए नईए धुलीमइयतडंमि मयग-सिणाणुज्जया इव ते संमिलि-
ऊण सिकंथाउक्केरेहि संथरे किच्चा उवविसंति । ते नग्गिणगा उत्ताणगा समाणा निय-
कुलदेवे मेहमुहण्णमुहनागकुमारे चित्ते काऊणं अट्टमतवं विहेइरे । अट्टमतवपज्जंते चक्क-
वट्टिस्स तेयभयाओ विव नागकुमाराणं आसणाइं कंपेइरे, ते ओहिनाणेण तहट्टिए दुक्खिए
मिलिच्छे दट्ठूणं ताणं दुक्खेण पिउव्व अदिया तत्थ अभिगंतूणं तप्पुरओ पाउव्वंति,
'भो ! तुम्हाणं चित्तंमि अहुणा इच्छिओ को अट्ठो ? ववेह' एवं अंतरिक्खथिआ ते देवा

१ चामरोत्तंसमिषात् । २ गर्तादि- । ३ गुहा । ४ कमलापीड । ५ त्सरुः=खड्गमुष्टिः । ६ निर्मोकः=सर्व-
ज्जुककः । ७ कपयः । ८ पर्यस्ताः । ९ सिकतोत्करैः ।

चिलाए भासेइरे । गयणसंठिअमेहमुहनागकुमारदेवे ददट्ठणं अचंततिसिआ विव भालप-
ट्ठेसुं निवद्धंजलिणो ते वयंति-पुब्बं अणक्कंते अम्हाणं देसे अहुणा कोवि आगओ अत्थि,
जह सो गच्छेज्जा तह कुणेह त्ति । ते मेहमुहदेवा एवं कहिति-महिंदो विव देवासुरन-
रिंदाणमवि अजयणिज्जो अयं भरहचक्कवट्ठी अत्थि, 'टंकाणं गिरिपासाणो व्व मही-
यलंमि चक्कवट्ठी मंत-तंत-विस-सत्थ-वन्हि-विज्जाईणं अगोयरो होइ, तह वि हि
तुम्हाणं अणुरोहेण अम्हे इमस्स उवसगं करिस्सामु त्ति वोत्तुण ते तिरोहिया । तक्ख-
णाओ कज्जलसामवण्णा जलहरा भूमीयलाओ उइडेऊण अंभोहिणो इव नहयलं भरंता
संजायंते, ते विज्जुरुवतज्जणीए चक्कवट्ठिस्स सेणं तज्जंतीव, उज्जियगज्जियरवेहिं अंसइ
अक्कोसंतीव नज्जंति, तक्खणंमि ते मेहा नरिंदखंधावारस्स चुण्णकरणट्ठं तप्पमाणुज्जय-
वरिसिलोवमा अवरिं चिट्ठंति, ते लोहग्गेहिं इव नाराएहिं विव दंडेहिं पिव जलधाराहिं
वरिसिउं तत्थ पवट्ठंति, सच्चओ वि मेहजलेण भूयले पूरिज्जमाणे तत्थ रहा नावा विव,
गयाइणो मगरा इव दीसंति, कालरत्तिव्व फुरंतेण तेण मेहंधयारेण आइच्चो कत्थ गओ इव,
पच्चया पणट्ठा विव आसि । तयाणि महीयलंमि एगंधयारत्तणं च इक्कजलभावो य त्ति जुगवं
दुष्णि धम्मा संजाया । चक्कवट्ठी वि अणिट्ठ-दाइणि उक्किट्ठवुट्ठिं पेक्खिऊण नियहत्थेण पिय-
भिच्चं पिव चम्मरयणं फासेइ, चक्कवट्ठिकरफुडं तं चम्मरयणं उत्तरदिसिपवणेण वारिधरो
विव दुवालसजोयणाइं वड्ढित्था, समुदमज्झस्स भूयले विव जलोवरिथिए तंमि चम्मरयणे
समारुहिय ससेणिओ नरिंदो चिट्ठेइ । तह विट्ठमेहिं खीरसमुदमिव अइचारुहिं नवनवइ-
सहस्सेहिं सुवण्णसलागाहिं मंडियं, नालेण पंकयमिव वण-गंधिविहीणेण सरलत्तण-
रेहिरेण सुवण्णदंडेण सोहियं, जलाऽऽतव-वाउ-रेणुरक्खणक्खमं छत्तं पुढवीवई पाणिणा
फरिसेइ, तं च चम्मरयणं व वड्ढेइ । नरिंदो अंधयारविणासणट्ठं छत्तदंडस्स उवरिं
तेण अइक्कंतभाणुं मणिरयणं ठवेइ । तया छत्तचम्मरयणाणं तं संपुडं तरंतं अंडं पिव
विराएइ, तओ पहुडिं लोगंमि 'वम्हंडं' ति कप्पणा होत्था । गिहिरयणप्पहावओ
सुक्खेत्तंमि विव चम्मरयणंमि पच्चूसे ववियाइं धण्णाइं सायं निष्फज्जंति, तह पभाए
उत्ता कोहंड-पालक्का-मूलगाइणो दिणंते जायंते, दिणमुहंमि वविया चूय-कयली-
पमुहफलहुमा महापुरिसाणं पारंभा विव दिवसपज्जंते फलेइरे, तत्थ थिआ पमुइयजणा
एयाइं धण्ण-साग-फलाइं भुंजंति । उज्जाणकेलियायमणूसा इव सेण्ण-परिस्समं न
जाणेइरे, एवं भरहनरवई सपरिवारो नियपासायत्थिओ विव तत्थ चम्मरयणच्छत्त-
रयणमज्झंमि सत्थो अवचिट्ठेइ । तया तत्थ कप्पंतकालुव्व अविरयवरिसमाणणं ताणं

नागकुमारदेवाणं सत्त अहोरत्ताइं होत्था । 'के एए पावा मम एरिसमुवसगं काउं समुज्जय' ति भरहनरिंदस्स भावं वियाणिय अह ते महोयंसिणो सथा संनिहिया सोलससहस्साइं जक्खा सण्णाद्धा बद्धनूणीरा जियारूढधणुक्का कोहानलेण सच्चओ सच्चे डहिउं इच्छंता आगच्छिऊण मेहमुहनागकुमारे एवं ववेइरे—'अरे वराया ! जडा विव तुम्हे महीनाहं चक्क-वट्ठि भरहेसरं किं न जाणेह ? वीसस्स वि अजयणीए अमुंमि नरिंदमि अयं आरंभो दंतीणं महासिलुच्चए दंतपहारो इव तुम्हाणं चिय विपत्तीए सिया, एवं समाणे वि मंक्कुणा विव सिग्घं अवगच्छेह, अण्णाह तुम्हाणं बाढं अदिट्ठपुच्चो अवमच्चू होही' इअ ताणं जक्खाणं वयणं समाकणिऊण अच्चंतवाउला ते मेहमुहा देवा इंदजालिया इंदजालं पिव खणेण तं मेहवलं सहरेइरे, तओ य ते मेहमुहदेवा चिलाए उवगंतूण कहिति—'तुम्हे गंतूणं भरहनरिंदं सरणं अंगीकुणेह' ति । तओ ताणं वयणसवणेण हयासा ते मिलेच्छा अण्णसरणा सरणं भरहेसरं सरणं गंतूण अहीणं फणामणिणो विव एगओ पुंजीकयमणिणो, मेरुणो य अंतसारं पिव चारुवामीकरक्केरं, आसरयण-पडिबिंवाइं इव आसाणं लक्खाइं पाहुडंमि अप्पिति, नमिऊण य मत्थए निबद्धंज-लिणो ते बंदीणं सहोयरा इव चाडुगम्भियवायाए उवएहिं भरहचक्कवट्ठिणो वएइरे—

विजएसु जगन्नाह !, पयंडाखंडविक्रम ! ।

आखंडलो इवासि तुं, छक्खंडखोणिमंडले ॥

नरवइ ! अम्हाणं भूमीए वप्पसरिसवेयइहपव्वयस्स गुहापैओलिं तुमं विणा उग्घा-डिउं को समत्थो ?, आगासंमि जोइसचक्कं पिव जलोवरिं खंधावारं धरिउं तुमं अंतरेण अण्णो को खमो ?, एवं अच्चब्भुयसत्तीए हे सामि ! सुरासुराणंपि अजेओ ति विण्णा-ओ सि, अम्हाणं अण्णाणजायावराहं सहसु, अहुणा अम्हाणं पिट्ठीए नवजीवाउं हत्थं देसु, इओ परं नाह ! तुम्हं आणावसवट्ठिणो अम्हे इह ठाहिमो । किच्चविउ भरहनरिंदो वि ते मिलिच्छे साहीणं किच्चा सक्कारिऊण य विसज्जेइ, 'उत्तमाणं हि पणामंतो कोहो होइ' । अह सुसेणसेणावई नरिंदाणाए गिरिसागरमज्जायं सिंधुनईए उत्तरनिकंखुडं साहिऊण समागच्छेइ । महीवई नियाऽऽरियजणसंगमेण अणज्जे वि आरियत्तणं काउं इच्छंतो विव भोगे उवभुंजमाणो चिरं तत्थ चिट्ठइ । अण्णया दिसाणं विजए पैडिभू कंति-सोहिरं चक्करयणं आउइसालाओ निस्सरेइ, चुल्लहिमवंतगिरिं पइ पुव्वदिसामग्गेण गच्छंतस्स चक्करयणस्स पहेण कुंल्लाए पवाहो विव राया गच्छेइ, कईहिं पयाणेहिं

लीलाए गयंदो इव वच्चमाणो भूवई चुल्लहिमवंतगिरिणो दाहिणिल्लं नियंबभागं पावेइ, नरिंदो भुज्ज-तगर-देवदारु-वणाउलंमि तंमि ठाणंमि महिंदो पंडगवणंमि विव सिबिरं निहेइ, तत्थ य उसहनंदणो चुल्लहिमवंतगिरिकुमारं उदिसिज्जण अट्टमं तवं कुणेइ, 'कज्जसिद्धीए तवो हि पढमं हवइ मंगलं,' तओ य अट्टमभत्तंते पच्चूसकाले आइच्चो इव महातेयंसी नरिंदो रहारूढो सिबिर-समुदाओ निगच्छेइ, महीवईणं पढमो सो वेगेण गंतूण हिमवंतगिरिं रहग्गभागेण तिव्वुत्तो ताडेइ, अह वेइसाह-ट्ठाणत्थिओ भूनाहो हिमवंतगिरिकुमारस्सोवरिं नियनारंमकियं सरं विसज्जेइ ।

हिमवंतगिरिकुमारदेवविजओ, उसहकुडम्मि नामलिहणं—

सो बाणो विहंगुव्व गयणेण वावत्तरिं जोयणाइं गंतूण हिमवंतगिरिकुमारस्स पुरओ पडेइ । सो देवो गओ अंकुसं पिव तं सरं पेक्खिज्जण तक्कालं कोवेण लोहिया-इयलोयणो जाओ, स करेण तं सरं वेत्तूणं तत्थ य नामक्खराइं दट्ठूणं पैण्णगदंसणाओ दीवो विव समं पावेइ, तओ स पहाणपुरिसेणव्व रण्णो तेण इसुणा सह उवायणाइं गहिज्जण भरहनरवई अभिगच्छेइ । अह सो अंतरिक्खट्ठिओ जय जयत्ति वोत्तूणं पढमं भरहनरिंदस्स तं कंडं 'कंडगारो इव समप्पेइ, तओ सो कप्पतरुप्फमालं गोसीसच्चंदणं सव्वोसहीओ तह य सव्वओ सारं पोम्मदहजलं च भरहरायस्स देइ, पुणो सो पाहुड-मिसेण दंडंमि कडगे बाहुरक्खे देवदूसवसणाइं च पयच्छेइ, तओ हे सामि ! उत्तरदि-सापडजंते तुम्ह भिच्चो विव अहं चिट्ठिस्सं ति वोत्तूण विरमंतो सो रण्णा सक्कारिज्जणं विसज्जिओ नियट्ठाणं गच्छेइ । भरहनरिंदो तस्स गिरिणो सिहरं पिव सत्तूणं मणोरहं पिव रहं पच्छा वालेइ, तओ उसहसामिनंदणो उसहकूडगिरिं गंतूण रहसीसेण तिव्वुत्तो तं गिरिं गयंदो दंतेणेव पहरेइ, तत्थ पुढवीवई रहं ठविऊणं हत्थेण कागिणीरयणं गिण्हेइ, तस्स गिरिस्स पुव्वकंडगम्मि कागिणीरयणेण 'इमीए ओसप्पिणीए तइयार-पज्जंतंमि अहं भरहो चक्कवट्ठी अम्मि' ति वण्णे लिहेइ, तओ निअट्ठिज्जण सयायारो सो नियं खंधावारं आगच्छेइ, अट्टमतवस्स य पारणं कुणेइ, तओ नरीसरो चुल्लहिमवंतगिरिकुमारदेवस्स चक्कवट्ठिसंपयाणुखं अट्ठाहियामहसवं कुणेइ । गंगासिंधुमहानईणं अंतरालमहीयले अमा-यंतेहिं पिव गयणंमि 'उप्पवमाणेहिं तुरंगमेहिं, सइण्णभारपरिकिलंटाऽवणिं सिंचिउकामेहिं पिव मयजलपवाहं झरंतेहिं गंधसिंधुरेहिं, उद्दामनेमिरेहाहिं पुढविं सीमंतेहिं अलंक्रियमिव

१ वैशाखम्=संग्रामकाले संस्थानविशेषः । २ लोहितायितः=रक्तलोचनः । ३ सर्वदर्शनाद् दीपो निर्वा-
णमेति-इति लोकमान्यता । ४ काण्डकार इव । ५ कटक-गिरिमध्यभागः । ६ उत्प्लवमानैः ।

कुणमाणेहि उत्तमरहेहि, महीयले पसरंतेहि अबीयपरक्कमेहि मणूसमइयं दंसंतेहि कोडि-
संखपाइक्केहि, आसवाराणुगामी जच्चमयंगओ इव चक्करयणाणुगामी चक्कवट्टी वच्चंतो
वेयड्ढगिरि पावेइ ।

नमि-विनमिविज्जाहराणं विजओ--

तओ नमि-विणमि-विज्जाहरपइणो पइ पुढवीवई 'दंडमग्गणं मग्गणं पेसेइ ।
ते विज्जाहर-वर-वइणो ते च मग्गणं आलोइऊणं कोवाडोवसमाविट्ठा परूपरं इअ
वियारंति-इमस्स जंबूदीवदीवस्स एत्थ भरहखेत्तंमि अहुणा इमो भरहो पढमो चक्कवट्टी
उप्पन्नो, अयं वसहकूडगिरिमि सयं चंदविंव पिव नियं नामं लिहिऊण तओ वलिओ
एत्थ समागओ, गयस्स आरोहणो इव अस्स वेयड्ढपच्चयस्स पासंमि कयट्ठाणो बाहुबल-
गव्विओ एसो अत्थि, तम्हा एसो जयामिमाणी समाणो अम्हाहितो वि दंडं वेत्तुं इच्छंतो
एयं पयडं सायगं अम्हाणमुवरिं निक्खित्थ त्ति मण्णेमि एवं ते अन्तुन्नं वोत्तुणं
उट्ठाय संगामकरणटं नियबलेहि गिरिसिहरं ढक्कंता नोसरंति । अह सोहम्मेषाणनाहाणं
देवसेण्णाइं पिव ताणं नमि-विणमीणं आणाए विज्जाहराऽणीगाइं उवागच्छंति, ताणं उच्च-
एहिं किलकिलारावेहिं वेयड्ढगिरी समंतओ हसेइ इव गज्जेइव्व फुट्टेइ विव विभाइ, विज्जा-
हरिंदसेवगा वेयड्ढस्स कंदरे इव सुवण्णमइयविसालदुंदुहिणो वांपइरे, उत्तर-दक्खिण-
सेढीणं भूमि-गाम-नयराहिवा विचित्तरयणाभरणा रयणागर-सुया विव अक्खलंतगइणो
गयणे गरुहा इव नमि-विणमीहिं सद्धिं ताणं अवरा मुत्तीओ इव चलंति । केवि माणिकक-
पहा-पहासियदिसिमुदेहिं विमाणेहिं वेमाणियदेवेहिं असंलक्खणिज्जमेया वच्चेइरे, अण्णे
सीअराऽसारवरिसीहिं पुक्खरावट्टमेहसरिसेहिं गज्जंतेहिं गंधसिंधुरेहिं गच्छंति, केइ
इंदु-माणुपमुहजोइसियाणं अच्चिण्णेहिं पिव सुवण्णरयणरइयरहेहिं चलेइरे, के वि गय-
णंमि वैग्गुं वगंतेहिं वेगाऽइसयसालीहिं वाउकुमारेहिं पिव 'वाईहिं निग्गच्छेइरे, केइ सत्थ-
समूहवाउलहत्था वज्जसंनहाधारिणो पवंगव पवमाणा पाइक्का जंति । अह ते नमि-
विणमिणो विज्जाहरसेणापरिवरिआ सण्णाद्धा जुज्झुंउं इच्छंता वेयड्ढगिरित्तो उत्तरिऊण
भरहनरवइं उवगच्छेइरे । मणिमइयविमाणेहिं गयणं बहुखरमइयं पिव, पजलंतेहिं पहर-
णेहिं विज्जुमालामइयं पिव, पयंडदुंदुहिसदेहिं मेहघोसमयमिव कुणंतं विज्जाहरसेणं
आगासंमि भरहो पासेइ । तओ 'अरे दंडेत्थि ! अम्हेहितो तुमं दंडं वेत्तुं इच्छसि !'
त्ति वयंता विज्जुम्मत्ता ते दुण्णि भरहनरिंद संगामाय आहवंति । अह सो भरहनरिंदो

१ दंडमग्गणम्-दंडयाचकम् । २ शीकरः=जलकणः । ३ आच्छिन्नैः=बलात्कारग्रहीतैः । ४ वल्लु=
सुन्दरम् । ५ वाजिभिः तुरंगैः । ६ दण्डार्थिनः ।

ससेण्णेहि तेहि सह पच्चेअं जुगवं च विविहजुद्धेहि जुज्जेइ, 'जं जयासरीओ हि जुद्धेण लहणीआउ' ति । एवं दुवालसवाससंगमकरणेण जिया ते विज्जाहरवइणो कथंजलिणो पणिवइय भरहनरवइं वयंति —

आइच्चोवरिं को तेओ ?, वाउस्सोवरिं को जवी ? ।

मोक्खस्सोवरिं किं सोक्खं ?, को य सूरु तुमोवरिं ? ॥

हे उसहनंदण ! तुम्ह दंसणेण सक्खं अज्ज उसहभयवंतो दिट्ठो, अन्नाणाओ अम्हेहि तुमं जं जुज्जविओ तं सामि ! खमसु, पुरा उसहसामिणो अम्हे भिच्चा आसिमो, अहुणा तुम्ह वि सेवगच्चिय, 'सेवापउत्ती सामिव्व सामिनंदणे न लज्जाए सिया,' दाहिणुत्तरभरहड्ढमज्जवट्ठिवेयड्ढगिरिणो उभयपासेसुं तुव सासणेण इहं दुग्गपालव्व अम्हे ठाइस्सामो ति वोत्तूण विणमी नरिंदो उवहारं दाउं इच्छमाणो वि मग्गिउं इच्छंतो विव अंजलिं विहेउण अच्छराहिं सिरिं पिव आवगाहिं गंगं पिव सहस्ससंखाहिं सव्वओ वयंसाहिं परिवरियं नामेणं सुभइं इत्थिरयणं थिरीभूयसिरिभिव नियं दुहियं हरणो पदेइ ।

इत्थीरयणं—

तं इत्थिरयणं केरिसं जहा—सुत्तं दाऊणं निम्मियं पिव समवउरंसागारं, तेलुक्कमज्जवट्ठि माणिवकतेयपुंजमइयमिव, कयण्णुहिं सेवगेहिं पिव सया जोव्वणेण सिरिमंतेहिं नहेहिं केसेहिं च अच्चंतं विरायमाणं, बलपदायग—दिव्वोसहिं व सव्वामयोवसमगं, दिव्ववारिव्व जहिच्छन्सी-उण्हसंफरिसं, केसाईसुं तीसुं ठाणेसुंसामं, देहाईसु तीसु सेयं, करयलाईसुं तंबं, थप्पाईसु उण्णयं, नाहि—आईसुं गहीरं, नियंबाइसु वित्थिणं लोयणाईसु दीहं, उयराइतीसुं किसं, केसपासेण मऊराणं कलावे जयंतं, भालेण अट्टमीचंदं पराभवंतं, रइ—पीईणं कीला—दिग्घिआओ इव नयणाइं धरंतं, भाल—लायण—जलधारमिव दिग्घिनासियं, नवसुबण्णाऽऽयंसेहिं पिव गल्लेहिं सोहियं, अंसलग्गकणेहिं डोलाहिं पिव रेहिरं, सहजायबिबफल—विडंबिणो अहरे धरंतं, वज्ज—खंड—सेणि—सरिससोहिर—दंतेहि छज्जिरं, उयरं पिव तिरेहासोहियकंठं, नलिणीनालसरलाओ विसकोमलाओ बाहाओ धरमाणं, मयणस्स कल्लाणकलसे विव थणे धरंतं, नाहि—वावी—तीर—दुरुव्वावलिमिव रोमालिं बहमाणं, कामस्स सेज्जाए इव विसालनियंबभागेण तह य डोलासुवण्णथंभेहिं पिव उरुहिं विराइयं, जंघाहिं हरिणीजंघाओ अहरीकुणंतं, पाणीहिं पिव पाएहिं पंकथाइं पराभवंतं, पाणिपायंसुलिदलेहिं

१ उयामम् । २ क्रीडादीर्घिके=क्रीडावाप्यौ । ३ आदर्शाभ्याम् । ४ दोलान्याम् । ५ वज्रखण्डाः=हीरककणाः । ६ पाणिभ्यामिव ।

पल्लवियवल्लिमिव, पयासंत-नहरयणेहिं रयणायलतडिमिव, विसालसच्छकोमलवसणेहिं चलंत-मउय पवण-जायलहरीहिं नई पिव सोहमाणं, निम्मलपहातरंगियमणोरमावयवेहिं रयणसुवणमयाई भूसणाई पिव भूसयंतं, पिढओ छाहीए विव छत्तधारिणीए तह य हंसेहिं पउमिणि पिव संचरंतचामरेहिं निसेवियं, एयारिसं इत्थिरयणं विण्णेयव्वं ।

तह नमिविज्जाहरिंदो वि महाभुल्लाई रयणाई भरहचक्कवट्ठिणो सम्पेइ, 'गिहसमा-
गयंमि सामिमि हि महप्पाणं अदेयं किं !'। अह भरहराएण विसज्जिआ ते नमिविणिमि-
विज्जाहरिंदा भवाओ विरज्जमाणा नियनियपुत्तेसुं रज्जाई समारोविऊण उसहसा-
मिणो अघिमूलंमि वयं गिण्हेइरे ।

गंगादेवो-नट्टमालदेवविजओ-

तओ वि चलंतचक्करयणस्स पिढओ गच्छंतो भरहनरवई अमदतेओ 'मंदा-
इणीतडं समागच्छेइ, वसुमईनाहो जण्हवीसंयणस्स न अच्चासणे नाइदूरंमि सेण्णाई
आवासेइ, सुसेणसेणावई नरिंदादेसेण सिंधुव्व गंगं उत्तरिय गंगाए उत्तरनिकसुडं
साहेइ । तओ सो चक्कवट्ठी अट्टमभत्तेण गंगादेविं साहेइ, 'उवयारो समत्थाणं सज्जो
हवइ सिद्धीए' । सा गंगादेवी भरहनरिंदस्स रयणसिंघासणदुगं अट्ठुत्तरं च रयणकुंभ-
सहस्सं सम्पेइ, तत्थ रुवलायणकिंकरीकयमयणं भरहनरवई दट्ठूणं गंगा वि खोहं
पावेइ, वयणमयंकाणुगय-तार-नारागणेहिं पिव मुत्तामइयविभूसणेहिं सव्वंगे विरायमाणा,
वत्थरुवपरिणयाई नियपवाहजलाई पिव कयलीगन्ध-छल्लीसरिसाई वत्थाई धरंती,
रोमंच-कंचुको^१दंचिर-यण-फुट्टियकंचुया सयंवरमालं पिव धवलं दिट्ठिं खिवंती, नेह-
गम्मारवायाए पत्थिवं गाहं पत्थिऊणं कीलिउं इच्छंती गंगादेवी कीलानिकेयणं नेइ ।
तत्थ राया गंगादेवीए सह विविह-दिव्व-भोगे भुजमाणो एगदिणं पिव वरिसाणं
सहस्सं सो अइवाहेइ, कहंचि वि जण्हविं संबोहिऊण अणुणं च वेत्तूणं सो भरहो
पवलवलेहिं सह खंडपवायागुहं अभिचलेइ ।

अह बलेण अइमहाबलो सो वि खंडपवायागुहाए दूरओ सेणं निवेसेइ, तत्थ
भूवई नट्टमालदेवं मणंसि किच्चा अट्टमं तवं कुणेइ, तस्स य आसणं पकंपेइ । सो
देवो ओहिनाणेण तत्थ आगयं भरहचक्कवट्ठिं जाणिऊण उवायणेहिं आगच्छेइ, छवखं-
डपुढविवइणो भूरिभत्तिभरनिम्भरो सो देवो भूसणाई अप्पेइ, सेवं च पडिवज्जेइ ।

तओ विवेगवंतो नरिंदो कयनदं नडं पिव नट्टमालसुरं पसायपुव्वयं विसज्जेइ, पारणं काऊण तस्स य देवस्स अट्ठाहियामहूसवं विहेइ, तओ य सुसेणसेणावइं 'खंडपवाय-गुहा उग्घाडिज्जउ' ति आदिसेइ । तओ चमूनाहो नट्टमालदेवं मंतव्व मणमि किच्चा पोसहसालाए अट्टमतवं करिऊणं पोसहं गिण्हेइ, अट्टमतवंते पोसहागाराओ नीसरि-ऊण पइट्ठाए आयरिओ विव बलिविहिं विहेइ, तओ य विहियपायच्छित्त-कोउय-मं-गलो महग्घ-थेव-नेवत्थ-धरो धूवदहणं धरितो खंडपवायगुहं पयाइ, आलोगमेत्ते वि य नमिऊण तीए कवाडाइं अरुवेइ, तओ य तत्थ अट्टमंगलं लिहेइ । अह सो सेणावई कवाडुग्घाडणाय सत्तट्ठपयाइं अवसरिऊण कंचणमइयकुंचिगं पिव दंडरयण उवादेइ, तेण दंडरयणेण आहयं तं कवाडदुगं आइच्चरस्सि-पुट्ठ-पंकयकोसव्व उग्घडेइ, दुवारुग्घाड-णसमायारं चक्कवट्ठिस्स निवेएइ । तओ सो भरहनरिंदो इत्थिखंधमारुढो गयस्स दाहिणकुंभदेसंमि मणिरयणं निवेसित्ता तं गुहं पविसेइ, सेणार्हि अणुसरिज्जमाणो भरहो तिमिरविणासणट्ठं पुव्वामिव कागिणीरयणेण तत्थ मंडलाइं आलिहंतो वच्चइ । गुहा-पच्छिमदिसाएं भित्तीए नीसरंतीओ पुव्वदिसाभित्तिमज्झभागेण गंतूण दुण्णि सहीओ सहीए इव जण्हवीनईए मिलंतीओ उम्मग्ग-निमग्गाओ नाम ताओ नईओ भूवई पावेइ । पुव्वमिव य पज्जेए तीओ वि नईओ सेणाए सह लंवेइ । तओ तीए गुहाए दक्खि-णदुवारं सेण्ण-सेल्लाऽऽउरेण वेयड्ढगिरिणा पेरिअं पिव खणेण सयं चिय उग्घडेइ । तओ नरीसरो तीए गुहामज्झाओ केसरिव्व निग्गच्छिऊण गंगाए पच्छिमतडंमि खंधा-वारं च निहेइ ।

नवनिहिणो—

तत्थ पुढवीवई नव निहिणो उदिसित्ता अट्टमतवं कुणेइ, 'पुव्वं हि उवज्जियल-दीणं लंभणे मग्गपयंसगो तवो सिया' । अट्टमतवस्स पज्जंते पच्चेगं जक्खसहस्सेण सह अहिट्ठिया ते सइ विम्भुआ नव निहिणो भरहं अभिगच्छंति, तं जहा—

नेसप्पो अवि पंडुअ-पिंगल-सव्वरयणामया निहिणो ।

महपोम्म-कालया पुण, महकालो माणवो संखो ॥

ते य सव्वे निहिणो अट्ठकपइट्ठाणा, ऊसेहंमि अट्टजोयणा, नवजोयणवित्थि-ण्णा, दीहत्ते दुवालस-जोयणा, वेरुलिय-मणिकवाड-थगिय-वयणा कंचणमइआ रयण-संपुण्णा चन्दाइच्चलंछणा । ताणं निहीणं नामेहिं तथहिट्ठायगा पल्लुवमाउसा नागकुमार-

देवा तन्निवासिणो संति । तत्थ १-नेसप्पनिहितो खंधावार-पुर-ग्गामाऽऽगरदोण-
मुह-मडंब-पट्टणाणं विणिवेसणं होइ । २-पंडुअनिहीओ माणुम्माण-पमाणणं सव्व-
गणियस्स तह य धण्णाणं बीयाणं च संभवो सिया । ३-पिंगलाओ निहीओ
नराणं नारीणं हत्थीणं वाईणं सव्वाभरणविही नज्जइ । ४-सव्वरयणामइए निहिम्मि
एगिंदियाइं सत्त वि रयणाइं सत्त य पंचिंदियरयणाइं चक्कवट्टिस्स जायंते ।
५-महापउम-महानिहितो सव्वविच्छित्तिविसेसाणं सुद्धाणं वण्णजुत्ताणं च वत्थाणं समु-
प्पत्ती संजायइ । ६-कालनिहितो भावि-भूयभावणं वट्टमाणस्स य त्ति कालत्तयस्स
नाणं किसिपमुहाइं कम्माइं अन्नाइं पि सिप्पाइं च हुंति । ७-महाकालनिहिमि
विट्ठमरय-सुवण्ण-सिला-मुत्ताहल-लोहाणं तह लोहाइआगराणं समुभवो सिया ।
८-माणवनिहितो जोहाणं आउहाणं सन्नाहाणं च संपयाओ असेसा वि जुद्धनीई दंड-
नीई य जाएइरे । ९-संखमहानिहीहिंतो चउहा कव्वनिप्फत्ती, नट्ट-नाडगाणं विही
सव्वेसिं च तुरियाणं समुप्पत्ती भवइ । एयारिसा नव निहिणो वयंति-‘महाभाग !
तुम्हेच्चयपुण्णुदधवसीकया अम्हे गंगामुहमागहतित्थनिवासिणो तुमं अभिसमागया,
जहिच्छं निरंतरं च उवञ्जसु पदेहि य, कया वि अंबुहिमि जलं झिज्जइ,
अम्हे उ न झिज्जामो एवं सव्वेसु निहीसु वसं पत्तेसु नरिंदो अट्टमतवस्स पारणं
ताणं च निहीणं अट्टाहियामहुच्छवं कुणेइ । सुसेणसेणावई वि नरिंदाणाए गंगा-
दक्खिणनिकखुडं पल्लिं पिव लीलाए सव्वं साहिऊण समागच्छेइ । तत्थ पुढवीवई
लीलाए अक्कंतपुव्वाऽवरपयोनिही बीओ वेयइदगिरिव्व बहुकालं चिट्ठइ ।

अउज्झानयरीए पवेसमहूसवो—

अण्णया भरहनरवइणो साहियाऽसेसभरहस्सित्तं गयणद्वियं चक्कं अउज्झासंमुहं चलेइ,
तया भरहमहाराओ वि कयसिणाणो बलिकम्मं च विहेऊण सुणेवत्थधरो कय-पायच्छित्त-
कोउयमंगलो देवराओ इव महागयंदखंधारुडो, कप्पदुमेहिं पिव नवनिहीहिं पुट्टकोसो,
सुमंगलाए सुमिणाणं भिण्ण-भिण्ण फलेहिं पिव चउइसमहारयणेहिं निरंतरं परिवरिओ,
रायाणं कुलसिरीहिं पिव कमेण परिणीयरायकन्नाहिं बत्तीसाए सहस्सेहिं समण्णाभओ,
तह जणवयसमुप्पणावरबत्तीससहस्ताऽइसुन्दरसुन्दरीहिं अच्छराहिं पिव परिसोहिओ,
पाइक्केहिं व बत्तीसरायसहस्सेहिं चुलसीए य हय-गय-रह-सयसहस्सेहिं संजुत्तो,
छण्णवइसुहडकोडीहिं दक्कियभूयलो पढमपयाणदिवसाओ सट्ठिवाससहस्सेसुं अइक्क-
तेसु समाणेसु चक्कमग्गाणुसारी चलेइ । सेण्णुद्धयधूलीपूर-फरिस-मैलिणिए खेच-
रे वि भूमि-लूढिए विव करंतो, सेण्णभाराओ महीभेयैसंकुप्पाएण भूमिमज्झवासिणो

१ द्रोणमुखम्=जल-स्थलान्यां यत्र गमनं स्यात् तन्नगरम् । मडम्बम्=यत्र योजनं यावद् प्राप्नो न स्यात्
तादृक् स्थानम् । २ विच्छित्तिः-रचना । ३ मलिनितानू । ४ शङ्कोत्पादेन ।

वंतरे भुवणवडणो विय बीहावंतो, गोउलंमि गोउलंमि वियसंतनयणाणं गोवंगणाणं मक्खणं
अण्णं अण्णं पिव भत्तोए गिण्हमाणो, वणंमि वणंमि चिलायाणं कुंमि-कुंमत्थल्लभूयमो-
त्तियपमुहपाहुडाइं गिण्हंतो, पच्चए पच्चए पच्चयवासिभूवेहिं पुरओ ठवियं रयण-सुवण्ण-
खणि-सारवत्थुं अणेगसो अंगीकुणंतो, गामे गामे सोकंठियगामबुद्धे बंधवे इव
सपसायं गहियाऽगहियपाहुडेहिं अणुगिण्हंतो, खेत्तेहिंतो गावीओ इव वीसुं पसरि-
यनियसेणिगे पयंड-नियाऽऽणालट्टीए गामेहिंतो रक्खमाणो, पवंगमे इव रुक्खसमारूढ-
गामिल्लदारो तणए जणगो विव सहरिसं पासमाणो, सच्चया उवदवरहिय-धण-धम्म-
जीवधणेहिं गामाणं संपयं नियनीइलयाए फलं चिय पासंतो, नईओ पंकिलीकुणंतो,
सरोवराइं परिसोसंतो, वावी-कूवे य पायाळविवरोवमे कुणमाणो, मलयगिरिपवणुव्व
लोगाणं सुहं दिंतो दुव्विणीयाऽरिसासणो नरवई सणियं सणियं गच्छंतो विणीयान-
यरिं पावेइ । महीवई तीए नयरीए सहोयरमिव अतिहीभूयं खंधावारं अउज्झाप समीवंमि
निवेसेइ, तओ सो रायसिरोमणी तं रायधाणि मणंसि काऊण निरुवसग्गपच्चयं अट्ठमं
तवं विहेइ, अट्ठमतवंते पोसहसालाओ निकमिऊण अन्ननिवेहिं सह दिव्वरसवईए पारणं
कुणेइ । अउज्झानयरीए पए पए दिगंतराऽऽगयसिरीणं कीलादोला इव उच्चएहिं तोर-
णाइं बंधिज्जंति, पउरजणा पंहमि पंहमि जिणजम्मणमंहमि गंधंबुवुट्टीहिं पिव कुंकुमवा-
रीहिं छंटणं कुणेइरे, पुरओ अणेगीभूय समागयनिहीहिं विव सुवण्णथंभेहिं मंचए विरयंति,
अण्णुणसंमुहसठिया ते मंचया उत्तरकुरुथियदहपंचगस्स उभयपासओ दस दस कंच-
णगिरिणो इव रेहंति । पडिमंचं रयणमइयतोरणाइं इंदधणुहसेणिसोहापराभवं कुणंताइं
संति, विमाणेसुं गंधंवाऽणीयमिव मंचेसु गाइगाजणो वीणामयंगाइवायगजणेहिं सह
अवचित्ठेइ, मंचएसुं उल्लोयाऽऽवल्लविणो मौत्तिओऊला सिरीए वासागारेसुं कंति-थव-
इयाऽऽगासा विव पयासेइरे । पमोय-पुण्णपुरीदेवीए हसिएहिं पिव चामरेहिं, गयण-
मंडणभंगीहिं इव चित्तकम्मेहिं, कोऊहल्लसमागयनक्खत्तेहिं विव सुवण्णदण्णेहिं, खय-
राणं हत्थपडेहिं इव अब्भुयवत्थेहिं, सिरीणं मेहलाहिं विव विचित्तमणिमालाहिं
उड्ढीकयर्थभेसु नगरजणा हट्टसोहं विहेइरे । पउरजणा महुरङ्गणि-रसंत-सारसं
सरयकालं दंसिंतोओ पक्कणंतस्सिखिणीमालाओ पडागाओ बंधेइरे, पडिहट्टं
पडिगेहं च जक्खकइमगोमएहिं लित्तंगणेसुं मौत्तिअ-सत्थिए पूरिंति, अगरु-
चुणेहिं उच्चएहिं गयणंपि भूवाविउं भूविज्जमाणाओ भूवघडीओ पए पए पूरेइरे ।
सुहंमि खणंमि नयरीए पवंसं इच्छतो इंदुव्व चक्कवट्टी मेहमिव गज्जंतं
गयमारोहेइ । जो य कप्पुरचुण्णपंडुरेण एगेणच्चिय सेयाऽऽयवत्तेण मयंकमंडलेण

१ विष्णु । २ गन्धर्वानीकम् । ३ मौक्तिकावचूला = मौत्तीनी जालर । ४ स्तवकितः - गुच्छयुक्त ।

गयणं पिव परिसोहंतो, चामरदुगच्छलाओ नियदेहं संखिविय भत्तीए य उवेच्च
 समयं गंगा-सिंधूहिं सेविज्जमाणो, फेलिहगिरिसिलासारसुहुमरयकणनिम्मिण्हिं
 पिव सेय-निम्मल सण्ह-मसिण-घण-वसणेहिं सोहंतो, रयणप्पहापुढवीए नेहेण
 समप्पियनियसारभूयविचित्तरयणालंकारेहिं विव सव्वंगेसुं समलंकरिज्जमाणो, फणा-
 मणिधरेहिं नागकुमारेहिं नागराओ इव आवद्धमणि-माणिकमउडेहिं निवगणेहिं परि-
 वारिओ, गंधव्वेहिं इंदुव्व पमोयभरभरियवेयालियवंदेहिं किट्टिज्जमाणऽभ्युगुणो, मंग-
 लिय-तुरिय-निग्घोस-पडिसदमिसेण गयण-पुढवीहिं पि भिसं कयमंगलियज्जुणी, तेयसा
 सक्कसरिसो परक्कमस्स भंडागारं पिव नरवई जत्तेण कुंजरं किंचि चोयंतो पयलेइ ।
 तथा गयणंगणाओ ओइण्णमिव भूमिमज्झाओ य उट्ठियं पिव दीहकालाओ समागयं
 नरिंदं दट्ठुं अणेगगामाहिंतो जणवग्गो समागच्छेइ, रण्णो सयला सा सेणा तत्थ य दट्ठुं
 समागओ मिलिओ सव्वलोगो तइया एगहिं समग्गो वि मच्चलोगो पिंडीभूओव्व भायइ ।
 तथा अणीगाणं समागयलोगाणं च निरंतराऽवट्ठाणेण मुत्तो तिलकणो वि हि महीय-
 लंमि न पडेइ । वेयालिएहिं पिव हरिसुत्तालेहिं केहिं पि लोएहिं थुणिज्जमाणो,
 चंचलचामरेहिं पिव वत्थंचलेहिं केहिं पि वीइज्जमाणो, केहिं चि अंसुंमंतो इव भाल-
 कयंजलीहिं वंदिज्जमाणो, आरामिएहिं विव केहिं चि अप्पिज्जमाणफलपुप्फो, केहिं
 पि सकुलदेवया इव पणमंसिज्जमाणो, गोत्तबुइढाजणेहिं पिव केहिंचि दिज्जमाणासी-
 वाओ सो पुढवीवई भरहनरीसरो नाभिनेदणो समोसरणं विव पुव्वदुवारेण चउदुवारं
 विणीयानयरिं पुव्वदारेण पविसेइ, तांहे लग्गघडियातुरियनादा इव जुगवं पत्तेगं पि
 मंचेसु संगीयाणि हुंति, पुरओ गच्छमाणे भूवाले रायपहाऽऽवणसंठियपमुइयपुरललणाओ
 दिट्ठीओ इव लोए खिवंति, पउरजणपक्खित्तकुसुममालाहिं समंतओ पिहिओ भरह-
 नरवणो कुंजरो पुप्फरहमइओ संजाओ, पुणो सो नरिंदो उक्कंठियलोगाणं अमंदुकंठाए
 रायपहंमि सणियं सणियं वच्चइ, नयरजणा वि गइंदभयं अगगंता भरहनरिंदस्स पासंमि
 उवेच्च रण्णो फलाईणि समप्पिपति 'बलवंतो खलु पमोओ' । निवो कुंजरकुंभ-थल-
 मज्झंमि अंकुसेण तालितो मंचाणं मंचाणं अब्भंतंरंमि मयंगयं थिरीकुणेइ, तथा उभय-
 पासेसुं मंचाणं पुरओ संठिआओ पवरपुरललणाओ जुगवं चक्कवट्ठिणो कप्पुरेण आर-
 त्तियं कुणंति, तथा भूवई दोसुं पासेसुं भमंत-जलंतारत्तिओ उभयपासथिआऽऽइच्च-मयंक
 मेरुगिरिसिंरि धरेइ । अक्खएहिं पिव मोत्तिएहिं पुण्ण-पत्ताइं उक्खिविज्जण आवणऽग्गम्मि
 संठिएवाणिए दिट्ठीए सो आलिंगेइ इव, मग्गासण्णपाप्पाएसुं दुवारठिअकुलंगणाणं

१ अष्टपदपर्वतः । २ वीज्यमानः । ३ अंसुमान्-आदिरयः । ४ तदा-तस्मिन् समये । ५ सृष्टतड्डुलान् ।
 ६ उपेत्य । ७ वाणिजान् ।

मंगलाई सो पत्थिवो नियमइणीणं विव अंगीकरेइ, दट्ठं इच्छमाणे परुपरसंधरिसण-
पीलिज्जमाणे समीवट्टिए जणे उक्खित्ताऽभयपयकरो भूवई वेत्तिअजणेहितो रक्खेइ,
एवं गच्छंतो भूमिपालो रायमंदिरग्गभूमीए उभयपासओ उच्चएहिं निवद्धमत्तगयवरेहिं
रज्जसिरीकीलागिरीहिं पिव अइंधुरं, इंदनीलमइयगीवाभरणेणेव मणोहारिमायंद-दल
पुण्णेण तोरणेण विभूसिअं, कत्थइ पुत्तागणेहिं कत्थइ कप्पूरचुण्णेहिं कत्थइ चंदकंत-
मणीहिं कय-सत्थियमंगं, कत्थ य चीणंसुएहिं कत्थ य दुऊलवसणेहिं कत्थ वि देव-
दूसेहिं पि पडामापत्तिपरिमंडियं, अंगंगमि कत्थइ कप्पूरवाणीएहिं कत्थ य पुफ-
रसेहिं कत्थ वि गयमयजलेहिं कयाभिसेयणं, सुवण्णकलस-मिसाओ वीसंत-
रविमिव सत्तभूमियंच विउसंति-महापासायं आसाएइ । तओ तस्स पासायस्स
अंगण-ग्ग-वेइंगाए पायं निवेसितो वेत्तिदिण्हत्थो नरिंदो गयवराओ
उत्तरिऊणं पुवं आयरिओ इव सोलससहस्साइ ताओ नियाऽद्विद्वयगदेवयाओ संपू-
इऊण विसज्जेइ । तओ सो वत्तीसं रायवरसहस्साइ चमूवई पुरोहियं गिहवई वड्ढई
च विसज्जए, पुणो सो भूवई तेसद्विअद्विगतिसयाइ सए मयंगए आजालाय विव दिट्ठीए
नियट्ठाणगमणाय आदिसेइ, तह महसवसमत्तीए अतिहिणो विव सेट्ठिणो अट्टारस सेट्ठी-
पसेट्ठीओ य दुग्गपालो य सत्थवाइ वि विसज्जइ । तओ सो भूमिपालो स्सको सईए
इव सुभदाए इत्थीरयणेण सहिओ तह रायकुलजायाणं च पवरजुवईणं वत्तीस-सहस्सेहिं
तावइआहिं जणवयवइकण्णाहिं वत्तीसपत्तजुत्तवत्तीसनाडगेहिं पि परिवरिओ जक्खराओ
कइलासमिव मणिरयणसिलापत्तिदिण्णनयणूसवं पासायं पविसेइ । तत्थ य नरिंदो
सीहासणंमि पुव्वमुहो खणं ठाऊण काओवि संकहाओ काऊण सिणाण-निएयणं वच्चइ,
तत्थ भरहनरीसरो सरम्मि गओ विव सिणाणं किच्चा परिवारेहिं समं सरसाहारभो-
यणं कुणेइ, तओ तेहिं नवरस-वरनाडएहिं मणोरमेहिं च संगीएहिं जोमेहिं जोगीव
कंपि कालं नयइ । एगया सुरनरा भत्तीए तं इअ विण्णवित्ति-सकसमपरकम ! महाराय !
तुमए विज्जाहरनरिंदसहिया एसा छखंडभूमी साहिआ, तओ अम्हे अणुजाणेसु जह
तुम्ह महारज्जाभिसेयं सच्छंदं कुणोमो ।

भरहस्स महारज्जाभिसेओ —

रण्णा तहत्ति इअ अणुण्णाया ते देवा नयरीए बाहिरं सुहम्मसहाए खंडमिव पुव्वु-
त्तरदिसाए मंडवं विहेइरे, तओ ते दह-नई-समुद-तित्थेहिंतो जलोसहि-मट्ठिआओ

१ भाकन्दः-आम्रः । २ विश्रान्तादित्यमिव । ३ सूदान्-रसवतीकारान् । ४ श्रेणी-प्रश्रेणयः=नव माला-
कारादिजातयो नव तैलिकादिजातय इति अष्टादश ।

आहरंति । भरहमहाराया पोसहसालाए गंतूण अट्टमतवं कुणेइ, 'जओ तवसा पत्तंपि रज्जं तवेण च्चिय नंदइ', अट्टमतवंसि पुण्णे अंतउरेण परिवरिओ परिवारजुओ मयंगया-रुढो राया तं दिव्वमंडवं गच्छइ, अंतउरेण सहस्ससंखनाडएहिं च सह भरहो उण्णयम-भिसेयमंडवं पविसेइ, सो तत्थ सिणाणपीढं मणिमइयसीहासणं च आइच्चो मेरुगिरिमिव पयाहिणं कुणेइ, तओ पुव्वसोवाणपंतीए अच्चुच्चं सिणाणपीढं गयंदो गिरिसिहर-मिव आरोहेइ, तओ तत्थ रयणसीहासणंमि पुव्वदिसाभिमुढो भरहेसरो उवविसेइ, तया केइवया इव ते वत्तीससहस्साइं नरिंदा उत्तरसोवाणमग्गेण सुहेण पीढमारोहेइरे, ते भूवा चक्कवट्ठिणो नाइदूरपुढवीए भद्दासणेसुं कयंजलिपुडा तित्थयरं वंदारवो इव चिट्ठंति, तओ सेणावइ-गिहवइ-वड्ढइ-पुरोहिय-सेट्ठिपमुहा वि दाहिणसोवाणमालाए पीढं आरोहि-ऊण जहकमं निय-निय-उइयासणेसु समासीणा महारायं विण्णत्ति काउं इच्छंता इव निबद्धंजलिपुडा चिट्ठंति । तओ भरहचक्कवट्ठिणो धम्मचक्कवट्ठिणो उसहसामिणो इंदा विव ते आभियोगियदेवा अभिसेयनिमित्तं समागच्छंति । जलगब्भिएहिं मेहेहिं पिव, वयणणसियकमलेहिं चक्कवाएहिं विव, पडंतपाणियनाएण तुरियनायाणुवाईहिं साहा-विय-वेउव्विय-रयणकलसेहिं ते देवा चक्कवट्ठिस्स अभिसेअं कुणंति । तओ सुहमुहुत्तम्मि ते वत्तीसरायवरसहस्सा हरिसेण नियनयणेहिं पिव निस्सरंतवहलजलकलसेहिं भर-हनरवइं अभिसिंचेइरे, तओ ते मत्थयम्मि पउमकोससहोयरनिबद्धंजलिणो चक्कवट्ठि वड्ढावेइरे-तुमं जयसु विजयसु य । अवरे सेणावइसेट्ठिपमुहा जलेहिं तं अभिसिंचंति जलेहिं पिव निम्मलवयणेहिं अहिथुणेइरे, अह ते उज्जल-पम्हल-सुउमारगंधकसाइय-वसणेण भाणिक्कमिव तस्स अंगं लुहंति । पुणो ते कंति पोसगैरगेरिएहिं कंचणं पिव राइणो अंगं गोसीसचंदणरसेहिं विलिविति, तओ उसहसामिणो सक्कदिणं मउडं मुद्धा-उभित्तित्तस्स राय-अग्गेसरस्स भरहनरिंदस्स मुद्धम्मि ते निहेइरे, मुहचंदस्स समीव-द्विय-चित्ता-साइणो इव रयणकुंडले रण्णो कण्णेसु पहिराविति, तस्स कंठम्मि पवित्त-मोत्तियमंठिय-हारं ठवित्ति, निवस्स वच्छत्थले अलंकाररायस्स हारस्स युवरायं पिव अद्धहारं ते निवेसित्ति, अब्भंतर-अब्भयपुडमयाइं विव निम्मलकंतिरेहिराइं देवदूसाइं वसणाइं रण्णो ते पहिरावेइरे, निवइणो कंठकंदले सिरीए उरत्थलमंदिरकिरणमइयवपं पिव उद्दामं सुमणोदामं ते पक्खिवित्ति, एवं कप्पहुमो इव अणग्घवत्थमणि-भाणि-काभरणभूसिओ भूवई सगगखंडं पिव तं मंडवं विभूसेइ, तओ सो सब्बपुरिसण्ण-हाणो धीमंतो भरहनरिंदो वेत्तियपुरिसेहिं अहियारिपुरिसे बोझाविऊण एवं आदि-सेइ-भो ! तुम्हे गयखंधं आरोहिऊण समंतओ पइपहं च परिभमिऊण इमं बिणीया-

नयरिं दुवालसवरिसयज्जंतं सुंक-कर-दंड-कुदंड-रहियं अभडपवेसं निच्चपमोयं कुणेह ।
तओ तक्खणं चिय ते अहिगारिपुरिसा तह कुणेइरे, 'जओ कज्जसिद्धीसुं चक्रवर्तिस्स
आणा पंचदसं रयणं भवइ' । अह पत्थिवो ताओ रयणसीहासणाओ उट्ठेइ, तयणु तस्स
पडिबिंवाई पिव अण्णे वि नरिंदाइणो सहेव हि उट्ठेइरे । भरहेसरो नियागमणमग्गेण
गिरिणो इव सिणाणपीढाओ उत्तरेइ, तह अण्णे वि नरिंदा उत्तरेइरे । तओ महोसाहो
महीवई स-पयावं विव असज्जं वरहत्थि आरोहिऊण नियपासायं गच्छेइ, तत्थ सिणाण-
घरंमि गंतूण निम्मलेहिं जलेहिं सिणाणं काऊण धरणीधवो अट्टमभत्तस्स अंते पारणं
करेइ, एवं दुवालसवारिसियाभिसेयमहूसवे समत्ते सिणाओ कयवलिकम्मो कयपाय-
च्छित्तकोउयमंगलो भरहनरिंदो बाहिरसहाए गंतूण ते सोलससहस्साइं अप्परक्ख-
गदेवे सक्कारिऊण विसज्जेइ, तओ य पासायवरारूढो पंचिंदियविसहसुहं भुंजमाणो
महीवई विमाणत्थिअसको इव चिट्ठेइ

चक्रवर्तिस्स सामिदीओ—

तस्स चक्रवर्तिणो आउहसालाए चक्रं छत्तं असी दंडो य एयाइं एगिंदियाइं
चउरो रयणाइं संजायंते, रोहणायले माणिककाइं पिव तस्स सिरिमंतस्स सिरिगेहंमि
कागिणी-चम्म-मणिरयणाइं नवनिहिणो य हवंति, नियनयरीए सेणावई गिहवई पुरो-
हिओ वड्ढई वि चत्तारि नर-रयणाइं संजाएइरे, गयाऽऽसरयणाइं वेयइडगिरिमूलंमि
हवंति, इत्थिरयणं तु उत्तरविज्जाहरसेदीए समुप्पणं । नयणाणंददाइणीए सुत्तीए मयंकुच्च
दूसहेण य पयावेण भाणुमंतो विव भरहो सोहेइ, सो पुंरुवत्तणं गओ समुहो इव गंभीरो,
पुणो मणूससामित्तणं पत्तो वेसमणो विव, गंगासिंधुपमुहचउदसमहानईहिं जंबुदीवो
विव चउदसमहारयणेहिं सो विराएइ, विहरमाणस्स उसहपहुणो पायाणं हिट्ठमि जह
सुवण्णकमलाणि हवंति तह भरहनरिंदस्स नव वि निहिणो पायहिट्ठथिइणो वट्ठेइरे, अण-
प्पमुल्लकिणिय-अप्परक्खगेहिं इव सया पासत्थियसोलसदेवसहस्सेहिं परिवरिओ हवइ,
नरिंदकण्णाणं पिव नरवईणं बत्तीससहस्सेहिं अच्चंतमत्तिभरेहिं सो निरंतरं उवासिज्जइ,
नाडगाणं बत्तीससहस्सेहिं पिव जणवयजायवरकण्णाणं वत्तीस-सहस्सेहिं सह
सो पुढवीवालो अभिरमेइ, सो पिच्छीए अथीयभूवो तिसट्ठिसाहियतिसयवासरेहिं
वरिसुच्च तावंतसूवगारेहिं विभाइ, पुढवीयलंमि अट्टारस-सेट्ठि-पसेदीहिं ववहारधम्मं
लिवीहिं नाहिनंदणो विव पयट्ठावेइ, रह-गय-हयाणं चउरासीइलक्खेहिं गाम-पाइ-
क्काणं च छणवइकोडीहिं सो विराएइ, बत्तीसजणवयसहस्साण महीसरो, वावत्तरि

पुरवरसहस्साणं सो पहु, नवनवइसहस्सदोणमुहाणं अडयालीससहस्सपट्टणाणं च सो अहिर्वा, चउवीससहस्सकब्बड— मडंवाणं सामी, वीससहस्साऽऽगराणं सोलसण्हं च खेड-सहस्साणं पसासगो, चउदसण्हं सेबाहसहस्साणं छप्पण्ण—अंतरदीवाणं एगूणपण्णासकुर-ज्जाणं च नायगो, एवं सो भरहखेत्तमज्झगयाणं अण्णेसिं पि वत्थूणं सासगो होत्था । विणीयानयरीए संठिओ भरहनरिंदो अखंडियमैहिपत्तं कुणंतो अभिसेगमहूसवपज्जंते नियजणे सुमरितुं पउत्तो, तओ निउत्तपुरिसा सट्ठिवाससहस्साइं जाव विरहेण दंसणुकं-ठियनियजणे रण्णो दंसेइ—

सुंदरिं ददृशुणं भरहस्स चिंता सुंदरीए य दिक्खा—

तओ स-पुरिसेहिं नामगहणपुण्यं दंसिज्जमाणं बाहुबलिणो सौयरं सुंदरिं सो गुणसुंदरो भरहो पेक्खेइ-सा केरिसी, गिम्हसमयैकंता नइच्च किसयरा, हिम-संपक्कवसाओ कमलिनीव मिलाणा, हेमंतकालचंदकला इव पणट्टरूवलायणा, सुकदल-कयलीव पंडुखामकवोला । तद्वाविहं परावट्टियरूवं तं संपेक्खिज्जण सकोहं भरहचक्क-वट्ठी सनिउत्तजणे वणइ-अरे ! किं अम्हकेरेवि गोहम्मि कयावि. ओयणाइं न ?, लव-णंबुहिम्मि लवणाइं पि किं न विज्जंते ?, विविहरसवईविउसा सूवगारा किं न संति ?, अहवा अमुणो किं निरायरा आजीविगा चोरा य ?, दक्खा—खज्जूरपमुहाइं खज्जाइंपि किं इह न सिया ?, सुवण्णगिरिम्मि सुवण्णंपि किं नहि विज्जइ ?, उज्जाणेसुं ते रुक्खा फलरहिया किं संति ?, नंदणवणंमि पि हि तरवो किं न हि फलंति ?, घंडापीणाणं पि धेणूणं दुद्धाइं इह किं न वा सिया ?, कामधेणू वि सुक्कत्थणपवाहा किं णु जाया ?, अह भोज्जाइंसपयासु समाणासु वि सुंदरी जइ न किंचि भुंजेइ, तो एसा किं रोगपीलिआ ? । जइ कायैसुंदेरिमत्तकरो इमीए को वि आमओ सिया ता किं सव्वे वि भिसयवरा खयं गया ?, जइ अम्हाणं मंदिरेसु दिव्वाओ ओसहीओ न पाविज्जंति तया हिम-गिरी वि संपइ ओसहिविरिहो किं ? । दलिदत्तणयभिव किसययं इमं पासंतो अहं दूमेमि, तम्हा अहो ! सत्तुहिं पिव तुम्हेहिं अहं वंचिओ अम्हि । ते वि निओगिणो भरहं पणमिज्जण एवं वयंति—‘देविदस्सेव देवस्स गोहम्मि सव्वंपि विज्जइ, किंतु देवो जओ पभिइं दिसाविजयं काउं निग्गओ तओ पभिइं एसा पाणत्ताणट्ठं केवलं आयंवि-

१ संबाधः—नगरविशेषः । २ आविपत्यम् । ३ सोदरम् । ४ ओकान्ता । ५ घडापीनानाम्—घडाजेवा आउवाळी गाय. । ६ सौन्दर्यम् । ७ दूये ।

लाई कुणेइ, तह जयच्चिय देवेण पव्वयंती निसिद्धा तओ पभिइं एसा भावओ 'संजया विव हि चिदठइ' । एवं सोच्चा महीणाहेण कल्लाणकारिणी तुं पव्वइउं इच्छसि त्ति पुट्ठा सुंदरी 'एवं' ति वणइ । भरहनरिंदो वि साहेइ—'पमाएण अंजवेण वा अहं इयंतकालं इमीए वयविग्गमरो होत्था, इमा खलु अवच्चं तायपायाणं अणुरूवं सिया, निरंतरं विसयासत्ता रज्जाऽत्तिता अम्हे के ?, अंबुहिवारितरंगुव आउं विणसिरं, एयं जाणंता वि विसयपसत्ता जणा न जाणेइरे । दिट्ठनट्ठाए विज्जूए मग्गावलोयणं पिव खणभंगुरेण अणेण आउसेण मोक्खमग्गो जइ साहिज्जइ तं सोहणयरं, मंस-मज्जा-मल-मुत्त-रुहिर-सेयाऽऽमयमइयदेहस्स पसाहणं गेहखालपक्खालणसरिसं चिय, एयाए तणूए मोक्खफलं वयं गिण्हउं इच्छसि तं साहु, निउणा खलु खीरसमु-हाओ वि रयणाइं चेव गिण्हेइरे' एवं पमुइएण नरिंदेण वयाय अणुणयाया तवकिसा वि सा सुंदरी अकिसा विव हँरिस्ससिया जाया ।

सुंदरीए दिक्खा—

एयम्मिं समये भयवं उसहज्जओ जंगमऊरबलाहगो विहरमाणो अट्ठावयणि-रम्मि समागच्छेइ, तत्थ पव्वयम्मि देवा रयण-कंचण-रूपमइयं अवरं पव्वयमिव समो-सरणं रणइरे । तत्थ देसणं कुणमाणं पट्टं जाणिऊण गिरिपालगा सिग्घं भरहचक्कव-ट्टिस्स समीवं उवेच्च विण्णवेइरे, तया सामिणो समागमणसमायारं समायणिऊण मेइ-णीवई छक्खंडभरहखेत्तविजयाओ वि अहिगं पमुइयचित्तो हवइ, पत्थिवो पट्टसमायार-विण्णवगाणं भिच्चाणं सइददुवालसकोडीसुवण्णस्स पारिओसियं देइ, 'तुम्ह मणोरह-संसिद्धीए मुत्तिव्व जगगुरू इह आगिच्छित्था' इअ सुन्दरिं कहेइ य, तओ भरहेसरो दासी-जणेहिं पिव नियंतेउरवहूजणेहिं तीए निक्खमणाभिसेयं करावेइ । अह कयसिणाणा सा सुंदरी कयपवित्तविलेवणा सदसवसणाइं परिहेइ, तओ जहट्ठाणं उत्तमरयणालंकारे धरेइ सीलालंकारवईए तीए बाहिरालंकारा आयारपालणट्टमेव । तहट्ठियाए सुंदरीए पुरओ रूवसंपयाए इत्थीरयणं सा सुभदावि चेडिन्व विभाइ । तया सा सीलसुंदरी सुंदरी जंगमा कप्पवल्लिन्व जो जं मग्गेइ तं तस्स अविलंबियं वियरेइ, कप्पूर-धूलि-धवल-वत्थेहिं उवसोहिया सा मराली कुमुडणिं पिव सिवियं आरोहेइ । हत्थि-वग-सैइ-पाइक्क-रह-च्छण्णभूमिणा नरिंदेण मरुदेविन्व सुंदरी अणुसरिज्जइ । चामरेहिं वीइज्जमाणा, सेयच्छत्तेहिं विराइज्जमाणा, वेयालियगणेहिं थुणिज्जमाण-निविडवयगहणसट्ठा, भाउभज्जार्हिं गिज्जमाणपवज्जमहूसवमंगला पए पए वरइत्थीहिं

उत्तारिज्जमाणलवणा चलंताणेगपुणपत्तेहिं सह सोहन्ती सा सुंदरी सामिपाय-
पवित्तिं अट्ठावयगिरिं पावेइ । स-मयंकं पुब्बायलं पिव सामिअहिद्वियं तं गिरि-
वरं दट्ठण भरह-सुंदरीओ महाहरिसं संपत्ता । तओ ते सम्गाववग्गाणं सोवाण-
मिव विसालसिलं तं अट्ठावयपव्वयं समारोहिरे । तओ भवभमणभीयाणं जंतूणं
सरणं चउदुवारं संखित्तजंबूदीवजगइं विव समोसरणं समागच्छन्ति । अह ते उत्तर-
दुवारमग्गेण जहविहिं समोसरणं पविसेइरे, तओ ते भरहसुंदरीओ हरिसव्णि-
एहिं ऊससंतसंकुचंतदेहाओ परमेसरं तिकखुत्तो पयाहिणं कुणेइरे, तओ ते रयण-
भूयलसंकंतजगवइरूवं दट्ठं ऊसुगा इव तित्थयरं पणमंति, तओ भरहचक्कवट्ठी भत्ति-
पवित्तिचारुगिराए आइमं धम्मचक्कवट्ठिं थुणिउं पारंभेइ- -

भरहेसरकथा थुई—

‘हे पहु ! असब्भुयगुणे जंपंतो जणो अण्णं जणं थुणेइ, किंतु अहं तुम्ह सब्भुय-
गुणे वोत्तुं पि अक्खमो तओ कहं थुणेमि ? । तहवि हि जगणाह ! तुव थुइं काहं । जओ
दल्लिहो सिरिमंताणं पि उवायणं किं न देइ ? । तुम्ह पायसरोयदंसणमेत्तेहिं अण्णजम्मण-
कयाइं पि पावाइं चंदकिरणेहिं सेहोलीपुष्पाणीव गलेइरे । अचिइच्छणिज्जमहामोहसंनि-
वायवंताणं पि हे सामि ! तुम्ह परमनिव्वुइकराओ सुहोसहरिससरिच्छाओ वायाओ
जएइरे । हे नाह ! तुव दिट्ठीओ वासासु वुट्ठीओ विव चक्कवट्ठिम्मि दल्लिहे वा पीइसंप-
याणं कारणं । कूरकम्महिमगंठिविहावणदिवागरो हे पहु ! अम्हारिसाणं पुण्णेहिं
इमं पुढविं बिहरेसि । वागरणसत्थेवावणसीलसण्णासुत्तसरिसी उप्पाय-वय-धुवमई तिवई
तुम्ह जएइ । भयवं ! जो इह तुमं थुणेइ तस्सावि एसो चरमो भवो होइ, जो तुवं सुस्स-
सइ झियाइ वा तस्स पुणो का कहा ?’ इअ भगवंतं भरहेसरो थुणिऊण नमिऊण य
पुव्वुत्तरदिसाए जहारिहं ठाणं उवविसेइ । अह सुंदरी वि उसहज्झयं पहु वंदिऊण
कयंजली गगरक्खरगिराए एवं वएइ—‘जगवइ ! एयावंतकालं मणसा पासिज्जमाणो
तुमं होत्था, संपइ उ बहहिं पुण्णेहिं दिट्ठीए पच्चक्खं दिट्ठी सि । मैयतण्हिआसरि-
च्छसुहे संसारमरुमंडले लोणेण पुण्णेहिं चिय पेऊसमहाद्रहो तुमं पत्तो सि । जगसुरु !
निम्ममो वि तुमं विस्सस्सावि वच्छलो सि, अण्णहा विसमदुहोयहिणो एयं कहं उदरसि ? ।
मम सामिणी बंभी कयत्था, भाउपुत्ता कयपुण्णा भाउपुत्तपुत्ता धण्णा, जे हि तुम्हाणं
पहं अणुसरिआ । भयवं ! भरहनरिंदनिब्बंभवसेण इयंतकालं जं मए वयं न गहियं,
तओ सयंचिय अहं वंचिअ म्हि । जगतारस ! ताय ! दीणं मं तारसु, तारसु, गेहुज्जोयगरो

दीवो घडं किं न उज्जोएइ । जगरक्खणिकदिक्खिअ ! पहु ! पसीअहि संसार-
समुदतारणजाणपत्तसरिच्छं दिक्खं मम देहि । भयवंपि महासत्तरेहिरे ! साहु
साहु त्ति बुवंतो तीए सामाइयसुत्तुच्चारणपुव्वं दिक्खं देइ । तओ पहु महव्वय-
दुमाराम-सुहासारणिसंनिहं अणुसासणमइअं देसणं विहेइ । तओ अप्पाणं मोक्ख-
पत्तमिव मण्णमाणा सा महामणा साहुणीगणमज्झम्मि जिट्ठाणुक्कमेण निसीएइ ।
सामिणो देसणं सोच्चा पायसरोयाइं च पणमिऊण मुइयमणो भरहनरीसरो अउ-
ज्झानयरि वच्चेइ । पुणो नियसयलजणं दट्ठुं इच्छंतस्स भरहेसरस्स अहिगारीहिं
जे आगया ते दंसिआ, जे अणागया वि ते संभारिआ । नियाभिसेयमहूसवे
वि अणागए ते भाउणो नच्चा भरहेसरो ताणं पत्तेयं दूए पेसेइ । 'जइ तुम्हे
रज्जाइं समीहेह ता भरहं सेवेह' त्ति दूएहिं बुत्ता ते सव्वे वि आलोइऊण इमं
वयंति- 'पिउणा अम्हाणं भरहस्स य विभइऊण रज्जं दिण्णं, संसेविज्जमाणो भरहो
तओ अहिगं किं काहिइ, किं काले समावडंतं कालं रुंभिस्सइ ?, किं देहग्गाहिणिं
जरारक्खसिं निग्गाहिस्सइ ?, किं वा वाहाकारिणो वाहिवाहे हणिस्सइ ?, जं वा जहु-
त्तरं वड्ढमाणं तिण्हं किं दलिस्सइ ?, जइ भरहो एरिससेवाफलं दाउं न समत्थो,
तो मणूसभावे सामण्णे वि को केण सेविज्जउ । पत्तविसालरज्जो वि जइ असंतोसाओ
अम्हाणं रज्जं बलाओ गहिउं इच्छइ तो अम्हे वि तस्स तायस्स तणया, तओ हे
दूआ ! तायं अविण्णविऊण जेट्ठेण सोअरियबंधुणा तुम्हेच्चयसामिणा जोडुं अम्हे
न ऊसाहामो' ताणं दूआणं एवं कहिऊण तंमि चिय समए अट्ठावयगिरिम्मि समो-
सरणे संठियं उसहसामिं उवगच्छेइरे, परमेसरं पयाहिणतिगं काऊण पणमंसित्ता सिर-
निवट्ठंजलिणो सव्वे वि एवं थुइं विहेइरे- 'जिणेसर ! देवेहिं पि अविण्णेयगुणं तुमं
थुणिउं को पैच्चलो । तह वि ईस ! विलसंतवालचावला थुणिस्सामो । जे सया तुमं
नमंसंति ते तवंसिजणेहितो अहिगा, जे उ तुमं सेवेइरे ते जोगिहितो वि सेट्ठ-
तमा । जगभावपयासणदिणेसर ! पइदिणं नमंसंताणं कयपुण्णाणं तुम्ह पायनहं-
सुणो अवयंसंति । जगज्जंतु-अभयप्पय ! तुमए कासइ 'सामेण बलाओ वा न किंचि
गिणिहज्जइ, तहवि तुं तेलुककक्कवट्ठी सि । पहु ! सव्वजलासयजलेसु निसागरु-
व्व इक्को वि तुमं सव्वजीवाणं चित्तेसुं समं वट्ठसि । देव ! तुमं थुइं कचारो सव्वेहिं
थुणिज्जइ, तुम्ह अच्चगो सव्वेहिं अच्चिज्जइ, तुव पणमियारो सव्वेहिं पण-

मिउज्झइ, तुमम्मि भन्ती महाफलदाइणी सिया । देवेस ! दुक्खदावग्गितवियाणं तुमं
 हेक्कवारिओ, मोहंभयारमूढाणं तुमं चिय एक्कदीवो असि । पंहमि छायादुमो
 इव दीणाणं सिरिमंताणं भुक्खाणं गुणवंताणं पि य तुमं साहारणुवयारी' इअ भयवंतं
 थुणिऊण भमरुव्व सामि-पायारविंदेसु निवेसिअनयणा अह एगीभूआ ते एवं विण्ण-
 वेइरे-‘तयारिणिं तायपाएहिं पिहं पिहं देसरज्जाइं विभइऊण जहारिहं अम्हाणं भर-
 हस्स य दिण्णाइं । जगदीसर ! तेहिं चिय रज्जेहिं संतुट्ठा अम्हे संचिट्ठामो, सामि-
 हंसिया मज्जाया हि विणयसंपण्णाणं अलंघणिज्जा होइ । किंतु भयवं ! भरहेसरो
 नियरज्जेणं अवहरिएहिं च अण्णरज्जेहिं जलेहिं वडवाणलो इव न संतूसेइ । जह तेण
 अण्णेसिं पुढविवईणं रज्जाइं अवडरियाइं तह सो भरहो अम्हाणं पि रज्जाइं अवह-
 रिउं इच्छइ, एसो अवरनरिंदाणं विव अम्हाणं पि दूअपुरिसेहिं ‘सिग्घं रज्जाइं चइ-
 ज्जेतु सेवा वा मम किज्जउ’ त्ति आदिसेइ, अप्पबहुमाणिणो तस्स वयणमेत्तेण ताय-
 दिण्णाइं रज्जाइं अम्हे कीवां विव कहां मुंचामो ?, अहिगरिद्धीसुं निरीहा अम्हे तस्स
 सेवं पि कहां कुणेमो ?, असंतुट्ठा एव माणविघाइणिं सेवं कुणेइरे, रज्जं अमुंचमाणे
 सेवाए य अकरणे सयं जुद्धं उवट्ठियं, तह वि तायपाए अणापुच्छिऊण न किंचि
 काउं तरामो’ । तओ निम्मलकेवलनाणसंकंतासेसमुवणो क्किवावंतो भयवं सिरिआइणाहो
 ताणं एवं आदिसेइ—

भरहभाऊणं पहुणो उवएसो, तेसिं च दिक्खा—

वच्छा ! पुरिसव्वयधारिपुरिसवीरेहिं हि अच्चंत-दोहकारिणा वेरिवग्गेण
 सह जुज्झियव्वं, पुरिसाणं जम्मंतरसएसु वि रागहेसमोहकसाय त्ति अणिट्ठाइणी
 सत्तवो संति, रागो हि जीवाणं सुगइमणे लोहमइयपायसंकला, दोसो य नरगावासनि-
 वासम्मि बलवंतो पडिंभू, मोहो नराणं भयणवावट्ठपक्खेवणम्मि पणसरिसो, कसाया अग्गि-
 णो विव नियासए चिय डहेइरे, तओ दोसरहिएहिं तेहिं तेहिं उवायसत्थेहिं निरंतरं जुज्झिऊण
 जुज्झिऊण एए वेरिणो नरेहिं विजेयव्वा, इक्कसरणभूयस्स धम्मस्स चेव सेवणं हि
 विहेयव्वं जेण सासयाणंदमइयं तं पयं सुलहं सिया । अणेगजीवजोणिसंपायाऽणंतबाहा-
 निबंधणं अहिमाणिक्कफला इमा रज्जसिरी सा वि ‘विणसिरी, किं च वच्छा ! पुव्व-
 भवेसुं तुम्हाणं देवलोगसुहेहिं जा तिण्हा न छिण्णा, सा इंगालकारगस्सेव मच्चभोगेहिं-
 कहां छिंदेज्जा ? ।

१ एकवारिदः । २ क्लीबाः=नपुंसका इव । ३ द्वेषः । ४ प्रतभूः=प्रतिनिधिः । ५ निजाश्रयान् ।

एत्थ इंगालगारस्स दिट्ठो—

को वि इंगालगारगो जलस्स दिईं आदाय निज्जलरणम्मि इंगाले काउं गच्छित्था, सो मज्झणहाऽऽयवपोसिय-इंगालानलसंतावाओ संजायवहलतिसाए अक्कंतो दिइगयसव्वजलं पिवित्था, तेणावि अच्छिण्णतिसो समाणो सुत्तो सो सुमिणम्मि गिहं गओ, तत्थ वि घड-कलस-गम्भारीगयसयलपयं पासी, तज्जलेहिं पि अच्छिण्ण-तिण्हाए अगितेल्लमिव वात्री-कूव-तलागाईं पाऊण पाऊण सोसित्था, तहच्चिय तिसिओ अह सो सरियाणं समुद्दस्स य जलं पिज्जित्था, तहवि नारगस्स वेयणा इव न य तस्स तिसा अवगया, तओ सो मरुकूवम्मि गओ, तत्थ सो रज्जुहिं दब्भ-पूलं वंधिऊण जलट्ठं कूवम्मि खिवित्था, 'दुहिओ हि किं न कुणेज्ज ?' । कूवस्स दूर-जलत्तणेण मज्जे वि गलियंबुयं तं दब्भपूलयं दमगो तेल्ल-पोयं पिव निच्चोइऊण पिवित्था । जा तिसा समुद्दाईहिं न च्छिण्णा सा पूलजलेण कहं छिज्जइ ? , तदेव तुम्हाणं सगमुद्देहिं अच्छिण्णतिसा सा रज्जसिरीए किमु छिदिज्जइ ? । तओ वच्छा ! विवेगवंताणं तुम्हाणं अमंदाणंदनीसंदनिच्चाणपयसंपत्तिकारणं संजमरज्जं वेत्तुं जुज्जइ, । तओ तयाणि समुप्पणसंवेगवेगा ते अट्ठाणउई पुत्ता भगवंतस्स अंतियम्मि पच्चज्जं गिण्हिस्सु । तओ ते दूआ 'अहो ! धीरिमा, अहो ! सत्तं, अहो ! वेरग्ग-बुद्धि' त्ति चिंतमाणा एएसिं सरूवं भरहनरिंदस्स निवेणइरे । भरहचक्कवट्ठी वि तारो-वई तारगाणं जौईणिव्व, दिणयरो पावगाणं तेयाणीव, बारिही सोआणं जलाइं पिव तेसिं रज्जाइं गिण्हेइ ।

चक्कस्स लाहो विजओ दिसाए, रज्जाभिसेगो भरहस्स रण्णो ।

भाऊण दिक्खापरिकित्तणं च, उद्देसगे वुत्तमिहं चउत्थे ॥

इअ सिरितवागच्छाहिवइ-सिरिकथंबपमुहाणेगतिथोद्धारग-सासणप्पहावग-आवालंबंभयारि-सूरी-

सरसेहर-आयारियविजयनेमिसूरीसरपट्टालंकार-समयण्णु-संतमुत्ति-वच्छल्लवारिहि-आह-

रिय-विजयविन्नाणसूरीसरपट्टधर-सिद्धंतमहोदहि-पाइअभासाविसायर-विजयकथूर-

सूरिविइए महापुरिसचरिए पट्टमवग्गम्मि भरहचक्कपत्ति-दिसाविजय-

रज्जाभिसेग-भाउवयग्गहेणसरूवो चउत्थो उद्देसो ।

१ दतिः=मशक । २ अशोषयत् । ३ निच्चोत्थ-नीचेवीने । ४ तारापतिः=चन्द्रः । ५ ज्योतीषि ।

६ ओतसां=प्रवाहाणाम् ।

पचमो उद्देशो

एगया सहामज्झसंठियं भरहाहीसरं नमंसिऊण सुसेणसेणावइ भासेइ-महाराय !
 दिसाविजयं काऊणं पि तुम्ह इमं चक्करयणं अज्जावि मउम्मतो गओ आलाणथंमं
 पिव इमं नयरिं न पविसेइ । भरहराओ वि एवं वएइ-छखंडभरहखेत्तमज्झम्मि
 अज्ज वि को णाम वीरो मम आणं न पडिच्छेइ ? । तयच्चिय सइओ कहेइ-
 'जाणामि अहं, देवेण चुल्लहिमवंतगिरिं जाव एयं भरहखित्तं निज्जियं, दिसाजत्तं
 कुणंते वि तुमम्मि किं विजेयव्वो अवसिट्ठो सिया ? , ममंत-घरट्टजंते पडिया चणगा
 किमु चिट्ठंति, तहवि नाह । नयरीए अपविसंतं एयं चक्कं अज्ज वि जेयव्वं तुम्ह
 आणालंघणुम्मत्तं कं पि सएइ ? , तुम्ह दुज्जयं जेयव्वं देवेसु वि न पासामि, अहवा
 अरे ! णायं, वीसदुज्जओ जेयव्वो एगो अत्थि । सो सामि ! उसहसामिणो तण-
 ओ तुम्ह लहुभाया बलीणंपि बलविणासगो महाबलो बाहुबली अत्थि । जहा एगओ
 सव्वसत्थाइ एगओ वज्जं, तह एगओ सव्वं रायवुंदं एगओ सो बाहुबली । जह तुमं
 उसहसामिस्स नंदणो लोगुत्तरो सि तह सो वि अत्थि, तओ एयम्मि अजिए तुमए
 किं जियं ? छखंडभरहम्मि सामिणो सरिसो को वि न दिट्ठो, तस्स जए भरह-
 नरिंदस्स को नाम उक्किट्टगुणो अत्थु ! , परंतु अयं बाहुबली जगमाणिज्जं तुम्ह
 आणं न मण्णेइ, तस्स अजयाओ लज्जियं पिव चक्कं इह नयरं न पविसेइ । वाहीव
 लहू वि सत्तू न उवेक्खियव्वो, तओ लहुणा विलंबेण अलं, बाहुबलिस्स जयं पइ
 'जएह' । अह मंतिवयणं सोच्चा दावानलमेहवुट्ठीहिं गिरी विव सज्जो कोवुवस-
 मेहिं औलिद्धो भरहेसरो इमं बवेइ-एगओ लहुबंधू वि आणं न अंगीकुणेइ इअ
 लज्जागरं, एगत्य अणुयबंधुणा सह जुद्धं ति तं मम बाहेइ । जस्स सघरम्मि न
 आणा चलेइ, तस्स आणा बाहिरम्मि अवहासकरी सिया, तह य कणीयसबंधुणो
 अविणयासहणम्मि पवाओ । एगओ दरिआणं दप्पनासणं अयं रायधम्मो, इओ
 भायरम्मि सुबंधुत्तणं कायव्वं ति हा ! संकडम्मि पडिओ म्हि । अमच्चो वि एवं
 अभिहेइ-महाराय ! देवस्स जं संकडं तं भवंतस्स महत्तणेण सो चिय कणीयसो अव-

णेस्सइ, जओ 'जिट्ठेण आणा देया, कणीयसेण सा कायच्चा' अयं आयारो साहारण-
गिहवईणं पि खूढो एव, तओ देवो वि लोगखूढमग्गेण संदेसहारणं दूअं पेसि-
ऊण कणीयसरस भाउणो आणं कुणेउ, देव ! वीरमाणी तव अणुओ केसरी
पेल्लाणं पिव सव्वजगमाणणिज्जं तुम्ह आणं जइ न सहिस्सए, तया इंदुव्व पव-
लसासणो तुमं तं कणीयसं भायरं पसासेज्जा, एवं लोगायारस्स अणइक्कमाओ लोमे
तुम्ह वि अववाओ न सिया । भरहनरिंदो तस्स वयणं तहत्ति पडिक्कजेइ, जओ सत्थ-
लोग-ववहाराणुसारिणी वाणी उवादेया ।

भरहस्स बाहुबलिं पइ दूअपेसणं-

तओ सो नीइकुसलं वायालं दहं सुवेगं नाम दूअं अणुसासित्ता बाहुबलिं
पइ पेसेइ । सो सुवेगो सोहणं सामिसिक्खं समायाय रहं आरोहिऊण तक्खसिलं
पइ चलेइ । सार-सइण्णपरीवारो सो अइवेगवंतरहेण अउज्झानयरीए बाहिरं
निगच्छेइ, गच्छंतस्स तस्स पहम्मि कउजारंभविहिम्मि दइव्वं पडिऊलं पासंतमिव
वामं लोयणं असइं फंदेइ, वन्हिमंडलमज्झम्मि सुवण्णगारस्सेव तस्स दाहिणा नाली
रोगाभावेऽपि पुणरुत्तं वहेइ, खलंतगिराणं असंजुत्तवण्णेसु वि जीहा विव समेसु
वि मग्गेसु तस्स रहो मुहुं खलेइ, आसवारेहिं वारिज्जमाणो वि असइं पेरिज्जमाणो
विव हरिणो तस्स पुरओ दाहिणाओ वामओ जाइ, तस्स अग्गम्मि सुक्ककंटग-
दुमम्मि निविट्ठो कागो उवले सत्थं पिव चंचुं घरिसंतो कडुयं रसेइ, तस्स
वाहणस्स रुंधणेच्छाए देव्वेण मज्झे छूढा अगला इव तस्स पुरओ पलंबिरो किण्ह-
पण्णगो उत्तरेइ, वियारिक्क-विउसं तं पच्छा पल्लसंतो विव चक्खुसुं रयं पविक्ख-
वंतो वाऊ पडिऊलो वायइ, पण्णुडियं मिअंगविरससरो रासहो तस्स दाहिणओ
होऊण विरसेइ । सुवेगो एयाइं अवसउणाइं जाणंतो वि अग्गओ गच्छइ । सामि-
णो हि सुमिच्चा कंडुव्व कत्थ वि न पक्खलंति । सो चक्कवाओ विव तेहिं तेहिं नय-
स्वासीहिं खणं दीसमाणो बहुए गाम-नयरागर-कब्बडे लंबेइ । सामिकज्जम्मि पव-
ट्ठिओ सो वणखंडसरोवर-सिंधुनइप्पमुहठाणेषु वि न वीसमेइ । एवं सो पयाणं
कुणंतो मच्चुणो एगतकीला-भूमिमिव महाडविं पावइ, सा केरिसी ? रक्खसेहिं पिव
मिअ-चम्म-वसणधरेहिं लक्खीकयकुंजरेहिं सज्जियकोदंडेहिं चिलाएहिं आउला, हरिण-

१ पर्याणम्-पलाण । २ असकृत् । ३ वारंवारम् । ४ क्षिप्ता । ५ पर्यस्यन्निव । ६ भुदङ्ग ।

चित्तय-वग्ग सिंवेहिं सेरहेहिं पि जमरायस्स संगोत्तेहिं पिव कूरसांवएहिं निरंतरं
 खइया, जुअंताऽहिनउलज्जमीअभीसणा, रिच्छकेस-धरण-तल्लिछ-बाल-चिलोइया,
 परुप्परं महिससंगाम-भंजिज्जमाणजिण्णतरु लोहलुत्थात्रियमहुमक्खियागणेहिं असंचारा,
 अब्भलिहतस्सगतिरोहिदिवारा । एरिसिं भयंकरं तं महाडविं महावेगवंतरहो सुवेगो
 पुण्णवंतो कट्ठं दिव सलीलं उल्लंघेइ । कमेण सो-‘मग्गंतर-तरु-वीसमिराऽणग्ग
 विहसणधारीहिं सत्थ-पहियवहुजणेहिं संलक्खिज्जमाण-सुरज्जं, गोउलम्मि गोउ-
 लम्मि रुक्खतलसमासीण-पहरिसिर-गोवदारगेहिं गिज्जमाणुसहचरियं, भइसालव-
 णाओ आहरिऊण आरोविण्हिं फलसोहिरवहलबहुतरुवरेहिं अलंक्रियाहिलग्गामं, पट्ट-
 णम्मि पट्टणम्मि गामम्मि गामम्मि घरम्मि घरम्मि य दाणसीलसेट्टिजणेहिं सोहि-
 ज्जमाण-मग्गणजणं, भरहनरिंदाओ तसिएहिं पिव उत्तरभरहइदाओ समागएहिं
 अक्खीणसामिद्धीहिं मिलिच्छेहिं पाएण अज्झासियगामं, छक्खंडभरहखेत्तेहिं तो खंडं-
 तरं पिव संठियं भरहाणाऽणभिण्णुं, बहलीदेसं समासाएइ । मग्गम्मि बाहुब-
 लिनरिंदं विणा रायंतरं अजाणंतेहिं जणवयवासिसुहीहिं जणेहिं सह अणेगसो
 आलावं कुणंतो, सुणंदानंदणाणुणाए वणेयर-गिरियर-दुम्मय-हिंसगपाणिणो वि अहिं-
 सगभावं समावण्णे पासंतो, पयाणं अणुरागवयणेण महासमिद्धीहिं च सिरिबाहुबलि-
 रायस्स रज्जनीइं अच्चब्भुयं मण्णमाणो, भरहनरिंद-कणीयसबंधुणो उकिट्ठगुणसव-
 णाओ वीसरियभरहसंदेसं मुहुं अणुसुमरंतो सो सुवेगो तक्खसिलापुरिं पावेइ ।

दूअस्स तक्खसिलापुरीए पवेसो, बाहुबलिणा सह संभासणं—

पुरीपरिसरनिवासिलोगेहिं किंचिलोयणपाएण खणं को वि पढिओ अत्थि
 इअ बुद्धीए पेक्खिज्जमाणो, लीलोज्जाणेमुं एगत्थमिलियाणं धणुहब्भासं कुणंतानं
 सुहडाणं भुयप्फालणेहिं तसंत-रह-तुरंगमो, इओ तओ पउरजणरिद्धिपेक्खणतल्लि-
 च्छ-सारहिणा अणिसिद्धत्तणेण उप्पहगामिखलंतरहो, बाहिरुज्जाणतरुमुं समत्थ-दीव-
 चक्कवट्टीणं एगहिं मिलियाइं गयरयणाइं पिव बद्धे वरगए पासंतो, जोइसियविमा-
 णाइं चइऊण इव समागएहिं वरतुरंगमेहिं बंधुराओ आससालाओ पेच्छमाणो, भर-
 हाऽणुय-एस्सरिय-अच्छरिज्जाऽवलोयणजाय-सिरोवेयणाए इव सिरं धुणंतो स दूओ
 तं पुरिं पविसेइ । अहमिंददेवे विवि सच्छंदसीले हट्ठसेणीमुं उवविट्ठे सिरिमंतवणि-

१ शरभैः=अष्टापदैः । २ संगोत्रैः=एकगोत्रियैः । ३ श्वापदैः=हिसकैः । ४ खचित्ता=व्याप्ता । ५ चिला-
 इयो=किरातिका=भीलबी । ६ लाहलो=नाहलो म्लेच्छजातिविशेषः । ७ अभ्यासितो=निवेशितः । ८ अभभिज्ञम् ।
 ९ समासादयति ।

यजणे पासंतो सो रायदुवारं गच्छेइ । सहस्सकिरणस्स किरणाइं 'आयड्ढिऊण इंव विणिम्मिए कुंते धरंतेहि पाइक्काणीएहिं कथं वि अहिट्ठियं, इक्खुपत्तमुहाइं लोहसल्लाइं धरमाणेहिं पल्लवियवीरयादुमेहिं पिव पाइक्केहिं कथं सोहियं, पाहाणभंगे वि अभंजिरे लोहमोमारे धरंतेहिं एग-दंतधर-गएहिं पिव सुहडेहिं कथं वि रेहियं, कथं य चंद-केउधरेहिं पिव फलगासिधरेहिं पयंडसत्तिधरवीरपुरिससीहेहिं विराइयं, नक्खत्तगणपज्जंताच्चंतदूरवाणपक्खेवगेहिं सदवेहीहिं तूणपिट्ठीहिं धणुहपाणीहिं सुहडेहिं कथं वि अहिट्ठियं, दुवारपालेहिं पिव दोसुं पासेसु संठिएहिं उदामसुंडादं-डेहिं दोहिं गइंदेहिं दूराओ भयंकरं एरिसं नरसीहस्स बाहुबलिस्स सिंघदुवारं पासंतो विम्भियमाणसो दुवारवालपैडिक्खिओ सो सुवेगो तत्थ संठिओ । नरिंदसहाए एसच्चिय मज्जाया । दुवारवालो अब्भंतरम्मि गंतूण बाहुबलिं निवेएइ- 'तुम्हाणं जेट्ठस्स भाउणो सुवेगो नाम दूओ दुवारम्मि चिट्ठइ' । अह बाहुबलिस्स रण्णो अणुण्णाए वेत्तिएण दंसियपहो विउसाणं वरो सो सुवेगो बुहो आइच्चमंडलं पिव सहं पविसेइ । सो संजायविम्हओ रयणसीहासणासीणं तेयंसिं बाहुबलि-नरिंदं पेक्खेइ, केरिसो सो-जो सग्गाओ भूमिं समागएहिं आइच्चेहिं विव आबद्ध-रयण-मउडेहिं तेयंसि-नरवईहिं उवासिओ, नागकुमारेहिं पिव दिप्पंतचूलामणीहिं विस्सस्सावि अपराभवणीएहिं रायकुमारवरेहिं जो सेविओ, सामि-वीसास-सर्व्वेस्स-वल्लो-संताण-मंडवेहिं धम्माइपरिक्खणकुसलेहिं धीमंतेहिं पहाणेहिं जो परिवारिओ, 'सहस्ससो निक्कोस-सत्थपाणीहिं अप्परक्खगेहिं निग्गयजीहसप्पेहिं मलयगिरिच्च भीसणो, चमरीहिं हिमालयपव्वओ इव जो निरंतरं वारंगणाहिं अइ चारु-चामरेहिं वीइज्जमाणा, अग्गे सुवण्णदंडधरेण सुइवेसेण वेत्तिएण जो विज्जुसहियवारिधरेण सैरओ इव उवसो-हिओ आसि । अह सो णंडालफुडभूमियलो हत्थिच्च रणंत-दिग्घयर-कंचणसिंखलो नरनाहं नमेइ । तओ रण्णा भमुहसण्णाए तक्कालं आणाइए पडिहारेण य दंसिए आसणे सो उवविसेइ । बाहुबलिनिवो पसायसुहासंदिरनयणेण तं पासंतो ववेइ- 'सुवेग ! जिट्ठस्स भरहनरिंदस्स कुसलं किं ?, सुंदर ! तायपाय-लालिय-पालिय-विणीयानयरीए पया कुसालिणी किं ?, कामाइसत्तूणं पिव छण्हं भरहखंडाणं विजयं भूवई निरंतरायं कासि किं ?, सट्ठिवाससाहस्साइं पयंडसेणाए दिसाविजयं काऊण सेणावइपमुहसायलपरिवारो कुसलं किं समागओ ?, सिंधूराऽरुणियकुंभत्थलेहिं गयणं संज्ञाभममइयं पिव कुणंती रण्णो करिघडा निरामया किं ?, हिमवंतगिरिं जाव महि

१ आकूष्य । २ तूणपट्टैः । ३ । प्रतीक्षितः । ४ सर्वस्व० । ५ सहस्रशः । ६ शरद् । ७ ललाटस्पृष्ट० ।

अक्कमिन्ता सामागच्छमाणाणं राइणो वस्तुरंगमाणं अकिलामो वट्टइ किं ?, पत्थिवेहिं सेविज्जमाणस्स सव्वत्थ अक्खलियाऽऽणस्स जेट्ठस्स भाउणो सुहेण वासरा किं वड-
वच्चेइरे ?' इअ परिपुच्छिऊण तुण्हक्के संठिए उसहणंदणे सो ऊसुगरहिओ सुवेगो
कयंजली इमं वयणं ववेइ-जो सायलाए पिच्छीए सयं कुसलं कुणेइ, तस्स भरह-
नरिंदस्स कुसलं सओ सिद्धं अत्थि । अउज्झापुरीए सुसेणार्णं हत्थिणो तुरंगम
स्स य अकुसलं काउं दइव्वो वि किं समत्थो ?, जाणं नायगो तव जिट्ठो माया ।
भरहनरिंदाओ तुल्लो अहिगो वा किं को वि कत्थ वि अत्थि ? जो छण्हं भरहखंडाण
जयम्मि विग्ययरो होज्जा । अखंडियाऽऽणो सो भरहेसारो सव्वेहिं नरीसरेहिं सेवि-
ज्जइ, तह वि जाउ चित्तम्मि न पमोएइ, 'जो दल्लिहो वि कुहुंवेण सेविज्जइ स ईसारो,
जो तेण न सेविज्जइ तस्स एस्सारियसुहं कत्तो' ?, सट्ठिवाससहस्सापज्जंते समाग-
एण तुम्ह जिट्ठेण उक्कंठाए कणिट्ठाणं आगमणं पडिक्खियं, महारज्जाभिसेगसमए तत्थ
बंधुसंबंधिजण-मिन्ताइणो सव्वे आगया भरहनरिंदस्स य रज्जाभिसेगमहं अकरिंसु ।
समागएहिं सवासवेहिं सुरेहिं पि अलाहि किंतु तुम्ह जेट्ठबंधू महीणाहो पासम्मि
अप्पणो कणीयसबंधुणो अपासंतो न हरिसेइ । दुवालससु वासेसु अणागयनियबंधुणो
नच्चा, ताणं आहविउं नरं पेसित्था, जओ उक्कंठा बलवई सिया । ते कंचि वियारं काऊणं
भरहस्स, समीवम्मि न समागच्छित्था, किंतु तायपायाणं अंतिगे गंतूण पव्वज्जं गिण्हंसु ।
संपइ तेहिं रागरहियाणं समणाणं न को वि अप्पकेरो न वा परो, तेहिं राइणो बंधुव-
च्छल्ल-कौउगं कहं पूरिज्जइ ?, जइ तुवावि तत्थ सुबंधुत्तणसंभवसिणेहो अत्थि, ता आग-
च्छसु, पुढन्निवइणो नियबंधुस्स हिययपमोअं देहि । दीहकालेण दिसाविजयं काऊण समा-
गए जिट्ठबंधुम्मि वि जया एवं अच्छिज्जइ, तओ तुमं कुलिसाओ वि अहिगं निट्ठुरं अहं
तक्केमि । गुरुणो अवमाणाओ निव्वएहितो वि निव्वए तुम्हे मण्णेमि, 'गुरुम्मि हि सुरेहिं
पि सभएहिं इव वट्ठियव्वं' । एगत्थ वीसविजई अण्णहिं च गुरुम्मि विणयसंपण्णो,
एत्थको पसंसारिहो ? त्ति । अलाहि वियारेणं, पारिसज्जेहिं गुरुम्मि विणयसंपण्णो एव
पसंसिज्जइ । एवं तुम्ह अविणयं पि सव्वंसहो नरिंदो सहिस्सइ, किंतु पिसु-
णाणं एवं निरंकुसो अवगासो सिया । तत्थ तुम्हाणं अभत्ति-पयासिमाओ पिसुणाणं
गिराओ भरहनरिंदस्स चित्तं कंजियछंटाओ स्वीरं पिव दूसिस्संति, अप्पणो पहुम्मि अइ-
अप्पं पि अप्पणो छिहं तं रक्खणीअं, जओ लहुणा वि छिहेण जलं सेउं किं न उम्मू-
लेज्जा ?, इयंतकालं अहं न आगओ म्हि त्ति हिययम्मि आसंकं मा कुणसु, अहुणा

वि आगच्छसु, सु-सामी खलियं नहि गिण्हेइ । तत्थ तुमस्मि गए पिसुणाणं मणो-
रहा आइच्चोदए हिमसमूहो विव सज्जो विलयं पावंतु । पव्वदिणम्मि रयणीयरो दिवागरेण
विव तेण सामिणा संगमाओ तुमं तेएहिं चिरं बुद्धिं लहेसु । सामित्तणं इच्छमाणा
अण्णे वि हि बहवो बाहुसालिणो नरवरा अप्पणो सेवणीयत्तणं चिच्चा तं भरहनरिदं
पइवासरं सेवेइरे, सुरेहिं इंदो विव निग्गहाणुग्गहसमत्थो चक्कवट्ठी पुढवीपालेहिं
अवस्सं सेवणिज्जो हि, चक्कट्टित्तणपक्खे वि तुमए तस्स सेवा कया सा अबीयबंधुत्त-
णवच्छल्लपक्खं उज्जोइस्सइ, मज्झ भायरु त्तिःभयरहिओ समाणो जइ न आगच्छेसि एयं
न जुत्तं, 'आणापहाणा नरिदा हि णाइभावेण न गिण्हज्जंति' । अयकंतेण अयाइं
पिव पगिट्ठतेएण आयइइया देव-दाणव-माणवा भरहेसरस्स समीवं आगच्छंति । जं वा-
सवो वि अट्ठासणदाणेण मित्तव्व आयरेइ, तं भरहनरिदं आगमणमेत्तेण किं नहि अणु-
कूलं वट्ठेसि ?, जइ वीरमाणित्तणेण तं रायाणं अवमण्णेसि, ता तम्मि भरहेसरन-
रिदम्मि ससेण्णोवि तुं समुदम्मि सैत्तुमुट्ठिव्व असि । तस्स जंगमा पव्वया इव सक्क-
गय-सण्णिहा चउरासीइलक्खा गयवरा अभिसप्पमाणा केण सहणीआ ?, कप्पंत-
कालसमुदस्स कळोले विव 'वीसुं महिं पावमाणे अस्स तेत्तिए आसे रहे य
को खलिस्सइ ? । छण्णवइगामकोडिसामिणो तस्स छण्णवइकोडिपाइक्का सीहा विव
कस्स तासाय न सिया ? । तस्स इक्को सुसेणसेणावई दंडपाणी कयंतो
विव समावडंतो देवासुरेहिं पि सोहुं किं सक्को ? । अमोइं चक्कं धरंतस्स
चक्कवट्ठिणो भरहस्स उ सूरस्स तमवुंदं पिव तिलोई वि 'थोक्कच्चिय । तओ
बाहुबलि ! तेएण वएण य जेट्ठो सव्वहा सेट्ठो सो नरिंदो रज्ज-जीवियकामेण
तुमए सेवणिज्जो अत्थि । अह बाहुबलावसारिय-जगबलो अवरो अण्णवो इव गहीरह्णणी
बाहुबली इअ भासेइ-हे दूअ ! साहुं तुमं वायालाण इक्को च्चिय अग्गेसरो अत्थि,
जओ ममावि पुरओ एरिसं वयणं वोत्तुं तरेसि । जेट्ठो हि मम भाया तायतु-
ल्लो अत्थि, सो वि बंधवाणं समागमं जइ इच्छइ तंपि अहो ! जुत्तं चिय । सुराऽ-
सुरनरिदसिरीहिं समिद्धो सो अप्पविहवेहिं समागएहिं अम्हेहिं लज्जिहिं त्ति नो
अम्हे आगया । सट्ठिवाससहस्साइं पररज्जाइं गिण्हंतस्स तस्स कणिट्ठबंधुरज्जगह-
णम्मि वाउलया कारणं, जइ सुबंधुत्तणं तस्स कारणं सिया तया सो नियभाऊणं पुरओ
रज्ज-संगामकामेण पत्तेण कइं दूए पेसित्था ? । लुट्ठेणावि हि जिट्ठेण भाउणा सट्ठि

१ अयस्कान्तेन-लोहचुम्बकपापाणेन । अयांसि-लोहानि । २ सक्तुमुष्ठिवत् । ३ विष्वक् । ४ प्लावयतः ।

५ स्तोका एव । ६ शक्नोषि । ७ व्यग्रता ।

को भाया जुज्झिहिइ ति बुद्धोए वियारिऊण महासत्तवंता ते कणिहा तायं अणुग
 च्छिंसु । ताणं च रज्जगहणेणावि छलं पेक्खमाणस्स तुम्हं सामिस्स धुवं बगवेट्ठियं
 पयडं जायं, अहो ! एवं अम्हासु वि तारिसं नेहं दंसितो सो भरहो वाया-पवंच-
 वियक्खणं विसिट्ठं तुमं पेसित्था । पव्वइऊण भायरेहिं रज्जदाणाओ तस्स भरहस्स
 जो हरिसो करिओ सो तत्थ समागएण मए रज्जलुद्धस्स तस्स किं कीरिहिइ ? । वइराओ
 वि ककसो हं, जं अप्पविहवो वि समाणो भाउतिरक्कारकायरो तस्स समिद्धिं न
 गिण्हामि, सो भरहो उ पुप्फाओ वि मेउओ, जो मायावी अवणवायभीरुणं कणी-
 यसवंभूणं रज्जाइं सयं गिण्हित्था । नणु दूअ ! भाउरज्जाइं गिण्हमाणं तं
 भरहं जं उविकिखत्था ता निब्भएहिंतो वि निब्भया कहं अम्हे ? । जइ गुरु गुरु-
 गुणजुत्तो होज्जा ता तम्मि गुरुम्मि विणओ पसंसारिहो सिया, गुरुगुणेहिं हीणम्मि
 गुरुम्मि विणओ वि लज्जाकारणमेव । अवलित्तस्स कज्जाकज्जं अजाणंतस्स उप्पह-
 पडिवणस्स गुरुणो वि परिच्चागो विहिज्जइ । तस्स भरहस्स तुरंगाइयं अम्हेहिं
 अच्छिण्णं किं ?, किं वा अस्स नयराइयं भग्गं ?, जेण सव्वंसहो भरहनिवो
 अम्हाणं अविणयं सहिस्सइ । दुज्जणपैडिआरट्ठं अम्हे तत्थ पयत्तं न कुणेमो ।
 'वियारिऊण कज्जकारिणो साहवो खलवयणेहिं किं दूसिज्जन्ति ?' । एयावंतकालं अम्हे
 न आगया, जओ सो 'निप्पिहो कत्थ वि गओ आसिं ?', जेण अज्ज भरहचक्कि
 उवागच्छामो । सो भूयच्च छलगवेसगो सव्वत्थ वि सइ अपमत्तणं अलुद्धाणं च
 अम्हाणं किं खलियं गिण्हेज्जा ? । तस्स देसाइयं किपि अगिण्हमाणानं अम्हाणं सो
 भरहेसरो कहं नाम सामी होज्जा ? । मम तस्स य भयवं उसहसामी एव
 एगो सामी, अम्हाणं मिहो स-सामिसंबंधो कहं घडइ ? । तेयनिमित्तं मइ तत्थ
 गए तस्स तेओ केरिसो सिया, खूरे अब्भुदिए समाणे पावगो नहि तेयंसी सिया ।
 सामिव्व आयरमाणा असमत्था ते उ भूमिवइणो तं भरहं निसेवेज्जा, दीणेषु
 जेषु एसो भरहो निग्गहाऽणुग्गहक्खमो अत्थि । भाउसिणेहपक्खेण वि एयम्मि
 मए कया सेवा सा वि चक्कवट्ठित्तणपक्खम्मि सिया, जओ अवद्धमुहो जणो एवं
 वइस्सइ-‘एसो चक्कवट्ठिस्स सेवगो’ ति । अस्स अहं निब्भयो भाया म्हि, सो य
 आणापहाणो जइ णाइनेहेण अलं आणवेज्जा, ‘किं वइरं वइरेण न विदारिज्जइ’ ? ।
 सुरासुरनरोवासणाए पीणिओ एसो अत्थु, अणेण मम किं ?, ‘सुमग्गम्मि गम-
 णक्खमो सुसज्जिओ वि रहो उप्पहम्मि भंजिज्जइ’ ? जइ तायभत्तो महिंदो

१ सुदुक्कः । २ अवलित्तस्य-गवित्तस्य । ३ प्रतिकारार्थम् । ४ निःस्पृहः । ५ आज्ञापयतु ।

जिट्ठं तं तायनंदणं अद्दासणे उववेसेइ, तेणावि सो भरहो किं गव्विरो हवइ ? ।
 एयम्मि भरहसमुदम्मि ससेण्णा नरिंदा जे सत्तुमुट्ठिव्व ते उ अण्णे, अहं तु तेएहिं
 दूसहो हंत ! वडवानलो होज्जा । अक्कतेयंसि 'अण्णतेया इव मइ पाइक्का आसा
 रहा हत्थिणो सेणाणी भरहो विय सव्वे पल्लिज्जन्तु । बालत्तणम्मि करिणा इव करेण जो
 पाएसुं समादाय लेट्टुलीलाए गयणम्मि मए उच्छालिओ गयणमग्गे दूरं गंतूण जो
 भूमोए पडंतो 'एसो पैरासू मा होज्ज' ति मए पुप्फव्व करपउमम्मि गहिओ । निज्जि-
 याणं चाडुकाराणं नरवईणं चाडुवयणेहिं जम्मंतरं पत्तो इव सो अहुणा तं त्रिस्सरित्था,
 सव्वे वि ते चाडुवारा नरवईणो पणासिहिरे, सयं एक्को च्चिय एसो बाहुबलि-
 बाहुबलाओ संनायपीडं सहिस्सइ । दूअ ! इओ तुं गच्छसु, रज्ज-जीवियकामेण
 सच्चिय आगच्छेउ, तायदिण्णभागसंतुदठेण मए च्चिय तस्स भूमी उव्विक्खिया, तत्था-
 गमणपयोयणं मम नत्थि । तओ 'चित्तकाएहिं विव ददसामिआणापासजंतिएहिं पकोव-
 तंव-नयणेहिं नरेसरेहिं सो पेक्खिज्जमाणो, रोसाओ हणेह हणेह ति अंतो वयंतेहिं फुरि-
 याहरेहिं रायकुमारेहिं मुहुं मुहुं वियडं कडक्खिज्जमाणो, गसिउं इच्छंतेहिं पिव उड्ढी-
 कयममुदेहिं किंचि चलिअसत्थेहिं दिढावद्धपरियरेहिं अंगरक्खगेहिं पेक्खिज्जमाणो, अम्हाणं
 साहसिएण केणावि सामिपाइक्केण अयं वरागो हम्मिहिइ ति मंतीहिं चित्तिज्जमाणो
 पायं उक्खेविऊणं चिट्ठमाणेण सज्जीकएण हत्थेण कंठे धरिउं पिव उक्कंठिएण वेत्तिएण
 उट्ठाविओ सो सुवेगो मणंसि खुदिओ वि समाणो धोरिमं धरिऊण समुट्ठाय सहागेहाओ
 बाहिरं निग्गच्छेइ ।

सुवेगदूअस्स सहाए निग्गमणं—

तया कुद्धतक्खसिलाऽहिवइ-तार-सदाणुमाणाओ भिसं रोसखुहियाए दुवार-
 स्थियपाइक्केसेणाए अण्फालिज्जमाण-फलएहिं नच्चिज्जमाणमहाऽसीहिं पविस्खज्जमाण
 चक्केहिं गिण्हिज्जमाणमोग्गरेहिं फाडिज्जमाणतिसल्लेहिं पीडिज्जमाणेतूणेहिं गिण्हिज्ज-
 माणदंडेहिं पेरिज्जमाणेहिं परसुहिं पए पए सव्वओ वि अण्णो मच्चुं पिव पासंतो
 खलंतपाओ बाहुबलिणो सीहदुवाराओ सो निग्गओ । तओ रहारूहो गच्छंतो सो सुवेगो
 मिहो उच्चएहिं वयंतणं पउराणं गिरं एवं आंयण्णेइ—

१ अन्यतेजसि इव । २ प्रलीयन्ताम् । ३ विगतप्राणः । ४ प्रियवचनैः । ५ चित्रकायैः-व्याघ्रैः ।
 ६ कटाक्षमाणो । ७ ऊर्ध्वोक्तकुटिभिः । ८ हनिष्यते । ९ धैर्यम् । १० स्फोटयमानविशाल्यैः । ११ तूणम्-
 शरधिः-भयं । १२ आकर्णयति ।

पण्हो—को एसो नूतणो पुरिसो रायदुवाराओ निगगओ ?,

उत्तर—इमो खलु भरहमहीवइणो दूओ समागओ ।

प०—इह पुढवियलम्मि अवरो कोवि राया अत्थि ?,

उ०—अउज्झाए बाहुबलिणो जेट्टो भाया भरहेसरो निवो अत्थि ।

प०—सो भरहनरिंदो केण हेउणा एत्थ इमं दूअं पेसित्था ?,

उ०—नियभाउणो सिरिबाहुबलिभूवइणो आहवणट्ठं ।

प०—नणु अम्हकेरसामिणो भाया इत्तियकालं कत्थ गओ आसि ?,

उ०—सो लक्खंडभरहखित्तविजयाय गओ होत्था ।

प०—सो उक्कंठिओ अहुणा कणिट्ठं भायरं किं आहवेइ ?,

उ०—नणु अण्णरायगणसामण्णसेवं कारिउं ।

प०—असारे नरिंदे जिणिऊण तस्स इह माणे—खीलगे अहिरोहणं किं ?,

उ०—अखंड—चक्रवट्ठित्ताहिमाणो तत्थ कारणं ।

प०—कणिट्ठभाउणा जिओ सो नरिंदाणं पुरओ नियं मुहं कहं दंसिहिइ ?,

उ०—सब्बत्थ जयणसीलो सो भावि—निय—पराभवं न जाणेइ ।

प०—तस्स भरहभूवइणो मंतिवग्गम्मि मंतणे मूसगसरिसो वि कोवि नत्थि किं ?,

उ०—तस्स भरहनिवस्स कमागया मइमंता बहवो मंतिणो संति ।

प०—अहिणो मुहं कंडूइउं इच्छतो सो भरहो तेहिं किं न वारिओ ?,

उ०—तेहिं मंतीहिं न वारिओ कित्तु पेरिओ, एरिसी भवियव्वया । एवं नयरज्जाणं वयणं सुणंतो सो खुवेगो नयरीए वाहिरं निगगओ । नयरीदुवारम्मि वच्चंतो सो देवयाहिं विव पाउकयं भरहबाहुबलीणं विग्गह—कहं पुरावुत्तं इव सुणेइ, पहम्मि कोहेण तुरियं पि गच्छं—तस्स इमस्स फेद्धाए च्चिय सा ताणं विग्गहकहा तुरियतरं पसरित्था, तीए वत्ताए वि राया—ऽऽपेणेव खणेण पइगामं पइपुरं सुहडा सेणानिमित्तं सज्जेइरे, रहसालाहिंतो संगामिए रहे कडिइऊण अहिणवेहिं अक्खाईहिं जोगिणो सरीराइं पिव केइ दिट्ठयरीकुणेइरे, केवि वाहि—यालीए आरोहिऊण आरोहिऊण पंचहिं धाराहिं पि आसे रणसहे कारिति, अवरे लोहार—घरेसु गंतूण किवाणाइआउहं पहुणो तेयमुत्तिं विव तेयंति, अण्णे सिंगसाराइं संजोइ—ऊण अभिणवतंतीहिं च बंधिऊण जमभूमयासरिसाईं सारंग—धनुहाइं सज्जिति, केइ पाण-

१ मानकीलके । २ प्रादुष्कृताम् । ३ इतिहासमिव । ४ स्पष्टया । ५ बाह्याल्याम्—अश्वकीडनभूम्याम् ।
६ अश्वगतिभिः । ७ शङ्खनिष्पन्नधनुषि ।

वंताइं तुरियाइं पिव पयाणेसुं पणाइणो कवयाइवहणाय अरणाओ उट्टे आणएइरे, केई सबाण-सरहिणो ससिरक्ख-कवयाइं च नेआइआ सिद्धंते इव अच्चंतं दिहीकुणेइरे, केवि गंधव्वभवणाइं पिव महंतीओ जवणियाओ पडकुडीओ य वितणिऊण खणं आलोयंति, बाहुबलिनरिदंम्मि भत्ता सव्वे जणा जाणया अवि मिहो फट्ठाए इव संगामे सज्जी-वंति, तत्थ अत्तजणेण जो रणुमुहो को वि निवारिज्जइ अणत्तस्सेव तस्स नरिदंम्मि भत्ति-पहाणो सो कुप्पेइ, अणुरागेण पाणेहिं पि रण्णो पियं काउं इच्छंताणं जणाणं एवं आरंभं पहम्मि वच्चंतो सो सुवेगो पासेइ । लोगम्मि तं जुद्धकहं सोच्चा दट्ठण य पच्चयवासिनरिदा अवि अवीयभत्तिमाणियाए बाहुबलिरायाणं मिलंति, गोवालसदेण गावीओ इव गिरिवासिनिवाणं गोसिंग-नाएणं निकुंजेहिंतो सहस्ससो चिलाया धावे-इरे । केई भडा वग्घपुच्छललीए, केयण मऊरपिंछेहिं, केवि लयाहिं कुन्तले वेगेण बंधेइरे । केइ अहितयाए केयण तरुतयाए के वि गोहाल्ललीए मिगचम्ममइयपरिहाणं बंधिति । पाहाणहत्था धणुहहत्था पवंगा इव उप्पवमाणा ते सामिभत्ततुरंगुव्व निय-सामिं परिवरेइरे । भरह-अक्खोहिणी-चुण्णणेण चिराओ बाहुबलिपसायावकैयं अज्ज देमो चि ताणं भडाणं गिराओ हवंति । ताणं पि एवं 'ससंरंभं आरंभं पासंतो विवेगवंतो सुवेगो चित्तेइ-अहो ! बाहुबलिनिवाऽऽहीणा देसवासिणो एए रणकम्मम्मि नियपिउसंबंधिवेरेणेव तुवरिन्ति, बाहुबलि-सेणाए पुव्वं संगामिच्छवो एए चिलाया अवि आगयं अम्हकेरबलं हंतुं ऊसहेइरे, तं कं पि जणं न पासेमि जो जुद्धं न सज्जेइ, सो को वि इह न विज्जइ जो बाहुबलिम्मि रत्तो न सिया । अहो ! बहलीदेसे किसीवला वि खरा नियसामिभत्ता य संति । तं किं देससहावो अहवा बाहुबलिनरि-दस्स गुणो कयाइ सामंताइणो पाइका वेयणकिणिआ होन्तु, किंतु इमस्स बाहुबलिणो गुणकिणिआ समग्गा वि भूमी पाइकीभूया अत्थि । लहुयमस्स सिरिबाहुबलिसइ-णस्स अग्गओ अग्गिणो तिणसमूहमिव बहुविं पि चक्कवट्ठिसेणं लहुविं मण्णेमि, किं च इमस्स महावीरस्स बाहुबलिस्स पुरओ सरहस्स कलहं पिव चक्कवट्ठिं पि अहो ! ऊणं संकेमि, भूमीए चक्कवट्ठि चिय, सग्गे उ सको एव ओयंसी पसिद्धो अत्थि, परंतु ताणं अंतोवट्ठी अहिगो वा बाहुबली नज्जइ । इमस्स चैवेडाघायमेत्तेण वि चक्कव-ट्ठिणो तं चक्कं पि इंदस्स य तं वज्जं पि विहलं चिय मण्णेमि । अहो ! जं अम्हेहिं बलवंतो बाहुबली चिरोहिओ कओ, तं रिच्छो किल कण्णे गहिओ, मुट्ठीए किल महासण्णो

१ नैयायिकाः । २ अनाप्तस्येव । ३ नादेन । लतागृहेभ्यः । ४ अक्षौहिणी-महतीसेना । ५ अवक्रम्यम्-बदलो । ६ साटोपम् । ७ वेतनक्रीताः । ८ शरभस्याष्टापदस्य पुरो कलभमिव । ९ चपेटा० । १० विफलमेव ।

धरिओ । वग्गो एगं हरिणं पिव एगं भूमिखंडं वेत्तूण संतुट्ठो अयं बाहुवली मुहा अम्हेहिं तज्जिऊण खलीकओ । अणेगनरिंदसेवाहिं भरहनिवस्स किं अपुण्णं ? जं वाहणाय केसरिसीहो इव सेवाकरणद्वं अयं आहविओ ।

सुवेगदूअस्स विणीआए आगमणं —

सामिहियचित्तमाणं मंतीणं धिरत्थु, अम्हाणं पि इह धिरत्थु. सत्तूहिं पिव जेहिं एत्थ कम्मम्मि सामी उवेविखओ, 'एगेण सुवेगेण गंतूण पट्ठणो विग्गहो कारिओ' त्ति लोगो भणिस्सइ, गुणदूसणं दूयत्तणं धिरत्थु एवं निच्चं चित्तमाणो कइवयदिणेहिं नयनिवुणो सुवेगो विणीयानयरिं पावेइ, दुवारपालेण सभाएणीओ पणामरइयंनली सो निसीएइ, तओ चक्कवट्ठी सायरं पुच्छेइ सुवेग ! लहुबंधुणो बाहुवल्लिणो किं नाम कुसलं ? जं तुं वेगेण आगओ सि, तओ अहं खुहिओ म्हि, अदुवा तेण तुं पट्ठेत्थो तओ तुरियं आगओ, बलवंतस्स तस्स मज्झ भाउणो इमा वीरवित्ती जुत्ता सिया । तया सुवेगो पि एवं वएइ— देव ! तुम्ह विव अउल्ल-परक्कमस्य तस्स अकुसलं काउं देवो वि न पक्कलो । तुम्ह लहुभायत्ति पुव्वं विया-रिऊण अचंचंतहियकंखिणा मए विणयपुच्चयं सामिसेवद्वं स वुत्तो, तयणंतंरं च तिच्चो-सदेणेव परिणामुवयारिणा अवच्चवयणीएण वयणेण उत्तो सो न सामेण नावि य कक्क-सेण वयणेण देवसेवं मण्णइ 'संनिवाइए वियारे भेसयं किं नाम कुज्जा' ? सो माणसारो बाहुवली तेलोक्कं पि तिणतुल्लं मण्णेइ, सिहो इव कंचन पडिमल्लं न जाणेइ । तुव इमम्मि सुसेणसेणावइम्मि सेणम्मि य वणिणए 'किं एयं' त्ति दुग्गंधाओ विव नक्कं सो भंजेइ, पट्ठस्स भरहल्लखंडविजए वणिणए सो अणाकणियं कुणंतो नियभुयदंदे पेक्खेइ, तायदिण्णभागसंतुट्ठस्स मज्झ उविकखाए भरहो भरहखित्तल्लखंडं गिण्हित्थ त्ति सो आह, अलाहि तस्स सेवाए, उंदाहो सो निम्भयो दोहणद्वं वग्गिं पिव अट्ठणा रणाय देवं आहवेइ, तुम्ह बंधू एरिसो ओयंसी माणी महाबाह अत्थि, जओ गंधहत्थी व असज्झो अण्णविक्रमं न सहेइ, इंदस्स सामाणियदेवा इव तस्स सभाए पयंडभुयपरक्कमा सामंतरायाणो वि एयस्स सरिसा एव, तस्स रायकुमारा वि उच्चएहिं रायतेयाहिमाणिणो रणकंइयणजुत्तबाहुदंडा तओ दसगुणा चिय संति, अस्स माणिणो मंतिणो वि तस्स मंतं अणुमण्णेइरे, जओ जारिसो सामी होइ तस्स परिवारो वि तारिसो हवइ । तस्स अणुरागिणो पउरजणा वि पंडिक्क-याओ इत्थीओ अवरपइणो इव अण्णं पत्थिवं नहि जाणंति, न य सहेइरे ।

तस्स जे कराइपयाइणो जणा जाणवया य तेवि अणुराणेण भिच्चा विव पाणेहिं
पि पियं काउं इच्छेइरे, सिंहा इव वणेअरा गिरियरा जे सुहडा ते वि वसीभूया
तस्स माणसिद्धिं काउं इच्छेइरे, सामि ! अलाहि चहुणा कहिएण, अहवा अहुणा
सो वीरो जोदुं इच्छाए तुमं दट्टुं इच्छेइ, न उ दंसणुकंठाए, अओ परं जं अप्पणो
रोएइ तं सामी कुणेउ, जओ दूआ न मंतिणो किंतु सच्चसंदेसवाइणो संति । भरह-
नरिंदो सुत्तधारुव जुगवं विम्हयाऽभेरिस-खमा-हरिसाईं तक्खणं दंसिऊण इअ ववेइ-
भरहनरिंदस्स मंतीहिं सह विचारणा —

अह सुरासुरमणूसेसु एयस्स सरिसो अण्णो कोवि नत्थित्ति अयं अत्थो मए सिसु-
कीलासुं पि फुडं चिय अणुभूओ, जगत्तयसामिनंदणस्स मज्झ अणुयस्स बाहुबलिणो
तिलोई वि तिणमेत्तं ति, एसा न थुई किंतु सच्चो एसो अट्ठो, अणेण लहुवंधुणा
अहं सव्वहा सिलाहणिज्जो एव, जं बीयबाहुम्मि लहुयरम्मि एगो महंतो बाह न
सोहइ । जइ सीहो बंधणं सहेज्जा, सरहो वा वसं वच्चेज्जा, तइया बाहुबली वसी-
होज्जा, तो मम किं हि ऊणयरं सिया ? । तओ अम्हे तस्स दुच्चिएण सहि-
स्सामो, जइ लोगा मं असत्तं वइस्सन्ति, ता तं वयंतु, लोगम्मि पउरिसेण धणेण
वा सव्वं वत्थुं लब्भइ, किं तु विसेसेण तारिसो उ भाया कत्थ वि न पाविज्जइ ।
मंतिणो ! किं एवं जुत्त नो वा, तुम्हे तुंहिं धरिऊणं उदासीणा इव किं ठिआ ?,
जहट्टं जं भवे तं वएज्जाह ।

अह सेणाणी सामिणो खमाए बाहुबलिणो य अविणएण पहारेण विव दूणो
वएइ-हे देव ! उसहसामिणो पुत्तस्स सुपहुणो भरहेसरस्स उइया खमा, किंतु
सा करुणापत्तम्मि जणम्मि अरिहा । जो जस्स गामम्मि वसेज्जा सो तस्स आहीणो
जायइ, सो बाहुबली देसं पि भुंजमाणो वयणेणावि तुम्हाणं नो वसो । पाणाणं अव-
हारी वि तेयं वड्ढवित्तो वेरी वरं, नियमाउणो तेय-वहविधायगो न उ बंधू
वि सेट्ठो । रायाणो कोसेहिं सेण्णेहिं मिचेहिं तणएहिं देहेणावि य अप्पपहावं रक्खे-
इरे, ताणं पहावो च्चिय जीवियं । सामिणो स-रज्जेणावि किं अपुण्णं होत्था ? जो
छखंडभरहखेतविजओ कओ, सो पहावट्टमेव गायव्वो । एगत्य वि हओ पहावो सव्वत्थ
हि हओ चेव, जओ हि सईं पि भट्टसीला सईं सव्वया सिया असईं । गिहीणं
पि धणेसु च्चिय संविभागो जुज्जइ, ते वि गिहिणो बंधवेहिं गिज्झमाणं अप्पणो पहावं

मणयंपि न उविक्षरे । जं सयलभरहविजयवंतस्स पहुणो इह अविजओ तं किल समुं
 उत्तिण्णस्स गोप्पयम्मि निमज्जणसरिसं । किं च इमं कथं वि सुयं कथं वि दिट्ठं वा, जं पुढवीए
 चक्कवट्ठिणो वि पोडिप्फद्धी राया रज्जं भुंजेइ ? । देव ! तत्थ अविणीयम्मि भाउसंबंधमेत्त-
 जाओ जो नेहो तं एयं सामिणो एगहत्थेण तालिया-वायणमिव । 'वेसाजणे विव-
 नेहरहिण् वाहुवलिम्मि वि सामी नेहाल्ल अत्थि' एवं वयंते अम्हे जइ देवो निसेहइ, निसे-
 हेउ, किंतु 'सव्वे सत्तुणो विजिणिऊण अंतो पविसिस्सामि' ति निच्चएण अज्जावि बाहिरं
 संठियं चक्कं देवो कहं निसेहिहिइ । भाउणो मिसेण एसो सत्तू नहि उवेक्खिउं जुज्जइ,
 अमुं अत्थं अवरे वि मंतिणो पट्ट पुच्छउ । सुसेणसेणावइणो वयणसवणाणंतं भरहनरिंदेण
 सम्मुहावलोयणेण पुट्ठो सुरगुरुसरिसो सइवऽमणी एवं वणइ—सेणावइणा जुत्तं वुत्तं, अण्णो
 को इमं वुत्तं सक्को ?, विक्कमपयासभीरवो हि सामितेयं उविक्षंति, नियपहाववुड्ढीए
 पहुणा आइट्ठा निओगिणो पाएणं नियलाहट्ठं उत्तरं रएइरे वसणं वा वइटावेइरे । अयं तु
 सेणाहिर्वइ देवतेयस्स पवणो पावगस्सेव केवलं बुद्धिदहेयवे सिया । सामि ! चक्करयणमिव
 एसो वि सेणाहिर्वइ थेवं पि सत्तुसेसं अजिणिऊण न तूसेइ । तम्हा अलं विलंबेण, तुम्हाणं
 आणाए अज्जच्चिय दंडहत्थेहिं पयाणभंभा पडिपक्खो विव ताडिज्जउ । सुघोसार्यटाना-
 एण देवा विव पसप्यंतेण भंभानिणाएण सवाहण-परिच्छदां सेणा मिलंतु, तेयाभिवु-
 ड्ढीए उत्तरदिसाभिमुहं आइच्चो इव तक्खसिलानयरिं पइ देवी पयाणं च विहेउ, सयं
 पि गंतूण सामी नियभाउणो सुवंधुत्तणं पेक्खउ, सुवेगदूयमुहसंदेसं सच्चं असच्चं वा
 जाणेउ, तओ भरहेसरो सइववयणं तहत्ति पडिवज्जेइ, 'विउसा हि अवरस्सावि जुत्तं
 वयणं मण्णेइरे' । तओ सुहदिवसे कय-पयाण-मंगलो सो भरहनरिंदो उण्णयगिरिं पिव
 नागं आरोहेइ । अण्णनरिंदिकसेणासरिसेहिं हयगयरहारुदेहिं सहस्ससो पत्तीहिं पया-
 णतुरियाइं वाइज्जन्ति । अह पयाण-तुरियनिणाएहिं, समतालनिग्घोसेहिं संगीयकारिणो
 विव सव्वसेणाइं मिलेइरे । नरिंद-मंतिसामंत-सेणावईहिं परिवारिओ अणेग-मुत्ति-धरो
 इव भरहनरिंदो नयरीए बाहिं निज्जाइ ।

भरहनरिंदस्स संगामकरणट्ठं पयाणं—

अह भरहेसरस्स जक्खसहस्सेणाहिट्ठियं चक्करयणं सेणावई विव पुरस्सरं हवइ,
 सत्तूणं गुत्तचरा इव रणो सेणुत्थिआ पयाणसूयगा पंसुपूरा आसु दूरं पसप्यंति, तइया
 पयलियलक्खसंख-गयवरेहिं गैउप्पत्तिभूमीओ गयरहिया इव लक्खज्जन्ति । तस्स

चलमाणेहिं तुरंगेहिं संदणेहिं वेसरेहिं उट्टेहिं अण्णं सव्वं महीयलं वाहनरहियं जायं
ति मण्णेमि, जलहिं विवखमाण्णं सव्वं जलमइयं पिव तस्स पाइक्खुंदं पासमाण्णं
नरमइयं जगं आभाइ । मग्गे मग्गे गच्छंतस्स नरिंदस्स गामे गामे पुरे पुरे य लोग्गणं
पवाया चिरं एरिसा जाएइरे—‘अमुणा नरवइणा एगं खेतं पिव सव्वं भरहखित्तं साहियं
एसो निवो मुणी पुव्वाइं पिव चउदसरयणाइं पावीअ, निउत्तपुरिसा इव अस्स नव
निडिणो वसमा हुविरे, एवं समाणे पत्थिवो किमदं कत्थ वा पत्थिओ ? । जइ एसो
सिच्छाए वा नियदेसे वा पेक्खिउं गच्छइ तथा सत्तुसाहणकारणं एयं चक्कं किं अग्गओ
पयाइ ? , धुवं दिसाणुमाणेण एसो भरहो बाहुबलिं पइ गच्छेइ, अहो महंताणं पि अखंड-
पसरा कसाया हवंति, सो बाहुबली देवासुरेहिं पि अईव दुज्जओ सुणिज्जइ, तं जिणिउं
इच्छंतो एसो अंगुलीए मेरुं उद्धरिउं इच्छइ, कयाई अणेण अणुओ जिओ वा अणुएणावि
एसो जिओ ति महंतो अजसो, भरहनरिंदस्स उभयपयारेणावि एत्थ हाणी होहिइ’ ति
पवाए सुणंतो भरहेसरो उच्छलंतधूलिपूरेण वइढणसीलविक्खगिरिं पिव सव्वओवि
उच्छलंतमंधयारं इव दंसितो, चउण्हं सेणंगाणं तुरंग-गय-रह-सुहडाणं हेसा-गज्जण-
चिकार-करफोडणरवेहिं दिसाओ नादितो, गिम्हदिणयरुव्व मग्गसरियाओ सोसितो,
उदामो वाउव्व मग्गतरुणो पाडितो, ‘‘सेणज्झयवत्थेहिं गयणं बलागामइयं पिव कुणंतो,
सेण-मइय-भूमि गय-मय-जलेहिं निव्वावितो चक्कपयाणुगामी नरवई आइच्चो एगरा-
सीओ अण्णरासिं पिव दिणे दिणे गच्छंतो बहलीदेसं आसाएइ । भरहनरिंदो तस्स
देसस्स पवेसम्मि अवेक्खंदं निवेसिऊण समुदो मज्जायाए इव समज्जायो अवचिट्ठेइ ।
सुणंदानंदणो बाहुबली वि रायनीइ-गिह-त्थंभ-सरिसेहिं गुत्तचरेहिं तत्थ तं आगयं
जाणित्था ।

बाहुबलिणो वि पयाणं ।

अह बाहुबलिनरिंदो पयाणनिमित्तं पडिनाएहिं गयणं भंभीकुणंतं पिव भंभं
वाएइ । कयपत्थाणमंगलो बाहुबली मुत्तिमंतं कल्लाणं पिव ऊसाहमिव भद्दगइंदं आरोहेइ,
सुरेहिं इंदो त्रिव निवेहिं रायकुमारेहिं मंतीहिं अवरेहिं पि सुहडेहिं सज्जो पस्विरिओ वि
सो बाहुबली महावटेहिं महूसाहेहिं एगकज्जपउत्तीहिं अमेज्जेहिं तेहिं अप्पणो अंसेहिं

१ प्रवादाः-जनश्रुतयः । २ नियुक्ताः-नियोगिनः । ३ स्वेच्छया । ४ अनुजो-लघुबन्धुः । ५ सैन्य-
प्रजयस्त्रैः । ६ अवस्कन्दम्—शिविरम् । ७ भंभा-भेरी । ८ सद्यः ।

पिव रेहेइ, अह सज्जो तच्चित्ताहिद्विया इव तस्स लक्खसो हत्थारोहा सोइणो रहिणो पाइका य निगच्छन्ति, अयलनिच्चओ सो बाहुवली सत्थधरेहि ओयंसीहिं नियसुहदेहिं पुढविं एगवीरमइयं पिव रयंतो चलेइ । तस्स वीरपुरिसा असंविभागजय-जसकंखिणो परुपरं 'अहं इकोवि सत्तुणो जिणिस्सं' ति वयंति, तत्थ सेणम्मि काहलवायगो वि वीरमाणी होज्जा, रोहणायलम्मि हि कक्करा वि सव्वे मणिसक्खधारिणो हुंति ।

भरह-बाहुवलीणं सइण्णववत्था ।

तयाणि चंद-सरिस-पंडुहिं महामण्डलियरायच्छत्तमण्डलेहिं गयणं पुंडरीयमइयं इव संजायइ । बाहुवली पत्तेणं पि महोयंसिणो नरवइणो पासन्तो नियबाहवे विव उच्चेहिं मण्णमाणो अग्गओ वच्चेइ । सेण्णणं उदामेहिं भारेहिं पुढविं जयतुरियरवेहिं च सग्गं अप्फोडितो इव बाहुवली पहम्मि वच्चंतो दूरसंठिए वि नियदेससीमम्मि सिग्गं जाएइ, समरुक्कंठिआ सुहडा खलु पवणाओ वि वेगवन्ता हुविरे । बाहुवली भरहेसरस्स सिविराओ नाइदूरे नच्चासण्णे गंगातडम्मि नियं खंधावारं निवे-सेइ । अह पच्चूसकालम्मि अण्णमणं अइहिणो विव ते भरह-बाहुवल्लिणो मोगहेहिं संगामूसवाय निमंतेइरे । अह बाहुवली रत्तीए सव्वरायाणुमयं परक्कमणे सिहं पिव नियं सिंहरहपुत्तं सेणावइं कुणेइ, पट्टहत्थिणो विव अस्स मुद्धम्मि दित्तिमंतो पयावो इव सुववणमइओ रणपट्ठो बाहुवल्लिणा सयं निवेसिज्जइ । सो रायाणं नमंसिज्जण लद्धरणसिक्खाए हरिसिओ अप्पणो आवासं गच्छेइ, बाहुवलीनिवो जुद्धं अण्णे वि राइणो आदिसित्ता विसज्जेइ, सयं रणत्थीणं ताणं सामिसासणं चिय सक्कारो एव । भरहचक्कवट्ठी वि आयरिओव्व सुसेणसेणावइणो रायकुमार-नरवइ-सामन्तरायसंमयं रणदिक्खं पयच्छेइ, सुसेणो सिद्धमन्तं पिव सामिसासणं घेत्तुण चक्कवागो विव पभायं इच्छंतो नियगेहं पथाएइ, भरहेसरो वद्धमउडे रायकुमारे इयरे वि सामन्तराए आहविज्जण समराय अणुसासेइ- 'हे महोयंसिणो ? सुहडा ! मम अणुयस्स बाहुवल्लिस्स रणम्मि अपमत्तेहिं तुम्हेहिं अयं सुसेणसेणावइं अहं पिव अणुसरियओ, भो भो ! भवंतेहिं महामत्तेहिं हत्थिणो इव भुयदुम्मया बहवो नरवइणो वसंवथा कया, वेयड्डगिरिं च अइक्कमित्ता देवेहिं असुरा विव दुज्जया चिलाया विक्कमेहिं वाढं अक्कन्ता, हन्त ! ते सव्वे जिणिज्जन्तु, जओ तेसुं तक्ख-सिन्हाहिवइपाइक्कमेत्तस्स संणिहो न को वि होत्था, एगो वि बाहुवल्लिणो जेढो पुत्तो

१ सादिनः-अश्वारोहाः । २ वाद्यविशेषः । ३ महौजस्विनः । ४ निजबाहुन । ५ अतिथी इव ।

६ मागधेश्वारणः । ७ महासात्रैः-हस्तिपकैः ।

सोमजसो तूयाइं एवणो इव सेण्णाइं दिसोदिसिं खेतुं सवको, तस्स य वेएण कणिट्ठो विक्कमेण उ गरिट्ठो महारहो सीहरहो पुत्तो सत्तुसेणदवानलो अत्थि, किंच बाहुबलिणो अवरेसु य पुत्त-पोत्ताइंसु इक्किक्को अवखोहिणीमल्लो कयंतस्स वि भयसंपाडणपक्कलो अत्थि । तस्स य सामन्ताइणो सामिभत्तीए वलेण य जइ तुलिज्जंति तथा ते वि तेहिं सद्धिं ईडिमाणत्थिआ इव समाणभत्ति-बलवंता संति । अण्ण-सइणम्मि जह महाबलो एगो अग्गणी जारिसो होइ तस्स सइणम्मि सच्चे वि महो-यंसिणो सुहडा तारिसा संति । सो महाबाहू बाहुवली ताव दूरे अत्थु, जुद्धम्मि एयस्स एगा वि सेण्णरयणा वज्जव्व दुब्भेयणिज्जा । तओ पुब्बदिसिक्खणा पाँउसभव-जलहर पिव तुम्हे वि संगामाय गच्छंतं सुसेणसेणावइं अनुगच्छेहं । निअपहुणो सुहो-वमगिराए अंतोभरिया विव ते पुल्लण समंतओ फारीभवंतदेहा जाया । भरहनरिंदेण विसज्जिया ते जयसिरीणं पिव पइवीराणं सयं वरणं कुणमाणा स-गेहं गच्छेइरे ।

उभयहं सेण्णाणं संगामहं सज्जीभवणं—

तइया दुण्हं भरह-बाहुवलीणं पसाय-जल-जलहीणं तरिउं इच्छमाणा वीर-वरा रणकम्मम्मि सज्जेइरे । अह ते किवाण-चाव-सरहि-गया-पसुहाइं नियाइं नियाइं सत्थाइं देवे विव अच्चिंति । ऊसाहेण नच्चमाणचित्तस्स तालं पूरिउं पिव ते महासुहडा सत्थाणं पुरओ तुरियाइं वाएइरे । निम्मलनिय-जसेहिं पिव महा-भडा सुरहीहिं नवचंदणुव्वट्ठणेहिं अप्पणो देहं मज्जेइरे । गडालेसुं आवद्धकिण्ह-पड-वीरपट्ट-सोढाविडंबगे ण्डालालंकारे^१ मिगमएण सुहडा विरयंति । उभयसेण्णे वि सत्थाणं जागरणं कुणमाणाणं सत्थसंबंधिसङ्गामकहाओ य समायरंताणं वीराणं निदा भीया इव न समागया, यभाए जुद्धाभिकंखीणं उभयसेण्णवीराणं तिआमा सययामा विव कहंचि वि सा गया । अह आइच्चो उसहपुत्ताणं रणकीला-कोउंहुल्लं पेक्खिउं पिव उदयायलसिहरं आरोहेइ, तइआ उभेसुं सेण्णेसुं मंदरायल-संखुब्भमाण-जलहि-जलाणं पिव पलयकालसंजाय-पुव्वखलावट्टय-जलहराणं इव दंभैलितालिज्जमाणगि-रीणं पिव रणतुरियाणं महंतो निणाओ होइ, तथा पसप्पंतेण तेण रणाऽऽओज्ज-निणाएण तम्मि समए उक्कण्णताला दिसिगया तसिंति, जलजंतुणो भयभंतचित्ता

१ वयसा । २ अक्षौहिणी-महती सेना । ३ प्रतिविम्बस्थिता इव । ४ प्रावृद्धभवजलधरम् । ५ मार्ज-यन्ति । ६ ललाटालङ्कारान् । ७ मृगमदेन-कस्तूर्या । ८ त्रियामा-रात्रिः । ९ कुतूहलम् । १० दम्भोलिः-बभ्रः । ११ आतोयं-वायम् ।

जायंति, जलहिणो खुभंति, कूराइं पि सत्ताइं सव्वओ गुहासु पविसिरे, महोरगा विवराओ वि विवरेसु निलिज्जंति, पाहाणखंडीभवंतसिहरा गिरिणो कंपेइरे, कुम्भराओ वि संकुयंत-पायकण्ठं वीहेइ, गयणं धंसेइव्व, पुढवी विद्वेयइ इव जायइ । अह रायदुवारपालेणेव रण-तुरिय-नाएण पेरिआ उभएसु सेण्णेसु सेणिगा जुद्धं सज्जेइरे । केवि रणूसाहंससंतदेहत्तो तुट्ठीओ कवय-नालिगाओ भुज्जो भुज्जो नवनवाओ ताओ समारएइरे, के वि नेहेण सयं चिय तुरंगमे संनैहिति, 'सुहडा हि वाहणेसु अहिगं रक्खं कुणेइरे' । के वि आसे संनाहिऊण परिकिखउं आरोहिऊण वार्हिति, 'दुसिक्खिओ जडो अ आसो आसारोहग्गि सत्तुव्व आयरेइ' । संनाहगाहणम्मि हेसमाणे तुरङ्गमे केवि देवे इव अच्चेइरे, जुद्धम्मि हेसा हि जयगुणी सिया । के वि सन्नाह-रहियाऽऽसे लद्धण अप्पणो-सन्नाहे चएइरे, 'समरेसुं बाहुपरकमवंताणं इमं हि पुरिसव्वयं' । समुदे मच्छो विव घोररणम्मि खलणारहिओ संचरंतो तुमं अप्पणो कोसलं दंसिज्जाहि त्ति के वि सारहिं पसांसिति । पडिमा पौहेएहिं पिव के वि चिरं समरं पासमाणा नियरहे समंतओ सत्थेहिं पूरिति । के वि चारणे इव दूराओ अप्पजाणवणट्ठं उंसंभियनियचिन्हे झयथंभे दिढयरे विहेइरे । के वि सुसिलिद्ध-जुग-रेहिर-रहेसु परसेण-जलनिहि-जलकंतमणिनिहे तुरंगमे जुंजेइरे । के वि सारहीणं दिढयराइं कवयाइं अप्पिंति, 'आससहिया वि रहा सारहिं विणा निप्फला हि' । के वि नियंवाहाओ इव उद्दाम-लोह-वलय-सेणि-सम्पककक्कसे गयदन्ते पूयंति । केइ समागच्छंतीए जयसिरीए वासघराइं पिव पडागामालारेहिराओ सारीओ हत्थीसु आरोविंति, कत्थूरीहिं पिव निग्गच्छंत-गंड-गयमएहिं सउणं ति वयंता केवि तिलए कुणंति । के वि अण-गय-मयगंधवासियं पवणं पि असहिरे मणुव्व दुद्धरे गए आरोहेइरे । सव्वे वि हत्थारोहा सव्वेहिं सिन्धुरेहिं समर-महूसव-सिंगार-कंचुए इव सुवण्णमइयंककडे गहाविंति, तह य मुंडग्गेसुं उण्णाल-नील-कमल-लीलाए लोहमुग्गरे गार्हिति । तइ हत्थिवगा जमस्स आहरियदन्ते विव किण्ड-लोह-मइय-तिक्खकोसंए दंतिदंतेसुं विणिहेइरे ।

सत्थपुण्णा वेसरा सयडा य अणुगच्छंतु, अण्णह लहुहत्थाणं सत्थं कं पूरिस्सइ । निरंतरसंगामकम्मपराणं वीराणं जइ अग्गे धरियाइं वम्माइं तुट्ठिस्संति, तओ वम्म-

१ विद्रातीव । २ उच्छवसद्=पुलकित धतुं । ३ संनाहयन्ति=संभ्रायने भाटे अन्तरं वगेरेथी सगण करे छे । ४ हेषा-अवशब्दः । ५ पाथेयैरिव । ६ अवलम्बितः । ७ निजवाहनिव । ८ शारीः-गजपर्याणानि=हाथीतुं पञ्चाशु अंभाडी वगेरे । ९ कंकटान्-कवचान् । १० कोशकान्-शस्त्रविशेषान् । ११ विनिश्चति ।

पुण्णा उट्ठा सिग्गं चलंतु । रहीणं हि सत्थासणि-पायाओ नगा इव रहा भंजिहिन्ति,
तओ सज्जिया अण्णे रहा अणुगच्छन्तु । पढमेसु आसेसु संतेसुं जुद्धमि विग्घो मा
होव्वं त्ति आसवाराणं पिट्ठओ सयसो अण्णे आसा गच्छंतु । इक्किक्कं बद्धमउडं
नरिदं वहवो वि इभा अणुजंतु, जं तेसिं एगेण इमेण जुद्धं न होइ । रणायास-गिम्ह-
उउतवियाणं जंगमपवाओ इव जलवाहिणो महिसा अणुसेणिगं गच्छंतु । चंदस्स
कोसोव्व हिमगिरिणो सारं पिव अभिणव-वण-रोहणो-सहीओ वसहेहिं उप्पा-
डिजंतु । एवं संगमाम्मि रायनियोगिपुरिसाणं आपससमुब्भवकोलाहलेहिं रणतुरिय-
महारवो अईव वड्ढेइ । तया समंतओ समुत्थियतुमुलेहिं विस्सं सदमइयं पिव, 'पेखंता-
SSउहेहिं च सव्वओ लोहमइयं इव होइ । इट्ठपुण्विणो विव पुव्वपुरिसाणं चरित्ताइं सुम-
राविता, वासरिसिक्ख उच्चएहिं रणनिव्वाहफलं संसंता, नारयरिसिक्ख आयरसहिया वीराणां
उदीवणं सुहुं सुहुं उवत्थियपडिसुहडे पसंसमाणा पव्वदिणञ्च रणुत्ताला वेय्यालिया
हरिसेण तत्थ पइहत्थि पइरहं पइतुरंगं अणाउलं भमंति ।

संगमपारंभे जिणिदपूअणं--

अह वाहुवली सिणाइत्ता देवं अच्चिउं देवालयम्मि वच्चेइ, महंता हि कत्थइ
कज्जम्मि न विमुज्जेइरे, तत्थ जम्माभिसेगम्मि वासवो विव सो उसहसामिणो पडिमं
सुगंधि-जलेण भत्तीए ण्हेवेइ, तओ कसायरहिओ सो परमसद्धो सद्धाए नियचित्तं
पिव दिव्वगंध-कसाइयवत्थेण तं पडिमं लुहेइ । तओ पडिमाए दिव्ववसणमइय-
चोलणं रयंतो विव जवखरुदमेण विलेवणं कुणेइ, तओ राया कप्पतरुपुप्फमाला-
सरिस-सरस-सुगंधजुत्त-विचित्ताहिं पुप्फमालाहिं जिणपडिमं समच्चेइ, सोवणिय-धूव-
दहणम्मि धूमेहिं नीलुप्पलमइयपूयं विरयंतो इव दिव्वधूवं डहेइ, तओ कय-उत्तरासंगो
मयररासिस्थिओ आइच्चो पयावं पिव दित्त-दीवगं आरत्तिगं वेत्तूण आरत्तिअं उच्चा-
रिऊण पणमिऊण कयंजली भत्तिवहुमाणो वाहुवली आइणाहं एवं धुणेइ- 'जं सैस्स
अग्गणयं जाणिऊण सव्वण्णु ! अहं तुमं धुणेमि तं तु तुमम्मि एसो दुव्वारो
भत्तिवहुमाणो मं सुहेरेइ, आइमत्तिथेसो ! भवारित्तियपाणीणं वज्जपंजरनिभाओ
तुम्हकेर-पाय-नह-दिक्खिओ जयंति, देव ! भवंतचरण-कमलं पेक्खिउं रायहंसव्व

१ 'प्रेखद्-कम्पमानः । २-स्मारयन्तः । ३-व्यासर्षिवत् । ४-वैतालिकाः । ५ स्तपयति ।
६ मार्ष्टि । ७ स्वस्य । ८ दुर्वारः । ९ मुखरयति ।

धण्णा चिय देहिणो पइदिणं दूराओ वि धावेइरे, भयवं ! सीयपीलिएहिं सरो विव घोर-
 संसारदुक्ख-बाहिएहिं विवेगवंतेहिं तुमं नेव एगो सरणीकुणीअसि, नाह ! हरिसेणं
 निमेसरहिएहिं नेत्तेहिं जे पाणिणो तुमं पासंति ताणं परलोगम्मि वि देवत्तणं न दुल्लहं,
 देव ! खीरेण खोभेवत्थाणं कज्जलकयमालिणं पिव तुव देसणावयणजलेहिं नराणं
 कम्ममत्तो अवगच्छेइ, सामि ! उसहणाह ति जविज्जमाणं तव नामं सच्चसिद्धिसमा-
 करिसणमंतत्तणं अवलंवेइ, पहु ! जे तुम्हकेरभत्तिवम्मिया ताणं सरीरीणं वज्जपि न
 भिंदेइ, खल्लपि न च्छिंदेइ' एवं भगवत्तं पुलयंचिओ रायसिरोमणी सो बाहुवली थुणिऊण
 नमिऊण य देवथागाराओ निग्गच्छेइ, तओ सो हेम-माणिकक-मंडियं वज्जकवयं विजय-
 सिरीविवाहाय कंचुगं पिव गिण्हेइ, तम्हा सो नरीसरो विउल-विद्धुम-समूहेण समुदो
 विव भासुरेण तेण कवएण विराएइ, तओ धरणीधवो गिरि-सिहर-निविट्ट-मेइ माला
 सिरिविडंबणं सिरत्ताणं सिरम्मि निहेइ, पिट्ठीए महाफणिठाणाइण-पायाल-विवरु-
 वमे लोहनारायभरिए दुण्णि 'तूणे बंधेइ, वामभुयदंडम्मि जुगंत-समय उड्डखित्त-
 जमदंडसहोयरं कोदंड धरेइ । इअ सण्णद्धो बाहुवली पुरोहिएहिं पुरओ 'सत्थि' ति
 आसासिज्जमाणो, सगोत्तबुड्डाजणेहिं 'जीव जीवत्ति' वुच्चमाणो, बुड्ड-सिद्ध-पुरिसेहिं
 'नेद नंद' ति वुच्चंतो, बंदिनरेहिं चिरं 'जय जय' ति वइज्जमाणो सो महाभुओ आरोह-
 नेण दिण्णहत्थावलंबणो देवराओ मेरुसिहरं पिव महागईदं आरोहेइ । इओ तयणिं चेव
 पुण्णबुद्धी सारिभरहेसरनरिंदो वि सुभसिरीए कोसागारं देवथागारं गच्छेइ, तत्थ
 महामणो सो दिसिंविजयाणीयपउमाइतित्थजलेहिं सिरि-आइनाहपहुणो पडिमं ण्ढ-
 वेइ, तओ सो रायसीहो देवदूसेण वत्थेण सिप्पिवरो मणिणो विव अपडिमं तं पडिमं लुहेइ,
 लुहिऊण हिमायलकुमाराइदिण्ण-गोसीस-चंदणेहिं तं पडिमं नियजसेहिं पुढविं पिव
 विलिपेइ, विलिपिऊण लच्छीवरसरिसपउमेहिं नयण-थंभणोसाहिरूवं पूअं रएइ,
 रइऊण महीवई धूमचल्लीहिं कट्यूरीपत्तावल्लिं आलिहंतो विव पडिमाए पुरओ धूवं डहेइ ।
 तओ सो समग्ग-कम्म-कट्ठाणं उल्लणं अग्गिकुडं पिव उदित्त-दीवगं आरत्तिगं
 गिण्हेइ, तं आरत्तियं उत्तारिऊण आइणाहं च पणमिन्ना भरहभूवई मत्थयम्मि अंजलिं
 विरइऊण इअ थुणिउं उवक्कमेइ'-जगणाह ! जडो वि जुत्तमाणी अहं तुमं थुणेमि ? जओ
 गुरुणो पुरओ बालाणं लल्लावि गिराओ जुत्ता एव । देव ! गुरुकम्मोवि जीवो तुम्ह
 सरणं अंगीकुणंतो सिज्झइ, 'सिद्धरसस्स हि फासेण लोदो वि सुवण्णीहोइ' । नाह !
 तुमं ज्ञायमाणा थुणमाणा अच्चमाणा य धण्णा देहिणो मण-वाय-कायाणं फलं पावेइरे,

सामि ! पुढवीए विहरमाणस्स तुम्ह वि चरणरेणवो नराणं पावदुमुम्मूलणे
महागया इव आयरंति, पद्द ! सहावओ मोहेण अधिल्लमाणं सरीरीणं विवेगलोयणं
दाउं तुमं चिय एगो सक्को सि, जे तुम्हेच्चय-पाय-पउमेषु भमरायंति ताणं मणस्स
मेरुप्पमुहं पिव लोयणं न दूरे, देव ! भवंत-देसणावयणेहि पाणीणं कम्मपासा जल-
हरज्जलेहि जंबुफलाइं पिव सिग्धं गलंति, जगदीसर ! तुमं मुहुं मुहुं पणमिच्चा इमं
पत्थेमि तुम्ह पसायाओ तुमम्मि भत्ती जलहिजलमिव अक्खया होउ” इअ आइनाहं
धुणिऊण नसंसिऊण य भत्तिमंतो चक्कवट्ठी भरहनरिंदो देवयागाराओ निग्गच्छेइ ।
तओ सो निवो पमाणविनिम्मियं कवयं भुज्जो भुज्जो सिद्धिलीकाऊण हरिस्ससिएण
अंगेण धरेइ, तेण अंगलम-दिद्व-मणिमइयवम्मेण महीवई माणिककपूआए देवपडिमा
इव विराएइ । तओ सो भरहेसरो बीयं मउडं पिव मज्झम्मि उच्चं छत्तवट्ठुलं सुवण-
रयण--सिरत्ताणं धरेइ, नागराए विव अच्चंत-तिक्ख-नाराय-दंतुरे दोणिण तोणीरे
पिट्ठम्मि बंधइ, तओ सो इंदो विव उज्जुरोहियधणुहं वामेण पाणिणा चेरि-पडिऊलं
कालपुट्टं महार्थणुं उवादेइ । सो सूरुओ विव अण्णतेयंसीणं तेयं गसमाणो, भद्दगईदो
इव लीलाए थिरपायन्नासं कुणंतो, मइंदव्व अगओ पडिवीरे तिणं पिव गणितो,
पन्नगिंदो इव दुव्विसहदिट्ठीए बीहैणगो, महिंदुव्व उच्चएहि वंदिवुंदारगेहि धुणिज्जमाणो
भरहनरिंदो रणकुसलं महागयं समारोहेइ । अह ते दुणिण वि भरहबाहुवलिनरिंदा कप्पत-
रुव्व बंदीणं दविणं दिता, सहस्सक्खव्व समागयनिय-सेण्णाइं पासंता, मुंणालं रायहंसव्व
एगं वाणं धरंता, कामकहं विलासिपुरिसव्व रणकहं कुणंता, महुसाहा महोयंसिणो ते
उभे नहमज्झम्मि दिणयरव्व निय-निय-सेण्णमज्झम्मि समागच्छन्ति । निय-सइण-
व्भंतरसंठिओ भरहो बाहुवली य जंबूदीवमज्झवट्ठि-मेरुगिरि-सिरिं धरेइ । ताणं दुण्हं
सेण्णाणं अंतोवट्ठिणी भूमी निसद-नीलवंतगिरीणं मज्झम्मि महाविदेहखेत्तभूमीव
लक्खिखज्जइ । ताणं दुणिण वि सेणाओ कप्पंतसमए पुव्वाऽवरवारिनिहिणो इव पंति-
रूवाओ होऊण अभिसंप्पेइरे । पंतिं विष्फुट्ठिऊण वाहिरं गच्छंता पाइक्का रायदुवार-
पालेहिं सेऊहिं जलपवाहा इव निवारिज्जंति, ते सुहडा रायादेसेण तालेण एग-
संगीय-वत्तिणो नइगा इव परुप्परं समपायनासं चलन्ति, निय-थाणं अचइऊण गच्छंतेहिं-
सव्वसेणिगेहिं ताणं दुण्हं सेणाओ इक्क-देहाओ विव विरायंति । ते सुहडा
रहाणं लोहमुहचक्केहिं पुढविं फाडंता, लोहकुडालकप्पेहिं आसाणं खुरेहिं खणंता,

१ जन्मान्धानाम् । २ तृणीरो । ३. मीषणो-भयजनकः । ४ बन्दिनः-स्तुतिपाठकाः । ५ मृणालम्-
पद्मनालम् ६ यरस्वपरं संमुखं गच्छन्ति ७ विस्कोटय-तोडीने ।

अद्धचंदसरिसलोहमइय-वेसर-खुरेहिं भिंदंता, पाइक्काणं वज्जपेण्हिचरणेहिं चुण्णंता,
खुरेहिं खुरप्पसरिसेहिं महिसवसह-खुरेहिं खंडंता, मोग्गरनिहेहिं हत्थिपाएहिं मेइणिं
चुण्णमाणा, अंधयारसहोयरेहिं रएहिं गयणं ठक्कंता, दिणयर-किरणसरिसेहिं च सैत्थ-
ऽत्थेहिं पयासंता, भूइट्टेण नियभारेण कुम्भपिट्ठं किलिसंता, महावराहस्स समुण्णयं दाढं
नामंता, नागरायस्स फणाऽऽडोवं गाढं सिद्धिलिता, निहिले वि दिसिगईदे कुज्जी-
कुणंता, उच्चएहिं सिंहणाएहिं वम्हंडभायणं नादंता, पयंड-कर-प्फोडणपणाएहिं च
फोडिता, पसिट्ठेहिं झयलंछणेहिं उवलक्खित्ता उवलक्खित्ता महोयंसिणो सुहडा पडिबीरे
नामग्गहण-पुव्वयं वयंता, अहिमाण-सत्तसालिणो सुहडा अप्पुण्णं आहविंता दुण्हं
सेण्णाणं अग्गसङ्गणसुहडा अग्गसेण्णसुहडेहिं सह मिलेइरे ।

जुद्धनिवारणद्धं देवाणं आगमणं ।

जलजंतुणो जलजंतूणं पिव हत्थारोहा हत्थारोहाणं, तरंगा तरंगाणं पिव आस-
वारा आसवाराणं, वायवो वाऊणं पिव रडिणो रडिणं, गिरिणो गिरीणं पिव पत्तिणो
पत्तीणं कुंतस्स कुंतं असिणो असिं मोग्गरस्स मोग्गरं दंडस्स दंडं च मेलविंता
अमरिसेण जाव हुक्केइरे, ताव गयणम्मि तेलुक्कविणाससंकाए संभंता देवा समा-
गच्छंति । नियवाहूणं पिव भरहबाहुवलीणं को अयं संघरिसु त्ति 'विमरिसमाणा
ते देवा दुण्हं सेणिगे एवं वयंति-‘जाव तुम्हाणं मणंसिणो सामिणो बोहावेमो ताव
केणइ न जुज्झियव्वं’ एत्थ उसहसामिणो आणा सिया । एवं देवाणं वयणं सोच्चा
तिजगभत्तुणो आणाए चित्त-लिहिया विव उभए वि सव्वे वि ते सेणिगा तहेव
चिट्ठंति । तहट्टिया ते सेणिगा 'इमे देवा किं बाहुवलिणो संतिआ ? किं वा भरहस्स
'संतिआ' ? एवं चित्तन्ति । संपइ कज्जं न विणस्सेज्ज लोगस्स य भइं होउ त्ति
बवमाणा ते गिन्वाणा पुव्वं भरहचक्कवट्ठिं समुवागच्छंति । जयसु जयसु त्ति आसिसं
दाऊण पियंवया देवा जुत्ति-जुत्तेण वयणेण मंतिणो इव वयंति-‘नरदेव ! देवराएण
अमुरा इव छक्खंडभरहखित्तम्मि तुमए सव्वओ भूवा विजिआ, राइंद ! तुम्ह परक्क-
मेण तेएण य तेसुं राएसुं मिगेसु सरहस्स विव पडिमल्लो न कोवि सिया, महिएहिं
जलकुंभेहिं मक्खणसद्धा विव तेहिं णूणं भवंतस्स रणसद्धा न हि पुण्णा जाया, तओ
तुमए अप्पणो बीएण भाउणा सह जुद्धं आरद्धं एयं स-हत्थेण स-हत्थस्सेव ताडणं,

१ पाणिः-पगनी पानी, २ शस्त्राऽस्त्रैः । ३ कणाटोपम् । ४ उपस्थिता भवन्ति । ५ विमृशन्तो-
विचारयन्तः । ६ सत्काः-संबन्धिनः । ७ आशीर्वादम् ।

राय ! महातरुधंसणम्मि इभस्स गंडकंहुई इव तुव जुद्धम्मि बाहुकंहु चेव धुवं कारणं, जह मत्ताणं वण-गयाणं 'संफिट्ठो वणभंगस्स हेऊ तह तुम्हाणं भुयकीला वि विस्सस्स विणासाय चेव सिया, जह मंसभक्खिणा खणियसुहट्ठं खगकुलं विणासिज्जइ तह तुम्हेहि कीलानिमित्तं विस्सं संहरिउं किं आरब्धं ? । मयंकाओ अग्गिबुट्ठो विव जगर-क्खगाओ किवाळूओ उसहपहुणो जायजम्मस्स तुव किं इमं जुत्तं ? , तम्हा पुढविवइ ! संगेहिंतो संजमीव इमाओ घोराओ संगामाओ विरमाहि, नियं गेहं वच्चाहि । तुमम्मि आगए तुम्ह अणुओ बाहुवली वि आगओ, तुमम्मि गए एसो वि जाहिइ, कारणाओ खलु कज्जं हि होइ, जगक्खयपावपरिहाराओ तुम्हाणं सुहं होउ, दुण्हं पि सेण्णाणं च रणचायाओ भहं अत्थु, तुम्हेच्चय-सेण्ण-भार-भूमिभंगविरहा-ओ भूमिगन्धनिवासिणो भवणवइपमुहाऽसुरिंदाइणो सुहिणो संतु, तुम्हकेर-सेण्ण-त्रिमइणाऽभावाओ इह भूसी पव्वया जलहिणो पयाओ सत्ताइं च सव्वओ खोहं चयंतु, तुम्ह समर-संभावि-जग-संहार-संकाविरहिया सव्वे वि देवा सुहं चिट्ठंतु' इअ आगमणपओयणं वोत्तूणं विरएसु देवेसुं भरहेसरो मेहगज्जण गहीर-गिराए भासेइ-तुम्हेहि विणा विस्सहियगरं इमं वायं के ववित्तु, लोगो हि पाएण पर-कोउंहेल्लं पेक्खिउं उदासीणो होइ । किंतु इह संगामुत्थाणकारणं अण्णहा चेव, हियकंखिरेहिं तुम्हेहिं जुत्तीए अण्णहच्चियं ऊहियं, 'कज्जमूलं अविद्याणिऊण अण्णया किंच ऊहिऊण सासगस्स सुरगुरुणो वि सासणं निण्णलं होज्जा' । अहं बलवंतो म्हि त्ति न खलु अहं संगामकरणाभिलासी जाओ, 'भूइट्ठे तेल्ले समाणे 'सेलमइणं किं विहिज्जइ' ? तह य छक्खंडमरहस्सित्तम्मि नरिंदे जिगंतस्स मज्झ पडिमल्लो न आसी तह अज्जावि न विज्जइ, पडिमल्लो उ जयाजयनिवंधणं सत्तू चेव सिया, किंतु देव्वजोगाओ एव बाहु-वलिणो मम य भेओ जाओ अत्थि । छट्ठिं वाससहस्ताइं दिसिविजयं काऊणं समागओ समाणो अहं तं बाहुवलिं 'अण्णारिसं पिव पेक्खेमि, एत्थ भूइट्ठो कालो कारणं, तओ दुत्रालससु अभिसेगवासेसु सो बाहुवली मज्झ समीवे नहि आगओ, तत्थ मए तस्स पमाओ तक्किओ, तत्तो तरस आहवणत्थं मए दूए पेसिए वि जं सो न आगच्छि-त्था तत्थ वि मंतीणं मंतणदोसो कारणं तक्किज्जइ । एअं नलोहाओ न य कोवाओ आहवेमि, किंतु एगम्मि वि अणमिरे चक्कं अंतो न पविसेज्जा । चक्करयणं नयरिं न पविसेइ, एसो य मं न नमेइ त्ति एयाणं परुण्णरफद्धाए संकडम्मि पडिओ म्हि । सो

१ संयोगो-मिलनं च । १ कुतूहलम् । २ ऊहितम्-तर्कितम् । ३ शीलः-पर्वतः । ४ अन्य दशमिव

बाहुवली मणंसी वि मम भाया एगवारं आगच्छेउ, ममत्तो अतिही पुयं पिव अण्ण पुढविं पि गिण्हेउ, मम चक्कपवेसं विणा न अण्णं संगामकारणं, नण्णोवि अण्णणावि तेण अणुजम्मेण मम न माणो सिया ।

अह सुरा बवन्ति-राय ! संगामकारणं महंतं, भवारिसाणं अप्पेण कारणेण एरिसी पउत्ती न सिया, तओ अम्हे बाहुवलिं ससुवेच्च बोहावेमो, जुगक्खओ विव आगच्छंतो जणक्खओ रक्खणिज्जुत्ति, भवंतो इव सो वि जइ उच्चएहिं कारणंतं वएज्जा तह वि अहमेण जुद्धेण न जुज्झियव्वं, उत्तमेहिं दिट्ठि-वाया-बाहु-दंडाजुद्धेहिं जुज्झियव्वं, जह निरवराहाणं गयाईणं वहो न हि होज्जा । तहत्ति चक्कवट्ठिमि अंगी-कुणंते ते देवा विइयसेण्णम्मि बाहुवलि-नरिंदं उवागच्छेइरे, अहो ! दिट्ठ-अवट्ठमण-सुत्तीए एसो अथैरिसणीओत्ति अंतो विम्हयवंता ते तं एवं भासिंति-जगनयणचक्रोराणंद-पयाणमयंक ! उसहसामिनंदण ! चिरं जयसु चिरं नंदसु, जलहीव तुमं कयावि मज्जायं न उल्लंघेसि, संगामाओ कायरुव्व अवण्णवायाओ बीहेसि, नियसंपयासु अगव्विरो, परसंपयासु अमच्छरी, दुव्विणीयाणं सासणो, गुरुसुं पि विणमिरो, विस्साभयदाण-परस्स पहुणो अणुरुवो तुं तणओ असि, अवरस्सावि विणासाय मणयं पि न पवट्ठित्था तथा जिट्ठम्मि भायरम्मि तुव किं अयं मयंकरो आरंभो ?, सुहाओ पंचत्तणं पिव तुवत्तो एसो न संभाविज्जइ, एत्तिए वि गए मणयं पि कज्जं न विणट्ठं, तुम्हा खलमेत्तिमिव रणारंभ-संरंभं चयसु, नरेसर ! मंतेण महोरगे विव नियाणाए संगामारंभाओ वीरसु-हडे निवारेसु, जिट्ठभरहभायरं अभिगांतूण वसंवओ होहि, एवं च कए 'सत्तिमंतो वि अयं विणयवंतो' इअ अच्चंतं सिलाहिज्जसि, तओ भरहउज्जियं इमं छक्खंडभरहस्वित्तं सो-वैज्जियं पिव भुंजसु, तुम्हाणं दुण्हं किं अंतरं ? इअ वोत्तूणं वरिसिऊण जलहरेसु विव विरएसु देवेसु बाहुवली किंचि हसिऊण गहीरगिराए वएइ-देवा ! अम्हाणं विग्गहकारणं परमत्थेण अविण्णाय निय-निम्मलासएण एवं वएह-'तायभत्ता सइ तुम्हे' अम्हे वि य तायस्स तणया इअ संवंधाओ वि तुम्हेहिं एरिसं वुत्तं तं जुत्तं, पुरा हि दिक्खासमए अत्थीणं हिरणं पिव देसे विभइऊण अम्हाणं भरहस्स य अप्पित्था, निय नियदेसेण संतुट्ठा सव्वे वि अम्हे चिट्ठामो, धणनिमित्तं हंत ! पर-दोहं को कुणेइ ?, असंतुट्ठो उ भरहो भरह-स्वित्तमहोदहिम्मि महामच्छो अण्णे मच्छे विव समग्ग-नरवईणं रज्जाइ गसित्था, तेहिं पि रज्जेहिं भोयणेहिं ओअैरिओ विव असंतुट्ठो सो नियलहु-

१ नतेनापि । २ दंडावलम्बनमूर्त्या । ३ असहनीयः । ४ पंचत्वम्-मरणत्वम् । ५ इयति । ६ स्वोपाजितमिव । ७ औदारिकः-उदरपूरकः ।

बंधूणं रज्जाइं अचिच्छंदित्था, जो भाऊणं पिउदिण्णाइं रज्जाइं अचिच्छंदेज्जा तेण अप्पणा चेव अप्पणो गुरुत्तणं निवारिअं, वय-मेत्तेण न गुरु किंतु गुरुणो विव आयरमाणो गुरु होइ, तेण लहुबंधुनिकासणाओ नणु गुरुत्तणं दंसियं, एत्तियकालं विवभमेण मए अयं सुवण्णबुद्धीए पित्तलव्व मणिवुद्धीए य कैच्चव्व गुरुबुद्धीए दिट्ठो, पिउणा नियवंस-जाएण वा दिण्णं निरवराहिणो अण्णस्साऽवि पुढविं अप्परज्जो वि न हरेज्जा, किं पुणो भरहेसरो ? । नूनं एसो कणिट्ठाणं रज्जाइं हरिऊण न लज्जिओ, जओ अहुणा जयणसीलो रज्जकएणं मं पि आहवेइ । जह पोओ अंभोनिहिं तरिऊण समुदतडत्थिय-गिरिणो दंतग-भागेसु अप्फडिज्जइ तह अयं भरहो सव्वभरहखित्ते जिणिऊण वेगेण मइ अप्फडिओ । लुद्धं मज्जाथारहियं रक्खसं पिव निग्घिणं अमुं भरहं मम कणिट्ठबंधवो वि लज्जाए नहिं सेवित्था, तस्स केण गुणेणाइं अज्ज वसंवओ हवेमि ? , अमरा ! सव्वंभा विव मज्झत्थं धरिऊण बवेह । अह सो निय-विक्रमेण मं वसोइत्तं करेइ, तं तु करेउ, खत्तियाणं हि एसो आहीणो पहो । एवं ठिए वि हि आलोइऊण जइ पच्छा गच्छेज्जा तथा खेमेण एसो गच्छेउ, एवारिसो हं न लुद्धो । भरहदिण्णं सव्वभरहखित्तं अहं भुंजेमि त्ति कयावि किं होज्जा ? , केसरिसीहो केणइ दिण्णं कयाइं किं भुंजेइ ? , तस्स भरहखित्तं गिण्हंतस्स सट्ठिवास-सहस्साइं गयाइं, जइ इमं अहं वेत्तुं इच्छिस्सं तथा वि हि गिण्हि-स्सं, एत्तियकालेण तस्स समुप्पण्णभरहविभूइं किवणस्स धणं पिव तस्स भाया अहं कहं हरामि ? , जइ जाइफलकवलेण हत्थीव सो अमुणा वेभवेणं अंधो जाओ तथा वि सो सुहं अचिच्छउं न सक्को, जओ भरहेसरस्स एयं भरहखेतेस्सरियं मए हिंयं चिअ मए अणिच्छाए^१ उविकिखयं ति जाणेह, किंतु मज्झ कोसं हत्थि-तुरंगाइअं जसं पिय य अप्पिउं^२ षडिभूहिं पिव अप्पसरिसेहिं मंतीहिं एसो इहं आणीओ अत्थि, तुम्हे जइ इमस्स हियाभिलासिणो तथा इमं संगामाओ निसेहेह, अजुज्झमाणेण अण्णेणावि सह अहं कयाइं न जुज्झामि । ते देवा जलहरस्स गज्जियं पिव तस्स उज्जियं वयणं सोच्चा विम्भयचित्ता भुज्जो वि एवं वयंति-इओ जुद्धम्मि चक्काऽपवेसणं हेउं जपंतो चक्कवट्ठी अणुत्तरीकाऊणं निरोद्धुं सुरगुरुणावि असक्कणीओ, जुज्झमाणेण सह अहं जुज्झामि त्ति जपंतो भवंतो जुद्धाओ निरोद्धुं निययं सक्केणावि न सक्किज्जइ । उसहसामिदिह-संसग्ग-सालीणं महाबुद्धीअं विवेगवंताणं जगपालगाणं दयालूणं तुम्हाणं दुण्हंपि विस्सस्स दुइइव्वजोगेण जुद्धस्स उप्पाओ उवत्थिओ, तह वि पत्थियदाणकप्पपायव ! वीर ! तुमं पत्थिज्जसि 'उत्तमेण चिय जुद्धेण जुज्झाहि न उ अहमेण' उग्गतेयंसीणं तुम्हाणं

१ आच्छिन्नत्-बलात्कारेण अगृह्णात् । २ कावत् । ३ दन्तकाः-पर्वतस्य दन्ता इव निर्गता भागाः । ४ सभ्या इव माध्यस्थ्यम् । ५ वशायत्तम् । ६ हृतमेव । ७ उपेक्षितम् । ८ प्रतिनिधिभिरिव ।

अहमेण हि जुद्धेण भूइह-लोग-पलयाओ अकालम्मि पलओ भवे । तओ दिट्ठिजुद्धा-
ईहिं जं झुंझियच्चं तं सोहणं, तेसु हि जुद्धेसु अप्पणो माणसिद्धी लोगाणं च पलओ न
सिया । आम त्ति बाहुवलिम्मि वयंते ते देवा ताणं दुण्हं जुद्धं दददुं पउरा विव नाइ-
दूरे चिट्ठेहरे । अह बाहुवलिस्स आणाए गयत्थिओ ओयंसी पडिहारो गयच्च गज्जंतो
नियसेणिए एवं वएइ-भो भो ! सच्चसामंतरायाणो ! सुहडा ! य चिरं चित्तमाणाणं
तुम्हाणं पुत्तलाहो विव अभिट्ठं सामिकज्जं उवट्ठिअं, परंतु तुम्हाणं मंदपुण्णत्तणेण देवेहिं
महाबाहू अयं देवो भरहेण सह दंदजुद्धनिमित्तं पत्थिओ, सयं पि दंदजुद्धाभिलासी
सिया, तत्थ सुरेहिं पत्थिओ पुणो किं ? तओ इंदतुल्लविवकमो बाहुबलिनरिंदो तुम्हे
जुद्धाओ निसेहेइ, तम्हा मज्झत्थदेवेहिं पिव तुम्हेहिं हत्थिमल्लो विव अवीयमल्लो
जुज्झिज्जमाणो एसी सामी पेक्खणीओ । तओ महोर्यंसिणो तुम्हे रहे आसे कुंजरे य वालि-
ऊण 'वंकीभूया गहा विव अवक्कमेह, करंडगेसु पन्नगे इव कोसेसु खग्गे खिवेह, केँणो
विव उँदीमुहे कुंते कोसएसुं विवुंचेह, महागया करे इव उड्ढीकए मोगरे अवणमेह,
णडालाओ भुमयं पिव धणुक्काओ जीअं उत्तारेह, अत्थं निहाणे पिव वाणं तोणीरे
'निहेह, जलहरा विज्जूओ विव सल्लाई च संवरेह । वइरनिग्घोसेणेव पडिहार-
गिराए धुण्णिआ बाहुबलिणी सेणिया चित्तम्मि एवं चित्तेइरे-“अहो भाविरणाओ
वणिएहिं पिव भीएहिं, भरहेसरसेणोहिंतो उच्चएहिं लद्धलंचेहिं पिव, अम्हाणं
पुव्वभववेरिहिं पिव अकम्हा आगएहिं विबुहेहिं हा ! पहुं पत्थिऊण अहुणा जुद्धसवो
निरुद्धो, भोयणाय उवविट्ठाणं अगओ भायणं इव, लालणाय उवसप्पंताणं पेलिअंकाओ
मुत्तो विव, अहो ! कूवाओ निगच्छमाणाणं आयइदणी रज्जू विव अम्हाणं आगओ
वि रणूसवो दइव्वेण हरिओ । भरहतुल्लो अणो को पडिपक्खो होही, जेण अम्हे
संगामे सामिणो रिणरहिया होहिस्सामो । ”दायादेहिं पिव चोरेहिं पिव सुँवासिणी-
पुत्तेहिं पिव अम्हेहिं बाहुवलिस्स धणं मुहा गहियं । नूणं अम्हाणं इमं बाहुदंडवीरिअं
अरणसमुब्भवक्खलाणं पुप्फसोरहं पिव मुहा गयं । कीवेहिं इत्थीणं पिव अम्हेहिं
”अत्थाणं संगहो, तह य सुगेहिं सत्थिअमासो विव सत्थिअमासो मुहा विहिओ । तावस-
दारगहिं कामसत्थपरिन्ताणं पिव अम्हेहिं इमं पाइक्कत्तणं पि निप्फलं गहियं । एए
मयंगया संगामअभासं तुरंगमा य परिस्समजयअभासं हयबुद्धीहिं अम्हेहिं मुहेव कारिया ।

१ वकीभूताः । २ अपक्रामत । ३ केतून् । ४ ऊर्ध्वमुखान् । ५ भुवम्=भवा । ६ ज्याम्=धनुर्जी-
वाम् । ७ निधत् । ८ धूर्णिताः=प्रान्ताः । ९ पर्यङ्कात्=पलंगयो । १० आकर्षणी=खेचनारी । ११ दायादेः=
पैतृकसम्पत्तिभागहरैः । १२ चिरवितृष्टहनिवासिन्याः पुत्रैः । १३ क्लीबैः । १४ अन्नाणाम् । १५ शास्त्रा-
भ्याम् इव शस्त्राभ्यासः ।

सरय-समुद्भववेरिहिं पिव अम्हेहिं मुहा गज्जियं, रायपत्तीहिं पिव अम्हाहिं मुहा विअंडं कडक्खिअं ? , सामग्गीदंसगेहिं पिव अम्हेहिं मुहासंनद्धं, जुद्धमणोरहे अपुण्णे अम्हाणं अहंकारधारित्तिणं निष्फलं चिय गयं” एवं विचित्तमाणा विसायविसग-
विभया स-सुकारा स-फुकारा सप्पा इव ते अवसस्पंति । तौहे खत्तियमहाधणो भर-
हेसरो वि महण्णवो वेलं पिव नियं सेणं अवसारेइ । महोयंसिणा चक्किणा अवसारिज्ज-
माणा नियसेणिगा पए पए समूहीभूय एवं आलोयंति-“मंतिमिसेण कस्स वेरिणो मंतेण अम्हाणं सामिणा दुवाहुमेत्तेण इअ दंदजुद्धं अणुमयं, सम्मिणा जो हि संगामो अभिमओ, तां तु तक्केण भोयणं पिव, तम्हा अहो ! अलाहि एएण, अओ परं अम्हाणं किं कज्जं ? । छक्खंडभरहस्वित्तनरवईणं रणकम्मेसुं अम्हाणं किं को वि अक्कंतो ? , जेण अज्ज रणकम्माओ अम्हे निसिहिज्जामो । जइ सुहडेसु नट्टेसु विजिएसु हएसु वा सामिणो जुद्धं जुत्तं, अण्ह न उ, रणे हि विचित्ता गई । जइ एगं आहुबलिं विणा अण्णो को वि पंडिवक्खो होज्जा, तथा सामिणो जुद्धम्मि कयाई न हि संकामहे । उदग्गवाहुणा बाहुवलिणा सद्धिं आहवम्मि पागसासणस्सा-
वि विजयम्मि संसओ होज्जा, तथा के अण्णे ? । महानईपूरस्स इव दुस्सहवेगस्स तस्स बाहुवलिणो जुद्धम्मि पढमं भत्तुणो ठाउं न जुज्जइ । पुव्वं आसदमेहिं दमिए आसे अहिरोहणं पिव पुव्वं अम्हेहिं जोहिए तओ सामिणो रणो उइओ,” एवं अण्णुणं बवमाणे सेणिगे पेक्खिऊण इंगियागारेहिं ताणं मणोगयभावजाणगो चक्कवट्ठी समा-
हविऊण इअ भासेइ-

भरंहस्स नियसेण्णाणं पुरओ बलपयंसणं ।

जहेव तमवुंदविणासणम्मि भाणुणो किरणा अग्गेसरा तहेव तुम्हे सत्तु-
संमदणम्मि मम अग्गेसरा सुहडा हवेह । जह अगाह-परिहाए हत्थी वप्पतडं नाभिगच्छेज्जा तह तुम्हेसु सुहडेसु समाणेसुं को वि रिज्ज मं पइ न आयाइ, मम जुद्धं अदिट्ठपुब्बिणो तेण तुम्हे एरिसं मुहा आसंकेह, भत्ती हि अपए वि भयं पेक्खेइ । सुहडा ! सव्वे तुम्हे संमिलिऊण मज्झ बाहुवलावलोयणं कुणेह, जेण तुम्हाणं संका ओसट्ठेण रोगोव्व खणेणं पणस्सइ, इअ वोत्तूणं चक्कवट्ठी खणगपुरिसेहिं खणेणाऽवि अइवित्थिणगहीरं एगं गइडं खाणेइ, दाहिणवारिहिणो तीरम्मि सेज्जगिरी इव तस्स गड्डस्स तडम्मि भरहेसरो उवविसइ, स वामबाहुम्मि वडक्खम्मि जडाओ

१ वारिदैः । २ विकटं कटाक्षितम् । ३ तस्मिन्काले । ४ अपकान्तः । ५ प्रतिपक्षः-शत्रुः ।
६ पाकशासनस्य-इन्द्रस्य । ७ अपदे-अस्थाने । ८ सद्यगिरिः ।

इव लंबमाणाओ निविडाओ संकलाओ पइसंकलाओ य वंधेइ, सहस्ससंखार्हि तार्हि संखलाहि स चकवट्टी अंघेहिं सहस्संख विव बलीहिं महातरु विव रेहेइ । अह सो सुहडे वण्ड-सबलवाहणा तुम्हे महासगडं वसहा विव निव्भयं मं समाकरिसेह, सव्वे सव्व-बलेण मं कइदिऊण इहं गइडाए पाडेह, इमं मज्झ बाहुबलपरिक्खणद्धं न तुम्हाणं सामि-अवण्णच्छलं । अम्हेहिं इमो दुंसुमिणो दिट्ठो तं पडिहणिज्जउ, सो हि दुसु-मिणो चरियैत्थकरणेण सयं चिय निप्फलो होज्जा ए भुज्जो भुज्जो चकवट्टिणा आइट्ठा स-सेणिगा ते कहंचि तस्स वयणं अंगीकुणेइरे, 'जओ सामिणो आणा बली यसी' । तओ ते सव्वे सेणसुहडा मन्दरगिरिणो मंयणदवरिगाभूयं सप्यं पिव चकवट्टिभुयस्स संखलावुंदं समाकरिसेइरे । तइया पलंबिरासु चकवट्टियबाहुसंखलासु गाढविलग्गा ते उत्तुंगतरुसाहमेसुं साहामिगा विव भासेइरे, चकवट्टी सयं अप्पाणं करिसमाणे निय-सेणिगे गिरिं भिंदमाणे गए इव कोउंग-पेक्खणद्धं उविवखेइ । अह चक्की तेण च्चिय बाहुणा हिययम्मि अंगरागं कुणंतो विव तं बाहुं हियए ठवेइ । तया ते सुहडा मालावद्धघडीनाएण सव्वे सह पडन्ति, तया चकवट्टिणो बाहु निरंतरं लंबमाणेहिं तेहिं सेणिगेहिं खज्जुरेहिं खज्जुरतरु-साहा विव छज्जेइ । सामिणो विक्रमेण हरिसन्ता ते सेणिगा पुव्वकय-दुस्संक्रं पिव ताओ बाहुसंकलाओ खणेण उज्जेइरे, तओ चकवट्टी कुंजरारूढो भुज्जो वि समरंगणं आगच्छेइ, तइया उभण्हं सेवणाणं मज्झम्मि विउळं भूमियळं गंगा-जँउणाणं मज्झे अंतावेइदेसो इव विरायइ, तओ जगसंहार-रक्खणाओ पमुइया देवा नियो-गिणो इव सणियं तत्थ पुढवीए रँयाइं हरिति । विवेगवन्ता ते समोसरणभूमि पिव गंधं वुवुट्ठीए समन्तओ तं भूमिं अहिसिंवेइरे, तत्थ रणाऽवणीए मंतवाइणो मण्डलावणीए विव ते सुरा वियसियाइं कुसुमाइं खिवंति ।

भरह-बाहुबलीणं दिट्ठिपमुहजुद्धं ।

अह ते उभे वि रायकुंजरा कुंजराओ ओयरिऊण कुंजरा विव गज्जंता सम-रभूमिं पविसंति, उभे वि महोयंसिणो लीलाए चलंता पए पए कुम्मरायं पि पाणसं-सए आरोविति । पढमं दिट्ठिजुद्धेण जुज्झियच्चं ति पइणं काऊण ते अवरे सक्की-साणा इव अनिमेसनयणा संमुहा चिट्ठेइरे, 'उभयत्थ थिअ-भाणु-मयंकसंज्ञासमय-गयणसोहाधरा ते अरुणनेत्ता संमुहा अण्णोणस्स मुहं पेक्खेइरे, एवं ज्ञायन्ता

१ अंशुभिः । २ दुःस्वप्नः । ३ सार्थककरणेन । ४ मन्थनरज्जुभूतम् । ५ शाखासृगाः-वानरैः । ६ गङ्गायमुनामध्यभागः । ७ रजसि । ८ उभयत्र ।

जोगिणो विव उभे निच्चललोयणा मिहो निज्झायंता ते चिरकालं संचिद्धेइरे, तथा जिहस्स उसहसामिनेदणस्स भरहस्स नेत्ताइं आइच्चकरक्कंतनीलुप्पलुव्व निमीलेइरे । भरहल्लक्खंडविजयलद्धाए महईए कित्तीए चक्कवट्ठिणो अवखीइं अंसुयजलमिसाओ जलं दिंतीव । तथा सिराइं धुणंता अमरा पमायम्मि पायवा इव बाहुबलिम्मि पुप्फ-वुट्ठिं विदेइरे । बाहुबलिणो सोमप्पह-पमुहवीरेहिं आइच्चोदए पक्खीहिं पिव हरि-सकोलाहलो कुणिज्जइ, त्कालम्मि उज्जयनट्टारंभे कित्ति-नट्टगीए इव बाहुव-लिस्स रण्णो वलेहिं जयतुरियाइं वाइज्जंति, भरहस्सावि सुहडा मुच्छिया इव संसुत्ता इव रोगाउरा इव मंदतेआ हवंति, अन्धयारपयासेहिं मेरुस्स उभे पेसा विव ताइं दोणिं बलाइं विसायहरिसेहिं जुज्जंति । तइया बाहुबली 'कागताल्लिज्जनाएण मए विजियं' ति मा वएसु, अहुणा वायाजुद्धेणा वि जुज्झाहिं ति चक्कवट्ठिं वएइ । बाहुबलिणो वयणं सोच्चा चरणपेट्ठो अहीव सामरिसो चक्की वि जयणसील ! 'एवं हवेउ' ति बाहुबलिं भासेइ । ईसाणिदस्स वसहो विव निणायं, सक्कस्स एरावओ इव विंहीयं, वारिधरो विव थणियं उच्चएहिं भरहो सीहनायं कुणेइ । तस्स सिंहनाओ जुद्ध-पेक्खणाणं देवाणं विमाणे पाडितो विव, गयणाओ गह-नक्खत्त-तारगाओ संसमाणो इव, कुलाऽयलाणं अच्चुच्चएहिं सिहराइं चालितोव्व, समंताओ जलहीणं जलाइं उच्छालितो विव, महानईए पूरजलं अभिओ तीराइं पिव पसरंतो सभा-भूमिसुं वावेइ । तेण नाएण दुब्बुद्धिणो गुरुणो आणं पिव रहजोइयतुरगा वेग्गं न गणिंति, पिसुणा सुगिरं पिव हत्थिणो अंकुसे न माणेइरे, 'सिंभरोगिणो कडुत्तणं पिव आसा कैसं न जाणेइरे, जारपुरिसा लज्जं पिव उट्ठा नासारज्जुं न गणेइरे, भूय-गसिया विव वेसरा कसापायं न वेयंति, के वि तेण नाएण तसन्ता थिरयं न धरेइरे ।

अह बाहुबली वि सिंहनायं विदेइ-सो एरिसो, आगच्छंत-गरुल-पक्ख-निग्घो-सबुद्धीए पायालाओ वि पायालं पविसिउं इच्छमाणेहिं पिव उरगेहिं, जलहिमज्झम्मि य अब्भंतरपविट्ठ-मंदरायल मंथण-सइ-संकाए सव्वओ वि तसमाणेहिं जलजंतूहिं, भुज्जो इंद-विमुत्त-दंभोल्लि-निणाय-भरेण अप्पणो विणासं आभंक्रमणेहिं कंपमाणेहिं कुलायलेहिं, कपंतकाल-पुक्खलावड्डय-मेह-मुत्त-विज्जुज्जुणिभमेण भूमिपीढम्मि लुहंतेहिं मज्झलोग-निवासीहिं, असमय-समागय-दइच्चावक्खंदकोलाहल्लभमाओ य वाउलेहिं अमरगणेहिं अइदुस्सवो सुणिज्जमाणो लोगनालिफद्धाए अईरुत्तरं वड्ढमाणो बाहुबलिणा अइमइरवो

१ पार्श्वविष । २ स्पृष्टः । ३ संख्यन्-अंशयन् । ४ व्याप्नोति । ५ बल्लाम्-लगाम । ६ श्लेष्मरो-
गिणः । ७ कक्षाम्-चाबूक । ८ अधरोत्तरम्-अध उपरि ।

सिहणाओ विहिज्जइ । भुज्जो वि महाबलो भरहनरिंदो हरिणीओ इव वेमाणिआणं
 'विलयाओ तासितं सीहणायं विहेइ, एवं कीलाए इमस्स मज्झलोगस्स भयजणगा विव
 कमेण भरह-बाहुबलिणो महज्झणिं कुणेइरे, तत्थ भरेहसररस्स सवो कमेण हत्थिणो
 हत्थो इव सप्परस्स य सरीरं पिव अइसएण हीणो हवइ, बाहुबलिणो उ सिहनाओ
 सज्जणस्स 'सोहदं पिव सरियाए पवाहो विव अहिणाऽहिगं पवइहेइ । एवं सत्थवाए
 वाइणा पडिवाई इव वायाजुद्धे वि वीरेण बाहुबलिणा भरहेसरो विज्जिओ । अह ते
 उमे बंधवा बाहुजुद्धं बद्धकैच्छ-गयवर-सरिसा पेरिअरं बंधेइरे । तइया बाहु-
 बलिणो सुवण्णदंडधरो पडिहारप्पहाणो उच्छल्लिअवारिही विव वणइ-पुढवि ! वइर-
 खीलगे इव गिरिणो अवलंबित्ता असेसंपि सत्तं धरिऊण यिरीभ्व, नागराय ! परिओ
 मारुयं पूरिऊण थंभाविऊण य गिरिव्व दिट्ठीहोऊण पिच्छिं धरादि, महावराह !
 वारिहिणो पंकम्मि पलोट्टिऊण अग्गेयणं परिस्समं विहाय पुणो नैविओ होऊण
 पुढवि अंगीकुणसु, कुम्मसेट्ठ ! वज्जमाणि ! परिओ वि अप्पणो अंगाई संकोइऊण
 नियपिहिं दिदं काऊण पुढवि वडसु, दिसिगया ! पुढं पिव दमाथाओ अट्टिमाणाओ
 वा निदं मा धरेह सव्वप्पणा सावहाणा होऊण वसुहं धरिज्जाह, जम्हा अयं वइरसारो
 बाहुबली वइरसारेण चक्कवट्टिणा सह मल्लजुद्धेण जुज्जिअं अहुणा उच्चिट्ठेइ । अह
 ते महामल्ला विज्जुदंड-ताडिय-गिरिव्वसरिसं करप्फोडणं विहिंता मिहो आहवेइरे ।
 चंचलकुंडला धायइखंडाओ आगया दिणयर-मयंकसहिया चुल्लमेस्सणो इव ते सली
 लपयन्नासं चलंति, नयंता ते दंतिणो दंतेहिं दंते विव अण्णुणं करेहिं करे वळेण
 अप्फालंति, पयंडानिलपेरिआ आसणमहातरुणो विव ते खणेणं पि जुज्जंति, खणेण
 य विउज्जंति, दुद्धिणु-म्मत्त-महासमुद्धतरंगव्व ते वीरा खणेणावि उप्पडंति य
 निवडंति, अह ते उमे महाबाहुणो सिणेहाओ विव अमरिसाओ धाविऊण अंगेण
 अंगं पीलमाणा 'सिलिंसंति, कम्माहीणजीवो विव 'निउद्धविण्णाणवसेण कयाई को
 वि खणेण हिट्ठं खणेण उइहं हवेइ, जलमज्झमच्छव्व वेगेण सुहुं विपरिअट्टमाणा ते
 'इमो उवरिं इमो हिट्ठम्मि' ति जणेहिं न नज्जन्ति, महाहिणो इव मिहो
 ते बंधणविण्णाणं कुणंति, सज्जो वि ते बंधवा वाणरा इव विउज्जंति, सुहुं
 पुढवीपलोट्टणाओ धूलिधूसरा उमे पैत्तधूलीमया मयंकला इव पभासिति, सप्यंताणं सेलाणं
 पिव ताणं भारं असहिण्ह पुढवी पायनिग्घायनिग्घोसाओ आरडइ इव, अह उदगवि-
 क्कमो कुद्धो बाहुबली एगेण हत्थेण चक्कवट्ठिं सैरहो कुंजरं पिव गिणहेइ, गिण्हिऊण गओ

१ वनिता । २ सौहृद-मित्रता । ३ शास्त्रवादे । ४ कक्षा=उरोबन्धनम् । ५ परिकरम्-कटिबन्धनम् ।

६ नव्यो भूत्वा । ७ क्षुद्रमेरु इव । ८ नदन्तौ । ९ लिल्यन्ति । १० नियुद्धं-बाहुयुद्धं । ११ प्रातधूलीमदाः ।

१२ मदकला=हस्तिनः । १३ शरभोऽष्टापदः ।

एसुं पिव गयणम्मि तं उल्लालेइ, 'बलीणं पि बलिणो उप्पत्ती अहो ! निरवही सिया' धणुक्काओ विमुक्को बाणो इव, जंताओ विमुक्को पाहाणो इव तइया सो भरहेसरो गयणपदम्मि दूरं गच्छेइ, सक्क-विमुत्त-वज्जाओ विव तओ आवडंतभरहाओ जुद्ध-पेक्खिणो सव्वे खेयरा पलायंति, उभेसु सेण्णेसु महंतो हाहारवो जाओ, महंताणं हि आवयागमो कास पडिक्कलं दुक्खकारणं न सिया ?, तइया बाहुबली विचित्तेइ-मज्झ इमं बलं धिरत्थु, बाहुणो धिरत्थु, अवियारियकारणं च मं धिरत्थु, एयकम्मविक्खगे रज्जदुगमंतिणो धिरत्थु, अहवा विगरिहिएहिं एएहिं किं?, अज्जवि जाव मे अग्गाओ पुढविपि द्दम्मि पडिऊण कणंसो न विणसेज्जा ताव गयणाओ पडिच्छामि त्ति चिंतिऊण बाहु-बली पडंतस्स तस्स हिद्वम्मि सेज्जसरिसे नियमुए धरेइ, उइदवाहू संजमीव उइद-वाहू बाहुबली आइच्चावलोयणवयधारी विव तइया उइदमुहो चिट्ठइ, उइदगमणिच्छ इव पायग्गबलेण चिट्ठमाणो सो निवडंतं भरहं गेदुयलीलाए पडिच्छेइ । तइया दुण्णं सेण्णाणं भरहुक्खेवणजायं विसायं तस्स रक्खणसमुप्पण्णोहरिसो उस्सग्गं अववाओविव सिग्गं अवसारेइ, बाहुबलिणो भाउरक्खणजायविवेणेण सीलगुणेण विज्जा विव जणेहिं बाहु-बलिणो पँउरिसं धुणिज्जइ, सुरा बाहुबलिस्स उवरिं पुप्फवुट्ठिं विहेइरे, अहवा तारिसवीरव-यजुत्तस्स तस्स कियंतं इमं ? । तथा भरहेसरो जुगवं लज्जाकोवेहिं धूमजालाहिं वन्दीव जुज्जइ । अह लज्जानमंतवयणपंकओ बाहुबली जिद्वस्स भरहस्स वेल्लक्खं हरिउं संग-ग्गारं एवं वएइ-जगनाह ! महावीरिअ ! महाभुय ! मा विसीएसु, देव्वजोगेण कयाई केण वि विजई वि विजिणिज्जइ, एयावंतेण तुमं न जिओ सि अहं च अणेण विजई न अम्हि, घुणक्खरणाएण अज्ज वि अहं अप्पणो जयं मण्णेमि । अओ भुवणेसर ! तुमं चिय इक्को वीरो असी, जओ देवेहिं महिओ वि वारिही वारिही चेव, न 'दिग्घिआ, छखंडभरहेसर ! फालचुओ वग्गो विव किं चिट्ठेसि ? रणकम्मट्ठं उच्चिट्ठसु उच्चिट्ठसु । एवं सोच्चा भरहो वि एवं भासेइ-अयं मे बाहुदंडो मुट्ठिं पगुणंतो नियदोस्स पमज्जणं करिस्सइ च्चिय, तओ चक्कवट्ठी फणीसरो फणं पिव मुट्ठिं समुज्जमिऊण कोवतंवनयणो अवसरिऊण बाहुबलिं अभि धावेइ, भरहो तेण मुट्ठिणा बाहुबलिणो उरत्थलं मयंगओ दंतेण गोउरैस्स कवाडं पिव आहणेइ, चक्कवट्ठिणो बाहुबली-उरत्थलम्मि सो मुट्ठिप्पहारो कुपत्ते दाणं पिव बहिरे कण्णजावव्व पिसुणम्मि सक्कारुव्व खारभूमीए जलवुट्ठीव रणम्मि संगीयं पिव हिमम्मि वन्दिपाओ विव मुहा होत्था । अह 'अम्हाणं पि किं

१ कण्णः-खण्डः । २ कन्दुकलीलया । ३ पौरुषम् । ४ वैलक्ष्यं-लज्जाम् । ५ संगदग्गदम् । ६ दीर्घिका-
वापी । ७ समुद्यम्य । ८ उरःस्थलम् । ९ गोपुरस्य-नगरद्वारस्य ।

कुद्धो' इअ आसंकिऊण देवेहिं पेक्खिओ सुणंदानंदणो उच्चएहिं मुट्ठि उक्खेवेइ, तेण मुट्ठिणा सो महामत्तो अंकुसेण गयं कुम्भत्थलम्मि इव चक्कवट्ठि उरत्थलम्मि ताडेइ । तेण घाएण दंभोलिपाएण गिरिव्व भरहेसरो मुच्छविहलो भूयलम्मि पडेइ, पढंतेण तेण सामिणा कुलंगणा इव भूमी कंपेइ, बधुणा बंधवो विव पव्वया वि वेवंति । मुच्छियं नियजिट्ठभायरं दट्ठणं बाहुबली चित्तेइ-खत्तियाणं वीरवयनिव्वंधम्मि को इमो 'कुहेवागो ?, जहिं नियभायरम्मि एरिसो निज्झंतो विग्गहो होइ, जइ जिट्ठो बंधू न जीवेज्जा ता मज्झ वि जीविण अलं एवं मणंसि कुणभाणो नयणजलेहिं तं सिचंतो बाहुबली नियं उत्तरिज्जं वीरिणीकाऊण तओ भरहं वीएइ । अह चक्कवट्ठी खणेण लद्धसण्णो सुत्तो विव उट्ठाइ, पुरओ य भिच्चं पिव ठिअं बाहुबलिं पासेइ, खणं ते उंहे वि बंधवा हिट्ठमुहा चिट्ठंति, अहो ! महंताणं पराजओ जओ य वि लज्जाइ सिया । तओ चक्कवट्ठी किंचि पच्छा अवक्कमेइ 'ओयंसीणं पुरिसाणं इमं हि जुद्धिच्छालक्खणं' । पुणो वि 'अज्जो भरहो केणइ जुद्धेण जुज्झिउं इच्छेइ, 'माणिणो जावज्जीवं मणयं पि माणं न उज्झंति' । बाहुबलिस्स खलु भाउहच्चाभवो बलवंतो अवण्णावाओ हाहिइ त्ति मण्णेमि, एसो आमरणंते वि नेव विरमिस्सइ इअ जावखणं बाहुबली चित्तेइ ताव चक्कवट्ठी जमराओ विव दंडं उवादेइ । चक्कवट्ठी उक्खित्तेण तेण दंडेण चूलाए अयलो विव सो रेहेइ ।

अह भरहभूवई उप्पाय-केउभमकारणं तं दंडं नहंसि ममाडेइ, सीहजुवा पुच्छदंडेण महीयलं पिव तेण दंडेण बाहुबलिं सिरम्मि ताडेइ, सज्जगिरिम्मि अप्फलंतीए जलहिणो वेलाए विव तस्म सिरम्मि चक्किणो दंडघाएण महंतो सइ होज्जा । चक्कवट्ठी दंडेण बाहुबलिस्स मत्थय-थिअ-मउडं लोहघणेण अहिगरणीए अवत्थिअं लोहं पिव चुण्णेइ । बाहुबलि-मुद्धाओ मउड-रयण-खंडाई वायंरोलियरुक्खगाओ पुप्फाई पिव भूयले पडेइरे, तेण घाएण-बाहुबली खणं मउलियनयणो जाओ, तस्म भयंकरेण निग्गोसेण लोगो वि तारिसो जाओ । तओ खणेण बाहुबली वि नयणाई उंम्मीलिऊण हत्थेण पयंडं लोह दंडं गिण्हेइ, तइया अयं मं किं पौडिस्सइ, कि ममं उंप्पाडिस्सइ त्ति सग्ग-पुढवीहिं जहक्कमं सो आसंकिऊजइ, बाहुबलिणो मुट्ठीए सो आयओ लोहदंडो पव्वयस्स अग्ग-भागत्थिअ-वैम्मिए उरगो विव छज्जइ । अह तक्खसिल्लावई तं दंडं दूरओ अंतंगाऽऽ-

१ महामात्रो=हस्तिपकः । २ कुस्वभावः । ३ निग्रहान्तः । ४ व्यजनीकृत्य । ५ वीजयति । ६ उभौ ।
 ७ आर्यः । ८ अधिकरणो-एरणइति भाषायाम् । ९ उन्मील्य । १० पाटयिष्यति=विभागं करिष्यति । ११ उत्थादयि-
 ष्यति-उन्मूलयिष्यति । १२ बल्योक्तः=राफडो । १३ यमाद्वनसंज्ञापटमिव ।

इवणसण्णापडं पिव भिसं भमाडेइ, तओ बाहुबली तेण दंडेण चक्कवट्टिं हिययम्मि निदयं लउडेण कणमूढयं पिव ताडेइ । तेण घाएण चक्कवट्टिणो दहयरो वि सण्णाहो घडुव्व खंडसो सहसा विणट्टो, तया जिण्णकवओ चक्कवट्टी मेहरहिओ आइच्चो इव धूमरहिओ पावगो विव अमरिसेण अहियं पयासइ, सत्तममयावत्थापत्तो गओ इव खणद्धं विहलीहूओ किंपि न चित्तेइ, चक्कवट्टी पुणो सावहाणो समाणो अविलंबेण पिय-मित्तं पिव बाहुपोरिसं आलंबित्ता दंडं वेत्तूणं भुज्जो बाहुबलिं अभिधावेइ, दंतेहिं अहरं पीलंतो भिउडीभंगभीसणो भरहो वडवानलविडंबां दंडं भमाडेइ, चक्कपाणी तेण दंडेण कप्पंतकालमेहो विज्जुदंडेण पव्वयं पिव बाहुबलिं मुद्धम्मि ताडेइ । तेण घाएण बाहुबली लोहादिगरणीमज्झम्मि आहओ धंइरोवलो विव भूमिम्मि आजाणुं मज्जेइ, सो भरहदंडो वइरसारे बाहुबलिम्मि अप्फालिऊण तेण नियावराहेण भीओ विव विणट्टो ।

भरहस्स चक्रमोयणं—

पुढवीए आजाणुं मंग्गो बाहुबली तइया पिच्छाए अवगाढो अयलो विव पुढ-वीओ निग्गयसेसो सेसनागुव्व रेहइ, जिट्ठवंधुविक्रमेण अंतो विग्गयपत्तो विव तीए घायवियणाए स मत्थयं धुणावेइ, ताहे तेण घाएण पत्तवेयणो बाहुबली खणं अज्झ-प्परओ जोगिच्च न किंचि सुणेइ, तओ सुक्क-सरिया-तड-पंकमज्झाओ हत्थीव पुढवीमज्झाओ सुणंदानंदणो निज्जायइ, अमरिसणप्पहाणो सो लक्खारसाऽरुणदिट्ठि-पाएहिं तज्जयंतो विव नियबाहुदंडे दंडं च पासेइ, तओ तक्खसिलावई तक्खगनागं पिव दुप्पेक्खणिज्जं तं दंडं एगेण हत्थेण अभिक्खणं भमाडेइ, सुणंदानंदण एव-गेण भमाडिज्जमाणो सो दंडो राहावेहपरिभयंतचक्कसोहं वहेइ, भयंतो पेक्खिज्ज-माणो वि सो दंडो पेक्खगणं नयणाणं भयणं विहेइ । जइ अमुणो हत्थाओ एसो दंडो पडिस्सइ तया उप्पडंतो एसो कंसपत्तमिव आइच्चं फोडिस्सइ, भारुंडपक्खिणो अंडगं पिव चंदमंडलं चुणिस्सइ, आमलगतरुणो फलाइं पिव तारागणे भंसिस्सइ, 'निड्डाईं पिव वेमाणियविमाणाईं पाडिस्सइ, वम्मीअव्व पव्वयसिगाईं दलिस्सइ, तिणवुंदं पिव महातरुनिउंजाईं पिसिहिइ, अपक्क-मट्टिया-गोलगं पिव मेइणिं मिदिस्सइ त्ति सइ-ण्णेहिं अमरेहिं च पेक्खिज्जमाणो बाहुबली भूवई तेण दंडेण चक्कवट्टिं सिरम्मि निहणेइ । महत्तेण तेण दंडाभिघाएण चक्कवट्टी मोगराइयल्लीलव्व आकंठं उव्वीए

पविसेइ, तइया विसण्णा चक्किसेवगा 'अम्ह सामिणो दिण्णं विवरं अम्हाणं देसु' त्ति पत्थमाणा इव मेइणीए पडंति । राहुगसिए आइच्चे इव भूमिमग्गे चक्कवट्टिमि भूमीए नराणं गयणम्मि य देवाणं मइंतो कोलाहलो होत्था । निमीलियनेत्तो साम-
मुहो छक्खंडभरहेसरो महीमज्झम्मि लज्जाए इव खणमेगं अवचिट्ठेइ, अह एगस्स खण-
स्स अंते तेएण अइभासुरो निसाइ अंते दिणगरो इव मेइणीमज्झाओ निग्गच्छेइ, निग्ग-
च्छिऊण अह सो एवं चित्तेइ—'निहिलेसुं जुद्धेसुं जूएसु अंधजूयकारगो विव अहं अमुणा
विजिओ, गावीए भुत्तं दुव्वातिणादियं गोदोदगस्स इव मए साहियं भरहं किं इमस्स
उवओगाय सिया, एगम्मि भरहक्खित्तम्मि जुगवं उभे चक्कवट्टिणो कोसम्मि दुवे
असिणो विव न दिट्ठा न य सुणिआ, देवेहिं इंदो पत्थिवेहिं च चक्कवट्टी विजिणि-
ज्जइ इमं अणायणियपुव्वं खर—विसाणव्व सिया, अमुणा विजिओ किं अहं चक्कवट्टी
न भवामि ! मए वि अविजिणिओ वीसाऽजयणिज्जो इमो तम्हा किं चक्कवट्टी !
एवं चित्तमाणस्स तस्स भरहस्स करम्मि चित्तमणिविडंबगेहिं जक्खराएहिं समाणेऊण
चक्कं समप्पियं । तस्स पच्चयाओ चक्कवट्टी अहं ति माणी सो भरहो चक्कं
वाउलावट्टो अंभोयरयमंडलं पिव गयणम्मि भमाडेइ, तइया आगासम्मि अकालम्मि
पलय—कालानलो इव अवरो वडवानलो विव वइरानलो व्व, अकम्हा उच्चएहिं सैमुप्प-
ण्णक्कापुंजो विव भसमाणं रविविम्बं पिव विज्जुगोलगो विव जालाजालकरालं
भमंतं तं चक्कं लक्खिज्जइ । चक्कवट्टिणा पहारट्टं भमिज्जमाणं तं चक्कं दट्टूण
मणंसी बाहुबली मणंसि वियारेइ, अस्स ताय—पुत्ताभिमाणित्तणं धिरत्थु, मए दंडाउ-
हम्मि समाणंमि जं भरहेसरस्स चक्कगहणं तओ य तस्स खत्तवयं धिद्धी, अहो !
बालगस्स उत्तरिज्जवत्थगहणसरिसं देवाणं समक्खं इमस्स उत्तमजुद्धपइण्णं धिरत्थु, रुहो
भरहो तवंसी तेउलेसं पिव चक्कं पेंयंसंतो जह विस्सं वीहावित्था तह मंपि वीहाविडं
इच्छेइ, जह एसो नियबाहुदंडाणं विक्कमं जाणित्था तह चक्कस्स वि अस्स विक्कमं
जाणेउ एवं चित्तमाणस्स बाहुबलसालिणो बाहुबलिस्स उवरिं सव्वबलेण भरहो चक्कं
विपुंवेइ । समागच्छंतं चक्कं दट्टूणं बाहुबली चित्तेइ—इमं चक्कं जिण्णभायणं पिव
दंडेण किं सिग्गं दलेमि ! 'गेन्दुअव्व हेलाए आहणिऊण किंवा पच्छा खेवेमि ! अदुव
कमल—पत्तव्व लीलाए गयणम्मि किं उल्लालेमि ! जइ वा सिमुनालं इव मेइणीमज्झम्मि
किं नैसेमि ! अहव चवल—चडग—पोयं पिव किं हत्थेण गिण्हामि, अदुवा अवज्झावराहि-

१ अनाकर्णितपूर्वम् । २ वातसमूहावर्तः । ३ समुत्पन्नोल्कापुञ्ज इव । ४ मनस्वी । ५ प्रदर्शयन् ।

६ कन्दुकवत् । ७ न्यस्यामि ।

पुरिसं पिव पुव्वं चिय दूराओ अवसारेमि, किं अहवा घरट्ठेण धण्णकणे विव अस्स चक्कस्स अहिट्ठायगसहस्सजक्खे दंडेण सिग्घं दळेमि किं !, अहवा अमुणो हि पच्छा सव्वं इमं विहेयव्वं, पढमं ताव इमस्स परक्कमावहिं जाणामि एवं चित्तमाणस्स बाहुबलिणो समीवम्मि तं चकं उवेच्च सीसो गुरुणो विव पयक्खिणं कुणेइ । जओ चक्किस्स चक्कं सामण्णओ नियगोत्तसमुपण्णे पुरिसे न सक्कइ । तया विसेसेण तारिसचरिमदेहे नरे कइं सक्केज्जा ? । तओ पुणो वि तं चक्कं पक्खी नीडुं पिव तुरंगमो आससालं व चक्कवट्ठिणो हत्थं आगच्छइ । विसहरस्स विसं पिव चक्कवट्ठिणो मारणकम्मम्मि अमोहं सत्थ-सव्वस्सं इमं चेव अओ परं न अण्णं, दंडाउहम्मि मइ चक्कमोअणाओ अणीइकारणं चक्कसहियं एणं मुट्ठिणा मुदेमि त्ति अमरिसेण चित्तिऊण बाहुबली जमुव्व भीसणो दिदं मुट्ठिं उज्जमिऊण भरहं अभिधावेइ, उन्नयमोगगरकरो करी विव कयमुट्ठिकरो बाहु-बली दुयं भरहाहीसस्स अंतियं गच्छेइ, किंतु महोदही मज्जायाभूमीए इव स तत्थ संचिदइ, महासत्तमंतो तत्थ चिट्ठमाणो सो मणम्मि एवं चित्तेइ-अहो मं धिरत्थु, जओ रज्जलुट्ठेण अमुणा विव लुट्ठगाओ वि पाविणा मए भाउवहो समारद्धो, तत्थ सागिणी मंतव्व पढमंपि भाउ-भाउपुत्ताइणो हणिज्जंति तस्स रज्जस्स कएणं को जएज्जा ? पत्ताए रज्जसिरीए वि जहिच्छं च भुत्ताए वि मइरापाणकारगस्स मइराए इव पाणिणो तिची न जायए, आराहिज्जमाणावि रज्जलच्छी थोवं पि छलं पावित्ता खणेण खुददेवया विव परंमुही होज्जा । अमावस्सारत्तिव्व भूरि-तामसगुणोवेआ रज्जलच्छी अत्थि, अण्णहा ताओ तिणमिव कइं एयं उज्झित्था । तस्स तायस्स पुत्तेण सैमाणेण वि मए एसा रज्जलच्छी चिरेणं दुरायारत्तणेण विण्णाया, अण्णो हि कइं अमुं जाणिस्सइ ?, सव्वहा इयं हेयत्ति मणम्मि निण्णेऊण महामणा बाहुबली चक्कवट्ठिं वएइ-खमानाह ! भायर ! रज्जमेत्तकए वि सत्तुविव जं मए तुमं एवं खेइओ सि, तं खमसु, इमम्मि महाभवहूदम्मि तंतुपाससरिसेहिं भाउ-पुत्त-कलत्तेहिं रज्जेण य मम अलाहि, संपइ एसो अहं तिजग-सामिणो विस्सामयदाणिक्क-सत्तागारस्स तायस्स पढम्मि पहिओ होस्सामि त्ति वोचूण महासत्तसाली साहसियपाणीणं अग्गणी सो तेणच्चिय मुट्ठिणा सिरस्स केसे तिणमिव लुंवेइ । तइया 'साहु-साहु' त्ति साणंदं निगयंता अमरा बाहुबलिणो अवरिं पुप्फवुट्ठिं विहेइरे । पडिक्खण-महव्वओ सो बाहुबली एवं चित्तेइ-संपइ अहं किं तायपायपउ-माणं समीवम्मि गच्छामि ! अहवा नो गच्छिस्सं, जओ पुव्वपडिक्खणमहव्वयाणं नाण-सालीणं कणिट्ठाणं पि भाऊणं मज्झम्मि मम लहुत्तणं होस्सइ, तओ इहेव

झाणानलेण घाइकम्माइं डहिऊण संपत्तकेवलनाणो सामिपरिसाए गमिस्सामि' एवं मणंसि चित्तमाणो बाहुबली पलंबियवाहू रयणपडिमच्च काउसग्गेण तत्थच्चिय चिट्ठेइ । भरहो तं तारिसं ददूण अप्पणो य कुकम्मं वियारिऊण नमिरग्गीवो पुढविं पवेहुं इच्छंतो विव होत्था, ईसि उण्हेहिं नयणंमहिं कोवसेसं चयंतो इव भरहो सक्खं संतरसमुत्तिं पिव बाहुबलिभायरं नमंसेइ, तस्स अहिगुवासणेच्छाए पणमंतो भरहो नेहाऽऽयंसेसु संकतीए नाणारूवधरो संजाओ, अह भरहनरिंदो बाहुबलिणो गुणत्थु-इपुव्वयं नियावराह-रोगोसहिसरिस-स-निंदं एवं कुणेइ-‘तुमं धण्णो सि जेण मज्झा-णुकपाए रज्जं चत्तं, अहं तु पावो उम्मत्तो अम्हि जेण असंतुट्ठो तुमं उवइवित्था । जे ससत्तिं न जाणेइरे, जे य अनीइं कुणेइरे, जे य लोहेण जिणिज्जंति ताणं धुरंधरो हं होमि । भवतरुणो बीयं रज्जं ति जे न जानंति ते अहमा, तेहिंतो वि अहं अहमयमो, जओ जाणमाणो वि अहं न जहामि । तुमं चिय तायस्स पुत्तो, जो तुमं तायपइं अणुगच्छित्था, जइ अहं पि भकारिसो भवाभि तया तस्स पुत्तो होज्जा’ एवं पच्छातावजलेहिं विसायपंकं उम्मूलित्ता बाहुबलिस्स पुत्तं सोमजसं तस्स रज्जम्मि निवेसेइ । तओ पभिई ताणं ताणं पुरिसरयणाणं अवीयं उप्पत्तिकारणं साहा-सय-समाउलो सोमवंसो समुप्पण्णो । तओ सयलपरिवार-सहिओ भरहो बाहुबलिं पणमित्ता सग्ग-रज्जसिरि-सरिसिं अउज्झापुर्णि गच्छेइ । भयवं बाहुबली मुणी वि भूमीओ समुब्भूओ इव गयणाओ ओइण्णो इव तत्थ एगो संचिट्ठइ, झाणिक्कमग्गो नासिगंत-वीसंतनयणजुगो निक्कंपो सो मुणी दिसिसाहणसंकू इव सौहइ, सो वणरूवक्खव देहेण वन्हिकणे इव उण्हे वालुयाकणे विकिरंतं गिम्हवाय-समूहं सहेइ, सो सुहज्झाणमुहामग्गो मुद्धम्मि वि संठियं अग्गिकुंडं पिव गिम्ह-मज्झ-ण्हदिणयरं च न जाणेइ, स मत्थयाओ पायपज्जंतं जाव भिम्हतावाओ रय-पंकीभूय-सेय-जलेहिं पंकनिग्गओ कौलो इव विभाइ, एसो पाउसम्मि महाझंझावायानिष्ठ-घुण्णिय-पायवेहिं धाराऽऽसारेहिं गिरी विव मणयं न भिदिज्जिइ, एस विज्जुपाएसु निग्घाय-कंपिय-गिरिसिहरेसु वि न काउस्सग्गाओ नावि झाणाओ चलेइ, तस्स चरण-जुगं हिट्ठवहंतवारि-समुप्पण्णसेवालेहिं निज्जणगामवौवीसोवाणं व लिपिज्जइ, हेमंतम्मि हिमरूवजायहत्यमेत्तजलसरियाए वि कर्मिथण-डहणुज्जुत्तज्झाणग्गिणा सो मुहं चिट्ठेइ, हिमदद्धतरुसुं ‘हेमंतराईसुं कुन्दपुप्फव्व बाहुबलिणो धम्मज्झाणं विसेसेण वइहइ, रणमहिसा महतरूक्खंवे विव सिंगघायपुव्वयं तम्मि खंथकंडूयणं चिट्ठेइरे, गंडयपसवो

१ नखादशेषु । २ शूकरः । ३ ‘प्रकम्पित’ । ४ वेगवद्धारादृष्टिभिः । ५ बापीसोपानवत् । ६ हेम-
न्तरात्रिषु । ७ गण्डकः=गैंडो ।

रत्तीए गिरितडं पिव देहेण तस्स देहं अवट्ठंभित्ता निहामुहं अणुभवेइरे, करिणो
सल्लइतरुपल्लवभमेण तस्स पाणि-पाए मुहुं करिसंता करिसिउं असक्का 'वेलवखं पत्ता
गच्छंति, चमरीगावीओ वीसासमावण्णाओ उइदमुहीओ करपत्तव्व कंटकसरिसक-
रालजीहाहिं तं लिहंति, उच्चएहिं पसरंतीहिं सयसाहाहिं लयाहिं चम्म-रज्जूहिं
'मुअंगो विव सो सव्वओ वेढिज्जइ, पुव्वसिणेहवसागयसरपुण्णतोणीरसरिच्छा
सर-यंवा तं निरंतरं परिओ परोहंति, पाउसपंक-निमग्गेमुं तस्ससुं पाए अणप्पाओ
पलंत-सैयपइगग्गिभयदव्वमसूईओ उग्गच्छंति, वेल्लि-संकुले तस्स देहम्मि परुप्परा-
विरोहेण सेण-चडगाइपक्खिणो निह्वाइं कुणेइरे, तस्स वल्ली-वित्थार-गहणे सरीरे
सहस्ससो महोरगा अरण्ण-मोर-सदेण तसिया समाणा समारोहंति, देहं अहिरुदेहिं
पलंवमाणेहिं तेहिं भुजंगमेहिं बाहुवली बाहुसहस्सं धरंतो विव विराएइ, स चरणेसुं
पायसमीव-थिअ-वम्मीअविणिग्गएहिं महोरगेहिं पायकडगेहिं पिव वेढिज्जइ, इत्थं श्ला-
गेण संठियस्स तस्स बाहुवलिणो आहारं विणा विहरंतस्स वसहसामिणो इव
एगो वरिसो गओ । पुण्णे उ संवच्छरे वीसवच्छलो भयवं वसहसामी बंभी-सुंद-
रीओ आइविऊण आदिसेइ-एणिं सो बाहुवली खीण-पउरकम्मो सुक्कचउदसीरत्ती
विव पाएणं तमरहिओ जाओ, केवलं सो मोहणीयकम्मंस-माणाओ केवलनाणं न
पावेइ, जओ खंडपडेणावि तिरोहिओ अत्थो न हि दीसइ, तुम्हाणं वयणेण सो माणं
चइस्सइ । तुम्हा अज्ज तम्हे तत्थ गच्छेह, तस्स उवदेसदाणं खलु अहुणा समओ
वट्टइ, तओ बंभीसुंदरीओ पहुणो आणं सीसेण वेत्तुणं चलणाइं च वंदिऊण बाहुबलिं
पइ गच्छेइरे । पहु णच्चा वि तस्स माणं संवच्छरं जाव उविक्खित्था, जओ अमूढ-
लक्खा अरिहंता समए उवदेसगा हवेइरे । ताओ अज्जाओ तत्थ देसे गयाओ, किंतु
रैयच्छण्णरयणं पिव वल्लीतिरोहिअं तं मुणिं न पासिंति, अह मुहुं अण्णेसंतीहिं
तीहिं तहत्थिओ तरुसरिसो सो कहंचि उवलक्खिओ, निउणभावेण तं उवलक्खिऊणं
पयाहिणतिगं काऊण ताओ महामुणिं बाहुबलिं वंदिऊण एवं वयंति-जेढज्ज !
ताओ भयवं तुमं इमं आणवेइ 'गय-खंधाहिरुदाणं केवलं न उप्पज्जेज्ज' ति वोत्तूण
ताओ भगवईओ जहागयाओ तह पडिगयाओ । सो वि महप्पा अणेण वयणेण बिम्हय-
मावण्णो एवं चित्तेइ-चत्तसावज्जजोगस्स तरुणो विव काउस्सग्गे संठियस्स मम
एयम्मि रण्णम्मि गयारोहणं कत्थ ? इमीओ भगवंतस्स सीसाओ कत्थइ मुसं न

१ अवलम्ब्य-अवलम्ब्य । २ वैलक्ष्यम् लज्जाम् । ३ मृदङ्गः । ४ तूणीरम्-बाणतुं माधु । ५ शरस्तम्बाः-
मुञ्जतृणगुच्छाः । ६ शतपदीगमितदभंसूच्यः । ७ इदानीम् । ८ रज्जुच्छन्नम् । ९ अन्विष्यन्तीभ्याम् ।

वर्यति, अहो ! तं किं एयं ? हुं चिरेण हि मए जाणिअं—को हि वयगरिह्माणं
 कणिह्माणं बंधूणं नमुक्कारं कुणेज्ज त्ति माणो चेव गेओ, तं माणगयं निब्भरं आरूढो
 म्मि तेण तिजगगुरुणो तस्स सामिणो चिरं सेवाकारगस्स वि मम जलंमि कुलीरस्स
 तरणं पिव विवेगो न होत्था, जं पुळ्वं पडिवण्णवएसु महप्पेसु नियभाऊसु एए
 कणिह्म त्ति चित्तिऊण मम तेसु बंदणेच्छा न होत्था, इयारिणि पि गंतूण ते महामुणिणो
 बंदिस्सं ति वियारिऊण स महसत्तो पायं उक्खेवइ, तइया तम्मि चिय पयम्मि लया-
 वल्लिन्व सव्वओ षाड्कम्मेसुं तुट्टिएसुं तस्स केवलनाणं उप्पज्जेइ, अह सो उप्पण्णकेवलाणा
 दंसणो सोम्मदंसणो ससी रविणो इव सामिणो अंतिगं गच्छेइ, तत्थ तित्थयरस्स पय-
 विसुणं काऊण तित्थं च नमंसिऊण जगवंदणिज्जो पुण्णपइणो अह सो बाहुबली
 महामुणी केवलपरिसाए उवविसेइ—

पयविसुणं तित्थवइं विहाय, तित्थं नमिता य तिलोगपुज्जो ।

महामुणी केवलिणो सहाए तिण्णपइणो अह सो निसण्णो ॥१॥

नरवइवाहुबलिस्स वि संगामो संजमो य ज्ञाणं च ।

निक्कंपभावजुत्तं केवलनाणं च पंचमए ॥२॥

इअ सिरितवागच्छाहिबइ—सिरिकयवप्पमुहाणेगत्तिथोद्धारम—सासणप्पहावग—आबालवंभयारि—

सूरीसरसेहरायरिय—विजयनेमिसूरीसरपट्टालंकार—समयण्णु—संतमुत्ति—बच्छल्लवारिहि

आइरिय—विजयविण्णाणसूरीसरपट्ठधर—सिद्धंतमहोदहि—पाइअ—

भासाविसारय—विजयकत्थूरसूरिविरइए महापुरिसचरिए

पढमवग्गम्मि बाहुबलिसंगाम—पव्वज्जा—

केवलणाणवण्णणरूवो पंचमो

उद्देसो सम्मत्तो ।

छट्टो उद्देशो

इओ य सामिणो सीसो नियनामं पिव इक्कारसंगाणं भणिरो सपणगुणेहिं सहिओ निसग्गओ सुउमालो भरहपुत्तो मरीई जूहवइणा कलहो विव सामिणा सह विहरमाणो अण्णया गिम्हमज्झण्हसमए भीसण-रवि-किरणुकरेहिं सुवण्णयारेहिं पिव अभिओ झामिएसु मग्गपंसुसु, अदंसणिज्जाहिं वण्हिज्जालाहिं पिव सब्बओ उण्हाहिं महा-वायरासीहिं खिलीभूएसुं मग्गेसुं आपाय-मत्थय-उब्भूय-‘सेय-धाराभरिए अंगितत्त-ईसि-अल्लिघणसरिसे नियदेहे, जलसंसित्त-सुक्क-चम्मगंधव्व पस्सेय-किलिण्ण-वत्थ-देह-मलगंधे य दूसहे निग्गए, पाएसुं डज्झमाणो तिण्हाए अक्कंतो अवतवियप-हम्मि नउलो विव पीडं सहमाणो मणसा एवं वित्तेइ—

मरीइणो वेसपरिवट्ठणं ।

केवलदंसण-नाण-रवि-मयंक-मेरु-गिरि-सरिसस्स जगगुरूणो रिसइसामिणो ताव अहं पोत्तो म्हि अखंड छक्खंड-महीमंडल-महिंदस्स विवेगनिहिणो भरहेस-रस्स पुत्तो म्हि, चउव्विहसंघस्स समक्खं पहुणो य अंतियम्मि पंचमहव्वय-उच्चार-पुव्वयं पव्वज्जं गिण्हित्था, एवं समाणे इमाओ थाणाओ लज्जाए अवरुद्धस्स मज्झ समरंगणाओ वीरस्सेव मेहे गंतुं न जुज्जइ, महागिरिं पिव दुव्वहं समरगुणभारं सुहुत्तं पि वोढुं संपयं न सक्को म्हि, अओ इओ गिहगमणे कुलमालिणं इओ य वयं दुक्करं, ता इओ नई इओ सैदूलो हा । संकडम्मि पडिओ म्हि । अहुवा आ जाणियं, इह विसमे वि संजममग्गे पव्वए दंडगपहो विव अयं खलु सुसमो मग्गो सिया-एए समणा हि मण-वयण-कायदंडेहितो विरया, अहं तु तेहिं विजिओ म्हि त्ति तिदंडिओ भविस्सामि । अमुणो साहवो सिर-केसलुंचणिं-दिय-निग्गईहिं मुंडा हवन्ति, अहं पुणो खुरमुंड-सिहाधरो होदिस्सं । एए साहुणो थूल-सुहुम-पाणिवहाईहितो विरया संति, मम उ थूलपाणाइवायाइविरेई हवेउ । एए हि अकिंचणा, मम सुवण्णमुहाई किंचण अत्थु, इमे उवाणहारहिया, अहं तु उवाणहाओ परिहिस्सामि । एए अट्टारस-सीलंग-सइस्सेण अइसुगंधिणो, अहं तु सीलेण दुग्गंधो तेण चंदणाइयं गिण्हस्सं ।

१ ज्वलितेषु । २ स्वेदं । ३ अग्नितप्त-ईषदात्रै=अममदो । ४ अवतप्तये । ५ पौत्रोऽस्मि ।

६ साईलो-व्याघ्रः । ७ उपानदूरहितः ।

इमे साहवो ववगयमोहा संति, अहं तु मोहच्छणो म्हि, तओ तस्स चिण्हवच्छ-
त्तयं मत्थयस्सोवरिं धरिस्सं । सेयवत्थधरा एए, अहं तु कसायकलुसिओ अओ एयस्स
सुमरणत्थं कासायवसणाइं इं परिहिस्सं । अमुणो सोहवो पावभीरवो बहुजीवं जला-
रंभं चएइरे, मम उ मिएण पाणिएण सिणाणं पाणं च अत्थु एवं मरिई स-बुद्धीए
अप्पणो लिंगं कप्पिऊण तारिसवेसधरो सामिणा सह विहरेइ, जहा वेसरो न आसो
न य खरो किंतु उभयसरूवो तह मरिई न संजओ न य गिहत्थो नववेसधरो होत्था ।
मरालेसुं वायसं पिव महरिसीसुं भिण्णजाइमंतं तं निरिक्खिऊणं भूइठो जणो कोउ-
गेण धम्मं पुच्छेइ । सो मूलुत्तरगुणसंजुअं साहुधम्मं उवादिसेइ । सयं च अणा-
यारे किं पवट्ठेसि ? त्ति पुट्ठो स अप्पणो असत्तिं निवेएइ, समागयभन्वजीवे पडि-
बोहिऊण पच्चज्जागहणाभिलासिणो समाणे ते भविए मरिई सामिपायाणं समीवम्मि
पेसेइ । निकारणोवयारिकबंधूय रिसहसामी पडिबुज्झिऊण समागयाणं ताणं सयं दिक्खं देइ ।

मरीइसररीरे पीडा, कविलरायपुत्तस्सागमणं च ।

अण्णया पट्ठुणा समं एवं विहरंतस्स मरीइणो सररीरे कट्ठम्मि घुणो इव 'उल्लणो
रोगो समुप्पणो, तइया पालंबभदठवानरो विव वयभट्ठो बाहिरकओ मरीई नियवुं-
संजएहिं नेव परिपालिज्जइ, असंजायपैडियारो मरीई बाहिणा 'सुअराइणा आरक्खण-
वडिजओ इवखुवाडो विव अहिगं वाहिज्जइ, घोरे महारण्णे असहेज्जो विव रोगम्मि
निबडिओ मरीई नियहिययम्मि एवं चित्तेइ-अहो ! मम इहच्चिय भवे असुहं कम्मं उइणां,
जं अप्पणो वि साहवो एए अण्णं पिव मं उव्विखेइरे, अहवा उलूगम्मि अणालोय-
कारिणो दिवागरस्सेव ममंसि अपडियारिणो कास वि साहुणो दोसो न सिया, ते
हि सावज्जविरया साहवो सावज्जनिरयस्स मज्झ मिलिच्छस्स महाकुला विव वेया-
वच्चं कहं कुज्जा, मज्झ वि तेहिं वेयावडियं कराविउं नहि जुत्तं, जं हि साहुणं
पासाओ वेयावच्चकरावणं तं वयभंसोत्थपावस्स बुहडीए सिया, तम्हा अप्पणो पैडि
यारट्ठं ममेव मंदधम्मवतंतं कप्पि गवेसेमि, जओ मिगेहिं सह मिगा जुज्जंति एवं चित्त-
माणो मरीई कालेण कंहपि नीरोगो जाओ, कालेण हि ऊसरभूमी वि अणूसर-
त्तणं पावेइ ।

अण्णया पट्ठुणो पायपउमाणं अंतियम्मि दूरभविओ नामेणं कविलो रायपुत्तो
समागच्छेइ, तेण कविलेण विस्सोवयारकरण-पाउसिय-जलहरसरिसवसइसामिणो

१ उल्लणः=उत्कटः । २ प्रालम्बः=आधारः । ३ प्रतिहारः=रोगिसेवा । ४ शूकरादिना । ५ असह्यः ।

६ अनालोककारिणः-अप्रकाशकारिणः । ७ प्रतिचारायम्-सेवायम् । ८ प्रावृषिक वर्षासम्बन्धि ।

धम्मो सुणिओ, जिणिदकहिओ सो धम्मो कविलस्स चकवायस्स जोण्हा इव, उल्ल-
गस्स 'दिवापुहं' पिव पहीणभागधेयस्स रोगिणो 'भेसयं' पिव, वायरोगिणो सीयलं
पिव, छागस्स घणागमो विव न रुओ । तओ सो कविलो धम्मंतरं सुणिउं अहिलासी
इओ तओ दिट्ठिं खिवंतो सामिसीसेहिंतो विलक्खणं मरीइं पेक्खेइ, सो धम्मंतरगहणिच्छाए
सामिसगासाओ कैइगवाल्लो धणह्वावणाओ दलिदहइं पिव मरीइं उवागच्छेइ, तेण
कविलेण धम्मं पुट्ठो मरीइं वएइ-इह धम्मो नत्थि, जइ तुमं धम्मत्थी तया सामिणो
समीवं गच्छाहि । सो भुज्जो उसहसामिपायसमीवं गच्छेइ, पुणो तत्थ तदेव तं
धम्मं सुणेइ । तह वि नियक्कम्मदूसियस्स अस्स पहुमासियधम्मो न हि रोएइ, वरा-
गस्स चायगस्स संपुण्णसरेणावि किं !, भुज्जो सो मरीइणो समीवं आगंतूण इअ वएइ-
तुम्ह समीवस्मिं जारिसो वि तारिसो वि धम्मो किं न अत्थि !, धम्मरहियं वयं किं
होज्जा ! । एवं सोच्चा मरीइं चित्तेइ-को वि अयं ममाणुरूवो, अहो दइव्वेण सरिसाणं
अयं जोगो चिरेण जाओ, सइज्जरहिस्स नज्ज सइज्जो अत्थु, इअ विचित्तिऊण सो
एवं वएइ-‘तत्थ वि धम्मो अत्थि, एत्थ वि धम्मो अत्थि, अणेण एक्केण दुव्वमासिय-
वयणेणावि मरीइं अप्पणो कोडाकोडिसागरुवमपमाणं उक्कडं संसारं उवज्जेइ । सो
कविलं दिक्खेइ स-सहायगं च कुणेइ, तओ य एभिइं परिव्वायग-पाखंडं होत्था ।
उसहसामिणो अइसया ।

अह सिरिउसहसामिणो विहाराऽइसया वण्णिज्जंति-गामागर-पुर-दोणमुह-
पट्ठण-मडंवाऽऽसम-खेडप्पमुहसंनिवेसेहिं परिपुण्णं महियलं विहरमाणो वसइनाहो
पाउस-समय-जलहरो विव चउल्लु दिसांलु पणवीसाहिगजोयणसयं रोगाणं खएण ताव-
समणेण य जणाणं अणुगिण्हमाणो, पयंग-भूसग-सुगप्पमुह-खुदजंतुगण-कय-उवदवाणं
निवारणेण अणीईओ भूवालो विव सव्वाओ पयाओ सुहावितो 'नेमित्तिआणं' सैस-
याणं च वेराणं पसमाओ, तमहरणाओ रवी विव पाणिगणे पीणमाणो जह पुव्वं
सव्वसोक्खकारि-ववहार-मगपवट्ठीए आणंदवित्था, तह अहुणा सव्वओ वि अमारि-
पउत्तीए पयाओ आणंदयंतो, ओसडेण अजिण्णाऽइसुहाओ विव नियपहावेण जगस्सावि
अइवुट्ठि-अणावुट्ठीओ अवसारितो, अंतसल्लव्व अवगच्छंतस्मि सचक्क-परचक्क
भयस्मि अच्चंतसंतुट्ठजणवएहिं किज्जमाणागममहूसवो, रक्खसाओ मंतजाणगपुरिसो
विव सव्व-संहारग-घोरदुब्बिक्खाओ जगं रक्खंतो, अओ च्चिय 'भिसं जणेहिं थुणि-
ज्जमाणो अणंतं अंतो असंमार्यं केवलणाणजोइं बाहिरभूयं पिव जियमायंडमंडलं भामं-

१ दिवामुखम्-प्रभातम् । २ भेषजं-औषधम् । ३ कविकवालकः । ४ सहायकरः । ५ उत्कटम्-
विस्तीर्णम् । ६ नैमित्तिकानाम् । ७ शाश्वतानां च । ८ भृशम् ।

डलं धरंतो, गयणम्मि पुरओ चलंतेण असाहरणतेण धम्मचक्केण चक्केण चक्क-
वट्ठी विव रायमाणो, पुरओ तुंगेण लहुज्झयसहस्समंडियधम्मज्झएण सव्वकम्म-
जयत्थंभेण विव सोहमाणो, गयणे सयं सदायमाणेण दिव्व-हुंदुहिणा निव्वमरं किज्जमाण-
पयाणारिहकल्लाणो विव, नहत्थिएण पायपीढसहिएण फलिहरयणसीहासणेण निय-
जसेण इव उवसोहिओ, अमरेहिं संचारिज्जमाणेसु कणयकमलेसुं रायहंसो विव सलीलं
पायणासं कुणमाणो, भयेण रसायलं पविसिउं इच्छंतेहिं पिव अहोमुहेहिं तिण्हतुंढेहिं
कंटगेहिं पि अणाकिलिट्टपरिवारो, अणंगसहेज्ज-जाय-पावस्स पायच्छित्तं काउं पिव
सयलेहिं पि उँऊहिं पुगवं उवासिज्जमाणो, दूराओ उच्चएहिं सण्णारहिएहिं पि नामि-
यसिहरेहिं मग्गतरुहिं अभिओ नमंसिज्जमाणो विव तालवेटाणिलेण विव अणुउल-मउय-
सीयलेण अणिलेण निरंतरं सेविज्जमाणो, सामिणो पडिऊलाणं न सुहं होज्जत्ति नाऊण
विव पयाहिणं उत्तरंतेहिं पक्खोहिं लंघिज्जमाणडग्ग-मग्गो, वेलातरंगेहिं सागरो विव
गमणागमपरेहिं जहण्णओ कोडिसंखेहिं सुरासुरेहिं विरायमाणो, भत्तिप्पहाववसाओ
दिवावि सप्पहेण चंदेण विव नहत्थिएण आयवत्तेण विराइओ, इंदुणो 'पिह-क्कएहिं
किरणसव्वस्स-कोसेहिं पिव गंगातरंग-धवलेहिं चामरेहिं वीइज्जमाणो, नक्खत्तेहिं
नक्खत्तनाहो विव तवसा दिप्पंतेहिं लक्खसंखेहिं सोमगुणजुत्त-समणोत्तमेहिं परिव-
रिओ, पइसिंधुं पइसरं पंकयाई ओइच्चो विव पइग्गामं पइपुरं भव्वजंतुणो पडिवोहिंतो
वीसोवयारपवरो भयवं उसहसामी कमेण विहरंतो अणया अट्ठावयमहानिगिं आगच्छेइ ।

अट्ठावयवण्णणं ।

अह अट्ठावयपव्वयं वण्णेइ-सरयभवाणं मेहाणं एगहिं कप्पियं रासिं पिव,
धिण्णीभूय-खीरसमुहवेलाहूडं पिव आहरियं, पहुजम्मणाभिसेयसमए पुरंदरविउव्विय-
वसहाणं एगं उत्तुंगसिगं वसहं पिव संठिअं, नंदीसरमहादीव-वट्ठि-वावो-मज्झट्ठि-
आणं दहिमुहगिरीणं मज्झाओ एगयमं एत्थ आगयं पिव, जंबूदीव-पंकयस्स उद्धरियं
नालखंडं पिव, पुढवीए सेय-रयणमइयं उम्मडं मउडं पिव, निम्मलत्तणेण भासुरत्तणेण
य निच्चं चेव देवकुंदेहिं जलेहिं ण्हविज्जमाणं पिव, 'अंसुगेहिं च लुहिज्जमाणं पिव, निम्मल-
फलिहोवलतडेसुं निसण्णंगणाजणेहिं पवणुच्छलियकमलरेणुणा उवलक्खणिज्जसरिआजलं,
सिहरग्ग-भाग-वीसमिय-विज्जाहरललणाणं वेयइह-चुल्ल-दिमवंतगिरि-विम्हारणभवं-
तरं, सग्ग-भूमीणं ओयंसमिव, दिसाणं अणुवमं हासमिव, गह-नक्खत्त-निम्माणस्स ।

१ अनाह्लि^{३२} । २ कामसहायजातपापस्य । ३ ऋतुभिः । ४ तालवृन्तानिलेन । ५ पृथक्कृतैः ।

६ शरत्संभवानाम् । ७ वसन्तेश्च मृज्यमानम् । ८ विश्रान्त^० । ९ आदर्शमिव ।

अक्खयं मट्ठियाथलमिव, मज्झभागसमासीण-कीला-संत-कुरंगेहिं सिहरेहिं दंसिआणेग-
मयलच्छण-विब्भमं, निज्झरपंतीहिं चत्तनिम्मलुत्तेरिज्जं पिव, उंदचिरस्सरकंतमणिकिर
णेहिं उद्धपडागं पिव, तुंग-निम्मल-सिहर-ग-संकमिण आइच्चेण मुद्धविज्जा-
सिद्धवल्लहाणं दिण्णुदयगिरिब्भमं, मउरपत्तरइहिं महंतेहिं आयपत्तेहिं पिव अच्चंत-
"उह-पत्तबहलेहिं तरुहिं कयनिरंतरच्छायं, कोउगेण खेयरीहिं लालिज्जमाणेसुं हरिणवालेसुं
अओ चेव झरंतहरिणीखीरसिचिज्जमाणलयावणं, परिहियंकेलीपत्तवसणसवरी-नट्टं पेक्खिउं
सेणीकयनयणपत्ताहिं देवंगणाहिं अहिट्ठियं, सुरय-संत-उरगी-पीय-मंद-मंद-वणपणं,
वणाणिल-नड-कीला-पणट्ठियलयावणं, किण्णीगण-रयारंभ-मंदिरीभूयकंदरं, अच्छ-
राजणमज्जणभरेण उत्तरंगिासरोवरजलं, कथ वि "सारि-ज्जूकेलिपरेहिं कथइ पाण-
गोट्टिरएहिं कथ य आबद्धपणिएहिं जक्खेहिं कोलाहलीकयमज्झभागं, कथइ सबर-
नारीहिं कथइ किण्णीरीहिं कथ य विज्जाहरवल्लहाहिं पारद्ध-कीला-गीयं, कथ वि
पक्क-दक्खाफल-भक्खणुम्मत्तसुगेहिं कयारावं, कथ वि अंबंउकुराऽसणोम्मत्त-कोइल-कय
पंचमसरं, कथ य नवमुणालाऽऽसायणमत्तदंससरुद्धरं, कथ सरियातडुम्मय-कौंच-
केंकार-रवमुहरं, कथ वि आसण-जलहर-दंसणुम्मज्जंत-मोर-केकारवाउलं, कथ
य सरोवरपरिसरंत-सारस-सर-सुंदरं, कथ वि रत्तासोगवणेहिं कोसुंभवसणं पिव,
कथ य ताल-तमाल-हिंतालेहिं नीलवंरं पिव, कुसुमंविथ^१ किंसुयतरुहिं कथ वि
पीयंसुगं पिव, मालइ-मल्लिका-वणेहिं कथ वि सेयवत्थं पिव, एरिसं तं गिरिग-
रिट्ठं अट्ट-जोयणुस्सएण गयणपज्जंतुणयं अट्टावयगिरिं जगगुरु आरोहेइ । सो गिरी
वाउ-विकीण्णेहिं तरुकुसुमेहिं निज्झरवारीहिं च तिजगसामिणो अगं विहेइ इव ।

समवसरणं

अह सामियायपवित्तिओ सो अट्टावयगिरी पट्टजम्पणमहूसवेण पवित्तीकयमेरु-
गिरित्तो अप्पाणं हीणं न मण्णेइ, पहरिसिय-कोइलाइ-कूइयमिसेण सो अट्टावयाऽयलो
जगणाइगुणे मुहुं गायइ इव । तत्थ चउव्विह-देवा समोसरणं विरयंति-

अह वाउकुमारदेवा जोयणप्पमाणखेत्तम्मि संमज्जणीजीविणो विव
खणेण तिणकट्ठाइयं हरेइरे, मेहकुमारदेवा सज्जो अम्भाइ पाणिय-
महिसे विव विउव्विऊण गंधजलेहिं तं पुढविं सिंचेइरे, देवा विसालाहिं

१ उत्तरीय-उपरितनवस्त्रम् । २ ऊर्ध्वगच्छत् । ३ 'आर्द्रपत्र' । ४ 'कदलीपत्र' । ५ पाशाफलक-
शूतपत्रः । ६ पणितैः । ७ किंशुकः-पलाशवृक्षः । ८ अर्धम् । ९ संमार्जनी-सावरणी इति भाषायाम् ।

सुवण्ण-रयणसिलाहिं आयंसतलं पिव सभं धरणीयलं बंधेइरे । वंतरदेवा
 इंदधणुहखंडसोहाविडंबगाइं जाणुप्पमाणाइं पुप्फाइं वरिसिंति, चऊसु वि दिसासु
 अल्लेहिं तरुदलेहिं जऊणानई-वीइ-सिरि-सरिस-सोहिराइं तोरणाइं, विहेइरे ।
 तोरणाइं अभिओ थंभेसुं सिंधुनई-उभयतडत्थिअ-मगर-सिरिविडंबिणीओ मगरा-
 गिईओ विरायंति, तेसु तोरणेसु चत्तारि सेयाऽऽयवत्ताइं चउण्हं दिसादेवीणं रयय
 निम्मिया दप्पणा इव पयासिरे, तेसु पवणतरंगिया आगासगंगा तरलतरंगम्मदा-
 इणो झयपडा रायंति, तोरणाणं हिट्ठमि हिट्ठमि विस्सस्स इहयं मंगलं चि चित्तलिविबिम्भ-
 मकारिणो मोत्तियसत्थिगाइणो संति । तत्थ पुढवीए रइयपीढम्मि वेमाणिया सुरा रय-
 णागरसिरि-सव्वस्सं पिव रयणमइयं वप्पं विहेइरे, तत्थ वप्पस्सोवरिं तेहिं देवेहिं माणु-
 सोत्तरगिरिसीमम्मि चंदाइच्चमाला विव माणिकक-कविसीसपरंपरा किज्जइ, तओ जोइ-
 सियदेवा हिमगिरिणो मंडलीकयं इक्कं सिहरं पिव कंचणनिम्मियं मज्झमं पागारं रएइरे,
 तत्थ वप्पम्मि दीहकालं पेक्खगजणपडिबिबिएहिं चित्तसहियाइं पिव रयणमइयाइं कवि-
 सीसाइं कुणेइरे, भवणवइणो देवा कुंडलीभूय-सेसाऽहि-सरीर-म्मकारणं तइयं रूप-
 मइयं वप्पं विहेइरे, तत्थ ते खीर-समुद-जल-संथिअ-गरुल-सेणि विब्वम-हेउगं कंच-
 णमइयं कविसीसपरंपरं कुणंति । पुणो तेहिं देवेहिं वप्पे वप्पे य चत्तारि गोउराइं
 जक्खेहिं विणीयानयरीपायारम्मि विव कयाइं, गोउरेसुं य तेहिं पसरमाण-निय-
 किरणेहिं चिय सयगुणाइं पिव माणिककतोरणाइं कुणिज्जंति, दारंमि दारंमि वंतरेहिं
 चक्कु-रक्खेऽजण-लेहा-सरिसधूवउम्मिधारिणीओ धूवघडीओ निहिज्जंति, मज्झ-
 वप्पंभंतरम्मि पुव्वुत्तरदिसाए पहुणो वीसमणत्थं गेहम्मि देवालं पिव देवा
 देवच्छंदं विहेइरे, वंतरदेवा समोसरणमज्झम्मि पवहणमज्झे कूवयं पिव तिकोसमाणं
 चेइयतरुं विउव्विरे, अह ते देवा चेइयदुमस्स हिट्ठम्मि तं मूलाओ किरणेहिं पल्ल-
 वियं पिव कुणसाणं रयणमइयं पीढं विरएइरे, पुणो ते देवा तस्स पीढस्स उवरिं
 मुहुं चेइयस्ससाहापज्जंतपल्लवेहिं पमज्जिज्जमाणं रयणच्छंदयं विहेइरे, तस्स मज्झम्मि
 पुव्वदिसाए वियसियपंकयकोसमज्झे कणियं पिव सपायपीढं रयणसीहासणं कुणेइरे,
 तस्स सीहासणस्स उवरिं अभिओ आवट्टियं गंगानईपवाहत्तयं पिव छत्ततिगं विउव्वित्ति,
 पुव्वसिद्धं पिव कओ वि समाहरिऊण सुरासुरेहिं समोसरणं इह ठवियं पिव ।

तओ य जगवई पुव्वदुव्वारेण यव्वजीवाणं हिययं पिव मोक्खदुवारसमं तं सम-
 वसरणं पविसेइ, तओ पहु तक्कालं कण्णाऽवयंसीभवंतसाहापज्जंतपल्लवं तं असोग-

१ आइः । २ गोपुराणि-नगरद्वाराणि । ३ कूपकम्-कूपस्तम्भम् । ४ चैत्यतटम् । ५ भावसितम्=चक्राका-
 रेण भ्रमणशीलम् ।

तरुं पदक्खिणेइ, अह विह 'नमो तित्थस्स' ति वयंतो पुव्वदिसाभिमुहो रायहंसो पंकयं पिव सीहासणं उवविसेइ । वंतरदेवा अण्णासु वि तीसुं दिसासुं परमेट्ठिणो रयणसीहासणत्थिआइं पडिरूवाइं विउव्विति । तओ साहु-साहुणी-वेमाणियदेवीओ पुव्वदुवारेण पविसिऊण जिणं पयाहिणिऊण य भत्तीए जिणीसरं तित्थं च नमेइरे, तत्थ पढमपायारम्मि पुव्वदाहिणदिसाए धम्मज्जाणमहातरुणो सव्वसाहवो अंच्छेइरे । ताणं च पिट्ठओ उड्ढत्थिआ वेमाणियदेवीओ चिट्ठेइरे, तासिं च पिट्ठओ तहच्चिय साहुणीओ चिट्ठन्ति । भवणवइ-जोइसिय-वंतराणं देवीओ दाहिणदुवारेण पविसित्ता पुव्वमिव कमेण नेरईदिसाए चिट्ठेइरे, तह भवणेस-जोइसिय-वंतरदेवा पच्छिम-दारेण पविसिऊण पुव्वविहिणा जिणं तित्थं च नमंसिऊण वायव्वदिसाइ कमेण उवविसंति, तइया तत्थ वासवो समोसरियं नाहं विण्णाय विमाणवुंदेहिं गयणं ढक्कंतो सिधं समागच्छेइ, समागच्छिऊण उत्तरदारेण पविसित्ता सामिणो पयाहिण-तिगं काऊण नच्चा य भत्तिमंतो सक्को एवं थुणेइ—

उसहजिणस्स थुई ।

“हे भयवं ! जोगिपुंगवेहिं सव्वप्पणा वि तुम्ह गुणा जाणिउं असक्कणिज्जा, थुणिउं जोग्गा तुव गुणा कत्थ ? निच्चपमायपरो धुणिरो अहं कत्थ ? तह वि नाह ! तुम्हकेरगुणे थुणिस्सं, दीहपहम्मि वच्चंतो खेजो हि किं केणावि निवा-रिज्जइ ? ।

हे पहु ! भवदुहाऽऽयव-किलेसविवसाणं देहीणं छंतच्छाहीभूयपायच्छाय ! अम्हे ता रक्खाहि । नाह ! सयं तुं कयत्थो वि केवलं लोगस्स परवयारट्ठं विह-रसि, किं दिवागरो अप्पणो कए पयासेइ ?, मज्झण्हकालाऽऽच्चो विव पहु ! तुमम्मि तवंतम्मि देहीणं देहच्छाया विव सव्वओ कम्मं संकुचेइ । जे उ तुमं सव्वया पासंति ते हि तिरिअंचा वि धण्णा, भवंतदंसणरहिवा सग्गनिवासिणो वि देवा न धण्णा । तिजगवइ ! जाणं हिययचेइएसुं तुमं एगो अहिदेवया सि, ते भविआ पक्किट्ठे-हिंतो पक्किट्ठा संति । हे नाह ! अच्चणिज्जयायाणं भगवंताणं समीवंमि एगं पत्थणं कुणेमि—गामाओ गामं पुराओ पुरं विहरंतो वि तुमं कयाई मज्झ हिययं मा चयाहि” ति पहुं थुणिऊण सक्को पंचंगफरिसियभूमियलो पणमिऊण पुव्वुत्तर-दिसाए अंच्छेइ । तह य पहुणो समायारदाणत्थं तत्थ ठविआ अट्ठावयगिरिरक्खगा पुरिसा चक्कवट्ठिस्स ‘सामी एत्थ समोसरिओ’ ति कहिति ।

१ अशिनकोणके । २ आसते-उपविशन्ति । ३ मेळतीदिशि । ४ स्तोता । ५ पङ्क्तुः । ६ छत्र-छायाभूतपादच्छाय । ।

दाणसीलो स भरहचक्रवट्टी जिणीसरसमायारनिवेदगाणं ताणं सइह-बारहसु-
वण्णकोडीओ देइ, तारिसपुरिसाणं हि तं थोकं चिय । तओ सो सीहासणाओ उट्ठा य भग-
वओ दिसाओ अहिमुहं सत्त अट्ट पयाइं भंनूण विणएण पणमेइ, पणमिऊण भुज्जो सीहा-
सणम्मि उवविसिऊण सामिपायपासगमणत्थं पुरंदरो सुरे इव नरिंदे आहवेइ, भरहनरिंदाऽऽ-
णाए सव्वे भूवा वेलाए उच्चएहिं समुदवीइपरंपरा इव सव्वओ समागया । तइया सामि-
समीवगमणाय नियाहिरोहणे तुवरमाणा विव दंतिणो तारयरं गज्जंति, तुरंगमा य हेसिरे,
रहिणो पाइका य पमोयपुलंगंचिया गच्छंति । जओ भगवओ समीवगमणम्मि रण्णो
आणा सुगंधिसुवण्णसंणिहा सिया । जह महानईपूरजलाइं उभयकुले न संमायंति,
तह अट्ठावयाओ अउज्झानयरिं जाव थिआईपि सेण्णाइं न संमाइरे । तया गयणेवि सेय-
च्छत्तेहिं मऊरनिम्मियच्छत्तेहिं च मंदाइणीजंउणनईणं वेणीसंगो विव होइ ।

आसारोहसुहडकर-ग्ग-त्थिआ कुंता वि फुरमाणेहिं अप्पणो किरणेहिं अवरे समु-
क्खित्तकुंता इव सोहेइरे । गयारूढेहिं वीरकुंजरेहिं हरिसाओ उज्जियं गज्जंतेहिं कुंजरा
वि उँव्वडकुंजरा विव रेहिरे । सेण्णाइं पि जगवइं पणमिउं चक्कवट्टित्तो वि अईव उँसु-
आइं होत्था, जओ खग्गाओ खग्गाओसो वि अच्छंतं निसिओ होज्जा । दुवारपा-
छेण विव ताणं महाकोलाहलेण सहामज्झत्थिअस्स चक्कवट्टिणो सव्वओ मिलिआओ
सेण्णाओ निवेइज्जंति । अह चक्कवट्टी जह मुणीसरो रागहोसजएण मणसुद्धिं कुणेइ
तह सिणाणेण देहसुद्धिं करेइ । तओ कयपायच्छित्तकोउअमंगलो भरहेसरो नियचरित्तं
पिव उज्जलाइं वेत्थनेवत्थाइं परिहेइ । मुद्धम्मि सेयाऽऽयवत्तेण पासेसुं च सेयचामरेहिं
विरायमाणो सो मेऽपजंत-वेइगं गच्छेइ, आइच्चो पुव्वायलं पिव तं वेइगं आरोहि-
ऊण महीवई नहमज्झं पिव उँदग्गं महागयं समारोहेइ । जंतधाराजलेहिं पिव भेरी-संख-
पडहाइपहाणतुरियमहारवेहिं गयणाभोगं भरंतो, जलहरेहिं पिव मयजलेहिं गएहिं
दिसाओ निरुंभंतो, सागरो तरंगेहिं पिव तुरंगेहिं पुहविं ढक्कंतो, जुगलनरेहिं कप्पदुमो
विव हरिस-तुराहिं संजुओ संतेउपरिवारो सो भरहनरीसरो खणेण अट्ठावयगिरिं
पावेइ ।

सो गयाओ ओरुहिऊण महागिरिं आरोहेइ, जह संजमेच्छू गिहत्थधम्माओ
उत्तुंग चारित्तं पिव । सो उत्तरदुवारेण समोसरणं पविसित्ता आणंद-कंदलुग्गम-वारि-
हरं पहुं पासेइ, पयाहिणतिगं च काऊण पहुणो य पायपंकयाइं नमंसिऊण सिरम्मि

१ त्वरयन्त इव । २ गङ्गायमुनानद्योः । ३ उद्व्यूढकुंजरा इव । ४ उस्तुकाणि । ५ निश्चितः=
तीक्ष्णः । ६ वल्लनेपथ्यानि । ७ उदग्गम्-मनोहरम् । ८ हर्षत्वरभ्याम् । ९ अवस्थ ।

निबद्धंजली भरहो एवं थुई आरभेइ—“सामि ! मारिसेहिं तव थवणं कलसेहिं अंभो-
हिणो माणसरिसं चेव, तहवि निरंकुसो हं भत्तीए तुमं थुणिस्सं, पहो ! जह दीवस्स
‘संपक्काओ वट्ठीओ वि दीवत्तणं पावेइ तह तुमं ओसिया भविणो तुमए
तुल्ला हवन्ति, मत्त-इंदिय-गइंद-मैयहरणोसहं मग्गसासणं तुव सासणं विजवइ,
तिहुवणेसर ! घाइकम्माइ हंतूणं जं सेसकम्माइ उविवत्तसि, तं तु तिहुवणाणुग्गहणं
मण्णेमि, विहु ! तुम्ह चलणलग्गा भविणो गरुलपक्खमज्झगया जणा समुहं विव भव-
समुहं लंघेइरे, अणंतकल्लाणहुमोल्लासणंदोहलं जग-महा-मोहनिंदा-पंच्चूस-सरिसं
तुम्ह दंसणं जयइ, तुम्ह पाय-पंकय-फरिसाओ पाणीणं कम्माइ दारिज्जंति, जंओ
धंदमउयकिरणेहिं पि दंतिदंता फुडन्ति हि । जगनाह ! जह वारिहरस्स वुट्ठी मयंकस्स
य चंदिमा तह तुम्हाणं पसाओ वि सव्वेसिं साहारणो चेव,” एवं उसहणाइं थुणिज्जं
पणमित्ता य भरहेसरो सामाणियसुरोव्व इंदस्स पिट्ठीए निसीएइ, देवाणं पिट्ठीओ
अवरे नरा निसीएइरे, नराणं पच्छा नारीओ उइढट्ठिआ एव चिट्ठंति । इत्थं पढमवप्प-
मज्झम्मि चउव्विहो संघो अणवज्जे सिरिजिणसासणे चउव्विहो धम्मो इव चिट्ठेइ,
बीयपायारम्मि विरोहिणो वि मिहो सोयरा विव ससिणेहा सहरिसा तिरिआ चिट्ठंति,
तइयपायारम्मि समुवगया नरिंदपमुहाणं देसणासवणुक्कणा गय-तुरंगाइ-वाहण-
परंपरा चिट्ठंति ।

तिहुवणसामी सव्वभासाणुगामि-मेहनिग्गोसगहीर-गिराए धम्मदेसणं विहेइ,
तइया हरिसेण जिणदेसणं सुणमाणा तिरिअ-नरामरा अच्चंतभारविमुक्का इव संपत्त-
वञ्छियपया विव कयाभिसेयकल्लाणा व ज्ञाणद्विय व्व अहमिंदत्तणं पत्ता इव परं
बम्हपयं गया इव संजाया । देसणाएज्जंते अरहनरिंदो गहियमहव्वए नियभाउणो
निरिक्खिज्ज जायमणसंतावो मणंसि एवं चित्तेइ-एएसिं वंधूणं रज्जं गिण्हमाणेण भस्सय-
रोगिणा विव निरंतरं अतित्तमणेण हा ! मए किं करं ? भोगफलं इमं लच्छि अण्णेसिं
पि दिंतो म्हि, तं च दाणं मम मूढस्स भप्पम्मि हुयं पिव निष्कलमेव । कागो वि
कागे आहविज्ज अण्णाणं दाज्ज उवजीवेइ, अहं तु कागेहिंतो वि हीणो, जओ वंधुणो
विणा भोगे भुंजामि । भुज्जो वि मम पुण्णोदएहिं जइ पुणो इमे दिज्जमाणे भोगे
मास-खवणया साहवो भिक्खं पिव गिण्हेज्जा तइया वरं एवं आलोइज्ज भरहो जग-
गुरुणो पायमूलम्मि गंतूण रइयंजली नियबंधुणो भोगाय निमंतेइ । तइया उसहणाहो

१ सम्पकात् । २ आधिताः । ३ मयहरणौषधम् । ४ दोहदम् । ५ प्रत्युपसदशम्-प्रभातसमम् ।
६ दीवन्ते । ७ अनवधे-निष्पापे । ८ भस्सनि ।

एवं वण्ड-महीवड ! सरलासय ! तुम्ह बंधवो महासत्तसालिणो पइण्णाय-महव्वया संसा-
 रासारयं नच्चा सव्वओ चत्तपुव्वभोगा एए वंतं पिव भुज्जो वि भोगे न खलु पडि-
 गिण्हेइरे, एवं सामिणा भोगेसुं निसिद्धो भरसेसरो साणुतावेण मणेण भुज्जो चित्तेइ
 -जइ ताव चत्तसंगा इमे भोगे न भुंजेइरे, तह वि एए पाणधारणं आहारं तु
 भुंजिस्सन्ति एवं चित्तिऊण उच्चएहि पंचहि सयडसएहि आहारं
 आणाविऊण सो भरहो पुव्वं पिव बंधुणो निमंतेइ । पहु भुज्जो वि एवं
 वण्ड-‘भरहेसर ! आहरियं आहाकम्मं अण्णाइं मुणीणं न हि कप्पइ’ एवं
 निसिद्धो भरहो भुज्जो वि अकयाऽकारियाऽसणाइणा आमंतेइ, जओ ‘अज्जवम्मि
 सव्वं सोहइ । धम्मचक्किणा ‘राइंद ! महारिसीणं रज्जपिंडो वि न कप्पइ’ एवं भुज्जो
 वि चक्कवट्ठी ‘निराकरिओ । तइया सामिणा अहं सव्वहा पडिसिद्धो म्हि त्ति महंतेण
 अणुतावेण राहुणा निसागरो विव दुहिओ । तथा सहस्सक्खो भरहनरिंदस्स विलक्ख-
 त्तणं उवलक्खित्ता पहु पुच्छेइ-‘कइविहो अवग्गहो सिया’ । सामी वि वण्ड-इइंद-
 चंकि-नैरिंद-‘गिहत्थ-साहुसंबंधिभेयाओ पंचहा ओग्गहो सिया, एएसि उत्तरेण
 उत्तरेण पुव्वो पुव्वो ओग्गहो वाहिज्जइ, जओ पुंवुत्तपरुत्तविहीसुं परुत्तो विही बलवंतो
 सिया, तथा सक्को वि कहेइ-देव ! जे साहवो मम उग्गहे विहरेइरे ताणं मए
 निओ अवग्गहो अणुण्णाओ त्ति वोत्तूणं सामिपाए वंदिऊण सक्के अवट्ठिए समाणे
 भरहेसरो भुज्जो वि एवं चिन्तेइ एएहिं मुणीहिं जइवि मइयं असणाइयं न गहियं,
 तहवि अहं नियावग्गहाणुणाए कयत्थो होज्जा इअ हिययम्मि विया-
 रिऊण पसण्हियओ महीवड सक्को विव सामिपायाणं पुरओ नियं ओग्गहं अणु-
 जाणेइ, तओ सो भरहो साहम्मियं वासवं पुच्छेइ-अहुणा अणेण भत्तपाणाइणा
 मए किं कज्जं ? । इमं भत्तपाणाइयं गुणुत्तराणं दायव्वं ति सक्केण भासिए समाणे
 स एवं झियाइ-साहुणो विणा के अण्णो गुणुत्तरा ? , आ ! जाणियं अहवा
 देसविरया खलु सावगा ममाओ गुणुत्तरा संति, ताव मए इमं दायव्वं, एयं च
 कायव्वं ति निण्णेऊण चक्कवट्ठी सक्कस्स भासुराभिइयंतं रुवं दइठ्ठुं विम्विओ समाणो
 पुच्छेइ-देववड ! तुम्हे देवओगे वि किं एरिसेण रुवेण चिट्ठेह ? अहवा रुवंतरेण,
 जओ देवा कामरूविणो संति । देवराओ ववेइ-राय ! एरिसं रुवं तत्थ अम्हाणं
 न सिया, जं तत्थ रुवं तं मणूसेहिं दइं पि न पारिज्जइ । भरहो वण्ड-सुरवड !
 अप्पणो तीए दिव्वागिइए दंसणेण चंदो चकोरं पिव मम नयणाइं परिपीणाहि ।

१ साहुतापेन-सपधत्तापेन । २ साधुनिमित्तकृतं समानीतमन्नादि । ३ आजवे । ४ निराकृतः-निषिद्धः ।
 ५ पूर्वोक्त-परोक्तविधयोः । ६ समानधर्मवन्तम् । ७ शक्यते ।

तइया वासवो बवेइ—भूवई ! तुमं पुरुसोत्तमो सि त्ति तुम्ह पत्थणा मुहा न होज्जा तओ इक्कं अंगावयवं दंसिहिससामि त्ति उदीरिऊण सक्को उइयालंकारसालिणिं जग्गेहिकदीविणं अप्पणो अंगुलिं दंसेइ । भरहनरिंदो समुदो पुणिमाचंदं पिव वियसंतभासुरज्जुइं तं महिंदंगुलिं ददद्वणं पमुइअचित्तो जाओ । अह वासवो भगवंतं पण-मिअ नरिंदं सम्माणिऊण तक्खणेण संज्ञाए अब्भं पिव तिरोहिओ होत्था । अह चक्क-बही वि वासवो विव पहुं पैणिवइऊण चित्तम्मि नियकिच्चइं चिंततो विणीयान-यरिं गच्छेइ, तत्थ रयणनिम्मिअं सक्कंगुलिं ठविऊण भरहनरिंदो अट्ठाहियमहसवं कुणेइ, सज्जणाणं हि भत्तीए सिणेहे वि य तुल्लं चेव कायव्वं । तओ पमिइं इंदत्थंभं सैमुत्थंभिऊण लोणेहिं इंदमहसवो समादत्तो, सो अज्जवि वट्ठइ । तओ भयवं नाहि-नंदणो भवियपंकयबोद्दगरो अट्ठावयगिरित्तो अण्णत्थ आइच्चो खेत्ताओ खेत्तंतरं पिव विहरेइ ।

भरहेण सावगाणं भोयणदाणं ।

अह भरहनरिंदो सावगे समाहविऊण इमं बवेइ—तुम्हेहिं पइदिणं मईए गेहम्मि भोत्तव्वं, किसिकम्माइयं न विहेयव्वं, किन्तु अपुव्वणाणगहणं कुणमाणेहिं सज्झाणप-रेहिं अणुदिणं थेयं, भोत्तूण य भज्ज अणियगएहिं तुम्हेहिं इमं सइ पढणिज्जं जिओ भवं, वड्ढइ भयं, तम्हा मा हणाहि मा हणाहि त्ति । ते समणोवासगा तह त्ति पडिअज्जिऊण भरहनरिंदस्स अगारम्मि भुंजंति, तह य तं वयणं सज्झायं पिव तप्परा पढेइरे । देवो विव कामभोगासत्तो पमत्तो सो नरदेवो तस्सइसवणेण चिय एवं विचि-तेइ—केण हं जिओ म्हि ? हुं जाणियं कसाएहिं अहं विजिओ, कत्तो मम भयं अत्थि ?, तेहिंतो कसाएहितो एव, तओ पाणिणो मा हणेज्जा, एवं एए विवेगवंता सावगा निच्चमेव सुमराविति, अहो ! मम पमाइत्तणं, अहो ! मम विसयलद्धया, अहो ! धम्मम्मि वि उदासित्तणं, अहो ! संसाररागिया, अहो ! महापुरिसोइयायार—विव-रीयत्तणं, इमाइ चिंताइ गंगापवाहो लवणसमुदे विव पमायपरम्मि तम्मि खणं धम्मज्झाणं पवट्ठेइ, किन्तु अणाइकालमोहव्भासेण भुज्जो वि भूवो सदाइ—इंदियविसएसु पसज्जइ, जओ भोगफलं कम्मं अण्णहा काउं को वि न सक्को ।

अह अण्णया 'सूयाहिवईहिं भूवई विण्णत्तो, सावगो असावगो वा बहुलत्तणेण नो उवलक्खिज्जइ । भरहो 'सूअवरे आदिसइ—जं तुम्हे सइदा अत्थि, अओ इओ पमिइं परि-

१ अणियत्थ । २ समुत्तभय—ऊर्ध्वं कृत्वा । ३ भवान् । ४ सूदाधिपतिभिः—पाचकाध्यक्षैः ।
५ सुदशान् ।

कखापुव्वयं भोयणं दायव्वं, एवं सोच्चा ते स्रवकारा पुच्छंति-के भवंता १, ते ववन्ति-
 'अम्हे सावगा अत्थि,' सावगाणं कई वयाई संति २, ताई अम्हाणं संसेह । अह ते
 कहिति-अम्हाणं सावगाणं ताई न होज्जा, किंतु अम्हाणं सया वि हि पंच अणुव्वयाई
 सत्त सिक्खावयाई च संति, एवं पैरिक्खानिव्वूढा ते स्रवकारेहिं भरहभूवइणो दंसि-
 षंति । भरहनरिंदो ताणं कागिणीरयणेण नाण-दंसण-चरित्तिलिं रेहातिगं वेग-
 च्छंपि व सुद्धिनिमित्तं विहेइ, एवं अट्टवरिसे अट्टवरिसे य परिकखं ते कुणंति, तदेव हि
 सावगा कागिणीरयणेण लंछिज्जंति, काइणीरयणलंछिया ते भोयणं लहेइरे, अह ते वि
 उच्चएहिं 'जिओ भवं, वइहए भयं' इच्चाई पदंति, तओ ते 'माहणा' होत्था । ते य
 माहणा नियाई अवच्चाई साहूणं दिंति, ताणं केइ विरत्ता वयं गिण्हंति, केवि परीस-
 हासहा सावगात्तणं उवादिति, ते वि तदेव कागिणीरयणलंछिया समाणा भुंजेइरे । 'भर-
 हनरिंदेण एसिं भोयणं दिण्णं' ति लोगो वि सद्धाए ताणं भोयणं देइ । जम्हा पूइ-
 एहिं पूइओ केण केण न पूइज्जइ । भरहचक्की ताणं सज्झायनिमित्तं अरिहंतथुइ-मुणि
 सद्ध-सामायारीपवित्तिए 'आरिए वेए विहेइ, कमेण ते उ माहणा 'ब्राह्मणा' इइ
 एसिदिं पत्ता, कागिइरयणलेहाओ हु जण्णोववीययं पत्ताओ, इयं ठिई भरहरज्जे
 होत्था, भरहसयस्स पुत्तो आइच्चजसो पुणो काइणीरयणाभावाओ सुवण्णजण्णोववीयाई
 कुणेइरे, सहाजसाइणो केई नरिंदा रूपमइआई, अण्णे पट्टसुत्तमइआई अत्रे सुत्तमइआई
 कुणेइरे । भरहनरिंदाओ आइच्चजसो तओ महाजसो तओ कमेण अइबलो बलभदो
 बलवीरिओ कित्तिवीरिओ जलवीरिओ तओ अट्टमो दंडवीरिओ राया संजाओ त्ति अट्ट
 पुरिसे जाव अयं आयारो पउत्तो । एएहिं नरिंदेहिं समंतओ भरहइदं भुत्तं, भगवओ अ
 मउडो सक्केण उवणीओ तेहिं सिरम्मि थारिओ, तयणंतं सेसनरिंदेहिं तस्स महाप-
 माणत्तणेण वोहुं न पारिज्जइ, हत्थिणो हि भारो हत्थीहिं वोहुं सक्किज्जइ नावरेहिं ।
 नत्वम-दसमतित्थयराणं अंतरे साहुधम्मविच्छेओ जाओ, तओवि सत्तमुं जिणाणं अंत-
 रेमुं एवं साहुधम्मविच्छेओ समुप्पण्णो । तइआ जे अरिहंतथुइ-जइधम्म-सइधम्मम-
 इआ आरिआ वेआ ते पच्छा सुलसा-जण्णवक्काईहिं अणारिआ कथा । इओ य भर-
 हनरिंदो सावगादणेहिं कामकेलीए य अत्रेहिं पि विणोएहिं दिवसे अइवाहितो चिट्ठेइ ।
 अण्णया भयवं उसइपहू महिं पाएहिं चंदो गयणं पिव पवित्तयंतो अट्टावयमहागिरिं समा-
 गच्छेइ, तत्थ सज्जो सुरगणविणिम्मियसमोसरणे जगणाहो अच्छेइ, धम्मदेसयं च विहेइ ।

१ स्रवकाराः-रसवलीकाराः । २ परीक्षानिर्व्यूढाः-विहितपरीक्षाः । ३ वैकक्षमिव-उपनयनवत् । ४ आर्यान्
 वेदान् । ५ यज्ञोपवीतताम् । ६ याज्ञवल्क्यादिभिः । ७ पादैः-चरणैः किरणेश्च ।

जिणिदागमणसमायारो तत्थ अणिलेहिं पिव 'तुरिएहिं निउत्तपुरिसेहिं समेच्च भरहेसरस्स निवेइओ, भरहनरिंदो ताणं पुव्वपमाणं पारितोसियं देइ, जओ कप्पतरू दिणे दिणे दितो वि न हि 'झिज्जइ । स भरहो चक्की अट्ठावयगिरिम्मि समवसरियं सामि उवेच्च पयक्खिणं किच्चा नमंसिऊण एवं थुणेइ-जगवइ ! अबुहो वि हं तुव पहावाओ तुमं थुणेमि, जओ मयंकं पासंताणं मंदा वि दिट्ठी निम्मला होइ । सामि ! मोहं-धार-निम्मग्ग-जगपयासदीग्ग ! तुम्ह मयणं पिव अणंतं केवलनाणं जयइ, नाह ! पमायनिदानिमग्गाणं मारिसाणं पुरिसाणं बोहकज्जेण अक्को विव तुमं पुँगरुत्तं मयागयं कुणेसि, सामि ! जम्म-लक्खुवज्जियं कम्मं तुव आलोगणेण विलिज्जइ, कालेण हि 'थिणीभूयं पि धयं अग्गिणा दवेज्जा, एगंतसुसमाओ वि सुसमदसमकालो वि सोहणयमो, जत्थ कप्पदुमेहितो वि विसिट्ठफलदायगो तुमं समुप्पण्णो सि । समग्ग-भुवणीसर ! जह रण्णा गामेहितो भुवणेहितो निया नयरी पैगरिसिज्जइ तह तुमए इमं भुवणं भूसिअं, पिया माया गुरु सामी सव्वे वि जं न कुणेइरे, तं तुमं इक्कोवि अणे-गीभूय विव हियं विइेसि,

निसा निसागरेणेव, हंसेणेव महासरो । वयणं तिलगेणेव, सोहए भुवणं तए ॥

इअ विणयसंपण्णो भरहेसरो जहविहिं भयवंतं थुणिऊण पणमिऊण य जहट्ठाणं मिसीएइ ।

भगवन्तं पइ भरहनरवइणो पुच्छा, ।

भगवं आजोयण गामिणीए नर-तिरिअ-सुरलोग-भासासंवाइणीए गिराए वीसो-वयारस्स कए देसणं विहेइ, देसणाविरईए भरहेसरो पहुं नच्चा रोमंचिअदेहो कयंजली एवं विण्णावेइ-नाह ! इह भरहभूमीए जह तुम्हे विस्सहियगरा तह अण्णे धम्म-चक्कवट्ठिणो य कई भविस्सन्ति, ताणं च नयरं गोत्तं मायापियरे नामं आउसं वण्णं म्माणं अंतरं दिक्खा-गइणो य मज्झ कहिज्जाह ।

अह पहु आइक्खइ-एयम्मि भरहक्खेत्तम्मि अवरे तेवीसं तित्थयरा एगारह य चक्कवट्ठिणो होहिरे, तत्थ वीसइम-वावीसइमतित्थयरा गोयमणोत्तसमुब्भवा अण्णे य वावीस जिणेसरा कासवगोत्तिणो जाणियव्वा, सव्वे जिणवरा निव्वाणगामिणो हुंति ।

अउज्झानयरीए जियसत्तुनरिंद-विजयादेवीतणओ वावत्तरिपुव्वलक्खाउसो कणमसमज्जुई सइधचउधणुहसयदेहुच्चओ पुव्वंगोण-पुव्वलक्खवयपज्जाओ अजियतित्थ-यरो वीओ भविस्सइ, मईयनिव्वाणाऽजियजिणनिव्वाणकालाणं सागरोवमको-डीणं पण्णासं लक्खा अंतरं णायव्वं २। सावत्थीनयरीए जियारिनिव-सेणादेवीभवो सुवण्णनिहो सट्ठिपुव्वलक्खाउसो चउधणुसउस्सओ चउपुव्वंगहीण पुव्वलक्खदिक्खा-पज्जाओ तइओ संभवनाहो होस्सइ, अजियजिण-संभवजिण-निव्वाणंतरं सागर-वमकोडीणं तीसलक्खाइ ३। त्रिणीयानयरीए संवरमहीवइ-सिद्धत्थादेवीनंदणो कंचणनिहो पण्णासपुव्वलक्खाऊ सइधधणुसयतिगसरीरो अट्ठपुव्वंगहीणपुव्वलक्खवय-पज्जाओ चउत्थो अभिंदणजिग्गिदो हविस्सइ, सागरोवमकोडीणं च दसलक्खाइ अंतरं णायव्वं ४। तीए नयरीए मेहनरवइ-मंगलादेवीजाओ सुवण्णप्पहो वेया-लीसपुव्वलक्खाउसो धणुहसयतयदेहो बारहपुव्वंगहीणपुव्वलक्खवओ पंचमो सुमई अरिहतो होही, अंतरं च सागरोवमकोडीणं नव लक्खाइ ५। कोसंबीनयरीए धर-नरिंद-सुसीमादेवीभवो रत्तवणो तीसपुव्वलक्खाउक्को सइधधणुहसयदुगदेहो सोल-सपुव्वंगोण-पुव्वलक्खवओ छट्ठो पउमप्पहो तित्थयरो भविस्सइ, अंतरं च सागरोवम-कोडीणं नवइ-सहस्साइ ६। चाणारसीनयरीए पइट्टनरदेवपिच्छीदेवीतणओ सुवण्णकंती वीसपुव्वलक्खाउगो दुसयधणुहसरीरो वीस-पुव्वंगहीण-पुव्वलक्खवओ सत्तमो नामेण सुपासजिग्गिदो होही, सागरोवमकोडीणं नव सहस्साइ च अंतरं ७। चंद्राणनयरे महासेणनिव-लक्खणादेवीनंदणो दसलक्खपुव्वाउसो सेयवणो सइध-धणुसउस्सओ चउव्वीसपुव्वंगहीण-पुव्वलक्खवओ अट्ठमो चंदप्पहतित्थयरो होही, अंतरं च सागरोवमकोडीणं नव सयाइ ८। कण्णदीपुरीए सुग्गीवनरवइ-रामादेवीभवो सेय-वणो दुलक्खपुव्वाउसो इक्कधणुसयदेहो अट्ठावीसपुव्वंगहीण-पुव्वलक्खवयपज्जाओ नवमो सुविही तित्थयरो भविस्सइ, सागरोवमाणं नवइ कोडीओ अंतरं ९। भदिल-पुरम्मि दहरनिव-नंदादेवीजाओ सुवण्णप्पहो पुव्वलक्खाऊ नवइधणुहसिओ पण-वीस-पुव्वसइस्सवपज्जाओ दसमो सीयलो नाम अरिहा भविस्सइ, अंतरं पुणो साग-रोवमाणं नव कोडिओ १०। सिंधुरे विण्णुराय-विण्णुदेवीतणओ सुवण्णाहो असीधणुण-यदेहो चउरासीलक्खवरिसाउसो एगवीसवरिसलक्खवयपज्जाओ एगारहो सिज्जंस-जिणेसरो होही, छासट्ठिवरिसलक्खेहिं छव्वीसवरिसइस्सेहिं तह य सागरोवमसएण ऊणिया इगा सागरोवमकोडी जिणाणं अंतरं ११। चंपानयरीए चसुपुज्जनरवइ-

१ चतुरशीतिलक्षवर्षप्रमाणात्मकपूर्वाजिन जनः । २ न्यूनः । ३ लक्षणादेवी । ४ भद्रुच्छित्तः ।
५ कनिता-म्यूना ।

जयादेवीजाओ बावत्तरिवरिसलक्खाउसो सत्तरिधणुहसमुण्णओ रत्तवण्णो चउपण्णवरिसल-
क्खवयपज्जाओ बारहमो चासुपुज्जतित्थयरो होही, तह सागरोवमाणं चउपण्णासं अंतरं
१२। कंषित्तलनयरम्मि कयवम्मनिव-सामादेवीभवो सहिवरिसलक्खाउसो सदठिध-
णुहदेहो सुवण्णनिहो पण्णरहवरिसलक्खवयपज्जाओ तेरहमो विमलजिणो भविस्सइ,
चासुपुज्जनिव्वाण-विमलजिणनिव्वाणंतरे य तीसं सागरोवमा होहिरे १३। अउज्झापुरीए
सिंहसेणनरिंद-सुजसातणओ कणगवण्णो तीसलक्खवरिसाउक्को पण्णासधणुहदेहो
सइहसत्तवरिसलक्खवयपज्जाओ चउहसमो अणंतजिणवरो होही, विमलजिणमोक्ख-अणं-
तजिणमोक्खाणं अंतरं नव सागरा जाणियव्वा १४। रयणपुरम्मि भाणुभूवइ-सुव्व-
यादेवीनंदणो कणयाहो दसवरिसलक्खाउसो पणयालीसधणुणयदेहो सइहलक्खदुगव-
रिसवयपज्जओ पण्णरसमो धम्मजिणीसरो होही, अणंतजिण-धम्मजिणनिव्वाणमंतरं
चउसागरोवमपमाणं १५। गयपुरनयरम्मि बीससेणनिवा'इरादेवीसुओ कंषणनिहो
वरिसलक्खाउसो चत्तालीसधणुहदेहमाणो पणवीसवरिससहस्सवयपज्जाओ सोलसमो
सिरिसंतिणाहो जिणवरो होही, चउभाणीकयपल्लस्स भागतिगोणं सागरोवमतिपं अंतरं
१६। गयपुरनयरे सूरनरवइ-सिरिदेवीसुओ सुवण्णसरिसो पणनवइवरिससहस्साउसो
पणतीसधणुहतुंगो सइहसत्तसयजुय-तेवीसवरिससहस्सवयपज्जओ सत्तरसमो कुंथुणाहो
तित्थयरो होही, ताणं च अंतरं अइहपल्लवमं १७। गयपुरनयरे सुदंसणनरेस-देवी-
नंदणो कणयनिहो चउरासीइवरिससहस्साउसो तीसधणुहुण्णअदेहो एगवीसवरिस-
सहस्सवयपज्जाओ अट्टारसमो अरो नाम जिणिंदो होही, वरिसकोडिसहस्सोणपल्ल-
वमतुरियंसो जिणंतरं १८। मिहिलानयरीए कुंभनरिंद-पहावईदेवीतणओ नीलवण्ण-
देहो पणवीसधणुस्सओ पणपण्णवरिससहस्साउसो एगवरिससय-ऊण-पणपण्णवरिससह-
स्सवयपज्जाओ एगुणवीसइमो मललीनाहजिणेसरो भविस्सइ, जिणंतरं वरिसकोडीसह-
स्सपमाणं १९। रायगिहनयरम्मि सुमित्तनरवइपउमादेवीसुओ किण्हवण्णो तीसवरिसस-
हस्साउसो बीसधणुहुस्सयदेहो सइह-सत्तवरिससहस्सवयपज्जाओ बीसइमो मुणिसुव्वय-
जिणिंदो होही, चउपण्णवरिसलक्खमाणं च जिणंतरं २०। मिहिलानयरीए विजय-
निव-वप्पादेवीतणओ सुवण्णनिहो दसवरिससहस्साउसो पण्णरसधणुहदेहो सइहदुगव-
रिससहस्सवयपज्जाओ इक्कवीसइमो नमितित्थयरो भविस्सइ, छवरिसलक्खपमाणं
मोक्खंतरं २१। नोरिअपुरम्मि समुहविजयराय-सिवादेवीजाओ सामवण्णो दसधणु-
हतुंगो वरिससहस्साउसो सत्तवरिससयवयपज्जाओ बावीसइमो नेमिणाहो तित्थयरो

होहिइ, नमि-नेमिजिणाणं निव्वाणंतरं पंच वरिसलक्खमाणं २२। चाणारसीनयरीए आससेणनरिंद-बामादेवीभवो नीलवण्णो नवहत्थपमाणंगो सयवरिसजीविओ सतरिब-रिसवयपज्जाओ तेवोसइमो पासजिणिंदो होही, तेसीई सहस्साई सइहाई च सत्तसयाई नेमिजिणनिव्वाण-पासजिणनिव्वाणंतरं २३। खत्तियकुंडगामम्मि सिद्धत्थभूवइ-तिसला-देवीनंदणो सुवण्णनिहो सत्तहत्थकाओ वावत्तरिवरिसजीविओ वेयालीसवरिसवयपरियाओ चउवीसइमो सिरिमहावीरजिणीसरो भविस्सइ, पासजिण-वीरजिणंतरालं च सइहं बरि-ससयदुगं णायव्वं ॥२४॥

चक्कवट्ठिणो ।

सव्वे चक्कवट्ठिणो कासवगोत्तिणो सुवण्णवण्णा, एएसुं अट्ठ मोक्खगामिणो, दुण्णि सग्गगामिणो, दुण्णि य निरयगामिणो भविस्सन्ति । तुमं मईयकाले पढमो चक्कवट्ठी जाओ, तह य अजियतित्थयरकाळम्मि अउज्झाए वीओ सगरचक्की होही, सो सुमि-त्तनिव-जसमईदेवीतणओ सइहधणुहचउसयदेहो वावत्तरिपुव्वलक्खाउसो भविस्सइ २।

सावत्थीनयरीए समुद्धविजयनरिंद-भइादेवीपुत्तो पंचवरिसचक्खाऊ सइहवेया-लीसधणुहसयदेहो महवा नाम तइओ चक्कवट्ठी भविहिइ ३।

हत्थिणापुरनयरे आससेणनरिंद-सहदेवीभवो तिवरिसलक्खाउसो सइहइक्कच-तालीसधणुहतुंगो चउत्थो सणंकुमारो चक्की भविस्सइ ४। एए दुण्णि चक्कवट्ठिणो धम्मजिण-संतिजिणाणं अंतरे तइअसग्गगामिणो भविस्संति ।

संती कुंयू अरो य एए तिण्णि अरिहंता चक्कवट्ठिणो वि होहिन्ति ५-६-७।

हत्थिणापुरनयरे कयवीरियनरवइ-तारादेवीजाओ सट्ठिवरिससहस्साउसो अट्ठा-वीसधणुहदेहो सुभूमो अट्ठमो चक्की अरजिण-मल्लिजिणाणं अंतरे होही, एसो सत्तमं नरयं गच्छहिइ ८।

चाणारसीए पउओत्तरनिव-जालादेवीभवो तीसवरिससहस्साउसो वीसधणुहतुंगो पउमो नाम नवमो चक्की होही, तह य कंपिल्लनयरे महाहरिभूवइ-मेरादेवीसुओ दसव-रिससहस्साउसो पण्णरसधणुहस्सिपदेहो दसमो हरिसेणचक्कवट्ठी होहिइ, एए दुण्णि चक्कवट्ठिणो सुणिसुव्वय-नमिजिणंतरम्मि हविहिरे-९-१०

रायगिहनयरम्मि धिजयमहावइ-वण्णादेवीसुओ तिवरिससहस्साउसो बारहधणु-हदेहो नमिजिण-नेमिजिणंतरम्मि जयनामो एणारसमो चक्की भविस्सइ ११।

कंपिलनयरे बंभनरिंद-चुलणीदेवीनंदणो सत्तवरिस-सयाऊ सत्तधणुहदेहो दुवा-
लसमो बंभदत्तो नाम चक्कवट्टी सिरिनेमिनाह-सिरिपासनाइतित्थंतरे होही, रोहँझा-
णपरो एसो सत्तमिं नरयपुढविं गच्छिहिइ १२।

वासुदेव-बलदेव-पडिवासुदेवा—

तओ उसहपहू अणुहो वि वासुदेवसखं कहेइ-चक्कवट्टीओ अइहविकमा भरह-
तिखंडभूमिसामिणो किण्हवण्णदेहा नव वासुदेवा हवति, तेसु अहमो वासुदेवो कासव-
गोत्तो, सेसा उ गोयमगोत्ता । ताणं वासुदेवाणं सावक्का भायरा सेयवण्णा बलदेवा
नव हुंति । तत्थ पोयणपुरम्मि पयावइनरिंद-मिगावईदेवीतणओ चउरासीइवरिसल-
क्खाउसो असीइधणुहदेहो सिज्जंसजिणीसरे महिं विहरमाणे त्तिपुट्ठो नाम पढमो
वासुदेवो होहिइ सत्तमिं च नरयपुढविं वच्चिहिइ १ ।

वारवईनयरीए बंभनरिंद-पउमादेवीनंदणो वावत्तरिवरिसलक्खाउसो सत्तरिध-
णुहदेहो वासुपुंजजिणिंदे भूमिं विहरंते दुविट्ठो नाम बीओ वासुदेवो होहिइ, सो य
अंते छट्ठिं नरयपुढविं गच्छिही २ ।

वारवईनयरीए भइराय-पुढवीदेवीसुओ सद्विठवरिसलक्खाउसो धणुहसद्विसमु-
ण्णओ विमलसामिजिणसमए तइओ सयंभू नाम वासुदेवो, पुण्णाउसो सो छट्ठिं नर-
यावणिं गच्छिहिइ ३ ।

तीए चेव नयरीए सोमनिव-सीयादेवीजाओ तीसलक्खवरिसाउसो पण्णास-
धणुहुत्तुंगदेहो अणंतजिणवरे विज्जमाणे चउत्थो नामेण पुरिसोत्तमो वासुदेवो भवि-
स्सइ, आउससमत्तीए सो छट्ठिं निरयपुढविं गच्छिही ४।

आसपुरनयरे सिवराया-उमियादेवीसुओ दसलक्खवरिसाउसो पणयालीसधणु-
देहो धम्मतित्थयरे वट्टमाणे पंचमो पुरिससीहो नामेण वासुदेवो होही । सो आउं
परिपालिऊण छट्ठिं निरयभूमिं गच्छिस्सइ ५।

चक्कपुरीए महासिरभूवइ-लच्छीवईसुओ पणसद्विसद्विस्सवरिसाउसो एगूणतीस-
धणुण्णयविग्गहो अरजिणमल्लिजिणंतरे छट्ठो वासुदेवो पुरिसपुंडरीओ नाम होही,
पुण्णाउसो छट्ठं नरयं गच्छिहिइ ६।

१ सापत्ता:-अपरजननीजाताः । २ त्रिपुष्टः । ३ द्वारवती-द्वारिकानगरी । ४ द्विपुष्टः । ५ अमृतादे-
वीसुतः ।

वाणारसीनयरीए अग्निसीहभूष-सेसर्षदेवीभवो छप्पणसहस्सवरिसाउसो
छप्पीसधणुहविग्गहो अरजिणमल्लिजिणंतरे सत्तमो दत्तनामो वासुदेवो भविस्सइ,
पुण्णाऊ सो पंचमं निरयं वच्चिहिइ ७।

रायगिहपुरे (अउज्झानयरीए) दसरहनरिंद-सुमिच्चादेवीभवो दुवालससहस्सवरि-
साउसो सोलसधणुहदेहो सुणिसुव्वयजिण-नमिजिणंतरे अट्टमो नारायणो (लक्खमणो)
नाम वासुदेवो होहिइ, सो आउसं पालिऊण तुरियं निरयणुद्विं वच्चिहिइ ८।

महुरापुरीए वसुदेवनिव-देवकीनंदणो इक्कवरिससहस्साउसो दसधणुहविग्गहो
नेमिजिणीसरसमुवासणो नवमो किण्हो नाम वासुदेवो होही, पुण्णाउसो सो तइयं
निरयपिच्छिं वच्चिही ९।

वासुदेव-बलदेवाणं पिआ इक्को च्चिय, देहुच्चत्तणं च समाणमेव, अण्णो
विसेसो इमो-

तत्थ पढमो अयलनामो बलदेवो भदादेवीसुओ पंचासीइवरिसलक्खाउसो भवि-
स्सइ १, बीओ विजयनामो बलदेवो सुभदादेवीतणओ पणहत्तरिवरिसलक्खाउसो
होहिइ २, तइओ नामेणं भदो बलदेवो सुप्पहादेवीसूण पणसट्ठिवरिसलक्खजीविओ
होही ३, चउत्थो सुप्पहो नाम बलदेवो सुदंसणादेवीजाओ पणपणवरिसलक्खा-
उसो णायव्वो ४, पंचमो सुदंसणो नाम बलदेवो विजयादेवीनंदणो सत्तरसवरिस-
लक्खजीविओ ५, छट्ठो आणंदो नाम बलदेवो वेजयंतीदेवीनंदणो पंचासीइवरिस
सहस्सजीविओ ६, सत्तमो नंदणो नाम बलदेवो जयंतीदेवीसमुग्भवो पणसट्ठी-
सहस्सवरिसाउसो ७, अट्टमो पउमो (रामचंदो) नाम बलदेवो अवराइयादेवीभवो
पण्णरहवरिससहस्साउको ८, नवमो रामो (बलभदो) नाम बलदेवो रोहिणीदेवीसंभवो
दुवालसवरिस-सयाउसो भविस्सइ ९। एएसुं अट्ठ बलदेवा मोक्खं गच्छिहिन्ति, नवमो
रामो (बलभदो) पंचमं बंभदेवलोणं गच्छिहिइ, तओ चइऊण आगामिणीए उस्सप्पिणीए
भरहत्तिम्मि सो किण्हत्तिथम्मि सिज्झिहिइ ।

पडिवासुदेवा नव होहिरे ते इमे-

आसग्गीवो १ तारगो २ मेरगो ३ महु ४ निहुंभो ५ बली ६ पल्लाओ ७
लंकेसो रावणो ८ मगहेससो जरासंधो ९ य । एए सव्वे वासुदेवपडिमल्ला चक्कपहा-
रिणो चक्कधरा वासुदेवहत्थगएहिं अप्पकेरेहिं चक्केहिं हणिस्समाणा निरयं गच्छिहिरे ।

सिरि उसहजिणीसरमुहाओ भावितित्थयराइसरूवं सोच्चा भरहेसरौ भविय-
जगगणसमाउलं तं सहं ददुहणं पमुइयमणो पुणो षहुं पुच्छेइ-तिजगवइ ! जिणीसर !
भववं ! एगीभूयजगत्तयं पिव परिपुण्णत्तणेण संठियाए तिरिय-नरामरसंजुआए विसा-
ळाए एयाए परिसाए एत्थ किं को बि जीवो अत्थि ? जो भवंतो विव तित्थं पचट्ठि-
ऊण इमं भरहक्खेत्तं पवित्तिस्सइ ।

उसहपहू एवं संसेइ-भरह ! जो एसो तुम्ह मरीई नाम पुत्तो आइमो परिच्चा-
यगो अट्ट-रोहज्झाणहीणो सम्मत्तेण सोहिओ चउच्चिहं च धम्मज्झाणं ज्ञायंतो रहम्मि
संठिओ अत्थि, पंकेण दुँऊलं पिव नीसासेण दप्पणो चिव संपइ अमुस्स जीवो कम्मेण
मल्लिणो वट्ठइ; सो अग्गिपवित्तिवत्थं पिव जच्चसुक्खणं पिव सुक्कज्झाणग्गिसंजोगेण
कमेण सुद्धिं पाविस्सइ, पढमो एसो इहयं चिय भरहक्खेत्तम्मि पोयणपुरम्मि. तिपुट्ठो
नाम वासुदेवो भविस्सइ, तओ कमेण एसो पच्छिममहाविदेहेसुं मूगाइ नयरीए
घणंजय-भारिणीदेवीतणओ पियमित्तो चक्कवट्ठी होही, तओ य चिरं संसारे संसरिऊण
एत्थ भरहक्खेत्तम्मि अयं महावीरो नामेण चउव्वीसइमो तित्थवरो भविस्सइ, एवं
पहुवयणं सोच्चा भरहेसरौ सामिणो अणुणं वेत्तुणं भववंतं पिव वंदिउं मरीई अभि-
गच्छेइ, अभिगंतूण तं नमंसमाणो वणइ-जं तुमं दंसाराणं पढमो नामेणं तिपुट्ठो वासु-
देवो भविस्ससि, विदेहेसुं य पियमित्तो नाम चक्कवट्ठी होहिसि, तं तुव वासुदेवत्तणं
चक्कवट्ठित्तणं पारिच्चायगवेसं च न वंदे किंतु जओ तुं चउव्वीसइमो अरिहंतो भवि-
स्ससि, तओ तुमं वंदेमि इअ ववंतो कयंजलिपुडो तं तिकखुत्तो पयाहिणं काऊणं वंदेइ।

अह भरहनरिंदो जगणाहं नच्चा नागराओ नागपुरिं पिव अउज्झानयरिं गच्छेइ ।
मरीई भरहनिवगिराए अब्भदियजायपमोओ तिकखुत्तो करप्फोडणपुव्वयं एवं वोतुं
पक्कमेइ-जइ वासुदेवाणं अहं पढमो, विदेहेसुं च चक्कवट्ठी, अंतिमो अरिहंतो भवि-
स्सामित्ति एत्तिएण मम सच्चं पुण्णं । अरिहंताणं पढमो मम पियामहो, चक्कवट्ठीणं
आइमो मज्झ पिया, वासुदेवाणं च अहं पढमो, अहो मम कुलं उत्तमं, जह एगत्थ गय-
कुलं अण्हिं एरावणो तह एगत्थ तेलुक्कं एगहिं मम कुलं सिया, गहाणं आइच्चो
विव तारगाणं चंदो व्व सव्वेहिंतो कुलेहिंतो मम कुलं सेट्ठमत्थि एवं अप्पणो कुल-
मयं कुणंतेण मरीइणा लूयाए पुंडपिव नीयगोत्तकम्मं उवज्जियं ।

अह पुंडरीयपमुहगणहरेहिं परिवरिओ उसहपहू विहारमिसेण पुढविं पवित्तयंतो
तओ चलेइ, विहरंतो जिणो किवाए पुत्तव्व कोसलदेसनरे धम्मकोसलं नयंतो, परि-

चिप विव मगहलोगे तवपरे कुणंतो, दिवायरो पउमकोसे इव कासीदेसजणे विया-
संतो, निसाणाहो अणवे विव दसणदेसनिवासिणो आणंदयंतो, मुच्छिप विव चेदी-
देसमाणवे देसणासुहाए 'वेयंतो, वच्छयरेहिं पिव मालवदेसनिवासीहिं भम्मधुरं वाहिंतो,
पावविवत्तिणासाओ गुज्जरनरे देवे विव कुणंतो, वेज्जो विव सोरट्टदेसवासिणो पस-
त्थभावजुत्ते समायरंतो कमेण सत्तुंजयं गच्छेइ ।

उसहपट्टणो सत्तुंजयतिथम्मि आगमणं ।

तं च गिरिवरं वण्णेइ-कथइ रूपसिलाचएहिं वइदेसिअं वेयइदं
पिव, कथ वि सुवण्णपाहाणोच्चएहिं आहरियं मेरुणो तडं पिव, कथ य
रयणखाणोहिं अवरं रयणायअं पिव, कथ वि ओसहीहिं थाणंतर-थिअं हिमगिरिं
पिव, निरंतरसंसत्तजलहरेहिं परिहियचोलगं पिव, निज्जरजलेहिं खंधाऽवलं-
बिहत्तरियं पिव, दिवहम्मि सिहरसमीवट्टिएण खरेण धरियमउडं पिव, रत्तीए य
मयंकेण चंदणरसतिलकचिंहं पिव, गयणपज्जंतट्टिएहिं सिहरेहिं सहस्समुदं पिव,
तुंगेहिं तालमहीरुहेहिं अणेगबाहुदंडं पिव, नालिएरवणखंडेसुं उच्चएहिं पक्कपिंग-
लुंबीसुं नियावच्चभमाओ वेगुप्पडंत-पवंगमसंकुलं, उक्कण्णेहिं हरिणेहिं अंब-फला-
वचयपसत्त-सोरट्टवासिइरिणीनयणाणं आयण्णिज्जमाण-महुरगाणं, वियसियं सुइमिसेण
संजायपल्लिएहिं पिव जरंत-केअगीरुखेहिं भरिय-उवरियणभूमिं, ठाणे ठाणे 'सिरिखंड-
दव-पंडूहिं सिंदुवारतरुहिं उच्चएहिं कय-सवंग-मंगलतिलगावलं पिव, साहासंठिय-
साहामिग-णंगूल-जडिली-कएहिं 'चिंचादुमेहिं पलकख-णग्गोह-पायवाणकारं, अच्च-
ब्भुय-नियवित्थार-संपयाए पमुइएहिं पिव निच्चं रोमंचियफलेहिं फणसेहिं उवसोहियं,
अमावस्स-राइ-तम-सरिसेहिं सेलुतरुहिं आहरिय-अंजणगिरिचूलाहिं पिव रेहियं, सुग-
चंचुव्व रत्तकुसुम-समिद्धीहिं 'किंसुअरुखेहिं कुंकुम-थासगेहिं महागयं पिव सोहमाणं,
कथवि दक्खाभवं कथ वि खज्जूरभवं कथइ तालभवं मज्जं पिवंतेहिं सबरीजणेहिं
निबद्धगोहीयं, अक्खलंताऽऽच्चकिरणवाणाणं पि अभेज्जेहिं तंबूलोवणमंडवेहिं सण्णाहं
पिव धरंतं, तत्थ महातरुणं तलम्मि अल्ल-दुब्बंकुरासायणपसणहरिणवुंदेहिं किज्जमा-
णंघग्गोलणं, चिरं सहयारफलासायणनिमग-चंचुपुडेहिं जच्चवेरुल्लिएहिं पिव निरंत-
रेहिं सुगेहिं मंडियं, केयइ-चंपगाऽसोग-कलंब-बउलुब्भवेहिं पवणुद्धुणिएहिं परागेहिं
'रेयस्सल-सिलायलं, पहिय-सत्थ-अप्फालिज्जमाण-नालिएरीफलजलेण अभिओ पंकि-

१ चेतयन् । २ उत्तरीयम्-उपरितनवस्त्रम् । ३ 'फलगुच्छेषु । ४ सूचिमिषेण-शलिकाव्याजेन । ५ श्रौक्षण्ड-
द्रववत्-चन्दनद्रववत् । ६ शाखामृग-लांगूलजटिलीकृतैः । ७ चिञ्चा-अम्लकतरुः, पल्लः । ८ शैलः-
श्लेष्मनाशकतरुः । ९ किंशुकः-पलाशः । १० रोमन्धनम्-वागोलवृं । ११ रजस्वल-रजोयुक्त ।

लीभूयपव्वयासणभूयलं, भइसालवणपभिईणं मज्झाओ एगयमेण वणेण विव विसाल-
त्तणसालिणा तरुखंडेण मंडियं, मूलम्मि पण्णासजोयणवित्थरं, सिहरम्मि दसजोयणा-
ऽऽभोगं अट्टजोयणूसेहं तं गिरिवरं प्ह आरोहेइ ।

तत्थ सेज्जो वि सुरासुरविणिम्मि ए समवसरणे सव्वजीवहियगरो भगवं अच्छि-
ऊण देसणं कुणेइ । तथा देसणं दितस्स पडुणो गहीरगिराए सुहोत्थियपडिसदेहिं सो
गिरी अणुवयंतो इव विराएइ ।

अह पढमाए पोरिसीए गयाए तिजगणाहो पाउसकालम्मि गए जलहरो बुट्टीए
इव देसणाविहीए विरमेइ । तओ ठाणाओ उट्टाय सो देवदेवो देवविनिम्मि ए बीय-
पायारमज्झसंठिए देवच्छंदए निसीएइ । तओ य पढमो सिरिपुंडरीअगणहरो महारायस्स
युवराओव्व सामिणो पायपीढम्मि निसीएइ, निसीइत्ता सो गणहरवरो तहच्चिय संठियाए
परिसाए भगवओ विव धम्मदेसणं विहेइ, एवं सो वि गणहरो पभायम्मि समीरणो
ओसाय—सुहासिचणं पिव बीयपोरिसीए देसणं देइ । एवं उसहणाहो भवियजीवुवयारद्वं
धम्मदेसणं कुणंतो अट्टावयगिरिम्मि विव तत्थ कंचि कालं चिट्ठेइ । अणया जगगुरू अण्णहिं
विहरिउं इच्छंतो गणहरपुंडरीयं तं पुंडरीअं समादिसेइ—महामुणि ! अम्हे इओ अणत्थ
विहरिउं गच्छिस्सामो, तुमं मुणिकोडिपरिवरिओ एत्थच्चिय गिरिम्मि चिट्ठसु, एत्थ
खेत्ताणुभावेण सपरिवारस्स भवओ केवलनाणं खलु उव्वज्जिस्सइ । तथा सो गणहरो तहत्ति
सामिणो वयणं पडिवज्जिऊण पणमिऊण य कोडिमुणिगणपरिवरिओ तत्थच्चिय चिट्ठेइ ।
नाहिणंदणजिणेसो उव्वेलो वारिही तीरगड्डेसुं रयणोहं पिव तं पुंडरीयगणहरं तत्थ मोत्तूणं
सपरिवारो अण्णहिं वच्चेइ । सो गणवई उदयायलतडम्मि नक्खत्तेहिं सद्धिं मयंको
विव मुणीहिं सवं तत्थ पव्वयम्मि चिट्ठेइ, तओ सो पुंडरीअगणहरो परमसंवेगरंगरं-
जिओ सुहामहुरगिराए समणगणं एवं भासेइ ।

दव्व-भावसंलेहणा पुंडरीयगणहरस्स निव्वाणं ।

जयाभिलासीणं सीमापज्जंतपुढविसाहगं दुग्गं पिव खेत्तप्पहावेण सो अयं
गिरिराओ सिद्धिनिबंधणं अत्थि, मुत्तीए परमसाहगंतरूवा संलेहणा वि कायव्वा,
सा उ दव्वभावभेएण दुविहा होइ, तत्थ सव्वुम्माय—महारोग—नियाणाणं सव्वधाऊणं
सोसणरूवा दव्वसंलेहणा मया, जो य रागदोसमोहाणं कसायाणं भाव-रिऊणं
सव्वओ छेओ सा उ भावसंलेहणा जाणियव्वा इअ वोत्तूणं सो पुंडरीअगणहरो
समणकोडीहिं सह सव्वे सुहुमे य बायरे य अइयारे आलोएइ, अइविसुद्धिनिमित्तं

च भुज्जो महव्यारोवणं कुणेइ, वत्थस्स हि दुक्खुत्तो तिव्खुत्तो पक्खाल्लं
अइनिम्मलकारणं सिया ।

छण्ण वि जीव-णिकायाण, जं मए किंचि 'मंगुलं रइयं ।

ते मे खमंतु सव्वे, एस खमावेमि भावेण ॥ १ ॥

जे जाणमजाणं वा, रागद्वासेहिं अहव मोहेणं ।

जं दुक्खविद्या जीवा, खमंतु ते मज्झ सव्वे वि ॥ २ ॥

खामेमि सव्वजीवे, सव्वे जीवा खमंतु मे ।

मेत्ती मे सव्वभूएसु, वेरं मज्झ न केणइ ॥ ३ ॥

इअ वोत्तणं सो समत्तसमणेहिं सह निरागारं सुदुकरं भववरमं अणसणं पडिवज्जेइ,
खवगसेहिं समारूढस्स ओयंसिणो तस्स घाइकम्माइं अभिओ जिणारज्जुव्व तुटंति,
तइया तेसिपि कोडिसंखाणं साहूणं सज्जो घाइकम्माइं तुट्टेइरे, तथो हि सव्वेसि
साहारणं चेव । मासियसंलेहणापज्जंते चइत्तमासस्स पुणिमाए पुंडरीयगणहरस्स
पढमं केवलणाणं होत्था, पच्छा य ताणं महप्पाणं संजायं, तथो ते जोगिणो
सुक्कज्झाणस्स तुरियपाए संठिआ जोगरहिआ समाणा पहीणासेसकम्मा निव्वाणपयविं
पावेइरे । तथा सग्गाओ देवा समागच्च मरुदेवीमाईए इव खणेणं भत्तीए ताणं
निव्वाणगमणमहुच्छवं कुणेइरे । जह भयवं उसहसामी पढमो तित्थयरो जाओ, तह
सत्तुंजयगिरी वि तइया पढमं तित्थं संजायं । जत्थ इको वि पुणिवरो सिज्जेज्ज तं
पि पवित्तं तित्थं सिया, तथा जत्थ तावंता महेसिणो सिज्जंति तत्थ तस्स पवित्त-
त्तणम्मि किं पुणो कहिज्जइ ।

अह भरहेसरो नरिंदो सिरिसत्तुंजयगिरिम्मि रयणसिलामइयं मेरुचूलापडि-
फडिं चेइयं करावेइ, तस्स मज्झम्मि नरिंदो चित्तम्मि चेयणं पिव पुंडरीयपडिमाए सहियं
उसहपहुणो पडिमं ठवेइ । भयवं पि विविहदेसेसुं विहरमाणो चक्खुदाणेण अंधे विव
बोहिदाणेण भव्वजीवे अणुगिणेइ ।

अह भगवओ परिवाराइसंखा--

उसहपहुणो केवलणाणाओ आरब्भ समणाणं चउरासीइसहस्साइं, साहुणीणं
लक्खत्तयं, *सावगाणं सपण्णाससहस्सं लक्खत्तयं, तह य साविआणं चउपण्णसहस्स-
जुयाइं पंच लक्खाइं, चउइसपुण्वधराणं चत्तारि सहस्साणि पण्णासाहिगाइं च

१ अनिष्टम् ।

* ऋष्यसुते-तिग्णि सयसाहस्सीओ पंचसहस्सा उक्कोसिआ समणोवासगाणं संपया हुत्था २१६ ॥
बावीससहस्सा नव सया अणुत्तरोववाइयाणं संपया हुत्था ॥ २२६ ॥ इअ विसेसो वियाणिसव्वो ।

सत्सम्पदं होत्था, ओहिणागिसाहूणं वय सहस्सइं, केवल्लमाणधरस्सम्भाणं वीसं सहस्साइं, वेउव्वियल्लद्विपत्ताणं महप्पाणं साहूणं छसयम्भहियाइं वीसं सहस्साइं, तह वार्हणं मणपज्जवणाणीणं च पिहं पिहं स-पण्णास-छसयाहिगाणि दुवालससहस्साइं आसि, तह य तिहुवणवइणो उसहपहुस्स अणुत्तरविमाणोवन्नाइयाणं महप्पाणं वावीसं सहस्साइं संजायाइं ।

उसहपहुणो निव्वाणं ।

एवं भयवं आइतित्थयरो वव्हारे पयाओ विव धम्मम्मि चउव्विहं संघं संठवेइ । पव्वज्जाकालाओ पुव्वलक्खं स्वविऊण तओ भयवं अप्पणो मोक्खकालं च जाणिऊण भट्ठा वयगिरिं अहिगच्छेइ । कमेण विहरंतो स पहु सपरिवारो अट्ठावयसेलं पावेइ, पाविऊण मिव्वाणमंदिर-सोवाणं पिव तं गिरिं समारोहेइ, तत्थ उसहपहु सुणीणं दसहिं सहस्सेहिं सद्धिं चउइसभत्तेण तवेण पायवगमणं अणसंघं पडिबज्जेइ । तइया पव्वयपालगपुरिसा तह संठियं ज्जागुरुं णाऊण सिग्घं गंतूण भरहवक्कवट्ठिणो विण्णविति । सो भरहनरिंदो पहुणो चउव्विहारयच्चक्खाणं निसमिऊण अंतोपविट्ठसल्लेण विव सोगेण वाहिओ, तओ महंतेण सोगानलेण सज्जो संफुडो सो भरहो 'सिमिसिमायंतो अगिसंफासिइतरू जलबिंदुणो विव अंल्लणि मुंचेइ, अंतेउर-परिवारजुओ दुव्वारदुहपीलिओ भरहो पय्यच्चारेण अट्ठावयगिरिं पइ णिगच्छेइ, सो पाएसु ककसे वि कक्करे न गणेइ, जं हरिसेण विव सोगेण वि वेयणा न वेइज्जइ । कक्कर-दूण-पाएहिंतो रत्तधागाओ झरंति, सेण तस्स चलण-नास-पट्ठई अलत्तयरंजिया विव हवइ, आरोहण-खणेणावि गईए विग्घो मा होज्ज च्छि जाणेहिं उवगामिओ जणे नरिंदो अवगणेइ, सो सिरसं-ठिए वि आयवत्ते अइतविओ होऊण गच्छेइ, सुहावुट्ठीए वि चिरसंतावो कयाइ न पसमेइ । सोगविहलो सो भरहनरिंदो हत्थावलंबणपरे नियसेवगे मग्गे उच्चएहिं विलंगंते तरुसाहापज्जंतभागे इव अवहत्थेइ, सरियाऽऽयामगामिणी नाविआ तीर-तरुणो विव स अग्गेसरे वेत्तियपुरिसे वि वेगेण पच्छा कुणेइ, चित्तं पिव वेगेण गंतुं ऊसुओ सो चक्कवट्ठी पए पए खलंतीओ चाम्मरभारिणीओ वि न पइक्खेइ, वेगेण उच्छल्लिऊण उच्छल्लिऊण मुहुं उरत्थलअप्फालणेहिं गलियं वि मुत्ताहारं महीविई न जाणेइ, उसहपहुम्मि गयचित्तेण पाससंठिए वि गिरिपालगे भुज्जो सामिवुत्तंतं

पुच्छिउं वेत्तिणा आहवेइ, ज्ञाणत्थिओ जोगिव्व सो न किञ्चि पासेइ, न य कासइ वयणं सुणेइ, इक्कं चिय पहुं श्रियाइ, भरहेसरो वेगेण पवणो विव मग्गं लहूकुणंतो खणेण अट्ठावयगिरिं पावेइ, सामणजणुव्व पायचारी वि परिस्समं अजाणंतो भरहेसरो तओ अट्ठावयपव्वयं आरोहेइ, तत्थ य सोग-हरिस-समाउलो चक्खट्ठी पल्लं-कासणसंठियं तिजगनाहं पेक्खेइ, पेक्खित्ता जगवइं पयाहिणं किच्चा वंदिऊण य देहेच्छाहिव्व पासत्थिओ चकी समुवासेइ । पहुम्मि इत्थं थिए समाणे वि एए अम्हासुं कहं अच्छेइरे इअ हेउणो विव इंदाणं आसणाइं कं पेइरे । तओ चउसट्ठी वि इंदा ओहिणाणेण आसणकंपस्स कारणं नच्चा दुअं जिणिदं अब्भुवगच्छंति, ते वि पदक्खिणं काऊण जगणाहं च पणमित्ता विसणमणा आलिहिआ विव जिणिदस्स पुरओ चिट्ठेइरे । तह इमाए ओसप्पिणीए तइयारगस्स उ एगूणणवइ-पक्खेसुं अवसिट्ठेसुं समाणेसुं साहमासस्स किहतेरसीतिहिम्मि पुव्वण्हसमए अभिइनक्खत्तम्मि चंदजोगं उवागयम्मि पल्लंकासणम्मि निसण्णो वायरकायजोगे य ठाइऊण वायरे मणवयणजोगे रूंधेइ, तओ य सूहुमकायजोगेण वायरं काययोगं सुहुमे य मणवयणजोगे रूंधेइ, तओ य कमेण पहु सूहुमकायजोगं निरुंधंतो सूहुमकिरियापडिवाइं नाम तइयं सुक्खज्झाणं साहेइ, तओ य जिणेसो पंचहस्सक्खरुच्चारमेत्तकालं समुच्छिण्णकिरियाणियट्ठिं नाम तुरियज्झाणं आरोहेइ, आरोहिऊण सच्चदुक्खपरिचत्तो केवलणानंदसणधरो खीण-कम्मो निट्ठियट्ठो अणंतवीरियसुहसमिद्धो सो उसहपहु बंधाभावेण एरंडवीयव्व सहा-वओ उइढगई^१ रिज्जुणा पहेण लोअग्गं उवागच्छेइ । ते वि समणाणं दससहस्सा पडि-वण्णाणसणा खवगसेहिं समारूढा सव्वे वि समुप्पणकेवला सव्वओ य मण-वयण-कायजोगं निरुंभिऊण खणेण सामिणो विव परमपयं आसाएन्ति ।

सामि-निव्वाण-कल्लाणाओ अदिट्ठसुहलेसाणं नारणाणं पि खणेण दुहग्गी उव-संतो, महासोगसमक्कंतो चक्खट्ठी वि तक्खणं मुच्छिओ वज्जाहओ अयलोव्व पुढवीए पडिओ, तइया गरुए वि दुहे समागए दुहसिद्धिलत्तणकारणं जं रुइयं को वि तं न वेएइ, तओ सको सयं दुक्खसिद्धिलत्तणहेउं तं रुइयं चक्कवट्ठिस्स जाणाविउ उच्चएहिं महापोक्कारपुव्वयं कुणेइ, तह तिअसेहिं पि सक्कं अणुकंदणं कुणिज्जइ, सम-दुक्खाणं देहीणं चेट्ठा समा हि होइ । चक्खट्ठी वि तेसिं च रोअणं सोच्चा सण्णं च लद्धूणं उच्चयसरेण बैभंडं फोडितो विव कंदेइ, तया रुइएण रण्णो महंतो वि

१ देहच्छायेव । २ हुतम् । ३ ऋजुना । ४ दुःखशिक्षित्वकारणं रुदितम् । ५ ब्रह्माण्डम् ।

सोगगंठी महंतेण महापवाहस्स महंतेण वेगेण पालीबंधो विव फुट्टेइ, तओ सुरासुरमण-
साणं रुदिएहिं रुदिएहिं तेलुक्के वि कलुणरसो इक्कच्छत्तो विव होत्था, तओ आरब्भ
लोमे वि देहीणं सोगसंभवे एसो सोग-सल्ल-विणासगो रोयणमग्गो पवट्ठिओ, भरह-
भूवई 'नेसग्गिअं धीरिअं चइऊण दुहिओ तिरिए वि हि 'दुहाविंत्तो एवं विलवेइ-
हा ताय ! हा जगबंधु ! हा किवारससागर ! अण्णाणिणो अम्हे इह भवारण्णे कहं
चैत्तवंत्तो सि, दीवं विणा अंधयारे विव अभिलाण-केवलणाण-पयासगेण तुमए विणा
एत्थ भवे कहं ठाइस्सामो ?, परमेसर ! छउमत्थजणस्सेव तुह किं एयं मोणं, देसणं
कुणेषु, अमुं जणं किं नाणुगिण्हेसि !, अहवा जेण भयवं ! लोयगं गच्छित्था तेण
तुमं न भासेसि, किंतु ते वि मज्झ बंधवो दुहियं मं किं न भासेइरे, अहवा हुं णायं
ते हि सइ सामिणो अणुगामिणो संति, मम कुलम्मि मं विणा अवरो को वि सामिस्स
अणुणुगो नत्थि ।

जगत्तयताया ताओ, बाहुबलिपमुहा लहुबंधवो, बंभी-सुंदरीओ बहिणीओ,
पुंडरीआइणो पुत्ता, सिज्जंसपमुहा 'पोत्ता एए सव्वे अहिलकम्मसत्तुणो हंतूण लोअग्गं
उवगया, अहं तु पियजीविओ अज्जावि जीवामि । तइया सोगेण जीविय-'निन्विण्णं
मरिउं इच्छंतं पिव चक्कवट्ठिं दट्ठूणं पागसासणो तं बोहिउं एवं पारंभेइ—

भरहेसर ! महासत्तरेहिर ! अम्हाणं एसो सामी सयं संसारसमुदं तरित्था, अवरे
वि य तारिंसु, 'तित्थेण महाणइं पिव जिणिंदसंठविअतित्थेण अण्णे वि संसारिणो जीवा
चिरं संसारसागरं उत्तरिस्संति, सयं हि एसो कयकिच्चो भयवं अवरे वि जणे कय-
किच्चे काउं पुव्वलक्खवरिसं जाव सो अवत्थिओ । निहिलं लोगं अणुगिण्हिऊण
सिव-मयल मरुय-मणंत-मक्खय-मव्वावाहमपुणव्वभवं सिद्धिगइनामधेयं ठाणं संपत्तं जग-
सामिं राय ! किं नाम 'सोएसि । जो पेच्च महादुहोहडाणेसु जोणिलक्खेसु अणे-
गसो संचरेइ सो हि परासु सोइज्जइ ।

नरिंद ! साहारणजणेसुं पिव संपत्तपरमपयं पहुं सोचंतो किं न लज्जसि ?, सोगं
कुणंतस्स तुह सोयणिज्जस्स य पहुणो उभहं पि इमं न उइअं । जो हि एगया वि
सामिणो धम्मदेसणं सुणित्था सो कया वि सोगहरिसेहिं न जिणिज्जइ

१ नैसर्गिकं धैर्यम् । २ दुःखयन् । ३ त्यक्तवान् । ४ पौत्राः । ५ प्राप्तनिर्वेदम् । ६ तीर्थेन—
जलावतारमार्गेण । ७ शोचसि । ८ प्रेत्य-मृत्वा । ९ परासुः-मृतः शोचयते ।

किं पुणो बहुसो देसणं सुणमाणो भवं ! । महीणाह ! महासागरस्स खोहो, मेरुगिरिणो कंपो, अवणीए उव्वट्ठणं, कुलिसस्स कुंठया, 'पेऊसस्स विरसया, ससिणो उण्हया य कयाइ न सिया, तह तुम्ह इमं पेरिदेवणं असंभावणीअं । नरिंद ! धीरो होसु, अप्पाणं जाणेसु, जओ जगत्तय—इक्कधीरस्स तस्स पहुणो णणु तुमं तणओ सि एवं गोत्तवु-इट्ठपुरिसेण विव इंदेण पवोहिओ भरहनरिंदो जलं सीयत्तणं पिव साहाविअं धीरिअं धरेइ ।

उसहजिणनिव्वाणमहूसवो—

अह सर्विकदो सामितणुसैक्काखक्खराहरणे सिग्घं आभिओगियदेवे आदिसेइ, तओ देवा सक्कनिदेसेण णंदणोज्जाणाओ खणेण गोसीसचंदणकद्धाई समाणेइरे, पुणो ते सुरा इंदादेसेण पुव्वदिसाए पहुदेहस्स निमित्तं गोसीसचंदणेहिं वट्ठं चियं समारयंति, तह य इक्खागुकुलजायाणं मइरिसीणं कए दाहिणाए दिसाए तंसं चियं विहेइरे, पुणो य देवा अण्णेसिं अणगाराणं कएणं पच्छिमदिसाए चउरंसं चियं कुणेइरे ।

अह वासवो खीरसागराओ पुक्खलावट्ठमेहेहिं पिव देवेहिं सिग्घं जलाइं 'आणावेइ, तेण य जलेण सक्को भगवओ तणुं ण्वेइ, तह य गोसीसचंदणरसेहिं विलिपेइ, तओ य वासवो हंसचिन्हेण देवदूसेण वत्थेण परमेसरस्स तं सरीरं ढक्केइ, ढक्किऊण तं परमेट्ठिदेहं दिव्वेहिं माणिककभूसणेहिं सव्वओ भूसेइ, अण्णे उ देवा अण्णेसिं मुणीणं पि तक्खणं इंदुव्व भत्तीए तं सव्वं ण्ववणाइयं विहेइरे । तओ अमरा पिहं पिहं आणीएहिं तिलोईए सारभूयरयणेहिं सहस्सपुरिसवहणीआओ तिण्णि सिविगाओ कुणेइरे । तओ पुरंदरो सयं चेव सामिणो चलणे पणमिऊणं पहुदेहं मुद्धम्मि आरोविऊण सिविगामज्जे निक्खिवेइ, अण्णे य देवा इक्खागुवंसजायाणं 'सिवपयाऽइहीणं समणाणं सरीराइं तहेव य अवराए सिविआए परिक्खिवेइरे, तह य अवरे विवुहा अण्णेसिं अणगाराणं देहे निष्सु मुद्धेसु आरोविऊण तइयाए सिवियाए निहेइरे ।

अह हरी सयं तं जिणिंदसिविअं उद्धरेइ, अवरे य सुरा अवरेसिं मुणीणं सिविआओ धरेइरे । तइया एगओ अच्चरासु तालरासगं दिंतीसु, अण्णाओ य महुरसइं संगीयं कुणंतीसु, पुरओ पुरओ देवेसु सोमेण धूवधूमच्छलेण बाहं वमंतीओ इव धूवघडीओ धरंतेसु, 'केसु इ देवेसु सिविगोवरिं पुप्फदामाइं खिवंतेसु, केसु इ सेसानि-

१ पीयूषस्य । २ विलपनम् । ३ धैर्यम् । ४ संस्कारोपस्करानयने । ५ वृत्तां चिन्ताम् । ६ आनाययति ।

७ शिवपदातिथीनाम् । ८ बाष्पम् । ९ केषुचित् ।

मिचं ताई चिय गिण्हंतेसु, केसु इ सुरेसु देवदसेहिं पुरओ तोरणाई कुणंतेसु, केसु इ अमरेसु अगओ जक्खकदमेहिं छंटाणं दिंतेसु, केसु इ जंतभट्टपाहाणगोलगव्व अग्गओ 'विल्लुंतेसु, मोहत्तुणाऽऽहएसु विव अण्णेसु पिट्ठओ धावंतेसु, केसु इ नाह ! नाहत्ति उच्चएहिं सद्दं कुणंतेसु, केसु इ मंदभग्गा हया अम्हे त्ति अप्पाणं निदंतेसु, केसु इ नाह ! अम्हाणं सिक्खं देहत्ति मुहुं पत्थमाणेसु, केसु इ सामि ! अम्हाणं धम्मसंसयं को छिंदि-स्सइ एवं जंपमाणेसु, केसु वि भयवं ! अंधुव्व अम्हे कत्थ गच्छिस्सामु त्ति पच्छा-यावं कुणंतेसु, केसु इ सुरेसु पुढवी अम्हाणं विवरं देउ त्ति कंखमाणेसु, तुरिएसु वाइ-ज्जमाणेसु सक्को सामिसिविअं चिआए समीवं जेइ, अण्णे अ देवा अण्णाओ दुण्णि सिविआओ चिअं उवर्णित्ति । 'क्किच्चविज्ज सक्किदो सपुत्तो विव सामिणो तणुं पुव्व-दिसिचिआए सणियं ठवेइ, सहोयरा विव अमरा इक्खागुकुलजम्माणं समणाणं देहाई दौहिणिल्ल-चियगाए ठवेइरे, अवरे वि सुरा समुचियविउणो अण्णेसिं अणगाराणं सरी-राई पच्छिमदिसिचिआए निहेइरे ।

अह सक्कादेसेण अग्गिकुमारया देवा तक्कालं तासु चियासु अग्गिकाए विउ-व्विरे, वाउकुमारदेवा इंदस्स आणाए वाउणो विउव्वित्ति, तओ ते वायवो अभिओ वन्दि सिअं जालंति, सुरिंदस्स निदेसेण तासुं चियासुं भारप्पमाणाई कप्पूराईणि कुंभ-प्पमाणाई घयाई महुई च निहेइरे, अट्ठि मोत्तूण जाव सेसथाउणो दइडा ताव चिया-नलं मेहकुमारगा देवा खीरजलेहिं 'विज्जवित्ति । तओ पुरंदरो नियविमाणम्मि पडि-मव्व अच्चिउं पहुणो उवरियणिं दाहिणं दां गिण्हइ, ईसाणिदो वि उवरियणिं दाहिणेयरं पहुस्स दां गहेइ, चमरिंदो उ 'हेट्ठिल्लं दाहिणं दां उवादेइ, बल्लिंदो वामं हेट्ठिल्लं दां गिण्हइ, अण्णे उ वासवा सेसदंते, अण्णे य देवा अट्ठीणि वि गिण्ह-इरे । तथा तं मग्गमाणा सावगा देवेहिं दिण्ण-कुंडत्तय-ग्गिणो ते तओ पभिइ अग्गि-होत्तियमाहणा होत्था, ते हि गेहम्मि सामि-चिया-वणिं निच्चं पूयंति, सिरिमंता सेट्ठिणो लक्खदीवं पिव तं 'निव्वायं रक्खेइरे । इक्खागुकुलजायाणं समणाणं सेसाण-गाराणं च निव्वाणे ते दुण्णि चियाणले सामिचियानलेण जीवार्णित्ति ।

अण्णाणगाराणं निव्वाणं चियावर्णिं इक्खागुमहरिसाणं पि चिइगाकिसाणुणा ते वोहेइरे, अण्णाणगारचियग्गि अण्णेसु दांसुं चिइगावण्हीसुं पुणो न हि संकमेइरे, माह-

१ विल्लुत्तसु । २ कृत्यविद् । ३ दक्षिणचित्तायाम् । ४ उवालयन्ति । ५ अस्थि । ६ विध्यापयन्ति । ७ दंष्ट्राम् । ८ दक्षिणेतरे-वामम् । ९ अधस्तनीम् । १० निर्वातम्-वातरहितम् ।

णेसु अज्जावि एसो विही दीसइ । केइ उ 'लद्धमस्सा भत्तीए तं भेष्यं वंदेइरे, तओ पहुडिं भप्पभूसणा ते तावसा जाया, तओ देवा अढावयगिरिणो नव्वं सिहरत्तयं पिव चिया-थाणत्तए रयणत्थुवत्तयं विदेइरे, तओ नंदीसरदीवम्मि सासयपडिमामहूसवं किच्चा इंदसहिया ते देवा नियं नियं थाणं गच्छन्ति । सव्वे इंदा स-स-विमाणेसु सोहम्माए परिसाए माणवगत्यंभम्मि वट्ट-वड्ड-समुग्गए सामिदाढाओ निवेसिति, निवे-सिज्जण निरंतरं ताओ अच्चित्ति, तासिं पहावाओ ताणं सइ विजयमंगलाइं सिया ।

अढावयस्स उवरिं भरहकारिओ सिह्निसज्जाजिणपासाओ—

भरहनरिंदो य तत्थ पहुसक्कारासण्णभूमियलम्मि जोयणायामं ति-कोससमु-स्सयं निव्वाणपासायस्स सप्पहं नामेण सिह्निसज्जं पासायं वट्टइरयणेण उच्चएहिं रयणपासाणेहिं कारवेइ, तस्स य सामिसमवसरणस्स इव फलिहपाढाणमइआइं रभ्माइं चउरो दाराइं जायाइं, तत्थ पइदुवारं उभयपासेसुं सिवसिरीणं कोसा विव सोलस रय-णचंदणकलसा संति, दुवारे दुवारे रयणमइया सोलह तोरणा सक्खं अभिओ समु-ब्भूया पुण्णवल्लीओ विव संति, दारे दारे पासायदुवारैविणसिय-पसत्थि-लिवि-संणिहाइं मंगलकारगाइं सोलस अट्टमंगलाइं संति, तेसु य दुवारेसु चउण्हं दिसिवालाणं पि आहरिआओ सहाओ विव विसाला मुहमंडवा विज्जंति, तेसिं च चउण्हं मुहमंड-वाणं पुरओ मंडवंतम्मि सिरिवल्लीणं पेक्खागेहमंडवा हुंति, तेसिं च पेक्खामंडवाणं मज्झभागेसुं सूरबिबविडंविणो वड्डमइया अक्खाडगा संति, अक्खाडगे अक्खाडगे य मज्झभागम्मि कमलमज्जे कणिगा विव मणोहरं रयणसिंहासणं अत्थि, पइपेक्खामं-डवपुरओ मणिपीढिआ होइ, तीए य उवरिं रयणसालिणो चेइयथूमा भवंति,

ताणं च चेइयथूवाणं पुरओ विज्जोइयंउवरा पच्चेगं च पइदिसं महई मणि-पीढिआ हवइ, तीए पच्चेअं अवरिं चेइयत्थूभ-संमुहीणा सव्वंगं रयणनिम्मिआ पंच धणुहसयमाणा नामेणं उसहा चंदणणा चारिसेणा चट्ठमाणत्ति पल्लंकासणसंठिआ मणोहरा नयण-केरव-चंदिमा नंदीसरमहादीवचेइयमज्झम्मि सासयजिणपडिमा विव पडिमा हवंति, । तेसिं च पच्चेगं चेइयथूभाणं पुरओ अणग्गमाणिकमइआ विसाला चारुपीढिआ अत्थि, तासिं च पीढिआणं पुरओ पच्चेगं चेइयपायवा, ताणं चेइय-तरूणं पुरओ पच्चेगं मणिपीढिआओ संति, ताणं च पच्चेगं पि उवरिं इंदज्जाओ धम्मेण दिसिदिसि अहिरोविओ जयत्यंभो विव हवइ, पच्चेगं पि य इंदज्जायाणं च

पुरओ तिसोवाणा सतोरणा नंदा नाम पुक्खरिणी होइ, सा सच्छ-सीयलज्जला-
पुण्णा विचित्तकमलसालिणी मणोहरा दहिमुहपव्वयाहारभूयपुक्खरिणीनिहा भवइ,
तस्स सिहणिसज्जामहावेइयस्स मज्झभागम्मि महई मणिपीढिआ अत्थि, तीए
मणिपीढिआए अवरिं समोसरणस्स विव चित्तरयणमइओ देवच्छंदओ हवइ, तस्स
य उवरिं अकाले वि संझम्भपडलसिंरि उब्भाविंतो नाणावण्णवत्थमइओ उल्लोओ
हवइ, उल्लोयस्स अब्भंतरे पासेसु य वइरमइयंकुसा संति, तह वि उल्लोअसोहा
निरंकुसा अत्थि । तेसु अंकुसेसु कुंभमाणेहिं आमलगव्व थूलेहिं मुत्ताहलेहिं निम्मिया
मुहाधारोवमा हारा अवलंबमाणा संति, हारपज्जंतसे य विमला मणिमालिआ
तेलुक्क-मणि-खाणीणं आहरिआ वण्णिगा विव छज्जन्ते, मणिमालाणं अंतभागेसुं
अमला वइरमालिआओ सहीओ विव पहाभुएहिं परुपरं आलिंतीओ सोहेइरे,
चेइअभितीसुं च चित्तमणिमइओ गंवक्खा नियपहा-पडलेहिं जाय-तिरक्करिणीओ विव
संति, तेसु य डज्झमाणाऽगरु-धूमत्थोमा तस्स गिरिणो नैवुब्भूय-चूला-भमप्पया
सोहंते । तत्थ देवच्छंदम्मि निय-निय-संठाण-माण-वण्णधराओ सेलेसिज्जाण-
वट्ठिणो पच्चक्खं सामिणो विव उसहजिणिदपमुहाणं अरिहंताणं निम्मलाओ चउ-
वीसं पि रयणपडिमाओ निम्मविऊण ठवेइरे, तत्थ सोलस पडिमाओ सुवण्ण-
निप्फणाओ, उभे सामरयणमइआओ, दोणि फलिह-निप्पणाओ, दुवे वेडुज्ज-
रयणनिम्मिआओ, दो सोणपाहाणजायाओ एवं चउव्वीसजिणपडिमाओ तत्थ संति ।
सव्वासिं पि ताणं अरिहंतपडिमाणं अंकरयणमइआ लोहियक्खमणिपडिसेगा नहा
विज्जंति, नाहि-केसपज्जंतभूमि-जीहा-तालु-सिरिवच्छ-चुचुअं हत्थपायस्स य
तलाइ रत्तमुवण्ण-णिप्फणाइ संति, पम्हाइ नयणताराओ भंसुइं भुमयालोमाइं
केसा य रिद्धरयणमइयाइ, ओट्टा य विडुमइआ संति, दंता फलिहमइआ, सीस-
घडीओ वइरमइआओ, नासिगा अब्भंतरलोहियक्खपडिसेगा सुवण्णनिप्फणा, दिट्ठीओ
लोहियक्ख-पडिसेग-पंतभागाओ अंकरयणनिम्मिआओ त्ति अणेगमणिमइआओ पडिमाओ
पयासेइरे । तासि पिट्ठीए पच्चेगं इक्किा रयणनिम्मिआ जहारिहमाण-सालिणी छत्त-
धारपडिमा मुत्ता-पवालजालंकिंयं कोरंटगुप्फदामगं फलिहमणिमइअदंडं सेय्यवत्तं

१ वर्णिकाः-वानगी । २ गवाक्षाः-वातायनानि । ३ जाततिरस्करिण्यः-सजातयवनिकाः । ४ धूमस्तोमाः-
धूमसमूहाः । ५ नवोद्भूतचूलाभ्रमपदाः । ६ वैडूर्यम्-नीलवर्णमणिः । ७ शोणपाषाणजाते-रक्तवर्णमणिजाते । ८
लोहिताक्षमणिप्रतिसेकाः-लोहिताक्षमणिमय-नखाधस्तनभागाः । ९ चूचुकः-स्तनाग्रभागः । १० इमभूणि, भुवो
रोमाणि । ११ शीर्षघटयः-मस्तकहृद्भुजिकाः । १२ अभ्यन्तरलोहिताक्षमण्याभासिता । १३ पृष्ठभागे । १४ श्वेतात-
पत्रम्-श्वेतच्छत्रम् ।

धरंती चिद्वृद्ध, पच्चेगं तासि पडिमाणं उभेसुं पासेसुं उक्खित्तमणिचामराओ रयणमइआओ
दुण्णि चामरधारपडिमाओ संति, पच्चेगं भगवंतपडिमाणं पुरओ नाग-जक्ख-भूय
कुंडधाराणं दुण्णि दुण्णि पडिमाओ हुंति, ताओ सन्नंगं उज्जलाओ रयणमइआओ
कयंजलीओ पच्चेक्खा उवविट्ठा नागाइदेवा इव विरायंति । देवच्छंदम्मि निम्मलाओ
चउवीसं रयणवंटाओ, संखित्ताइच्चविवसरिच्छा माणिकदप्पणा, हेमनिम्मियाओ
ठाणसंठियदीविगाओ तह रयणकरंडगा सरियाऽऽवट्टवट्टुला चंगा पुप्फचंगेरिआ,
'लोमहत्थपडलीओ, विभूसणकरंडगा, हेमनिप्पणधूवदहणगाइं, आरत्तिगाणि रयण-
मंगलदीवा रयणभिगारगा मणोहररयणथालाई सुवण्णपत्ताई रयणचंदणकलसा रयण-
सीहासणाई, रयणमइअ-अट्टमंगलाई, हेममइअ-तेल्लसैमुग्गया, हेममइयाई धूवभंडाई,
हेममइआ उप्पलहत्थगा, एयाई सिरिमंताणं अरिहंताणं चउवीसाए तित्थयराणं
पुरओ हवंति । इअ णाणारयणमयं, तेलुक्के वि अइसुंदरं, मुत्तिमंतेण धम्मेण विव
चंदकंतमणिमइयवप्पेण सोहियं तं चेइअं भरहनरिंदस्स आणातुल्लसमए कलाविउणा
तेण वट्टइरयणेण जहविहिं विहिज्जइ, तं च एरिसं ईहामिग-वसह-मगर-तुरंग-
नर-किंनर-विहंगम वालग-रुरु सैरह-चमर-गयाइ-विविहचित्तकम्मेहिं उवसोहियं,
बहु-तरुज्जाणं पिव वणलया-पउमलयाहिं विचित्तब्भुयभंगियं, रयणयंभसमाउलं, गयण-
गंगातरंगेहिं पिव पडागाहिं मणोरमं, उण्णाएहिं सुवण्णमइअज्झयदंडेहिं दंतुरं पिव,
निरंतरपसरंतेहिं झयसंथिअ-किंकिणीसदेहिं खेयर-इत्थी-वुंद-रसणा-दाम-झुणि-
विडंबगं, उवरिं विसाळकंतिसालिणा पउमरागमणिकुंभेण माणिक्केण अंगुलीय-
मिव विरायमाणं, अंस्सहिं कत्थइ पत्तवियं पिव, कत्थइ संवम्मियं पिव, कत्थइ रोमं-
चियं पिव, कत्थइ लिच्छं पिव, कत्थ वि गोसीसचंदणरसमइयथासगलंछियं अइसु-
सिलिह-संधित्तणेण एगपाहाणेण निम्भियं पिव, अच्छराहिं मेरुगिरिव्व चेट्ठा-वैइ-
चित्त-चारुहिं माणिक-सालभंजीहिं अहिट्ठिय-नियंबभागं, उभेसुं दुवारदेसेसुं चंदण-
दवलित्तेहिं दोहिं कुंभेहिं थलसमुप्पणपुंडरीएहिं पिव अंकियं, तिरिअ-बद्धावलंविण्हिं
धूविण्हिं दैमेहिं रमणीअं, तलम्मि पंचवण्णकुसुमेहिं रैयपगरं, जउणानईए कलिन्द-
गिरि पिव निरंतरेहिं कप्पुरागरुकत्थूरीधूवधूमेहिं अहोणिसं पैलाविज्जमाणं, देवलो-
गाओ आगयं अच्छरागणसंकिणं पिव, पालगविमाणं विज्जाहरीवरिअं वेय-

१ लोमहस्तपटल्यः । २ रत्नभृंगारकाः । ३ समुद्रगकाः-दामडा । ४ कलाविदा । ५ वृकः । ६ रुहः-
मृगविशेषः । ७ शरभः-अष्टावृद्धः । ८ रथासकः-हस्तविम्बम्-हाथनां थापा । ९ वैचित्र्यचारुभिः ।
१० नितम्बभागम्-मध्यभागम् । ११ दामभिः-मालाभिः । १२ रचितप्रकरम्-पुष्पाणां रचनाविशेषः ।
१३ श्लाघ्यमानम् ।

इदमेहलाखंडं पिव, अग्गओ पासओ पच्छा य चारुवेइअतरुहिं माणिकपीठिगाहिं च भूसणेहिं पिव भूसिअं, अट्ठावगगिरिणो मुद्धन्नं पिव माणिककभूसणं, नंदीसरदीवाड-चेइआणं फट्ठाए विव अइपावणं एआरिसं भरहकारिअं तं चेइअं अत्थि ।

भरहेसरो नवणउईए नियभाऊणं दिव्वरयणसिलामइआओ पडिमाओ तत्थ-च्चिय करावेइ, भत्तीए अतित्तिओ सो महीवई भगवओ सुस्सुसमाणं अप्पणो वि पडिमं तत्थच्चेव कारेइ, चेइआओ बाहिरं भगवओ एगं 'थूभं, नियभाऊणं च एगूणं सयं 'थूवे करावेइ, एत्थ गमणागमणेहिं नरा आसायणं मा करिंसु चि चिंतिऊण नरिंदो जंतमइए लोहनिम्मिए आरक्खणे कुणेइ, लोहनिम्मिय-जंतजुत्तेहिं तेहिं आरक्खगपुरिसेहिं तं ठाणं मच्चलोगाओ बाहिरं पिव नराणं अगमणीअं थिअं । तओ य सो चक्कवट्ठी तत्थ दंडरयणेण तस्स पव्वयस्स दंते छिंदेइ, जेण सो गिरी उंज्जु-उच्चय-थंभो विव अणारोहणिज्जो होत्था । तओ तं गिरिं परिओ जणेहिं अलंघणीआइं जोयणंतरिआइं मेहलारूवाइं अट्ठ पयाइं विहेइ, तओ पहुडिं एसो सेलो 'अट्ठावओ' ति नामेण पसिद्धो होत्था, लोगम्म एसो गिरी हरदी १ केलासो २ फलिहगिरी ३ अ किट्ठिज्जइ । इअ चेइअं विणिम्मविऊण भरहच-क्कवट्ठी पइट्ठाविऊण य सेयवसणहरो मेहम्मि चंदो विव तत्थ चेइए पविसेइ, तत्थ सपरिवारो भूवई पयाहिणं काऊणं सुगंधिजलेहिं ताओ पडिमाओ ण्वेइ, ण्वविऊण देवदूसवत्थेहिं परिओ वि ताओ पडिमाओ मंज्जेइ, तओ य ताओ रयणाऽऽयंसो विव अच्चंतुज्जलाओ जायाओ ।

अह नरिंदो निम्मल-जोण्हापूरेहिं पिव 'सुगंधिथिण्णभावं पत्तेहिं गोसीस-चंद-णरसेहिं ताओ विलिपेइ, विलिपित्ता विचित्तरयणभूसणेहिं उदामेहिं दिव्वमालाहिं देवदूसवसणेहिं पि य ताओ अच्चेइ, तओ घंटं वायंतो जस्स य धूमवट्ठीहिं 'नील-वल्लरीहिं अंकियं पिव चेइअब्भंतरं कुणंतो भूवो धूवं उहेइ, तओ नरिंदो संसार-सीयभीयाणं जलंतं वण्हिकुंडं पिव कप्पूरारत्तियं उत्तारेइ, उत्तारिऊण उसइसामिणो पडिमं नच्चा सोगभत्तीहिं 'अप्फुण्णो भरहेसरो इअ थुणिडं पारंभेइ—

१ मूर्धन्यम्-मूर्ध्नि भवम् । २ अतृप्तिकः । ३ स्तूपम् । ४ स्तूपान्-पादुकाभण्डितदेवकुलिकाः । ५ अज्जुः-सरलः । ६ हराद्रिः-कैलासः । ७ माष्टि^१ । ८ रत्नादर्श इव । ९ सुगन्धिस्त्यानभावम्-सुगन्धिधनत्वम् । १० नीलवल्लीभिः । ११ आक्रान्तः ।

अट्ठावयजिणपासायंतभायचउब्बीसजिणाणं थुईओ—

कल्लाणपंचण्हिं, नेरइयाणं पि दुक्खतवियाणं ।

दिण्णसुहस्स सुहागर !, नमो तुहं तिजगदीसरय ! ॥१॥

सामिय ! जगहियकारण !, विहरंतेणं तए इमं विस्सं ।

दिणवइणा विव निहिलं, अणुग्गहियमेत्थ तमगसियं ॥२॥

अज्जजाणज्जजणाणं, विहरंतो तुं सिया समसुहाय ।

भवओ पवणस्स य तह, परोवयाराय होज्ज गई ॥३॥

अण्णेसिं विहरंतो, उवयरिउं आसि दीहकालमिह ।

उवयाराय हि भयवं !, मुत्तीए कास समुवगओ ? ॥४॥

भवया अहिद्धियं जं, लोयमां अज्ज लोगवरमासी ।

मच्चुपहाणो लोगो, तुमइ विणा एस संजाओ ॥५॥

अज्ज वि सक्खमसि तुमं, तेसिं सम्भावभूसियभवीणं ।

लोगाणुग्गहकरणिं, सरंति जे देसणं तुम्ह ॥६॥

रुवत्थं पि जणा जे, जिणिंद ! झाणं तुमम्मि जुंजंति ।

पच्चक्खमेव ताणं, जोगीणं पि भयवं तुं सि ॥७॥

परमेसर ! संसारं जहा असेसं चइत्थ दुहभरियं ।

तह निम्ममो वि चित्तं, न चएसु कयाइ मम पूर्णं ॥८॥

इअ थुणिऊणं उसहं, पहुं तओ जिणवरे य अण्णे वि ।

नमिउं नमिउं भरइओ, पत्तेणं वणिणउं लग्गो ॥९॥

विसयकसाया अजिअं, विजया—मायरसुकुक्खिवरहंसं ।

जियसत्तुनरिंदसुयं, नमामि अजियं अजियनाहं ॥१०॥

भवगयणपारगमणे, सूरं सेणोयरस्स वररयणं ।

नरवइजियारिजायं, संभवजिणणाहमरिहामि ॥११॥

संवरवंसाभरणं, देवीसिद्धत्थपुव्वदिसिभाणू ।
 अभिणंदणजिणयंदो, हणेउ सइ अम्ह दुरियाई ॥४॥
 जय मंगलामणकुमुय-चंदो मेहणयावणिजलहरो ।
 सुमई जिणिदणादो, जो भवियजण-मण-कुहहरणो ॥५॥
 सामि ! धरनरिंदजलहि-सोम ! सुसीमासरोवरसरोय ! ।
 पउमप्पह-तित्थयरो !, तुब्भं सययं नमो अत्थु ॥६॥
 जिणवर-सुपास ! रक्खसु, पुढवीमलयम्मि चंदणसरिच्छ !
 सिरियपइट्ठनिक्कुलाऽऽहारवरत्थंभ ! अम्हे वि ॥७॥
 महसेणकुलमयंको !, लक्खमणाकुक्खिमाणसमराल ! ।
 भयवं चंदप्पहजिण !, तारसु अम्हे भवोदहिओ ॥८॥
 सुग्गीवतणय ! रामा-देवी-णंदणवणुव्विकप्पतरू ।
 सुविहिजिणो मज्झ दिससु, परमपयपयासहगं मग्गं ॥९॥
 सिरिसीयलो जिणेसो, नंदादेवीमणंबुहि-मयंको ।
 दहरहनरिंदतणओ, मणवंछियदायगो मज्झ ॥१०॥
 सिरिविण्हुमाउत्तणओ, विण्हुनरिंदकुलमोत्तियाभरणं ।
 नीसेयससिरिरमणो, सिज्जंसो देउ मम मोक्खं ॥११॥
 वसुपुज्जनरिंदसुओ, माइजयाहिययपंकयाइच्चो ।
 अरिहंतवासुपुज्जो, सिवस्सिरिं दिज्ज भव्वाणं ॥१२॥
 सामाणण-वरचंदो, कयवम्मनरिंदसागरससंको ।
 अरिहो विमलजिणेसो, हिययं विमलं महं कुणउ ॥१३॥
 सिरिसिहसेणनरवइ-कुलमंगलदीवगो अणंतजिणो ।
 सुजसादेवीसूणू, वियरसु अम्हं सुहमणंतं ॥१४॥

माणुनिवहियचंदो, सुवयापुव्वायलेसउसिणंझ ।

धम्मजिणेसो भयवं, विहेउ धम्मे मइं मज्झ ॥१५॥

सिरिसंतिणाहजिणवर ! अइरादेवीवरंगओ भवसु ।

निववीससेणकुलणह-चंदो ! भवियाण संतिगरो ॥१६॥

सिरिकुंणुणाह ! भयवं !, स्सरनरिंदकुलगयणतिमिरारी ! ।

सिरिजणणी-कुक्खिमणी !, जएसु उम्महियमयणमओ ॥१७॥

देवीमाणसहंसो, सुदंसणनरिंदचित्तघणमोरो ।

तित्थयरो अरणाहो, देउ मम भवुत्तरणवरयं ॥१८॥

कुंभनरेससमुदाऽमयकुंभो मल्लिणाहजिणचंदो ।

देविपहावइजाओ, दिसउ सिवं कम्मखयमल्लो ॥१९॥

पउभावइदेवीसुअ ! सुमित्तिहमवंतपोम्म-दहरूवो ! ।

मुणिसुव्वयतित्थेसो ! 'पणई अम्हाण तुम्ह सिया ॥२०॥

वप्पादेवीरोहण-गिरिरयण ! विजयनरिंदकुलदीव ! ।

विस्सनमंसियपयकय ! नमिजिणवर ! देसु मुत्तिसुहं ॥२१॥

अरिहा अरिद्वेनेमी समुदधूवइसमुहरयणीसो ।

असिवाणि सिवासुणु, हरेउ भवियाण नमिराणं ॥२२॥

पासजिणीसरदेवो चामामणनंदणो पसंतिगरो ।

रायाऽससेणतणुओ विग्घहरो होज्ज अम्हाणं ॥२३॥

सिद्धत्थभूवतणओ तिसलाहियसररायहंससमो ।

चरमजिणेसो वीरो अणंतमवखयपयं देज्जा ॥२४॥

इअ चउवीसजिणथुई, पडिज्जमाणा इमाउ भवियाणं ।

कत्थूरसूरिरइआ, भवदुहहरणी सया होज्जा ॥२५॥

भरहस्स अउज्झापुरीए गमणं

इअ पच्चेगं सन्वे अरिहंते थुणिऊण नमंसिऊण य सिहनिउज्जावेइयाओ निग-
च्छेइ, वलंतग्गीवो तं चेइअं पियमित्तं व विलोयंतो सपरिच्छओ भरहनरिंदो अट्ठावय-
गिरित्तो उत्तरेइ, लग्गवत्थंचलो विव गिरिविलमामणो अउज्झावई तथो मंदं मंदं अउ-
ज्झानयरिं पइ चलेइ, सोगपूरेहिं पिव सेणोद्धूएहिं रयपूरेहिं दिसाओ वि आउलाओ
कुणंतो 'सोगत्तो भूवई कमेण नियपुरिं पावेइ, तइया बाढं तट्ठुक्खदुहिणहिं 'सोयरेहिं
पिव नगरलोगेहिं असुजुयनयणेहिं दीसमाणो भरहनरिंदो विणीयानयरिं पविसेइ, तथो
सामिपाए सरिऊणं सरिऊणं वुट्ठसेसजलहरो विव सो नरिंदो अंसुजलविंदवे वरिसंतो
नियं पासायं पविसेइ, सो तत्थ चिहंतो गच्छंतो सुवंतो जागरंतो बाहिरं मज्झे वा
दिवा निसाए वा हरियधणो किवणो अत्थं पिव पट्ठं चिय ज्ञायइ, तया अण्णहेउणा
वि अट्ठावयगिरियलाओ समागए नरे दट्ठणं पुब्बं पिव पट्ठसख्वं कहिते सो मण्णेइ ।
इअ सोगवाउलं भरहनरिंदं पासिऊण मंतिवरा तं एवं बोहिंति—हे महाराय ! जो पट्ठ
पुब्बं गिहवासत्थिओ वि पमुव्व इमं अबुहजणं ववहारणए पयट्ठावित्था, तथो गहिय-
दिक्खो भयवं अचिरसमुप्पण्णकेवलो भवजलहितो जगजणं उद्धरिउं इच्छंतो धम्ममि
पव्वट्ठिमु, सयं कयकिच्चो होऊण अण्णजणे वि कयकिच्चे काऊण जो परमपयं
पावित्था तं पट्ठं कहं नाम सोएसि ?, एवं कुलामच्चेहिं कहंवि वि बोहिओ महीवई
सणियं सणियं रज्जकज्जेसु पवट्ठेइ ।

भरहस्स भोगा—

तैमसा विमुत्तो मयंको विव सणियं सणियं सोगमुत्तो नरोसरो बाहिरं विहार-
भूमीसुं वियरेइ, गैयंदो विंशथलिं पिव सामिपाए सुमरिऊण विसीयंतो एसो उवेच्च
सया आसण्णसिद्धजणेहिं 'विणोइज्जइ, एगया सो जगईवई परिवाराणुरोहेण विणोअ-
उप्पत्तिभूमीसुं आरामपंतीसुं गच्छेइ, तत्थ य समागय—इत्थीरज्जेण विव इत्थीवुंदेण
सह रम्मासुं लयामंडवसेज्जासुं रमेइ, स तत्थ कोउगेण विज्जाहराणं पुप्फावचयं विव
तरुणजणाणं कुसुमावचयकीलं पेक्खेइ, वरवामलोयणा सयं 'पुप्फनेवत्थं गंठिऊण
पुप्फबाणस्स पूयं पिव तस्स उवणेइ, तं समुवासिउं असंखभूआ उउसिरीओ विव
सव्वंगपुप्फाहरणभूसिआओ अंगणाओ तस्स पुरओ कीलेइरे, तासिं मज्झे उउदेवयाणं
इक्कं अहिदेवयं पिव सव्वओ पुप्फभूसणो सो रायराओ वि रेहेइ । कयाई सो भरहेसरो
सव्वहूजणो रायहंसो इव कीलादीहियं कीलिउं सेंइरं पयाइ, तत्थ य वामनयणाहिं सह भरहो
कणेरुयाहिं सहिओ कुंजरो नम्मयाए विव जलकीलं कुणेइ, तया वामलोयणा—सिक्खि-
आओ विव जलुम्मीओ तं आलिगंतीओ खणं कंठम्मि, खणं बाहूसुं, खणं हिययम्मिपडेइरे ।

१ शोकात्तः । २ सोदरैरिव । ३ राहुणा । ४ गजेन्द्रः । ५ विनोद्यते । ६ पुष्पनेपथ्यम्—पुष्पवेषभूषणम् ।
७ पुष्पबाणस्य—कामस्य । ८ कीलादीर्घिकाम् । ९ स्वैरम् । १० जलोर्मयः—जलतरङ्गाः ।

एयम्मि समयम्मि अवयंसीकय-पंकओ चळंतमोत्तियकुंडलो सो भरहो वारिम्मि सक्खं वरुणदेवो विव लक्खिज्जइ, लीला-विलास-सामज्ज-निवेसणाय विव इत्थीहिं 'अहमहमिगयाए वारीहिं भूवई अहिसिचिज्जइ, अच्छराहिं पिव जलदेवयाहिं पिव अभिओ जलकीलापसत्ताहिं ताहिं रमणीहिं सह रमेइ, 'निय-पाडिप्फद्धीणं कमलाणं दंसणेण विव हरिणणयणाणं दिट्ठीओ वारीहिं 'तंवत्तणं पावेइरे, अंगणाणं अंगाओ विगलिण्हिं घणेहिं अंगर(गेहिं सकइमाइं जलाइं जक्खकइमत्तणं पारिविति । एवं भरहनरिंदो विविहप्पयारेहिं बहुसो जलकीलं कुणेइ । कयाई वि सक्किंदो व्व रांगीयगं कारितं सो पुढवीवई विला-समंडवसहं उवविसइ, तत्थ वीणावायगोत्तमा मंताणं उँकारं पिव संगीयकम्माणं पढमं सुस्सरं वेणुं पुरित्ति, वैणविगा सवणमुहेहिं फुडवंजणधाऊहिं 'सरेहिं एगारह-विहाओ वीणाओ वायंति, 'रंगायरिआ तयतयकवित्तणाणुगयं निच्चाभिणयमायरं नायेणं पत्था-रसुंदरं ताळं धरेइरे, 'मयंगवायगा पणववायगा य पियमित्तो व्व अण्णुण्णं मणयं पि अणु-ज्झंता नियं नियं वाँइत्तं वाएन्ति, हाहा-हूहू-देवगंधवाज्झंकारहारिणो गायगा सरगीइ-मणोरमे नवनवजाइरागे गायंति, लास-तंडवपंडिआओ नट्टिआओ विचित्तेहिं अंगहा-रेहिं करणेहिं पि सन्वेसिं विम्हयं कुणंतीओ तारं नच्चेइरे, भरहनरिंदो पेक्खणिज्जाइं एयाइं ति अविग्घं पेक्खेइ, 'जहिं तहिं पसत्ताणं पहूणं को हि वाहगो'?, एवं भरहे-सरो कामभोगे भुंजमाणो सामिमोक्खदिणाओ पंच पुण्वलक्खाइं अइवाहेइ ।

भरहस्स रयणापंसगिहम्मि केवलनाणुप्पत्ती—

अण्णया विहियसिणाणो कयबलिकम्मो "देवदूसंमुयल्लुहियसरीरो पुप्फमालागंठि-अकुंतलो गोसीसचंदणकयसव्वंगविलेवगो सव्वंगीणनिहियाणग्गदिव्वरयणभूसणो वर-जुवईगणपरिवरिओ पडिहारीए दंसिज्जमाणपहो सो भरहो अंतेउरगेहभंतरम्मि 'रयणाय-सगिहं गच्छेइ, अइनिम्मले आगासफलहुवमे तत्थ दप्पणे पडिबिबिअं जहपमाणं सव्वंगं रुवं दीसइ, तत्थ य अप्पणो देहं पेक्खमाणस्स भरहेसरस्स एगयमाए अंगुलीए 'अंगुलि-

१ अवतंतीकृतपङ्कजः—कर्णाभूषणीकृतपङ्कजः । २ साम्राज्यम् । ३ अहमहमिकया । ४ निजप्रतिस्पर्दि-
नाम् । ५ साम्राज्यम्—रक्तत्वम् । ६ वैजविकाः—वीणावादकाः । ७ स्वरैः । ८ राजाचार्याः—सूत्रधाराः,
तत्तत्रचित्वाडुगुगतम् । ९ मृदङ्गवादकाः । १० वादित्रम्—वाद्यम् । ११ देवदूष्यांशुकं । १२ रत्नादकंयहम् ।
१३ अंगुलीयकम्—मुद्रिका ।

उज्जं पडियं, महीवई अंगुलीए गलियं तं अंगुलीअं बरहिणो बरिहभाराओ पडियं एगं बरिहं पिव न जाणेइ । चक्कवट्टी कमेण देहंगाई पासतो दिवा मयंककलं पिव मुद्दि-
चारहियं गलियजोणं तं अंगुलिं पेक्खेइ, अहो इमा अंगुली तेयरहिया किं ? ति विवि-
तंतो नरेसरो भूमीए पडियं अंगुलियं पासेइ, अण्णाई पि अंगाई आहरणेहिं विणा
सोहारहियाई किं ? ति चित्तिउण सो अवराईपि भूसणाई मोत्तुं आरंभेइ, पुब्बं नरिंदो
माणिककमउडं उत्तारेइ, तइया चुयस्यणं मुद्दियं पिव मउडहीणं सिरं पासेइ, तओ
माणिकककुंडलाइं उज्जिउण सो कुंडलेहिं विहीणे कण्णपासे सूर-चंद-रहिआओ पुब्बा-
वरदिताओ विव पासेइ । पुणो 'गेवेज्जयं जहाइ, अह निवो गेवेज्जयरहियं गीवं
निज्जलं नइं पिव सिरिरहियं पेक्खेइ । खणेण द्वारं उत्तारेइ, तया नरिंदो गयतारगं
गयणं पिव हारविहीणं उरत्थलं आलोएइ । जया 'केऊराइं च सुंवेइ, तया सो भूवो
'उब्बेइइदय-अइडलइगापासे सालदुमे विव केऊरविमुत्ते दुण्णि 'बाहे पासेइ । इत्थमूले-
हितो जया कंकणाइं चएइ तया सो आमलसारग-रहियवरपासायं पिव तेहिं वज्जि-
याइं इत्थमूलाइं पेक्खेइ । जया अण्णाई पि अंगुलिज्जगाइं सुंवेइ तया सो भूवई भट्ट-
मणीओ फणिफणाओ विव. अंगुलिज्जगहीणाओ अंगुलीओ आलोएइ । जइआ पायक-
डगे चयइ तइआ गलियमुक्खणवलए गयरायदसणे विव कडगरहिए पाए पासेइ, इअ
कमेण भरहनरिंदो चत्तसव्वंगभूसणं गयसिरिं अप्पाणं जिणपणं तहं पिव पासेइ,
पासिउण चित्तेइ ।

भरहस्स चित्तणं—

अहो धिरत्थु इमस्स देहस्स, जओ भूसणाईहिं सरीरस्स सोहा चित्तकम्मेहिं
भित्तीए पिव कैरिमा, अंतो विट्ठाइमलकिलिणस्स बाहिं इंदियच्छिइ-भवमलेहिं भरि-
यस्स इमस्स सरीरस्स चित्तिज्जमाणं किंपि सोहणं न सिया, इमं सरीरं कप्पूर-कत्थूरी-
पमुइमुगंधिवत्थूइं पि उसरभूमी जलहरजलाइं पिव दूसेइ । विसएहितो विरज्जिउण
जेहिं मोक्खफलो तवो तविओ, तत्तवेईहिं तेहिं चेव एयस्स फलं गहिअं ति चित्त-
माणस्स सम्मं अपुव्वकरणकमेण खवगसेदिसमारुदस्स सुक्कज्जाणं संपत्तस्स घाइकम्म-
क्खएण अह तस्स भरहेसरस्स जलहरपडलविणासेण आइच्चपयासो विव कैवलं नाणं
पयडीहोइ ।

१ बरिहणः—मयूरस्य । बरिहभारात्—मयूरपिच्छसमुहात् । २ ग्रीवाभूषणम् । ३ कैयूरे—हस्तभूषणे ।

४ उब्बेच्छिताईल्लिकापासो । ५ बाहु । ६ कृत्रिमा । ७ तत्त्ववेदिभिः ।

तयानि च सोहम्माहिवङ्गो सक्कस्स सहसा आसणकंपो जायइ, अचेयणा वि भावा मंहताणं तामिद्धिं मंहताणं संसेइ, सक्को ओहिणाणेण भरहस्स केवलणा-
णुप्पत्तिं नच्चा भत्तीए तस्स समीवं अभिगच्छेइ । भत्तिमंता हि सामिन्व सामिपुत्ते वि
आयरवंता भवति, किं पुणो संपत्तकेवलम्मि ।

इंदो बएइ-केवलनाणि ! दव्वलिगं पडिवज्जसु, जेण वंदेमि, तुम्ह य निक्कमण-
महूसवं विहेमि ।

तओ अ बाहुबलिव्व भरहेसरो पव्वज्जालक्खणं पंचमुट्ठिअं केसलुंचणं विहेइ,
तओ सण्णिहिय देवयाए उवणीअं रयहरणपमुहोवगरणं भरहो गिण्हेइ, तओ चेव देविदो
तं वंदेइ, जओ-

वदिओ देवराएण तओ य भरहेसरो । न हि वंदिउजए पत्त-केवलो वि अदिक्खिओ ॥

तइआ भरहनरिंदं सैमस्सिआ दससहस्साइं रायाणो पव्वज्जं गिण्हेइरे, तारि-
ससामिसेवा हि परलोगे वि सुइदाइणी सिया ।

अह सक्को पुढविभारवहणसमत्थस्स भरहनरिंदतणयस्स आइच्चजसस्स रज्जा-
मिसेगं कुणेइ । तओ उसहसामिणो विव केवलणाणुप्पत्तीए अणंतं सपरिच्छओ भरह-
केवली गामागर-पुरा-रण-गिरि-दोणमुहाइट्टाणेसुं धम्मदेसणाए भव्वजीवे पडिबो-
हितो पुव्वलक्खवरिसं जाव विहरेइ, तओ य अट्ठावयगिरिम्मि गंतूण भरहेसरो केवली
जहविहिं चउव्विहारपच्चक्खाणं कुणेइ, अह सो इक्कमासपज्जंते सवणनक्खत्तगए
चंदे सिद्धाणंतचउक्को सिद्धिक्खेत्तं उवगच्छेइ ।

एवं च उसहसामिम्मि पिच्छं पसासमाणे भरहेसरो कुमारभावे पुव्वलक्खणं
सत्तहत्तरिं गमेइ, छउमत्थत्तणे भगवओ पिव मंडलियत्तणम्मि वरिसाणं एगसह-
स्सं अइवाहेइ, तओ रिसहतणओ चक्कवट्ठित्तणं उव्वहंतो एगवरिस-सहस्सोणाइं

छ पुव्वलक्खाइं वइक्कमेइ, वइक्कमित्ता समुप्पण्णकेवल्लणाणो वीसाणुग्गहणट्ठं दिवसं दिण-
यरुव्व पुव्वलक्खं विहरिज्जण इअ चउरासीइं पुव्वलक्खाइं नियाउसेण अइक्कमिज्जण
सो भरहो महप्पा मोक्खं गच्छित्था । तइआ पमुइयचिसेहिं देवेहिं समं सक्केण तस्स
निव्वाणमहसवो विहिओ ।

एवं पहुपुव्वभवा, वुत्ता तत्तो य कुलयरुप्पत्ती ।
सामिस्स जम्मणं तह, विवाह-ववहार-दंसणयं ॥१॥

रज्जं दिक्खा नाणं, जिणस्स तह खेव भरहभूवस्स ।
चक्कित्तं पहुणो तह, कमेण चक्किस्स सिवपत्ती ॥२॥

एयम्मि पढमवग्गे जं, इह वुत्तं भविण्णबोहट्ठं
उदेसगाण छक्कं, हरेउ दुरियाणि तं निच्चं ॥३॥

इअ सिरित्तावाग्गच्छाहिवइ-सिरिकयंबप्पमुहाणेगत्तिथोद्वारग-सासणप्पहावग-आवाळवंब-
यारि-सूरीसरसेहरायरिय-विजयनेमिसूरीसर-पट्टालंकार-समयण्णु-संत-

मुत्ति-वच्छल्लवारिहि-आयरिय-विजयविण्णाणसूरीसर-पट्ट-

धर-सिद्धंतमहोदहि-पाइअभासाविसारय-विजयकल्हूर-

सूरिविरइए महापुरिसचरिए पढमवग्गम्मि

मरीइभव-भाविसलायापुरिस-उस-

हसामिनिव्वाण-भरहनिव्वाण-

सरूवो छट्ठो उदेसो

समत्तो य सिरिउसइसामि-भरहचक्कवट्ठिपडिबद्धो पढमो वग्गो ॥१॥

मुंवापुरीइ मज्झे, सिरिगोडीपासणाइसंणिज्जे ।

इयं एयं चरियं रस-ससि-नंह-नयणवरिसम्मि ॥१॥

जिणसासणं जयइ जा, दिणयरससिणो तहा य लोगम्मि ।

ताव भविण्ण कंठे सया वसेज्जा इमं चरियं ॥२॥



શ્રી નેમિ વિજ્ઞાન કસ્તૂર સૂરિ
જ્ઞાનમંદિરના પ્રકાશનો
અવશ્ય વસાવો

- ૧ પ્રાકૃત વિજ્ઞાન પાઠમાલા
- ૨ ગિનસ્તોત્રકોશ
- ૩ સંક્ષિપ્ત પ્રાકૃત શબ્દ—ધાનુ ચૂપમાલા
- ૪ પાર્થઅવિન્નાણ કલા—પ્રાકૃત ભા. ૧ લા
- ૫ હરિયાલી સંસ્થા
- ૬ જ્ઞેન દર્શનનું નુલનાન્મક દિગ્દર્શન
- ૭ જ્ઞાતપુત્ર શ્રમાણ ભગવાન મહાવીર

ક્રપાતા ગ્રન્થા

- ૧ અભિધાન ચિંતામણિ કોશ સભાષાંતર
- ૨ સિરિયંદસય ચરિયં
- ૩ પાર્થઅ વિજ્ઞાણ કલા—પ્રાકૃત ભા ૨ જો
બુકાકાર
- ૪ પાર્થઅ વિજ્ઞાણ કલા—પ્રાકૃત ભા ૨ જો
પ્રતાકાર
- ૫ અભિધાન ચિંતામણિ કોશ મૂળ માત્ર ગૂટકો

